


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniijia Jesucristojiniji pueyano rupaaajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-21

Contents

MATEO	1
MARCO	74
LUCAS	119
JUAN	193
MIISHANO	248
ROMA	320
1 CORINTO	353
2 CORINTO	388
GÁLATA	410
ÉFESO	423
FILIPO	434
COLOSA	442
1 TESALÓNICA	449
1 TESALÓNICA	455
1 TIMOTEO	459
2 TIMOTEO	468
TITO	475
FILEMÓN	479
HEBREO	481
SANTIAGO	507
1 PEDRO	515
2 PEDRO	524
1 JUAN	530
2 JUAN	537
3 JUAN	538
JUDAS	540
NIQUISHANO	543

MATEO NAAJIOTASANO JESUCRISTOJINIJI

Jesucristo supuetanaajiniji pohuatasano (Lc 3.23-38)

¹ Jesucristoori supuetana Abraham jihuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaariti:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Uriás niquiocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacaritij, Israel pueyapueeri quiioosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaaajinia sequeya “Pueyaso jiyarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quiioosaaquiaari Babilonia jiyajiniara. Babilonia jiyajiniara nojori quiioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano (Lc 2.1-7)

¹⁸ Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetuqueyaquishacaritia María, Maríari tariucua manajaraca quiriquiaa. Pueyaso Sohuanucuaajari na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰ Naa José niishiriojosacari na cartenura juucuatej, Pueyaso seruuri nocua muetaquiaari na maquenujinia. José sequereeri:

—Supuetana jiyaniijia David niquiohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajari na manajorucuaa. ²¹ Maríari neyanu ranutaniya. Quiocua na sesojore “Jesu”. Sesa na pueya miijiosano tuujunutaniya nojori jiuujiajinijiiri. Naaratej, na sesaari quiniutianiya “Jesu”.

²² Jesu rasaanuuri naa quiquiaariti, tariucuacaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanohua tarijiatej:

²³ “Nia tojiri. Niyacoori manajenutaniya. Neyanu ranutanitari. Na sesojonutanitari ‘Emanuel’ ”.

Nioori pueyano rupaaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaariti taa Pueyaso seru sequequiaari nojuacuajani. María riquiaariiri na tiajinara necocuara. ²⁵ Nojoriiri maja na quiniu quiquiaari juhua seetanujanaa camitioono, María jaara raquiaari neyanujaaatijia. Jaara na raquiaari, na sesojoreeri “Jesu”.

2

Niishijiaca tiuquiiijosacari conaajaacua

¹ Jesuuri rasaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niquniuria tiuquiiioquiaari jiya pajamaji.

² Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niqiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishijiaca sequesanotej, jiyanohua tacaquiaariiri. Puetunu Jerusalén tiacajinia quiniaajanaari tacaquiaarijuhuaj. ⁴ Nocuaji, Herodesri Judiocuacaacuara seconaa sequequiaari nocua nojori nijionura, Moisés Rootasanojiniji niishitiojonaanio. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiaranotej?

⁵ Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujiunia sequesano. Cuno tariucuacaanu naajiotasanocuajaari naa sequeyatej:

⁶ “Belén tiacajinia quiniaanaa, nia tiacaari maja najuhuana shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supuenutaniya. Nojuajaari socua cutara Jiyaniijiajanaa quiniutaniya tamasa jiyaniijiacajiniji Judea jiyajinijinio. Cunoori maninia jitianutaniya cua pueya, Israel pueya”.

⁷ Naa pueya sequesano na tojiniu nuhuajiti, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niquishaacanu seetanujanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoretasee cuno mueyajiniji. Naa jaara na riuriatare, niocua cua numootecuhuaja. Janiyacua nocua quiaarejaaniuhuaj cua shuquiritianura nojuaja.

⁹ Niishijiaca tojiniu nuhuaji naa jiyaniijia Herodes sequesanotej, nojoriiri quiojiya-reecuhuaj. Jiya pajamaji na niqutiushano rijia niqutiuriiri nojori puetaano. Rijiaari pootia tiuushii tia caco, tee mueya quiriquiaacuajani. ¹⁰ Nojori niquishacari rijia, niishijiacaari jiyanohua timitiuciaari. ¹¹ Tiaco tiuquitiaseeri. Conaaja niqutiushii na nucua Mariataari. Conaajaacuara mojuquetacoquiaariiri. Na shuquiritiatureeri. Na nuhuaji, niishijiacaari na patootasano casaa riataquequiaari, nareya na niqutiosocoriquiano conaaja. Nojoriiri na niqutioquiaari oro, shanohua jaanutaja catijiasocoriquianojuhuaj, tamaatiuucua shanohua jaanutajanio. Na sesaari tahue rupaaajinia

“mirra”. ¹² Na nuhuaji, Pueyasoori cuno niishijiaca sequequiaari na maquenujiniya, maja Herodescua nojori tacatenuhuara Herodes nojori pohuatanuhua conaajajiniji. Naacuajitij, niishijiacaari tamonu nucuacohua tacatequiaariuhua na jiyajinihuara.

Egipto jiyajiniara Jesu mashitiasaanujiniji pohuatasano

¹³ Niishijiaca jaara quiaquiaariuhua, Pueyaso seruuri Joseecua muetaquiaari na maquenujiniya. José sequereeri:

—¡Quia sanere! ¡Conaaja quia mashitiare na nucuata Egipto jiyajiniara! Quiniqui nia quishii, janiya cuaara sequerohua quiajanijajaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanequiaari. Cuno niucuaja, conaaja mashitiaree na nucuatajaari Egipto jiyajiniara. ¹⁵ Nojori tiuquishacari Egipto jiyajinia, tii quishiiquiaariiri, Herodes cuaara cusoorajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinijia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanohua juaaquiaari. Na pueya jiyaroquiaari puetunu naatujoori canuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuaara puecoosaaria puetunu shusha roosanojuanaa, mariyata canapuate caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. ¹⁷ Naacuajitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

¹⁸ “Sapenuuri tojishiya Ramá tiacajinia. Jiyanohua taraatia. Raquelri necohuacua sariyacojiya. Majaari na paniniu na cumanijiasaanura. Necohuari tari puecoosaarucuaa”.

¹⁹ Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujiniya, Egipto jiyajinia nojori quishacarijia. ²⁰ Na sequereeri:

—Quia sanere. Mueya quia tacaretaarohua Israel jiyajinihuara na nucuataja. Mueya monu panijiaari tari cusuunurucuaa.

²¹ Joseeri sanequiaari. Mueya tacaretaquiaariuhua Israel jiyajinihuara na nucuatajaari. ²² Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijiuhuj, Pueyasoori na niishitioquiaari na maquenujiniya, tamocora na quianura. Naaratej, Joseeri mueya nucua pacuquiaari Galilea jiyajiniara. ²³ Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujiunia sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajinijinio pueyano”.

3

Tiuquinijiona Juan pohuatasacari cariiquia jiyajinia
(Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niqiara. ² Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni pania, na muerasu nia quiniuria seetanjuanaa.

³ Jiyanoohua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeeccanami-tiri Jiyaniijia nuu, maja mojoquetunu na quiniuria’ ”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucujia.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio. ⁵ Pueyari Juancua quiojoquiaari na tojitianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuj, puetunu Jordán moo shocuaqueyajinijiniojuanaano. ⁶ Pueya jaara pohuataquiaari Juan niquiara sesa nojori miiijosano, Juanri nojori tiuquinijioquiaari Jordán moojinia, Pueyaso tojijiaara nojori quiniu panishacari.

⁷ Na tiuquinijosacari pueya, Juanri queraatia Fariseocuaca niquiquiaari nocua ni-jiyano, Saduceocuacanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucujia nijaniyani? Nio pa quishacarini, quera Pueyaso sani-itionosacari jiyanoohua na ruuretajaca pueya. ⁸ Niaa jaara seetanjuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jiyaniniu niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijuhuj. ¹⁰ Nio miriqui sequesano nia tojirijuhuj pueyanaa. Naana jaara maninia jajau muetuyaquiri, na camaruuri na nuya na catijiasocoriquiano. Naajuhuj, Pueyasoori quera saniitionutaniya nijaniya, na tojiyashijia nia quiniuucua.

Tiuquinijiona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriquiano cutara. Nojuajaari jiyanoohua socua jiyaniijiajanaa janiyajiniji. Janiya maara jiyanoohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijiajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Nia jee-quentaniyajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiy-ocuacaanuji na totinijiasocoriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuj, cua nuhuaji niniaari tariucua pueca, na tojitianaa na rijionura na quiquiojiniaara, saniniuujia na tojiyashijia na quejionura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeri:

—Cua tiuquinirijia.

¹⁴ Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequerejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiniquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riateguee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri.

¹⁷ Jiyacaritij, jiyocuacaanuji Pueyaso rupaari tojishaaree naa sequeyano:

—Nioori cua Niyanuniyojua. ¡Na shuquiritiaa jiyanoahuanijia!

4

Samaruhua jiyaniiija saniniujiushacari Jesu

(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujiuniuria. Jesu sequeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucuaaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocuaaja. Seetanujuanaa saminio quiya cutaraari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuuri, Pueyaso Secojojua tia cacojiria. ⁶ Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucujaj”.

⁷ Jesuuri na riucuaaree:

—¡Maja! Pueyaso Rupaajinia, naa naajiotasanoori quiyajuhuj:

“Maja quia saniniujiuniu quia Jiyaniiija Pueyaso”.

⁸ Na nuhuaji, Sesaacaari Jesu tacaniquiaari socua jiyanoehua jiyaconaja tuhuananuucua. Cuniquiji na niquitirii puetunu jiya jiyaniijiacajanaari. Jiyanoehua cumaacaraca quijiaca. Jiyanoehua queraatia casamiriaca quijiacaajuhuj. Jiyanoehua maninia niquishano. ⁹ Jesu sequereeri:

—Janiyacua quia jiyatere jiyaniijiajanaara nojori nitini, quiaa jaara cua cariquimijaji mojoquetare quia shuqiritianura janiya, quia jiyaniiija cua quiniuria.

¹⁰ Jesuuri na sequereere:

—¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniiija Pueyaso quia shuqiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu coteesacari poonijionu Galilea jiyajinia

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacuajinio supueno pueya jiya, Neftalí niquiohuacuajinio supueno pueya jiyanio. Zabulón, Neftalíno, nojoriiri supuetana Jacobo niquiohua quiquiaari. ¹⁴ Jesu quishacari

cuno jiyajinia, naa tohuateequiaariiri taa tariucuacaanu Pueyaso sequesano caminiujiunia Isaías pohuataquiaari cuno jiyajinijicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵ “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani. ¹⁶ Cuno jiyajinia quiniaari ninishiqui quijiaca quiquiaari. Quiarijia saniniuujia, nojoriiri jiuujia Cuhuatana niquiriucuaa. Nojoriiri cusonu pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniuucujaji”.

¹⁷ Jiyacaritij, Jesuuri Pueyaso rupaa pohuatanu coteequiaari. Naa sequequiaariiri: —Nioojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa
(Mr 1.16-20; Lc 5.1-11)

¹⁸ Jesuuri Galilea caminia shuriuquioco rucuanajoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijiuhuaaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroortariquiaa. ¹⁹ Jesuuri nojori sequere:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

²⁰ Nojoriiri na shiyaru tiujiaquiaari ritia. Jesuta quiojiyareeri.

²¹ Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequere Juannio, na pueyara nojori quiniuriajuhuaj.

²² Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya
(Lc 6.17-19)

²³ Jesuuri puetunu Galilea jiyajiniajanaa rucuanajoquiaari na saquiriojosano puey-ata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiitiacojuajanaa naatanijioquiaariiri. Puetunu nootunejaca puey-ajanaa shaataquiaarijiuhuaaj. ²⁴ Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhuaajanaa, puetunu tamaatia cusonu jiitijacajanaanio, cumatacuruhuana cusosuhuaajuhuaaj, nootunejacanio. Nocua jiyatasaaquiaarijiuhuaaj samaruhuaraca quijiaca, canashiyaquiji cusojonuujucanio. Jesuuri nojori naatanijioquiaari puetunujuanaa.

²⁵ Jiyanohua queraatia pueyari Jesu nuhuajiquiaari Galilea jiyajiniji, Decápolis tiacajininio. Na nuhuajiquiaarijiuhua Jerusalén tiacajininio, Judea jiyajininiojuhuaj, mariyata Jordán moo taquijiria jiyajininio.

5

Jesu pohuatasacari Pueyaso rupaa tuhuananujiniji
(Lc 6.20-23)

¹ Jesu niquishacari jiyanohua queraatia pueya nocua niyano, nojuajaari tuhuananucua tacaquiaari tiji na cajiniuria. Na saquiriojosano pueyari nocua catecanoquiaari.

² Jesuuri nojori niishitiojonu coteequiaari. Naa na pueya sequereeri:

³ —Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriquiano, pueyaracaanu na jiitianura nojori.

⁴ 'Shuquiriaatia quijiaca cutaraari noo pojori canapuete taraatia quiyani sesa na miiniuucua. Pueyasoori nojori cumanijianutaniya.

⁵ 'Shuquiriaatia quijiaca cutaraari noo pojori, canapuete maja tama nerajaaja ni-ishiriojojuacani. Nojoriiri nio jiya camaruhua quiniutianiya, taa Pueyaso sequequiaar-icuajani.

⁶ 'Shuquiriaatia quijiaca cutaraari noo pojori, canapuete maninia quiniuucua jiaatiaa jiyano huani, taa pa jiaatiaacuaa miaquenuucua. Pueyasoori maninia quijiacara nojori jiyatenutaniya.

⁷ 'Shuquiriaatia quijiaca cutaraari noo pojori, canapuete naquiya miishanoocua taraajejani. Pueyasoori nojoriicua taraajenutaniyajaacuhuj.

⁸ 'Shuquiriaatia quijiaca cutaraari noo pojori canapuete maninia jiuujiaracani. Nojoriiri Pueyaso niquniutianiya cutara.

⁹ 'Shuquiriaatia quijiaca cutaraari noo pojori, canapuete pueya jiyanootejani. Nojoricuajaari Pueyaso muerasu quiniutianiya.

¹⁰ 'Shuquiriaatia quijiaca cutaraari noo pojori, canapuete naquiya miishanoni, Pueyaso panishano nojori miiniuucua. Pueyasoori nojori jiiitianutaniya pueyaracaanu shuquiriaatia, na muerasu nojori quishacari.

¹¹ 'Shuquiriaatia quijiaca nijaniya, tamasaca jaara nia macaatiri cua tojitiajaca nia quishacari, naajuhuj, nojori jaara miya naquiya nijaniya. Naajuhuj, niaari shuquiriaatia quijiaca, nojori jaara saquiriojotare niaacuara na sapojonuta, maninia nia tojiniuucua janiya. ¹² Niaa jaara naa miishaaretej, jiyano hua nia timiquiore. ¡Shuquiriaatia nia quirijiuhuj! Pueyasoori cunora jiyano hua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuni-aacuaajaari naa naquiya miishaaquiaarijiuhuj, nia supueyaquishaacarijiyojua.

Pueyaso muerasuuri juhua shoni quiya mijiria, juhua ninishiqui cuhuatanaajuhuj (Mr 9.50; Lc 14.34-35)

¹³ 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriiquia jatama, ¿maatucua taa tiquiriiquiara quiriuhuani? Maja na naata. Shoni jaara naa quiriritij, najuhuana quiyari, shaaca. Jiyano shoni cuara jataaaria nuujinia, pueya rapijosocoriquiano.

¹⁴ 'Naajuhuj, niaari juhua ninishiqui cuhuatana mijiria quiniaara. Tiaca jaara tuhananuucua quiri, majaari na naata na jamaaniu. ¹⁵ Naajuhuj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia nocuaji. Majaari samaritiu niatasaanu conatu cariquiaco. ¹⁶ Naajuhuj, nijaniya cuara maninia miiria pueya niqiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari jiyocuacaanu Quijia nia Que Pueyaso maniniuuaqueetanutaniya.

Jesu niishitiojosanoori tariucuacaanu Moisés Rootasanojiniji

¹⁷ 'Majaari nia jiyaniniu janiyari niqiaarini Moisés Rootasano cua tarinitiniuria nijaniya, Pueyaso sequesano caminiujiuniaa rootasanonio. Maja. Niqiaari cutaranijia puetunu cuno rootasanojuanaa cua tojiniuria, cua tohuateenurajuhuj. ¹⁸ Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari que-naaja niquiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotesaanojuanaa cuara tohuateerejaatijia. ¹⁹ Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua

rerequetesano quiniutianiya puetunu narta Pueyaso muerasujiniijianaa. Saniniuujia, cante tariucuacaanu Pueyaso rootasano tojiquiaanijia, na niishitiojoquiaa tamasaca-jaarihuaj, cuno pueyanoori socua tojishano pueyano quiniutianiya Pueyaso shuriucua jiyocuacaanu. ²⁰ Nia numooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria
(Lc 12.57-59)

²¹ 'Niaacuajaari tojiquiaari taa pa supuetanaa sequesaaquiaaricujani: "Maja monu. Cante pueyano monani, nojuajaari nequesoreesaanutaniya". ²² Janiyari saniniuujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuj, cante narta pueyano saarijiojuani, cunoori nequesoreesaanutaniya jiyani-ijianucua niquiara. Naajuhuj, cante narta pueyano sesacareeni, cunoori quera jatashiya mani quiquiojinia, pueyaracaanu saniitiosocoriquiano.

²³ 'Naacuajitij, nia niquitionu panishacari Pueyasora nia casaa, niaa jaara jiyacari niishiqui, quiaari quiarta pueyano juaatiriucuaa quiocuara, ritia quia tiujiare cuniqui quia niquitiosocoriquiano Pueyasora, catijijaja shuriucuan. ²⁴ Quiarta pueyanota quia jiyanootiocoocuara coteenu. Na nuhuaji cutara quia naata niquitionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatare ritia nojuaja, taa quia miiniutianiyani na jiyanooniuria quiajaniya. Ritia nia jecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojuacamarnu saniniuujia. Nojuajaari quia nujuatenutaniya nujuatejojuajinia. ²⁶ Seetanujanaa nia sequeyanijia, majaari quia tohuatanu quiniutianiya, quiaa cuaara niquitiorejaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajicua pa jiaatiaaquiniuria

²⁷ 'Niaacuajaari tari tojiquiaari nio tariucuacaanu rootasano: "Maja tamonu niquiocua numuetucunu". ²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jiyanoohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatere. Quiajanijara socua maninia cutaraari namijijiu quia quiniuria, maja quia jatasaanura mani quiquiojinia puetunu quia cuaqueyatajanaa. ³⁰ Naajuhuj, quia miaquetajara quia numatu jaara quia miitiri sesa, quia jiyatarenoj. Tucuacaanu quia jatere. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua
(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijiuhuj:

—Pa supuetanaari naa rootasaaquiaarijiuhuj: "Pueyano jaara necocua cartere, maaji cuaara niquitiosaaria naajionee, pueya niishiniuria neyacaqui na carteree".

³² Janiyari saniniuujia nia sequeyanijia, pueyano jaara necocua cartere, sesa miya Pueyaso niquiaraari. Naacuajitij, na cartesano maajiiri tamonuta quiniutianiya na

nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitijosano maja pa sapojonura

³³ 'Niaari tarijia tojtiaquiaari taa pa supuetanaa rootasaaquiaarini. Naa rootasaaquiaariiri: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocuaajaari niishiya majaari cua sapojonu' ".
³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere "jaa". Jaara seetanujuanaa quiyaquiri nia sequesano, saaja nia sequere "maja". Majaari nia sequesano nia maatenu najuhua naatej: "¿Janiyate sapojonuaari? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵ Naajuhuj, ¿casaara nia sequequiaa najuhuanani: "Cua sequesanoori juhua pa jiya? Majaari na shaajenu quiniutianiya". Maja naa sequenutej. Pa jiya, cunoori Pueyaso niaja na nioluaca. Naajuhuj, ¿casaara nia sequequiaani: "Cua sequesanoori juhua Jerusalén tiaca? Pueyaracaanu quiniutianiyari". Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuj, ¿casaara nia sequequiaa naa najuhuanani: "Quia naataari cua sequesanoocua tiuuniu, cua naca quishacarijia"? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio. ³⁷ Naaratej, pueyaracaanu saaja seetanujuanaa nia sequere "jaa", "maja". Cante na sequesano maatejani, cunoori Sesaaca niishitijosano niajaniya.

Jesu niishitijosano maja pa naminiuria (Lc 6.29-30)

³⁸ 'Niaacuajaari tari rootasaaquiaari: "Pueyano jaara tamonu pueyano namijia cocuartare, na namijia cuaara cocuartasariajuhuj, pueya nequesorenaa niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuj". ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqutiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuaaanu na sequesanojiniji. ⁴² Tamonu pueyano jaara quia casami masenu paniya nera, quia niqutiore nareja. Naajuhuj, tamonu pueyano jaara quia casaa panu paniya nareja rupaquijiara, quia niqutiore. Majaari na ruuretenu. Capora quia quiri.

Jesu niishitijosano pa paraca pa paniniuria (Lc 6.27-28, 32-36)

⁴³ 'Niaacuajaari nio tariucuaaanu sequesano tojtiaquiaarijihuaj: "Quia shuriucua quinia quia paniri. Saniniuujia, majaari quia paraca quia niquiniu". ⁴⁴ Janiya cutaraari nia sequeyani, nia paraa nia paniri. Nia sesacaja pueya nia maninihuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuj. ⁴⁵ Naa maninia nia miishacarij, niaari seetanujuanaa jiyocuaaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na

janurajuhuaaj. Pueyasoori maru nitiquiaa maninia miijiaca pueyara, sesa miijiacara-juhuaaj, maninia nojori nataacuaca moritianura. ⁴⁶ Naa jaara saaja nia panijiaca pueya panijia quiriquia, ¿Pueyasoteeri cunora nia shuquiritianutaniya, socua na casaajiniji na niquitionura niajaniya? Maja. Sesa miijiaca pueyani, noo pojori canapuate cumaneeca masejoquiaa na sapojonutani, nojoriiri maninia miiquiaa na panishano pueyajuhuaaj. ⁴⁷ Naa jaara saaja nia panishano pueya saruhuataquiaa, ¿niaateeri cunora maninia miijiaca quiya Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhuaaj. ⁴⁸ Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niquiara

¹ Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura niajaniya. Pueya jaara nia maniniuhuaque-etare maninia nia miiniucua, nia Que Pueyasoori maja na niquitionu quiniutianiya niajaniya socua, maninia nia miiniucua. ² Naaratej, naa jaara casamiijiuniucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacajuhuaaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. ³ Saniniuujia, naa jaara nia casaajiniji casamiijiuniucua niquitionu paniri nareja, quia mueneca cuara niishiyaquiiria quia niquitiosano quia miaquetajata. ⁴ Naa miriqui sequeree niajaniyanijia cua niishitiojonura niajaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacua-jaari nia niquitionutaniya na casamijiniji, na shuquiritiasacari niajaniya.

Jesu niishitiojosano naa pa secojonura Pueyaso (Lc 11.2-4)

⁵ Naa secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na njuanuta pueya niquiara, saaja pueya shootianura nojori. Nojoriiri naa secojonuuquiaa Pueyaso secojojua tiacajinatej, tiaca nuucuajiniajuhuaaj, tee queraatia pueya quiyacujani. Seetanujuanaa nia sequeyanijia, cuno pojoriiri tari maniniuhuaqueetasaarecuaja. Jiyano pueyatej, majaari nojori masenu quiniutianiya socua Pueyasojiniji. ⁶ Niajaniya saniniuujia, nia secojosacari Pueyaso, nia sohuacamara nia tiuquiri. Naa tiotiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Naa Que Pueyaso niquishacari naa jiyasohuaja nia miishanotej, nojuaja cutaraari nia niquitionutaniya na casamijiniji, na shuquiritiasacari niajaniya.

⁷ Naa secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸ Majaari juhua nojori nia miiniu. Pa secojiyaquishaacarijijojua, pa Que Pueyasocuaajaari tari niishiya casaa pa paniyani. ⁹ Naaratej, naate nia secojore:

“Canaa Quena, quiaa cutaraari jiyocuacaanu Quijia. Pueya cuara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jitianura. Quia panishano cuara miishaaria mijiria, taa jiyocuacaanu na miishaaquiacaani.

¹¹ Canaa quia niquitiore canaa miaquesocoriquiano quiarijiani. ¹² Canaa quia

jiyanoori sesa canaa miishanojiniji, taa canaa jiyanooquiaa tamasacacuaani, sesa nojori miishacari canaa. ¹³ Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaa-caacuaji. Saaja quiajaniya cutaraari seetanujuanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaja”.

¹⁴ 'Naatej, niaa jaara jiyanoori tamasaca, sesa na miishacari niajaniya, nia Que Pueyasoori nia jiyanooniutianiyajuhuj. ¹⁵ Saniniuujia, niaa jaara tamasaca jiyanooy-aquiri, nia Que Pueyasoori maja na jiyanooni quiniutianiya niajanijajuhuj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶ 'Niaa jaara miaqueyaquiya Pueyaso nia secojonura, majaari macuhajeconu pueya niquiara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. ¹⁷ Niajaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. ¹⁸ Naa nia miiri Pueyaso nia secojosacari, maja pueya niishiniuria cunogui miaajeya. Saaja pa Que Pueyaso cutara cuaara niishiiria nia miishano. Naacujitij, nojuajaari nia niqitionutaniya na casamijiniji na shuqiritianuucua niajaniya.

Pa casami pa racatare jiyocuacaanu Pueyaso shuriucua (Lc 12.33-34)

¹⁹ 'Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajariuhuj. Nohuasenuujuacaari nocua tiuquiniutianiya na nohuasenura. ²⁰ Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejojuuari maja na naata nocua tiuquiniu tii, jiyocuacaanuji nia casami na nohuasenura. ²¹ Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

Pa cuaqueyajinia cuhuatanajiniji pohuatasano (Lc 11.34-36)

²² 'Pa namijiaari juhua poojia cuhuatana. Naacujitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. ²³ Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyajuaru pueyanojiniji.

Pueyaso panijia pa quiri, maja cumaneeca panijia (Lc 16.13)

²⁴ 'Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu paniyaquiniutianiyacujua. Naacujitij, niaari shuquiriaatia poonijionutaniya nia panishano camarnura. Niaari tamonu sojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

*Pueyaso na muerasu cojuaja
(Lc 12.22-31)*

²⁵ 'Naaratej, nia sequeyanijia, maja puera nia niishiriojonu casaa nia miaquenu-taniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa mi-aquenu panishano, pa cushiniu panishanonio, maninia pa rishiniuria? Taaquiririniij. ²⁶ Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniiji. ²⁷ ¿Nia naatate socua jiyaconajara maashiniu, jiyanoehua nia tacaaniutia? Maja.

²⁸ 'Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitiajara shitianujuhuj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanoehua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniiji. ³⁰ Naana shuuri saaja rupaquijia shanohua niquishano. Jaara sorere, namitiashiyari catijasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijasocoriquianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasocuaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani? ³² Pueyaso niishiyashijiacaari naa sequejacatej, puera nojori tacaashacari puetunu na panishano casaacuajanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojijara nia quiniuria cutara. Pueyasocua nia niqutioiore puetunu nia panishanojuanaa. ³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucujaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

7

*Majaari quiarta pueyanoocuara soqueto nia quiniu
(Lc 6.37-38, 41-42)*

¹ Maja niarta pueyano nia soquenu najuhuanaj, Pueyaso mariqui nia jiyanoyaquiriji-aariuhuj. ² Taa nia sesacaquiaa tamasacacuaani, niaari naa sesacasaanutaniyajuhuj. Naatej, taa nia miiquiaa tamasacacuaani, Pueyasoori mariyata naa miiniutianiya nijaniyajuhuj. ³ Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jiiitiaa tama nia namijiajiniajaaja cutara? ⁴ Maca nia jiiitiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵ Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeeicare coteenu, na nuhuaji cutara niocua maninia nacasure niarta pueyano.

⁶ Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojijashijiacaari nia tojijaquiniutianiya, naatej taa tamonu pueyano sare tojijaquiquiaa nijaniyacuaani. Majaari Pueyaso soojeaca nia pohuatanu Pueyaso miishano

shanohua niajaninyara. Nojoriiri saaja rerequetenutaniya Pueyasojiniji nia pohu-atasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej
(Lc 11.9-13; 6.31)

⁷ 'Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacua-jiiri riatasaanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuriatanutaniyari. Cante tohuateyaji piquijiani, nocuajiiri riatasaanutaniyajuhuj.

⁹ 'Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹ Niajaninyari sesa miiniu niishijiaca. Naajaa, niaacuaajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoahua socua maninia niqutionu niishijia, na muerasu secojosacari nojuaja.

¹² 'Pueyaracaanu maninia nia miiri tamasaca, taa nia paniquiaa pueya miiniuria niajaninyacuajani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiuniaa rootasanonio.

Pueyasocua nuuri secanuniyojua
(Lc 13.24)

¹³ 'Pueyasocua neteja nuu nia pajere, shiitaniyojua nuuri tuneja. Saniniuujia, puereetuca nuuri neteya mani quiquiojiniara. Puereetuca na tuneja. Puereetu- caari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano. ¹⁴ Saniniuujia, shiitaniyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoahua shiitaniyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji
(Lc 6.43-44)

¹⁵ 'Tama nia cuaqueyajaaja nia cojuare sapojonuujuaacuajia, noo pojoriicuajia canapuate najuhuaana sequejacuajani: "Pueyaso Rupaa pohuatananjia". Nojoriiri sapuenu juhua maninia pueya niquishano, nojori sapojonura niajaninya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohujaru? Maja. Naajuhuj, cuno sesa jiuujiaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuj, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijasocoriquiano. ²⁰ Naacujitij, niocua cuno sapojonuujua pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya
(Lc 13.25-27)

²¹ 'Cuno pojori canapuate cua sequejacani: "Cua Jiyaniijianaa, cua Jiyaniijianaa", noojiaqueya nojoriijinijinoori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojitiajaca cutaraari nocua tiuquitianu- taniya. ²² Cua nequesoresacari pueya nio jiya puequesacari, queraatia pueyari

cua sequenutaniya: “Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhuj, canaari cusosuhua naatanijioquiaarini quia sesa canaa jyaniquishacari”. ²³ Janiyari saniniuujia naa sequejaca riucuanutaniyani: “Maja cua niishiniu niajaniya. ¡Nia quiojorohua! Niaari saaja sesa miijiaca quiquiaari”.

Jesu tojtiajaca miishanoori pueyaracaanu rishiniutianiya cutara
(Mr 1.22; Lc 6.47-49)

²⁴ Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jyanohua niquiaari. Moori pajaashiquiaari. Paratuuri jyanohua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquiajiniya tiaquiaari. ²⁷ Maruuri jyanohua niquiaari. Moori pajaashiquiaari. Paratuuri jyanohua piyarojoquiaari cuno tiaacuara. Cuno pueyano tiaari pojotaquiaari. Na camaruuri jyanohua taraatia quiquiaari na tia pojotasacari.

²⁸ Jesu jaara niishitiojonu puecaquiaari, pueyari jyanohua jiuujiateriquiaa na niishitiojosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiojosacari juhua jyanijiajanaa, maja juhua Moisés Rootasanojiniji niishitiojona. Cuno pojoriiri nareja tariucuacaanu rootasano caminiuuiuquiaari pueyaraaanu.

8

Jesu naatanishacari sesa cusonu jiitiaja
(Mr 1.40-45; Lc 5.12-16)

¹ Jesu jaara tuhuananujiniji rosequiaariuhua na cojiniaata, jyanohua queraatia pueyari na nuhuajiriqiaa. ² Tamonu pueyano cusosuuri jiyacari Jesuucua catecanoquiaari. Jyanohua sesa cusonu jiitiaquiaariiri. Tahue rupaaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiiatasacari. Cusosuuri Jesu cariquimiaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajaniya quia naata cua cusonu cushiritiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

¡Jiyacaritij, ritia cushiriiquiiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jyanijia quia cuaqueya quia niquitiri, na cartenura quiajaniya, pueya tajinia quia rucuanenonuhua juhuajaniya. Na nuhuaji, ritia quia niquitiore quia seru Pueyasocuara catijasocoriquiano. Naa quia miiritij taa Moisés niishitiojquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

Jesu naatanishacari Romano capitán seru
(Lc 7.1-10)

⁵ Jesu jaara tiuquiquiaariuhua na pueyata Capernaum tiacajinihua, Romano soldadohua jyanijiaari Jesuucua niquiaari na secojonura Jesu. ⁶ Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanoehua naquiya miya na noonutaari.

⁷ Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸ Soldadoehua jiyaniijaari na riucuaaree:

—¡Maja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuara shaateera tamajaaja. Niishiyacuajaniija, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiquiaanijia. Naajuhuj, cua soldadohuari cua tojitiaquiaajuhuj cua sequesacari nojori. Naacuaajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuara niiria, cunoori ritia niya cucua. Janiya jaara cua pataaco seru sequereni cuara miiria cua panishano, na miiquiaari. Cua sequesano jaara naa tojishaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquiniu quiquiaa Pueyasocua tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuacaari Pueyasocua tiuujiaa quiniutianiya juhua nio tahue. Nojoriiri tucuacaanuji nijionutaniya pananu muetasamaji, pananu tiuquishocojiiuhuj. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaac-tajuhuj, Jacobotanio. ¹² Parta Israel pueya, canapute Abraham jiniuanucujinijio supuenoni, nojoriiri saniniuujia tamocora quejoosaanutaniya ninishiqui, nojori tojitiaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutanitari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanucujinijio nojori quishacari.

¹³ Na nuhuaji, Jesuuri cuno soldadoehua camarnu sequequiaari:

—Quia tiajinia quia quiaarohuaqui. Cuara quiiriaqui taa quia sequereecuajani. Jiyacaritij, na seruuri ritia naataquiaariuhua.

Jesu naatanishacari Pedro reyarucua
(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya
(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhuj. ¹⁷ Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujuanaa na jatanura”.

Tamasaca pueya quiniu panishacari Jesu pueyara juucua
(Lc 9.57-62)

¹⁸ Jesu jaara jiyanoehua queraatia pueya niquiquiaari na shocua maano, na pueya sequereeri:

—Caminiya taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequeree:

—Niishitiojonanaa, janiyari quiata quianu paniyani. Janiyacua quia tarajareni puetunu tiqiyocujanaa quia rucuanajosacari.

²⁰ Jesuuri na riucuaaree:

—Quioojuapue cutaraari na raa jiitiaa. Shuhuari na jesuhua jiitiaajuhuaaj. Saniniuujia, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetujuarani.

²¹ Tamonu Jesu pueyajinijinoori Jesu sequeree:

—Cua jiyaniijianaa, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

²² Jesuuri na riucuaaree:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³ Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu coteequiaari nojori niuutiasacari. Jiyanhua piyarojoriquiaari. Caminiaari jiyanhua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucujasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

²⁶ Nojori riucuaareeri:

—¿Casaara nia pueretiuyani? ¿Majateeri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojoriijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhuaaj!

Jesu tohuatanishacari samaruhua, caapiqui pueyajiniji Gadara jiyajinia

(Mr 5.1-20; Lc 8.26-39)

²⁸ Jesuuri na saquiriojosano pueyata tiuquiiioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaquiji. Nojoriiri samaruhuaraca quiquiaari. ¡Jiyanhua pueya pueresano! Cuno nucuaco, majaari pueya rucuanenu quijia, cuno pojori na puerenuucua. ²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuuriquiaa. Jiyanhua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secjoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

³² Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tajojinijiiri. Cushiyari tii shushiniuushii.

³³ Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquiiijosacariuhua, pueya niquiara pohuatatuquiaari cushiyajiniijiiri, samaruhuaraca pueyajiniinio. ³⁴ Naaratej puetunu pueyajanaari cuno tiacajiniiji nijioquiaari Jesuucua. Nojori niquishacari Jesu, na sequetureeri nojori jiyajiniiji na quianura tamaqui.

9

Jesu naatanishacari cumatacuruhuana cusosu (Mr 2.1-12; Lc 5.17-26)

¹ Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niuutiaquiaariuhuari tama na tiacajiniarajaaja. ² Tii nojori tiuquiiijosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanohua nocuani, cusosu sequereeri:

—¡Quia shuquiriri sanajanaa! Quiaacujaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojitiariquiaa. Nojoriiri tama noojiajiniajaaja niishiriojonuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanohua sacuaraatia!”. ⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? ⁵ Seetanujuanaa, pueyano maja na naata jiyanooni pueya miishano sesa. Naajuhuj, majaari na naata tamajaaja pueya na naataniniu. ⁶ Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niquitiushacari Jesu miishano, puetunu pueyajanaari shiriiquitiuquiaari. Nojoriiri Pueyaso maniniuhuaqueetaquiaari pueya na niqutionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria (Mr 2.13-17; Lc 5.27-32)

⁹ Jesu quiasacari cuno tiacajiniiji, tamonu pueyano niquiquiaari cajiyanoori cumaneeca masejojuajinia Romano jiyaniijiara. Na sesa quiquiaari Mateo. Nojuacujaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tiajinia na miaquenura, na pueyajuhaaj. Naacuajitij Jesuuri cua tiajinia tiuquitiuquiaari miaquenura. Queraatia cuarta cumaneeca masejonaari canaa cojiriqiaajuhuj, queraatia noo pojorijihuj, Fariseocuaca jyaniquitiushano sesoriquia pueyatatej. Puetunu canaajanaari Jesuta miaquenuuriquiaani. ¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatatio?

¹² Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa miijiaca pueyari

cua paniya nojori cua jiyanooniuria sesa nojori miijosanojiniji. ¹³ Niaa cuaara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacarijij:

“Niaacuajaari nia seya catijiaquiaa cucuara. Maninia juhuari nia taraajenura tamasaacua. Cuno cutaraari cua shuquiritiasano”.

Naara niquiaarinijia nia sequesano sesa miijiaca cua jiyanooniuria sesa nojori miis-hanojiniji. Maja cutaraari mijiria cua niniu quiquiaari maninia pueyacu.

Pueya nequesotasano casaara Jesu pueya tarinitiaaquiQUIA quenaaja miaquenuni
(Mr 2.18-22; Lc 5.33-39)

¹⁴ Tiuquinijona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiQUIA quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miiquiaacuani.

¹⁵ Jesuuri nojori riucuaaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶ Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaaere toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenu-taniya. ¹⁷ Naajuhuaaj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuaana nia niitianura uva caaca. Naajuhuaaj, majaari na naata cua niishitiojosano cojitishaanu tariucuacaanu niishitio-josanota. Cua niishitiojosano nia tojitiare cutara.

Caapiqui maajipohua naatanijosacari
(Mr 5.21-43; Lc 8.40-56)

¹⁸ Jesu pocuasacarijia, nocua niquiaariiri Pueyaso secojojua tia camarnu. Jesu cariquimiaaji mojuquetaquiariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishianijia quiaa jaara niare nocua quia juaashiquia, samiitianutaniuhuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaarejuhuaaj. ²⁰⁻²¹ Canaa quiasacari, tamonu maaji cusosuuri Jesuucua cate-canoquiaari jiyasohuaaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishirio-joriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohuaaja. ²² Jesuuri na nijiniara tacate-quee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacarijij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniuyanonio. ²⁴ Jesuuri cuno pojori sequereeri:

—¡Niiquiji nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaseeri. ¡Maaji samiriuuri sanemaa! ²⁶ Naa Jesu miishanojinijiiri pohuataaaquiaari puetunu cuno jiyajiniajanaa.

Jesu jeecasacari caapiqui cariojuaru namijiaa

²⁷ Canaa jaara tohuareetaquiaari cuno tiajinijini, caapiqui cariojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuaana Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaaja!

²⁸ Canaa tiuquishacariuhua canaa quijia tiajinia, cariojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucuatereeri:

—Jaa, jiyaniijianaa. ¡Quia naatacuaaquiniatejaj!

²⁹ Jesuuri na juaashiquia niaree nojori namijiaacua. Jesuuri cariojuarujuri sequeere:

—Cucua nia tiuuniucua, cuara quiiria taa nia sequereecuajani,

³⁰ Cuno pojori namijiaari maniniuiaacara quiquiaariuhua. Jesuuri jiyanohua nojori rootaree:

—¡Majaari tamasaca niquiara nia pohuatanu cua miishano!

³¹ Na tohuareetasacari, cuno cariojuarujuriiri ritia pohuatanu coteequiaari Jesu miishanojiniji. Naacujitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj.

³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanohua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacujitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jiyanooni panija nojorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejaciono.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriojosano pueya sequequiaari:

—¡Nia niquiri! Jiyanohua queraatia pueya. Cuno pojoriiri juhua puereetuca sucohua. Saniniuujia, secajaari na senoonaa. ³⁸ Nocujia nia sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

10

Jesu saquiriojosacari doce pueya na jiyaramiquishocoriquiano (Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojini-
uria, canaa na jiyaramiquiyaquishacarijia. Jesuuri canaa niqutioquiaari na cumaaca,
samaruhua canaa tohuatanijionura, cusosuhua canaa naatanijionura, puetunu noonu-
juanaa canaa shaatanurajuhuj.

² Nioori canaa sesaca, na jiyaramiquishocoriquiano pueya sesacani: coteenuuri
quiquiaari Simón. Pedroori na sesa quiquiaarijuhuaj. Pedro tarajanu Andrésri
quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri
Zebedeo niqiohua quiquiaari. ³ Felipeeri quiriquiaajuhuj, Bartolomé, Tomásnio.
Quiriquiaajaariuhua janiya Mateoni. Janiyari tarijia quiquiaarini cumaneeca mase-
jojua Romano jyanijjara. Quiriquiaajaariuhua socua tamonu Santiago. Cuno San-
tiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri
quiquiaari Tadeo. ⁴ Quiriquiaajaariuhua Simón. Nojuajaari Cananeo pueya maanujini-
jinio quiquiaari. Judas Iscarioteeri quiriquiaajuhuj. Nojuajaari Jesu quiateriquiano
quiquiaari mosocoriquiano.

Jesu rootasano na pueya na jiyaramiquiyaquishacarijia (Mr 6.7-13; Lc 9.1-6)

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura.
Coteenu, canaa rootaquiaariiri, canaa na jiyaramiquiyaquishacarijia. Naa canaa
sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu Samaria
pueya tiacajinia. ⁶ Saaja parta Israel pueyacua nia quiaare cutara. Nojoriiri juhua
borregohua tashuquioonu quiya. ⁷ Nojori niqiuara nia pohuatare puetunu tiacajinia-
janaa. Nojori nia sequere: “Pueyasoori quiarjia nia jitianu paniya, niaa jaara na rupaa
tojitiajacara quiri”. ⁸ Cusosuhua nia naatanijiore. Macunucua nia samiitianijiore.
Canapuate lepra cusonu jitianu, cuno cusonu nia shaajare pueya cuaqueyajiniji.
Samaruhua nia tohuatanijiore pueyajiniji. Niaacuajaari nio cumaaca maseree nareja.
Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua
toqueya nia panu, sapatunio. Saa nia cushishanotaja nia quiaare. Majaari nia panu nia
mijotu. Nia naacutasano pueya cuaara niqutioora saniniuujia nia panishano.

¹¹ Nia rucuanijosacari, niaa jaara tamonu tiacajinia tiuquishii, nia nequesotare tee
maninia pueyano quiyani. Cuno pueyano tiajinia nia jiyojetare, niaa cuaara cuniquiji
quiaarejaatijia. ¹² Niaa jaara tamonu tiajinia tiuquishiiquia, pueya nia sequere naatej:
“Pueyaso cuaara nioojia cajitiiria”. ¹³ Cuno tiajinia quiniaa jaara maninia pueya
quiri, juhuajaniya quiniutianiyari taa nia sequereecujani. Nojori jaara Pueyaso
tojiyashijaca quiri saniniuujia, nojori jiuujiacaari cajitiyaquishaanutaniya. ¹⁴ Tamonu
tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca
nojori quiniucua, nojori niqiuara nia niohuacaacuaji nia rapijiotare jiya joocua.
Naacuajitij, cuno pueyari niishiniutianiya Pueyasoori nojori jyanoyaquiniutianiya,
nojori maseyaquiniucua na rupaa pohuataanaa. Naa nia miirijuhuj cuno tiaca
pueya niqiuara, cuno pojori jaara Pueyaso rupaa tojiniu paniyaquiri nia pohuatasacari.
¹⁵ Seetanujuanaa nia sequeyanijia, jiya puequesacari, cua nequesoresacari pueya,
cuno pueyari jyanohua saniitiosaanutaniya socua Sodoma tiaca pueyajiniji, Gomorra
tiaca pueyajinijio.

Pueyaso rupaa pohuataanaari naquiya miishaanutaniya

¹⁶ 'Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya niajaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasa pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸ Cua rupaa nia pohuatanucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhua. Naajaa, naacujitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio. ¹⁹ Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaaja maninia nia riucuanura. ²⁰ Naacujitij, nia riucuanoori maja tama niajaniyajinijijiaaja quiniutianiya. Pueyaso Sohuanu cutaraari nia pohuatenutaniya jiyaniijianucua niquiara.

²¹ 'Pueyari tama tarajanujuaaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyajacuaja na motenura, na queya tiuushacari cucua. ²² Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanujuaja nia tucuataaquishacarijia pohuatanu Pueyaso rupaa puetunu Israel pueya tiacajiniajanaa, janiyari jiyocuacaanuji tacatenu-taniuhuanu.

²⁴ 'Nio nia niishirijihua. Pueyanoori maja socua tojishano na niishitiojonajiniji. Naajuhua, seruuri maja socua tojishano na camarnujiniji. ²⁵ Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijihua. Maniniacuajaari, seru jaara juhua na camarnura quirijihua. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

Cante socua pa pueresanoni

(Lc 12.2-7)

²⁶ Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhua. ²⁷ Jiyasohuaja cua niishitiojosano niajaniyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacuajani mani quiquiojinia nia sohuanu na quejoonura, nia cuaqueyano.

²⁹ 'Pa naata saaja niquiriyatu cumaneeniyajuata caapiqui shiyojuanijoyua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacujitij, majaari quenaaja niquiriyatujua shiyojua cusonu Pueyaso paniyaquishacari. ³⁰ Naajuhua, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹ Naacujitij, maja nia puerenu. Niaari jiyanohua socua Pueyaso panishano queraatia shuhujiniji.

Maja cumaati Jesucristojiniji pa caririquiniu

(Lc 12.8-9)

³² 'Niaa jaara tamasaca pueya niquiara sequere niaari cucua tiuujiaa cutara, janiyacua jiyocuacaanu quijia cua Que niquiara sequerejanihuaj, niaari cua muerasu. ³³ Cante saniniuujia cucuaji seetaja tamasaca niquiarani, janiyari cua Que niquiara na tamacanutaniyajaacuhaj.

Jesuucua tiuujia pueyari narta pueya juaashano
(Lc 12.51-53; 14.26-27)

³⁴ 'Majaari nia jiyaniniu janiya mijiria niquiaarini pueya quiniuria juhuajaniya. Maja. Mijiria cua niniuucua, pueyari juayonuujutanutaniya. ³⁵ Niquiaari cutaranijia pueya tiuuniuria cucua. Naacujitij, pueya tiuushacari cucua, cucua tiuyashijiaa pueyari nojori niquiniu paniyaquiniutianiya. Naacujitij, pueyanoori na que paracaaniutianiya, cucua tiuujia na que quiniucua. Maajiiri na nucua paracaaniutianiya-juhuaj, na nucua tiuuniucua cucua. Pueyano niquiocuaari na reyarucua paracaaniutianiyajuhaj, cucua tiuujia na reyarucua quiniucua. ³⁶ Naacujitij, tama pueya panishano pueyajaajari na paracara quiniutianiya, cucua nojori tiuuniucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuaj. ³⁸ Cante tama na cuaqueyajaaja panitiaaquijia na tojiniuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojijia na quiniucuaani, nojuaja cutaraari rishijiaa jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

Pueyasoori maninia miijiaa niquitionutaniya na jiitiasanojiniji
(Mr 9.41)

⁴⁰ 'Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhaj. Cuno, cante cua tojijiani, nojuajaari cua Jiyarona tojijiajuhuaj. ⁴¹ Naajuhaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniucuaani, Pueyasoori cuno pueyano niquitionutaniya maninia na casaajiniji. Nojuajaari niquitiosaanutaniya mariyata taa Pueyaso rupaa pohuatana niquitiosaanutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniucua, na tiaco tiuquinitiaja pueyanoori maninia casaa niquitiosaanutaniya mariyata taa maninia miijia pueyano niquitiosaanutaniyacuaani. ⁴² Naajuhaj, cante quenaaja shiniitiuniacu mohuaca raateya tamonuni, cua mueyaniyojua na quiniucua, Pueyasoori seetanujuanaa na jiitiasanojiniji na niquitionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura
(Lc 7.18-35)

¹ Jesu jaara canaa na doce saquiriojosano pueya rootanu tucuaquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

² Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuacaanu Pueyaso sequesano canaacua niriquianotej? ¿Canaate tamonu sashiya soj?

⁴ Jesuuri nojori riucuaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuaj. ⁵ Naa nia pohuatasuhua: “Cariyojuarujuriiri

tari niqutiarohua. Shipiiniquiuniuujiaaari maninia rucoorohua. Shu miaqueja cusonu jiiitajacaari tari jeequerohua. Numueejunucuaari tari tojitiarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuatasaaaree, Pueyaso muerasura nojori quiniuria”. ⁶ Shuquiriaatia quijia cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niquniuucua nia quiojocanu cariiquia jiyajiniani? ¿Niaateeri paratu piyarojosano naajua niquniuucua quiacanu? Maja. ¿Tiuquinijiona Juanteeri noojia niquijiateja? Maja. ⁸ Cua sequeture, ¿casaa niquniuucua nia quiojocanuni? ¿Niaateeri pueyano niquiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaa cutara, maja cariiquia jiyajinia. ⁹ ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujiunia niquniuucuatee? Jaa. Seetanujuanaa nia sequeyanijia, Tiuquinijiona Juanri jiyanoehua socua cutara pueyano tamasa Pueyaso sequesano caminiujiuniajiniji. ¹⁰ Cuno Juanjinijicuaajaari tariucuaaanu Pueyaso Rupaajinia pohuatasaaquiaari. Naa naajiotasaaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocujini. Nojuajaari quia puetanutaniya, quia nuu jeecariquiano quiocujij”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ 'Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quia cucua na tiuushacarini, cunoori socua cutara pueyano Tiuquinijiona Juanjiniji.

¹² 'Tiuquinijiona Juan jaara coteequiaari Pueyaso rupaa pohuatanu, pueyari jiyanoehua saniniujiuriquiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jiyanoehua saniniujiya Pueyaso muerasu na quiniuriani, naa quiniutianiyari. ¹³ Supuetana Moisés, mariyata puetunu Pueyaso sequesano caminiujiuniaajanaari tariucuaaanu pohuataquiaari taa Pueyaso jiiitianutaniya pueyani. Naa poojotasaaquiaariiri Tiuquinijiona Juan jaara tiuquiquiaarijiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴ Njaa jaara nio cua pohuatasanoocua tiuuniu paniri, nia tojiri nio: Tiuquinijiona Juancuaajaari tariucuaaanu pueyara Pueyaso sequesano caminiujiunia Elíascuaja. Elíascuajaari seque-saaquiaari niriqiano. ¹⁵ Cante numaaracani, cuara tojiiria cua sequesano.

¹⁶ 'Naa pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapute carijiniacuma tacuarishijionu paniya juucuan. Nojoriiri narta naatujooriicua naca, nojori tacuarishijionu panishacari juucua. ¹⁷ Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. ¹⁸ Naajuhuaaj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹ Na nuhuaji, janiyari tiuquiquiaarini. Janiya cutaraari sumatuucuaa miaquejani, mashaca ratujuajuhuaaj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaraatiajuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

*Jesu piriyojosacari tojiyashijianucua pueya
(Lc 10.13-15)*

²⁰ Corazín tiacajinia, mariyata Betsaida tiacajinia, Jesuuri tii socua pueya naatani-jioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiuyaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹—¡Niaari taraatia saniitiosaanutaniya, nioojia nia tacatoyaquiniucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniucua. ²² Naaratej, janiyari nia numooteyani: jiya puequesacari, niaari socua jiyanhua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³ Capernaum tiacajinia quiniaanaa, ¿niaateeri jiyaniya niaari tamasa tiaca shocotanutaniya nia jiyanihacari niaari socua maninia cutara? ¡Maja! Niaari mani quiquiojina quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiaajaj. ²⁴ Nocuaji nia sequeya cutaranijia: jiya puequesacari, niaari socua jiyanhua saniitiosaanutaniya Sodoma tiaca pueyajiniji.

Jesuucua tiuuniaari samaateriquiano cutara

(Lc 10.21-22)

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuacaanu camarunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocuaajaaja tiuujia. ²⁶ Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricujani.

²⁷ Cua tojitiare pueyanaa, cua Queeri cua niquitioquiaari puetunu casaajanaa cua jiiiasocoriquiano. Majaari seetanujanaa tamasa niishiniu janiya. Saa cua Queja cutaraari cua niishiya. Naajuhuj, majaari seetanujanaa tamasa niishiniu cua Que. Saaja janiya, Neyanuni, na niishiya cutaranijia, naajuhuj canapue cua niishitiniu paniya cua Quecujani. ²⁸ Cucua nia nijiore, puetunu nijaniyajanaa, canapue tacaquioyoni, canapue puera niishiriojonuujuacani. Nia jaara cucua nimia, janiyari nia samaraatanutaniyani. ²⁹ Cua niishitijosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaaniu quiniutianiya nia rupuesacari janiya. ³⁰ Nia tojishacari janiya, nioojiaari juhuajaniya quiniutianiya. Cua poonitijosacari nijaniya, majaari jiyajeneta na quiniu quiniutianiya niaara, cua cumaquishacari nijaniya.

12

Jesu pueya carojotasacari trigo samaatenu juuca

(Mr 2.23-28; Lc 6.1-5)

¹ Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonu-uriquiaani. ² Fariseocuaca jaara canaa niquiquiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitiaa! ¡Na shuquiuquiojonuuyari! ¡Naa nojori miishacaritij, poonijionuuyari! Cuno maja panishano samaatenu juuca miiniuria. ¡Pa supuetana Moiséscajaari naa pa rootaquiaaritij!

³ Jesuuri cuno pojori riucuaaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? ⁴ Nojoriiri Pueyaso Secojoua tiajinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secjonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niquiara. ⁵ Naajuhuaaj, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secjonaa pueyaracaanu poonijioquiaa Pueyaso Secojoua tiajiniani? Nojoriiri naa poonijionuquiaa samaatenu juucajuhuaaj. Naa nojori poonijosacari Pueyaso Secojoua tiajinia samaatenu juucatej, cunoori maja sesa. ⁶ Moisés cuajaari pa rootaquiaari maja pa poonijionura samaatenu juuca. Naajaa, cuno rootasanoori seetanujanaa maja na quiniu Pueyaso Niyanura, jaara Pueyaso Secojoua tiajinia poonijionaara quiyaquirijiuhuaaj. ⁷ Maja naasucuaari nia niishiniu quiquiaari casaa nio tariucuacaanu naajiotasano niishitiojiya nijaniya juucuan. Naa sequeyari: “Janiya cutaraari socua nia panitiaani niarta pueyacu nia taraajenura, maja saaja nia niqutiojonura nia seya cucuara catijasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiyaquiriquiaaj. ⁸ Cua tojitiare quiarjia. Janiyacuajaari Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyani.

Jesu jeecasacari pueyano juaashiquia cuseetucojuara joojequetano
(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniqijini. Canaari Pueyaso Secojoua tiajinia tiuquishiini. ¹⁰ Pueyanoori tii quiriquiaa cuseetucojuara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuajaruhua niishitiojosaquiaarini maja pa poonijionura samaatenu juuca.

¹¹ Jesuuri cuno pojori riucuaaree:

—Naa jaara niquiriyatujua borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¿Taaquiririni! ¹² ¿Majateeri pueyano socua jiyanojua panishano borregojiniji? Taaquiririni. Naaratej, maja pa tarinitianu maninia pa miiniuria pueyaracaanu, samaatenu juucajuhuaaj.

¹³ Na nuhuaji, sesarucouja sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijiaarjia rojotooquiaari nojori motenura Jesu.

Jesujiniji pohuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniqijii quiaqueeri. Queraatia pueyari na nuhuajiquiaari canaata. Jesuuri puetunu cusosuhuajanaa naatanijioquiaari. ¹⁶ Jesuuri na naatanijosano pueya rootaquiaari maja tamasa niquiara nojori pohuatanura cante nojuajani. ¹⁷ Naacuajitij, tariucuacaanu Pueyaso sequesano caminiujiunia Isaías pohuatasanoori tohuateequiaari. Nojuajaari juhuacarjia naa pohuataquiaari Jesujiniji Pueyaso sequesano miriquitij:

¹⁸ “Niocuajaari cua seru, cua saquiriojosano. Na timitiaanijia. Nojuajaari jiyanojua cua panishano. Janiyari cua Sohuanu jiyaronutaniya nocuani. Nojuajaari tamasa pueyapue pohuatanutaniya janiyajiniji, nojori quiniuria cua muersura pueyaracaanu. ¹⁹ Majaari pueyata juaajia na quiniu quiniutianiya. Majaari

nacojojua na quiniu quiniutianiya. Majaari na rupaa tojishano quiniutianiya tiacaacaco. ²⁰ Majaari quenaaja shuniitiasano naajua na shutianu quiniutianiya puetunujuanaa. Naajuhuaaj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijiaj, puetunu sesa miiniujianaa na puecanura, Jiyaniijiajanaa na quiniuhuara pueyaracaanu. ²¹ Puetunu tiqiyocuacajinijinio quijiaca pueyajanaari nocua tiuuniutianiya”.

Pueya sequesacari Jesu samaru cumaacaracana
(Mr 3.20-30; Lc 11.14-23; 12.10)

²² Tiquiaari Jesuucua jaatucusaquiaari. Cariyojuaru quiriquiaajaariuhuaaj. Naa quiquiaariiri samaruraca na quiniuucua. Jesuuri na jeeceere. Naacuajitij, tiquiaari pocuajara quiquiaari, niquijarajuhuaaj. ²³ Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyoteeri pa supuetana David niquihuacuajinio supueno pueyano, tariucua-caanu sequesano pa jiyaniijiaari quiriqianotej!

²⁴ Fariseocuaca jaara tojiqiaari naa pueya sequesacari Jesujinijitij, nojoriiri na juaaniutia sequesquiaari saaja:

—¡Cuno pueyanoori samaruhua tohuatanijia Satanás cumaacata!

Satanásri samaruhua jiyaniijia. ²⁵ Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuaaj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqiu. Naajaariuhuaaj, pueyano jaara juayonuujutare tapueyocuacata tama na tiajiniaajaaja, majaari nojori naata jatiqiu quiniu. ²⁶ Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. ²⁷ Janiya jaara samaruhua tohuatanijia Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijosacari samaruhua Pueyaso cumaacata, niaari jiyanohua jiyajeneya nia sequesacari janiya samaruhua tohuatanijia Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samaruhaatej, niaacuajaari niishiya Pueyasoori tari poonijia juhua Jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuaaj, janiyari Pueyaso cumaacata jaariuutiaa Sesaaca jiiitiasano pueyani.

³⁰ ‘Cante cua jiyano quiaquiyani, cunoori cua paraca. Cante cua naacutaaquia pueya rerecojonura Pueyasorani, nojoriiri saaja pueya cocuataa Pueyasocujia.

³¹ ‘Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuaaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Nyanu sesacajani, nojuajaari na naata jiyanooshaanujuhuaaj. Saniniuujia, cante Pueyaso Sohuanu sesacajani, nojuaja cutaraari jiyanooyaquishaanutianiya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuaaanujuhuaaj.

*Naanaari niishishano na jajaujiniji
(Lc 6.43-45)*

³³ 'Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuaajitij, na jajaujiniji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuaquiaani. ³⁵ Naacuaajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuajari. ³⁶ Nia sequeya cutaranijia, Pueyaso saniitionu juuca, pueyari puetunu najuhuana sesa na pocuasanoinijijiana nequesoreesaanutaniya. ³⁷ Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhuj, cante sesa casaa pocuaja quiquiaarini, nojoriiri saniitosaanutaniya saniniuujia. Naaratej, maajari nia niti nia taquiriocuatenu sacuaraatia casaa nia pocuanura.

*Fariseocuaca niquiniu panishacari Jesu miishano Pueyaso cumaacata
(Mr 8.12; Lc 11.29-32)*

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriqiano.

³⁹ Jesuuri nojori riucuaaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiuujia quiquiaari. ⁴⁰ Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatunutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiuujia socua jiyaniijiajanaa cutara Jonásjiniji. ⁴² Naajuhuj, tariucuacaanu jiyaniijia maajiiri niquiaari tucuacaanu pa supuetanaa jiyaniijia Salomón tojiniuucua. Cunoori quiquiaari jiyanoohua niishijia Salomón quiniuucua. Cuno maajiiri pananu shuucujia niquiaari Salomón na tojiniuria, jiyanoohua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicua saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

*Samaruuri na tohuatanishaquiji tacatejohua
(Lc 11.24-26)*

⁴³ 'Samaru jaara tohuatare pueyanoiniji, joojuashiquio rucuaneyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriasuhuari juhua camaruuju tia, netoosano, maninia jeenucuasano. ⁴⁵ Naaratej, samaruuri socua tamasa narta samaruhua pajeya. Socua siete narta samaruhua riuriataari socua jiyanoohua sesa nojuajiniji. Puetunu nojorijianaa jaara tiuquitiare cuno pueyanocua tii na quiniuria, cuno pueyanoori na nuhuaji socua jiyanoohua sesa quiijara jiyacateja.

Naa quiniutianiyajaariuhua nio pa quishacari pueyara na tojitiaaquiniuucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricujani.

Cante seetanujuanaa Jesu nucuani, tapueyocuacajuhua
(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuari tiuquiiioquiaari Jesu tapuey-
ocuacata Jesuucua. Carijiniacuma qutiuriquiaari. Jesuta pocoojonu paniriquiaa
juucuaari. ⁴⁷ Tamonu pueyanoori Jesu sequere:

—¡Niishitiojonanaa! Quia nucuacui quia tapueyocuacata carijiniacuma quia. Quiata
pocoojonu paniyaquinaari.

⁴⁸ Jesuuri saaja na numootena pueyano riucua:

—¿Cante cua nucuani? ¿Cante cua tapueyocuanani?

⁴⁹ Jiyacaritij, Jesuuri canaa na tojitianaa pueya shishirii. Tii quiniaa pueya se-
quereeri:

—Nio cua tojitianaani, nojori cutaraari juhua cua nucu, juhua cua tapueyocuaca
cutara. ⁵⁰ Naacuajitij, cante cua Que Pueyaso panishano miiquiaa cutarani, nojuaja
cutaraari cua tarajanu, cua rimiatsu, cua nucuano.

13

Natoojouja pueyanojiniji pohuatasano
(Mr 4.1-9; Lc 8.4-8)

¹ Cuno juucaja, Jesuuri tohuataquiaari tajiniji. Caminia casaqueyaji cajishiiri.
Canaari nata quiriquiaani. ² Jiyanoehua queraatia pueyari nocua rerequeejoquiaari.
Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa
pueyari jaaquiajania jateequiaari, tiji na tojitianura Jesu canaata. ³ Jesuuri queraatia
casaa pueya maanu niishitiojoriquiaa miriqui. Naa pohuataquiaari puetunu canaa-
janaari:

—Pueyanoori natoojonura quiaquiaari na cuhuariquiajania. ⁴ Na jacutasacari, seca-
jaari nucuaco totequiaari. Shuhuari nocua rosetaquiaari. Puetunujuanaa nucuacoji na
natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera
jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara
tacaquiaari, cuno natauri ritia sorequiaari maja puera nujuacaraca na quishacari.
⁷ Tajaacaari totequiaarijuhua riyocuaca tajinia. Riyocuaca maashishacari, majaari
cuno natau maashiniu quiquiaari maninia. Majaari na muetunu quiquiaari. ⁸ Maninia
jiyajinia totequiaariiri tajaaca saniniuujia. Tii moritiaquiaari maninia cutaraari.
Maninia muetuquiaari cutaraari. Puetunu cuno jiyoneejinijianaani, noojiaqueyari
muetuquiaari cien jajau niquiriyatu jiyonaacua. Tamonu jiyoneeri muetuquiaari
sesenta jajau niquiriyatu jiyonaacuajuhua. Socua tamonu jiyoneeri muetuquiaari
treinta jajau. ⁹ Niaa jaara numaaraca quiri, nia tojitiare cua pohuatasano.

Casaara Jesu niishitiojiya miriquini
(Mr 4.10-12; Lc 8.9-10)

¹⁰ Jesuuri naa pohuataquiaari miriqui pueya niquiaratej. Na nuhuaji, canaa,
Jesu saquiriojosano pueyani, canaari nocua catecanoquiaarini. Canaari na nequeso-
taquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹ Jesuuri canaa riucua:

—Pueyasoori nia saquiriojoquiaari, nia niishishoo casaa Pueyasojiniji nia niishini-
uria, taa Pueyaso poonijiya pueya jiuujiajiniani, na muerasura nojori quiniuria

shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹² Cante Pueyaso rupaa tojijia cutarani, nojua-jaari socua niishitiojosaanutaniya, Pueyasojiniji jiyanoehua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaar-iuutiasaanutaniyajanaa nojorijiniji. ¹³ Cunora, janiyari miriqui pohuatariquiaa nojori niquiarani. Naacuajitij, nojoriiri najuhuaana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴ Naa nojori quiniuucuatej, tari tohuateereeri juhuacarijia supuetana Isaías sequesano nojorijiniji. Pueyara Pueyaso sequesano caminiujiunia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵ Nojoriiri cumajiuujiaaca quiya. Nojoriiri juhua numueeju, tojiyashijia. Nojoriiri juhua nimishitiu quiyajuhua. Naa juhua nimishitiu qitiuyari nojori niquiyaquiniuucuaaji. Nojoriiri naa juhua numueejunucuaajuhua, nojori tojtiaaquiniuucuaaji noojiata. Naa qitiuyari nojori niishiyaquiniuucuaaji noojiata, cucua nojori tacatenuhuara cua jeecanura nojori jiuujia seque”.

¹⁶ Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhua. ¹⁷ Seetanujuanaa nia sequeyanijia, queraatia tariucuacaanu pueyari quiarijia nia niquishano niquiniuucua jiaatiaquiaari juucua. Naa nio niquiniuucua jiaatiaquiaari tariucuacaanu Pueyaso sequesano caminiujiuniaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucuaajuhua. Majaari nojori tojiniu quiquiaari saaja.

*Jesu niishitiojosacari miriqui na pohuatasano natoarjojuajiniji
(Mr 4.13-20; Lc 8.11-15)*

¹⁸ Nia pohuatareera nia niishiniuria cua pohuatasano natoarjojuajiniji. ¹⁹ Canapuate Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. ²⁰ Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹ Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijia nojori quiniuucua, nojoriiri ritia Pueyaso tojiniu tarinitiaquiaa. ²² Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhua, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajia. Naacuajitij, cuno pueyari juhua natau muetuhuo quiquiaa. ²³ Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniuujia jacutasano jajau. Naacuajitij, cuno pueyari juhua maninia natau, maninia muetuna cutara. Jiyanoehua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujuhua.

Jesu pohuatasano miriqui trigo tajinia moritaja sesa jiyasocuaajiniji

²⁴ Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojtiaashijia pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. ²⁷ Cuhuariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquiriojosano jajau quiquianucuaaja quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸ Cuhuariquia camaruuri nojori riucuaaree: “Pa paracaari cunohuaj, naa pa miiriucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiiriajaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiuniocojonura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

Jesu pohuatasano miriqui mostaza jajaujiniji

(Mr 4.30-32; Lc 13.18-19)

³¹ Jesuuri socua miriqui pohuataquiaari pueya niquiara, na niishitiojonura taa Pueyaso poonijiya pueya jiuujiajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia.

³² Seetanujuanaa mostaza jajauri socua jiyanoohua shiitianiyojua puetunu tamonu jajaujinijianaa. Naajaa, cuno mostaza jaara maashiri, socua puereetuucara maashijiaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

Jesu pohuatasano miriqui pan poreetajajiniji

(Lc 13.20-21)

³³ Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoohua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

Casaara saaja miriqui sequesano pohuatasaaquiaa pueya niquiarani

(Mr 4.33-34)

³⁴ Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaaritij. ³⁵ Naacuajitij, maninia tohuateequiaariiri tariucuaaanu pueyara Pueyaso sequesano caminiujiunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pohuatasano sesa jiyasocuajiniji

³⁶ Na nuhuaji, Jesuuri pueya maanu sequeree:

—Tariucuaaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocuajiniji.

³⁷ Jesuuri canaa sequeree:

—Janiyacuaajaari cunoni, maninia jajau natojojuani. ³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajini natanoni. Tamasacaari saniniuujia Sesaaca muerasu quiya. Nojoriiri juhua cuno sesa jiyasocua, cuhuariquiajini natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuacaanuji Pueyaso seyari juhua cuhuariquia senoona quiniutianiya. ⁴⁰ Naatej, taa sesa jiyasocua namitiashiya catijasocoriquianocuaani, naa quiniutianiyajaariuhua nio jiya puequesacari. ⁴¹ Janiyari cua seya jiyaronutaniya jiyocuacaanujini. Nojoriiri sesa miijiaca quioonutaniya, mariyata canapuede tamasa miiquiciaa sesani. ⁴² Nojoriiri quejoosaanutaniya mani quiquiojini. Nojoriiri tii sapuenutaniya pueyaracaanu. Naquiya na miishacari, na quiaca miaquenutaniyari. ⁴³ Na nuhuaji, Pueyaso tojitiajaacaari jiyanoehua shacantucara quiniutianiya juhua pananu, na Que Pueyaso jiitiasacari nojori pueyaracaanu. Cante numaacani, cuara tojitiaara cua sequesano.

Jesu pohuatasano miriqui jiyanoehua panishano casaajiniji

⁴⁴ Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanoehua panishano. Nojuajaari naa sequequiaariti:

—Tamonu pueyanoori tamasa cuhuariquia tajiriquiaa juucua. Casaa riuriatamaari, jiyanoehua panishano casaa. Tiijia na jamorohuari tee na quiriquiaacua-jani. Jiyanoehua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacujitij, cuno jiyanoehua na panishano casaari tama na casaara quiquiaarijiaaja. Naajuhuaaj, socua jiyanoehua panishano cutaraari, Pueyaso pueyanora nia quiniuria. Cunoori jiyanoehua socua panishano puetunu pa panishano casaajinijianaa.

⁴⁵ 'Socua nia tojiri nio pohuatasano. Casami niqutiojonaari pueyaracaanu rucuaneriquiaa shanoehua cohuajaaca tiujiau na pajenura. Cunoori noturu shipinijosano sai quiquiaari. ⁴⁶ Tamonu juuca, jiyanoehua shanoehua noturu saajia niqutiojooquiaariiri. Jiyanoehua na panishano. Naaratej, puetunu na jiitiasanojuanaa niqutiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanoehua na panishanoni. Naajuhuaaj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷ 'Pueyaso Rupaari juhua puereetuca shiyaru na camaru jartasano caminiajini. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriquiaa. Pueyari jaaquiajini cajitiquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaquiaari. ⁴⁹ Naa quiniutianiyajaariuhuaaj jiya puequesacari. Naacujitij, Pueyaso seyari rosetanutaniya, sesa miijiaca na saquiriojonura maninia pueya tajiniji. ⁵⁰ Na nuhuaji, sesa pueyari quejoosaanutaniya mani quiquiojini, taa sesa sapitiaaja jacutasaquiaaricuaani. Nojoriiri tii sapuenutaniya. Na quiaca miaquenutaniyajaariuhua naquiya na miiniutia.

Pueyaso Rupaari jiyanoehua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohuatasanojuanaacuaaja?

Canaari Jesu riucuaareni:

—Taaquiririnij Jiyaniijianaa.

⁵² Jesuuri canaa sequeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijiuhuaaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacuajani, quiarinio casamiriacajuhuaaj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojojuia tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijionurani? ⁵⁵ Na shipininiocuajaari suruhuatujiniji casaa shipinijona quijia. Na nucuacuajaari María. Na tapueyocuacaari Santiago, José, Simón, Judasnio. ⁵⁶ Na rimiatuhuari mariyata niya pa tajinia quiya. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojitiaaquishacari nojuajatej, Jesuuri nojori sequequiaari:

—Puetunu tiquiyocua pueyajanaari maninia tojitiaquiaa cutara Pueyaso sequenu panishano caminiujiunia. Saaja narta pueya tama na jiyajinijiniojuaarijia na tojitianu paniyaquiya, tama na tiajinijiniojuaja pueyano.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanohua cumaaca jitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. ⁴ Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niquiocuata!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiunia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniijia Herodesri jiyanohua na shuquiritiaquiaari. ⁷ Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niqutiore quia panis-hanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niqutiore Tiuquinijiona Juan naca miacojuajinia.

⁹ Jiyaniijia Herodesri taraajequue niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niqiara. Naacujitij, Herodesri na seya sequequiaari cuara niqutiosaarianoj.

¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaaquiaariuhua miacojuajinia. Niyacoo niqutiosaasuhuari. Niyacoori saniniujia na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiy-ataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquioco. Cuno pueyari canacuaji cutesee. ¹⁴ Naacuajitij, Jesu rosesacari botejiniji, jiyanohua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niqiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiu-tianiyani. Juhuacarijia pueya quia sequere nojori cuara quiojohuara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jitianu miaquesano. Niya quiya saajaari cinco pan, caapiqui sapitiaa-janio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. ²⁰ Puetunu pueya-janaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquiano. Doce canaasatuuri mishinijosaaquiaari na raacuata. ²¹ Jiyanohua queraatia pueyari miaquenuquiaari; cinco mil quiquiaari saa canujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³ Pueya jaara tari quiojoquiaariuhua,

Jesuuri tuhuananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. ²⁴ Canaari saniniuujia caminia jiuujiajinia tari jaaretariquiaacuaani. Mohuacaari saaja canaacuara cajiniuucuariquiaa, paratu piyarojosacari canaacuara. ²⁵ Juhuaquenu panishacari, Jesuuri canaa rupuesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanohua shiriiquitiuriini! Canaari sariyocuatireeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanijia. Maja nia puerenu.

²⁸ Canaa tojishacari Jesu, Pedroori Jesu sequeree:

—¡Jaara seetanujuanaa quiajaniya quiri Jiyaniijianaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanohua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijianaa cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajequee! ³³ Canaa niquishacari naa Jesu miishano na cumaacatatej, canaari Jesuucua mojuquetacouiaarini. Canaari na sequereeni:

—¡Quiaaqui seetanujuanaa Pueyaso Niyanu!

Jesu naatanijosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shitiaseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhujanaa. ³⁶ Pueyari Jesu sequetuquiaari:

—Nareja quia shanacure cusosuhua quiocua, nojori cuara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinijinio pueyari canaacua tiuquiiioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

² —Quia pueyari shuquitioojua miaquenuuquiaa. ¿Casaara nojori tojitiaaquiquiaa canaa niishitiojosano pa supuetanaajinijini? ¡Nojori cuara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajanियariuhuj? ¿Casaara nia tojitiaaquiquiaa saniniuujia Pueyaso Rupaani, nia supuetanaa jiiitishano miiniu nia miiniuriani? ⁴ Pueyasocuaajaari sequequiaari: “Quia que tojjia quia quiri, quia nucua tojjiano. Majaari nojori rerequetenu”. Naacuajitij,

maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniniacuajaari pueyano jaara na queya sequere: “Cua quena, cua nucuaana, janiyari Pueyasora niqutionutaniya cua casamini. Naacujiti majaari cua naata nia naacunu cua jiitiasano casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapuenu Pueyaso Rupaa tojitiajacanaa! Supuetana Isaiasquiiri maninia naajiotaqueiaaricujaja niajaniyajiniji, na caminiujiushacari nio rupaa Pueyasojiniji:

⁸ “Nio pueyari saa na rupaataja cua maniniuuaqueetaquiaa. Nojori jiuujiaari saniniuujia tucuaaanu quiya janiyajiniji. ⁹ Nojoriiri najuhuaana rerejoquiaa na maniniuuaqueetanura janiya. Nojori niishitiojosanoori tama nojori niishishanojuaja, maja cua rupaa”.

¹⁰ Na nuhuaji, Jesuuri puetunu pueyajanaa sequeree:

—Miji, niya cua tojitiaseecuarajaj maninia nia niishiniuria. ¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuacaari juaaquioree naa quia sequesacari-tij?

¹³ Jesuuri canaa riucuaaree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajania. Nojoriiri juhua sesa jiyasocua jayotasaanutaniya.

¹⁴ Seetanujuanaa Pueyaso niishiyashijiaca nojori quishacari, nojoriiri juhua cariyujuaru quiya. Narta cariyujuaru jaatucuyari. Cariyujuaru jaara narta cariyujuaru jaatucure juucua, nojoriiri mariyata raama totenutaniya.

¹⁵ Pedroori Jesu sequeree:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶ Pedro riucuaareeri:

—¿Niaateeri na niishiyaquiyajuhujaj? ¹⁷ ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari.

¹⁸ Saniniuujia, pa rupaata pa pocuasano sesani, cunoori poojiajiniji tohuataa cutara. Naacujitij, pueyanoori sesa quiya Pueyaso niqiuara, sesa casaa na pocuanuucua.

¹⁹ Pueyano jiuujiajania coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajinarani. Cuno jiyajinia quiquiaariiri Tiro tiaca, Sidón tiacajuhujaj. ²² Canaa rucuanijosacari tii, cuno jiyajinijinio taatuuri Jesuucua niqiuari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosanona, cucua quia taraajere quenaaja! Quiyatu samaru jiitiaa. Jiyanohua taraatia na miiquiaari.

²³ Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuaara quiohuara! ¡Taajeta naca pa nuhua-jini!

²⁴ Jesuuri canaa riucuaaree:

—Janiyari saaja Israel pueyacia jiyarosaquiaarini. Nojoriiri juhua borregohua tashuquiono. Nojoriicua taraajeyanjia.

²⁵ Cuno maajiiri Jesu sequesano tojirii. Naajaa, Jesu cariquimiaji mojuquetaseeri. Na sequereeri:

—¡Jiyaniijianaa, cua naacutare!

²⁶ Jesuuri na riucuaaree:

—Majaari maninia pa jaariutianura pa niquiohua miaquesano, sare niquiohua niquitiosocoriquiano saniniuujia.

²⁷ Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniyojuacuajaari mi-aquesano shiriya miaquenuquiaa, na camaru totinijosano na miaquejajiniji.

²⁸ Jesuuri maaji sequeree:

—Maniniacuaja quia sequesano maajiniaa. Quiaaqui jiyanohua cucua tiuya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹ Canaari Jesuta cuniquiji quiaquiaariuhua. Canaari Galilea caminia shuriuquioco tajimiaani. Canaari tuhuananuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuri-ucua, nojori tiacajiniji nojori patootasano. Cusosuhuari quiquiaari shipiiniquiu-jiuniaa pueya, cariyobarururinio, tiquianucujuhua, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa.

³¹ Pueyari jiuujiatequiaari nojori niquishacari tiquianucua pocoyano, shipiiniquiuju- niaa rucuaneyano maninia, cariyobarururini niquishacari maninijuhua. Naajuhua, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maninuhuaqueetaree. Sequetureeri:

—¡Jiyanohua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacia taraajeyanjia. Nojoriiri tari jiuujianaraca juuca camueenujiya niya pata. Majaari nojori jiiatunu quenaaja casa na miaquetuso- coriquiano. Majaari cua jiyaronu paniniu miaqueyojua nojori, nojori mariqui na miaajenuta cusojonuyarohua nucuacoori.

³³ Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiiitiaani?

Canaari na riucuaareeni:

—Canaa saaja siete pan jiiitiaani, secaja sapitiaajaniyojuanio.

³⁵ Jesuuri pueya sequeree na cajitiuniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuaara, na nuhuaji na neecasequiaariiri canaa niquitiojonura pueya. ³⁷ ¡Puetunu pueyajanaari

maninia miaquenuuquiaari! Tooquioreeri. ¡Canaari miaquesano cureenota mishinijio-
quiaari siete canaasatuni! ³⁸ Queraatia pueyari na miaquenuuquiaari. ¡Saaja canuuri
serojosaaquiaari cuatro mil pueya! Majaari maajipohua serojosaanu quiquiaari,
naatujoorinio. ³⁹ Na nuhuaji, Jesuuri pueya sequequiaari nojori quiojonuhara. Na
nuhuaji, Jesuuri canaa jiyataquiaari botejinia Magdala jiyajiniara.

16

*Fariseocuaca, Saduceocuaca niquiniu panishacari Jesu miishano Pueyaso cumaacata
(Mr 8.11-13; Lc 12.54-56)*

¹ Fariseocuacaari Saduceocuacata Jesuucua nijioquiaari nojori saniniuuniuria no-
juaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria
quiaate seetanujuanaa Pueyaso jiyarosano.

² Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia
juucaqui tariqui quiniutianiya”. ³ Naajuhuj, pananu jaara tariquicuaji jama, niqui-
tioocua jaara niquishaarejuhuaj, niaari sequequiaa: “Maruqui niniutianiya”. Niaari
naa niishiquiaa taamueca juucate quiniutianiyani jiya nia niquishacari. ¡Mosanucuaana!
¿Casaara saniniuujia nia niishiyaquiya casaa Pueyaso niishitiojiya juucua niajanianiyani?
Nojuacuajaari juucua na cumaacata na miishano miiquiaa nia niquiara najuhuanaj.

⁴ Jesuuri nojori niquiara sequereejuhuj:

—Nio sesoriquia pueya, Pueyaso tojtiaashijiacani, nojoriiri Pueyaso cumaacata cua
miishano niquiniu paniya juucua. Majaari nojori niquitishaanu quiniutianiya socua.
Nojoriiri saaja nio niquiriyatu Pueyaso cumaacata miishocoriquiano niquiniutianiya:
janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

*Jesu numootesacari na pueya Fariseocuaca niishitiojosanoocuaji
(Mr 8.14-21)*

⁵ Canaa niuutiasacari caminia taquijiria, canaari canaa coseyaca panu niyaje-
taquiaari canaa sasocoriquianoni. ⁶ Jiyacaritij, Jesuuri canaa sequeree:

—Niishijiaca nia quiri. Tama nia cuaqueyajaaja nia cojuare Fariseocuaca pan
poreetajaacuaji, Saduceocuaca pan poreetajaacuajinio.

⁷ Cunora, canaari tama sequetooreejaanijia:

—¿Casaa na sequeyani? Pan pa paaquiniucua naa pa sequeya jiyoteeri.

⁸ Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoo-
jiyajaaja panjinijini? ⁹ ¿Majateeri juhuanajuaja nia niishiniu tari cua miishanojiniji?
¿Niaateeri tari niyajetarucuaa taa canaasatu mishajate cureecanuni, cinco mil canuu
jaara miaquenuucanu cinco panjinijitij? ¹⁰ Naa jiyoteeri niyajetarucuaajuhuj taa
canaasatu mishajate cureecanuni, cuatro mil canuu jaara miaquenuucanu siete pan-
jinijitij. ¹¹ ¿Casaara nia jyaniriini janiya miaquesanojiniji sequeriquiaani? Maja
cua sequenu panjiniji. Naa sequeriquiaanijia tama nia cuaqueyajaaja nia cojuare
Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequesacaritij, canaari jiyacari niishiquiini majaari Jesu sequenu
quiriquiaa pan poreetajajiniji. Canaari shusha niishiquiini Jesuuri miriqui
canaa numooteriquiaa tama canaa cuaqueyajaaja canaa cojuanura Fariseocuaca
niishitiojosanoocuaji, Saduceocuaca niishitiojosanoocuajinio.

*Pedro sequesacari Jesuuri seetanujuanaa Pueyaso jiyarosano
(Mr 8.27-30; Lc 9.18-21)*

¹³ Canaa tiuquiiijosacari Cesareya Filipino tiaca jiyajinia, Jesuuri canaa nequesotaree:
—¿Taa pueya sequequiaa janiyajinijini, cantena janiyani?

¹⁴ Canaari Jesu riucuaareni:

—Noojiaqueya pueyari sequequiaa, quiaanaari Tiuquinijiona Juan. Herodes mote-sano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuaaanu pueyara Pueyaso sequesano caminiujiunia. Tamasacaari sanini-uujia quia sequequiaacujua, quiaanaari supuetana Jeremías, pueyara Pueyaso sequesano caminiujiuniajuhuaj, tamonu Pueyaso sequesano caminiujiunia soj.

¹⁵ Jesuuri canaa nequesotarohua socua:

¿Niajaniyariuhuj? ¿Taa nia sequeyanijia? ¿Cante janiyani?

¹⁶ Simón Pedroori na riucuaaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya. ¹⁸ Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujua-naa cucua quia tiuushacari, quia niishishacari janiyari Pueyaso Niyanuni. Naajuhuj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacuajitij, nojoriiri juhua puereetuca saajiaacua tiasano quiniutianiya. Puetunu cua muerasujuanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹ Naajuhuj Pedronaa, quiaari juhua cua quiquio tiotiu riatataja jiitiana quiniutianiya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiiriatej. Naajuhuj, quiaa jaara casaa tenujure, maja naa pueya miiniuriatej, Pueyasoori naa sequenu-taniyajuhuj.

²⁰ Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyanu.

Jesu numootesacari na pueya, nojuajaari mosaanutaniya

(Mr 8.31–9.1; Lc 9.22-27)

²¹ Jiyacaritij, Jesuuri canaa pohuatanu cotequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoahua. Pueyacuara secojonaa jiyaniijianucuaari nojori rupenutaniya naa cua paracaashaanurajuhuj, mariyata tariucuaaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuanu.

²² Naa Jesu sequesacaritij, Pedroori Jesu jaatucuree tamocora na nacasunura tama-jaaja. Jiyanoahua Jesu sequereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaa-nuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria

pueya niishiriojosano saaja. Naa quia sequesacaritij, quiaari cua Que sequesanoocuaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojijara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanohua taraatia quiniutianiya. Saniniuuja, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuj, pueyano jaara masere puetunu nio jiya casamijanaa, na casamiiri najuhuana quiniutianiya nera, na camaru jaara jatasaare mani quiquiojinia na shaajesacari. Nojuajaari maja na naata Pueyaso jiyanoootiniu tama na cuaqueyajaaja, naajaa, nojuaja jaara puetunu na casamijanaa niqutiore Pueyaso, Pueyaso samiitianiuhuara nojuaja.

²⁷ Janyacuajaari jiyanohua shacantuuca quiijara quiniutianiya, cua Que jiyatesacari janiya Jiyaniijiarajanaa. Na nuhuaji, janyari mijiria niniutianiuhua jiyocuaaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqutiosaanutaniya maninia nojori miiniuucua. Pueyaso tojitiaashijiacaari saniniuuja naquiya miishaanutaniya, sesa nojori miiniuucua. ²⁸ Seetanujuanaa nia sequeyanijia, noojiaqueya nijanyajinijinio niya cuata quiyani, majaari nia shaajenu quiniutianiya juhuanojuaja, niaa cuaara niquirijiaatijia Pueyaso cumaaca cucua tiuquiyano, cucua tiuujiaca jiitariquiano.

17

Jesu jatasacari shacantuucara (Mr 9.2-13; Lc 9.28-36)

¹ Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojoriiri quiquiaari Pedro, Santiago, Santiago tarajanu Juannio. Jiyareta tama nojorijiaarijia quiaquiaari. ² Jesuuri tii tamaatiara jataquiaari nojori niqiuara. Na jiquiocoori jiyanohua shacantuucara jataquee, juhua pananu. Na toqueeri mariyata jiyanohua cohujara jataquiaarijuhuaj, juhua cuhuatana. ³ Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. ⁴ Cunora, Pedroori Jesu sequere:

—¡Jiyaniijianaa, canaqui namitia niya quiyani! Quiaa jaara paniri, canaa quiocuaji suhuoronutaniya, Moisésrajuhuaj, Elíasranio.

⁵ Pedro pocuasacarijia, shacantuuca najacaari nojori mishiquiomaa. Najacajiniji, rupaari tojishaaquiaari naa sequeyano:

—¡Niiori cua Niyanuniyujua, cua shuquiritiasano! ¡Saaja nojuaja nia tojitiare!

⁶ Naa nojori tojishacari Pueyaso pocuaanotej, nojoriiri jacamatuquiaari jiyanohua na puerenuta. ⁷ Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuaturhua. Maja puerenu.

⁸ Nojori jaara niqunijionuuquiaari, majaari tari na niqutiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niqiuara tuhuananujiniji nia niquishano! Niocua na pohuatarohua cutara janiya jaara samiitiarohuani.

¹⁰ Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuaraarini, supuetana Elíasnaari quiocuaji mijiria niniutianiuhua coteenu, pueya na jiyanoootioteenuhuara necohuata?

¹¹ Jesuuri riucuaaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucuanura. ¹² Janiya cutaraari nia sequeyani, Elíascuajaari tari niqiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyaajuhua.

¹³ Naa Jesu pohuatasacari Elíasjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia
(Mr 9.14-29; Lc 9.37-43)

¹⁴ Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucua mojuquetaseeri na sequenura neyanuucua. ¹⁵ Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiiitasano cusuuri na taquiriocatequiaa. Na cusojosacari miiquiaa naquiyaari. Naacuajitij, sequeyarucua manijinia tiquiaari, moojiniano. ¹⁶ Janiyari quia pueyacu na tiuquitiasee na naataniniuria juucua. Nojoriiri maja na naata na naataniniu.

¹⁷ Jesuuri cunora sequereeri:

—¡Niaaqui Pueyasocua tiuyashijiaca, na tojiyashijiacano! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucuaaree:

—Maja puera maninia nia tiuuniu juhuanajuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

Jesu pacutesacari pohuatanu nojuajaari mosaanutaniya
(Mr 9.30-32; Lc 9.43-45)

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequereeri:

—Janiyari sapojonuta niqutiosaanutaniya taucuaani. ²³ Nojoriiri cua monutaniya. Jiuujianaraca juucajinia, janiyari samiitianutaniuhua.

Naa Jesu sequesacari canaatej, canaari jiyanohua taraajequiaarini.

Cumaneeca niqutiosacari Pueyaso Secojua tiaacuara

²⁴ Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojua tiaacuara, taa pa jiyaniijianucua sequequiaaricujani?

²⁵ Pedroori na riucuaaree:

—Na niqutioquiaanocuaaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucucajiniji soj?

²⁶ Pedroori Jesu riucuaaree:

—Taucuaca niqutiojoteshiyanocuaja nojori jiya jiitiana sequesano.

Jesuuri na sequeree:

—Naacuaaquiniatejaj. Naacujitij, tama na pueyajaarijia maja na niqutionu. Pueyaso Secojoua tiacuajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷ Naajaa, pa niqutioire juhuari nojori sequesano, paa mariqui nojori juaatiriiri. Nocuaji quia riósee caminiajinia. Quiocua coteenu quia jatasano sapitiaaja rupaama niquri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhuj.

18

Cante jiyaniijajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijanaa, canaa quia sequeretoj, puetunu quia pueyajinijiniojuanaani, ¿cante jiyaniijajanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyaretare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴ Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijajanaa quiniutianiya cutara narta Pueyaso muerasujinijinio. ⁵ Naajuhuj, cante naatujua maseja maninia na paniniuucua janiyani, nojuajaari cua maseyajuhuj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujajau saajia na riquiajiniji morotasano. ⁷ ¡Mijiria quiniaari jiyanojua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ Nio miriqui cua niishitiojosano nia tojiri: nia juaashiquia, nia niohuaca jaara sesa miitiya nijaniya, nia rashiquiarenoj, tucuaaanu jatasocoriquiano. Naa nia miiri niaa mariqui mani quiquiojinia jataaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhuj, nia namijia jaara nia miitiri sesa, nia jiatere. Tucuaaanu nia jatarenoj. Jiyanojua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanojua canaa miiniu panishano, cuno jaara sesa miijiara jiyateriquia canaa.

Jesu pohuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucujaj tamonu muerasuniyojua, juhua nio mueyaja. Cua tojitiare. Pueyasocuajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco

shootiaquiaa. Naajuhuaaj, Pueyasocuaajaari na muerasuranooocua niishiriojoquiaa. ¹¹ Naaratej, janiyari mijiria niqiaarini tashucuaano pueya cua pajenura, nojori cua jaariuutianura Sesaaca.

¹² ¿Taa nia sequeyani pueyanaa? Tamonu pueyano jaara cien borregohua jiitiare, niquriyatujua jaara tashucuaare tapueyocuacajiniji, ¿majateeri na camaru na borregohua cureeno tiujianu rupaquijia, tashucuaano na pajenura? Taaquiriirini. ¹³ Jaara na riuriatare, seetanujuanaa socua jiyanoohua cuno borrego tashucuaano shuquiritiaari tamasa na borregohuajiniji. ¹⁴ Naajuhuaaj, jiyocuacaanu quijia nia Queeri maja na paniniu quenaaja niquriyatujua nio muerasujinijinio tashucuanura puetunurajanaa.

*Taa pa jiyanooya pa tarajanuni
(Lc 17.3)*

¹⁵ 'Quiarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj. ¹⁶ Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niqiuara quia nacasure cuno sesa miinia. Niaa jaara naa miiritij, naa quiniutianiyari taa tariucuacaanu Pueyaso Rupaajinia niishitiojosaquiaaricuajani: "Querajaa pueya jaara mariyata pohuatare na niquishano, na tojishanojuhuaj, cunoori maja sapojonu". Naacuajitij, nojori saquiriojotasanoori seetanujuanaa quiniutianiya. ¹⁷ Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niquliarajanaa quia pohuatare sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiiria juhua Pueyaso niishiyashijia niaara. Naacuajitij, majaari socua nia rupuenunoj.

¹⁸ 'Seetanujuanaa nia sequeyanijia, cana nia jiyanoyaquirii mijiriani, na tojiniu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasorajuhuaaj. Naajuhuaaj, cana nia jiyanoorii mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasorajuhuaaj.

¹⁹ 'Naajuhuaaj, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocuara nia secojonura Pueyaso, cua Queeri nia tojiniutianiya. Nojuajaari jiyocuacaanu nia maninia miiniutianiya niaara, taa nia secojosacari nia sequereecuajanoj. ²⁰ Querajaa niajaniyajinijinio jaara rerejore, cucua tiuujia nia quishacari, janiyari tii niaata quiyajaanihuaj. Naacuajitij, cua Queeri nia secojosano tojiniutianiya cutara.

²¹ Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucuaja, janiya jaara na jiyanoori siete sesa na miishanojiniji janiyani?

²² Jesuuri Pedro riucuaaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pohuatasano jiyanooyashijia serujiniji

²³ 'Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijiaari nera poonijionaa pueya sequequiaari nojori cuara tari niqutiojoora nojuaja na cumaneeca, nojori na niqutiojosanojiniji na casami. ²⁴ Noojiaqueya nera poonijionaa pueya jaara tari nojori pasano casamijiniji niqutiojoriquiacuaa tama nojori cumaneecajinijiaaja, jiyacaritij, tamonuuri tiuquinishaarejuhuaj. Nojuajaari jiyanoohua queraatia casami masejoquiaari na jiyaniijiajiniji, queraatia millón cumaneeca. ²⁵ Nojuajaari

maja na jiitianu quiquiaari na cumaneeca, na jiyaniijia na niqutionuhuara. Na jiyaniijiaari cunora na pueya sequeree: “Tamonu camarnu nia niqutione nio cua seru, necocuataja, cua cumaneecara, necohuajuhuaaj, puetunu na casamijianaanio. Naacuajitij, na cuentaari puequenutaniya”.²⁶ Cuno na seru tojishacari naa na jiyaniijia sequesantej, nocuara jacamaquiaariiri. Na jiyaniijia sequereeri: “¡Cua tarinitiare quenaaja cua jiyaniijianaa! ¡Rupaquijiara cua tarinitiarejaara! Janiyacuajaari quia cumaneeca niqutionutaniya puetunujuanaani”.²⁷ Na jiyaniijiaari nocua taraajeree. ¡Na carterohua puetunujuanaari! Naa na jiyanooriiri, nocua na taraajenuucua.

²⁸ Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequereeri: “¡Ritia cua niqutione cumaneeca, tarijia quia masesano janiyajiniji!”²⁹ Narta seruuri na riquiajinia mininia cariquimiaaji mojuquetaree. Na sequereeri: “¡Cua tarinitiarecuaraja quenaaja! ¡Janiyacujaari quia cumaneeca quia niqutionutaniyani!”³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niqutionejaatijia.³¹ Narta seya niquishacari naa cuno jiyanooshano seru miishantej, nojoriiri jiyanoohua taraajequiaari. Nojoriiri jiyaniijiaacua quiojoquiaari puetunu sesa narta seru miishanojuanaa nojori pohuatanura.³² Naaratej, jiyaniijiaari tamonu na seru jiyaroree cuno jiyanooshano seru riniuucua. Na tiuquishacari, jiyaniijiaari na juaarii. Na sequereeri: “¡Quiaaqui jiyanoohua sesajuhuanajaj! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca.”³³ ¿Majateeri quia naata quiriquiaa taraajenu quiarta seruucua, taa cua taraajeree quocuacuaani?”³⁴ Jiyaniijiaari jiyanoohua juaarii. Cunora, cuno sesa miijia seru jiyarotareeri nujuatejojuajinia na nujuatesaanura. Sequereejariuhuaaj cuaara naquiya miishaaria tii, cuaara puetunujuanaa na cumaneeca niqutionejaatijia, casami na pasanoiniji.

³⁵ Nia Que Pueyasoori naa miiniutianiya niajanijuhuaaj, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura (Mr 10.1-12; Lc 16.18)

¹ Jesu jaara naa pohuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani.

² Jiyanoohua queraatia pueyari Jesu nuhujijaree. Quiniqui canaa quishacari, Jesuuri cusosuhua naatanijoree.

³ Jiyacaritij, noojiaqueya Fariseocuacajinijioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juaatiri?

⁴ Jesuuri nojori riucaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio.⁵ Naaratej, nojori shipinijiaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”.

⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacuajitij, majaari maninia Pueyaso rupetoofesano rupartanura.

⁷ Nojoriiri Jesu sequeree:

—Jaara naa quiriritij, ¿casaara supuetana Moisés rootaquiaaricuaraarini caya cuaara naajionee niqutioora necocua, na cartenu panishacari?

⁸ Jesuuri nojori riucuaaree:

—Moisés cuajaari niishi quiaari niaari puera cumajiuujiaaca. Naaratej Moisésri nia tarinitia quiaari nia niqiuocua nia cartenura. Coteenujanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyano hua sesa miya Pueyaso niqiuara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niqiuocua numuetucujuani. Naajuhuj, cante cartesano maaji camiyani, naa sesa miyajaariuhuj.

¹⁰ Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucuaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuacaanuji cumaaca niqutiosaareeni na tojiniuria. ¹² Naajuhuj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanajuhanajaj. Tamasaca canuuri maja na caminiu saniniuujia, jiatejosano nojori riyacajajau quishacari. Tamasacaari maja na caminiuujihuj tama nojori paniyaquishacarijaa, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

*Naatujooriicua Jesu secojosacari Pueyaso
(Mr 10.13-16; Lc 18.15-17)*

¹³ Na nuhuaji, pueyari Jesuucua nitia quiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujuree canaa juaaniutiani. ¹⁴ Jesuuri saniniuujia canaa sequere:

—¡Maja nojori tenujunu! Nia tarinitiare naatujoori cuaara cucua nijioora. Nia tojiri, canapuate seetanujanaa juhua nio naatujoorini, nojoriiri Pueyaso muerasu quiriquiano.

¹⁵ Na nuhuaji, Jesuuri na juaashiquia nia quiaari naatujooriicua, nojoriicua na secojonura, Pueyaso miiniuria maninia nojori. Na nuhuaji, Jesuuri quiniquiji quia quiaariuhua.

*Jiyano hua casamiriaca mashaja pocojosacari Jesuta
(Mr 10.17-31; Lc 18.18-30)*

¹⁶ Tamonu mashajaari Jesuucua ni quiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyan maninia cua quiniuria Pueyaso niqiuara, pueyaracaanu quijiara cua quiniuriani?

¹⁷ Jesuuri na riucuaaree:

—¿Casaara quia sequeya janiya maninia pueyanotani? Saaja niquiriyatujaaari maninia quiija cutara. Nojuacuajaari Pueyaso. Naajaa, quiaa jaara maninia quiniucua jiaatiaa Pueyaso pueyano quia quiniuria, quia tojiri tariucuaaanu Moisés Rootasano Pueyasojiniji.

¹⁸ Jesu riucuaareeri:

—¿Teyano rootasanoteni?

Jesuuri na sequere:

—Maja quia monu. Maja quiarta pueyano niqiuocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. ¹⁹ Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia panyacuua tama quia cuaqueyajaajani.

²⁰ Mashajaari Jesu sequeree:

—Janiyacujaari puetunujuanaa nio tojijia quiquiaari cua naatujuajinjini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanjuanaa maninia quiniucua jiaataa Pueyaso niquiara, quia quiaarohua quia tiajinia. Quia niqutiojore puetunu quia casamijianaa cumaneecara. Na nuhuaji, casamiijiuniucua quia niqutiojore nareja quia cumaneeca. Naacujitij, quiaari queraatia casami jiitianutaniya jiyocuacaanu. Na nuhuaji, quiocua nimiohua cutara, cua tojijia quia quiniuria.

²² Na tojishacari naa Jesu sequesantej, mashajaari taraatia quiaarohua jiyanoehua casamiriaca na quiniucua.

²³ Jiyacaritij, Jesuuri canaa sequeree:

—Seetanjuanaa nia sequeyanijia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri. ²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¿Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanoehua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequeree:

—¿Canaarijataj? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyarinjia?

²⁸ Jesuuri canaa riucuaaree:

—Seetanjuanaa nia sequeyanijia. Nio jiya maniniushitishacariuhua, janiyari cajiniutianiyanijia jiyaniijia cajitiujinia puetunu cua Quejinijia shanohua cua cumaacatajanaa. Jiyacaritij cua pueyanaa, niaari mariyata cajitijiosaanutaniya doce jiyaniijia cajitiucujinia. Niaari pa supuetana Israel doce niqiuohuacuajinio caneno pueya nequesoreena quiniutianiya. ²⁹ Cua pueya tojiniuria janiya, noojiaqueya nojorijiniijioori na tia tiujianutaniya, tapueyocuaca, na rimiatuhua, na que, na nucua, necohua, na cuhuariquiano. Canapute naa tiujiaquiaa na tojiniuria janiyani, cuno pojoriiri Pueyasojinijia socua jiyanoehua queraatia masenutaniya nojori tiujiasanojinijia. Nojoriiri pueyaracaanu shuquiriaatia quijiaca quiniutianiyajuhua, shaajeyashijiaca. ³⁰ Saniniujia, queraatia tojishano pueyari Pueyaso shocotasano quiniutianiya na tojtiaashijiaca nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijiaca pueyara. Cuno pojori jyanishano najuhua quijiaca, nojoriiri Pueyaso shuqiritiasano pueya quiniutianiya cutara.

20

Jesu pohuatasano cuhuariquiajinia poonitijosano pueyajiniji

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuaani.

Cuno cuhuariquia camaruuri quiaquiaari tariquicuaji pueya na pajenura na uva cuhuariquiajania nojori poonijionura. ² Cuhuariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojinijini. Poonijionaa pueyari na sequeree: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajania nojori poonijionura. ³ Pananu tacasacari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niquishiiri juhuajaniya quiyano tiaca jiuujiajania curotasano cajitiucujania. ⁴ Cuhuariquia camaruuri nojori sequeese: “Nia quiaarejuhuaj, cua uva cuhuariquiajania nia poonijionura. Janiyacua cumaneeca nia niqutiorohua nia poonijionu samini”. ⁵ Naacuajitij, nojoriiri quiojoquiaari cuno cuhuariquiajania poonijionurajuhua. Na camaruuri socua tohuataquiaariuhua panacari. Socua tamasaca pueya niquishiiri juhuajaniya quiyano tiaca jiuujiajania curotasano cajitiucujania. Nojori sequerejaariuhua nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucujajariuhua. ⁶ Tariucua pananu piriushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajania curotasano cajitiucujania najuhua quiyano. Nojori sequereeri: “¿Casaara nia quiojiaquiyaree poonijionuucuanu? ¿Casaa nia miya niyani? Niaa mariqui poonijiore”. ⁷ Nojoriiri na riucua: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajania nia poonijionura. Janiyacua nia poonijionu sami cumaneeca nia niqutiorohuani”. ⁸ Pananu tiuquishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijanaa taa cua sequeree coteenujanaa quiria poonijionaacuajani. Majaari rimiajata nojori niqutiojonu. Coteenu quia niqutiojore tariucua pananu piriushacari cua jiyaramiquishano. Naa quia niqutiojore puetunujuana. Quiocua naa tucuatate niqutiojonu noo pojorijuhua, canapuete tariquicuaji coteeree poonijionuacuajani”.

⁹ Jiyacaritij, tariucua pananu piriushacari poonitijosano pueyari nijomaa. Puetunu nojorijanaari cumaneeca niqutiosaaree taa cuhuariquia camaru coteenujanaa tariquicuaji poonijionaa pueya sequequiaaricuajani. Majaari rimiajata nojori niqutiosaanu quiquiaari cumaneeca, nojori poonijionu sami. ¹⁰ Na nuhuaji, coteenujanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaree taa cuhuariquia camaru sequeree nojori cuno juucacuajani. ¹¹ Nojori masacari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niqutioree taa quia niqutioree canaacuaani. Canaari pananucari cateree cutarani, pueyaracaanu canaa poonijosacari”. ¹³ Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarijia quia sequereeni janiyari naa cumaneeca quia niqutionutaniyani? Quiaari cua riucua: ‘Maniniacuaja’”. ¹⁴ Naaratej, quia jiyatarohua quia cumaneeca quia tiajiniohua. Janiyacuajaari naa niqutionu paniriquiaa tariucua pananu piriushacari cua poonitijosano pueyani, taa cua niqutioree quiajanuyacuani. ¹⁵ ¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacia jiaatajara quiqui, capora cua quiniucua?”

¹⁶ Na nuhuaji, Jesuuri naa sequequiaarijuhuaj, na pohuatasanojiniji na niishitijonura:

—Naa quiniutianiyari taa cua sequeriquiaacuajani: canapuete nuhuajishanaani,

nojoriiri coteetanaa quiniutianiya. Naajuhuj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijio.

Jesu camishacariuhua pohuatanu taa na mosaanutaniyani
(Mr 10.32-34; Lc 18.31-34)

¹⁷ Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuriuquiocora, tamajaaja canaata na pocoojonura. Canaa sequereeri:

¹⁸—Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niqutiosaanutaniya pueyacuara secojona jiyaniijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura. ¹⁹ Nojoriiri cua niqutionutaniya taucuaca. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samitianutaniuhuanii.

Santiago, Juan nucua sequesacari Jesu, maninia na miiniuria necohua
(Mr 10.35-45)

²⁰ Jiyacaritij, Zebedeo niquiocuaari Jesuucua catecanoquiaari necohuata. Jesuucuaara mojuquetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riucuaareeri:

—Quiaa jaara Jiyaniijia jiyatesaare, quiocua cua niquihua cajitijiore quia shuriucua, Santiago, Juannio. Tamonu cuara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucuaajuhuj.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucuaaree:

—Taaquiriirinj. Canaa naatacuaaquinatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaaji na jeenucuaquiaaricuaajani.

²⁴ Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa.

²⁶ Niajaniya saniniuujia, majaari naa nia quiniu quiniutianiya. Naacuajitij, cante tojishano pueyano quiniu paniya niajanijajinijinioni, cuno cuara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuara quiiria juhua nia seru, maninia na miiniuria niajaniya, naatej, taa cua miiquiaa niajanijacuaani.

²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaaji cua ritianura Sesaaca.

Jesu jeecasacari caapiqui cariyujuaru namijiaa
(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jiyanoehua queraatia pueyari Jesu nuhua-jiriquiaa. ³⁰ Jiyacaritij, caapiqui cariyujuaruuri nuu shuucuaaji cajitiuriquiaa. Nojori niishishacari Jesuuri nojori tajiriquiaa, nojoriiri nacanú coteequiaari:

—¡Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajanियarani?

³³ Jesu riucuatereeri:

—¡Jiyaniijianaa, canaa namijiaa quia jeecare!

³⁴ Jesuuri nojoriicua taraajeree. Nojori namijiaa quiareeri. ¡Nojoriiri niquijiacara quiquii! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinia
(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquijiose Betfagé tiacajiniani, Olivo nacuhua tuhuananu shuriucua. Cuniqiji, majaari puera tucuacaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

²—Cuno tiacajinia nia quiaare, noj pocuaji niquishiyatej. Niaari tii riuritanutaniya niquiojuaraca burro morotasano. Niocua na samaacartasee. Niocua miji na jaatucuyarohuanos, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhuacuaaja”.

⁴ Naa tohuaterequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaqueiaari Jerusalén tiacajinia quinia pueyara:

⁵ “Sión tiacajinia quinia pueya nia sequere: ‘¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’”.

⁶ Jiyacaritij, cuarta Jesu pueyari quiaquiaari. Nojoriiri naa miquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya niojoquiaari burro nijiniani, necojua nijinianio. Na nuhuaji, Jesuuri na nijinia cajirii. ⁸ Jiyanoehua queraatia pueyari tii quiriquiaa. Nojoriiri na tucuaque toqueya muevoquiaari nucuaco Jesuucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionaajuhuaaj, nojoriiri naa coteequiaari nacojonura: “¡Pueyanaa, niocua pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanoehua maniniaari pa Pueyaso! ¡Cuaara shuquiritiasano quiiria!”

¹⁰ Jesu tiuquishacari Jerusalén tiacajinia, puetunu tii quinia pueyajanaari jiuujiatecoquiaari. Sequetereeri:

—¿Cantejaara cunoni, tiuquiyani?

¹¹ Jesuta tiuquijionaari nojori riucuaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinijinio pueyano, Galilea jiyajinijinio.

Jesu jaacasacari seya niqutiojonaa Pueyaso Secojojua tiacariji
(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojojua tiacari matacainia tiuquiquiaari. Tii pueya niquishiiri seya niqutiojiyano. Jesuuri puetunu nojorijanaa tohuatanijoree. Cumaneeea tacatojojuaca juhuacutucua caponeetareeri, tee pueya niqutiojoriquiaa taucuaca cumaneeca, Pueyaso Secojojua tiajinia niqutiojosocoriquiano cumaneecaracujani. Mococoonu niqutiojonaa cajitiucua caponeetareejaariuhuj, tee mococoonu niqutiojosaariquiaacuajani Pueyasooacara catijasocoriquiano. ¹³ Jesuuri nojori sequeeree:

—Pueyaso sequesano cuajaari naa naajiotasaaquiaari tarijia:

“Cua quiquioori sesojosaanutaniya Pueyaso Secojojua tia”.

¡Niaari saniniuujia na jiyatecanu nohuasenuujuaca quiquiora!

¹⁴ Secojojua tiajinia na quishacarijia, cariyojuarujuri pueya, mariyata shipiiniquiujunaa pueyari nocua nijioquiaari. Jesuuri nojori naatanijoree. ¹⁵ Pueyacuara secjonaa jiyaniijianucuaari Moisés Naajioneejiniji niishitiojonaata Jesu shootariquiaa cusosuhua naatanijiyano. Jiyacaritij, naatujooriiri Secojojua tiajinia naa nacooriguiaa Jesujiniji: “¡Pa supuetanaa jiyaniijia David niquihuacuajinio supueno pueyano! ¡Nojuajaari pa Jiyaniijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucuaaree:

—¡Taaquiririnij! Na tojiyacujaniijia. Maniniacuajaari nojori sequesano. ¿Majateeri nia serojonu quiquiaacuaja tariucuaaanu Pueyaso Rupaajinia naa sequesanotej:

“Quiaari naatujoori niishitirii conaajanio, seetanujuanaa nojori maniniuhuaqueetanura quia Jiyarosano”?

¹⁷ Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

Jesu sesacasacari higo naana, muetuhuo na quiniuucua
(Mr 11.12-14, 20-26)

¹⁸ Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuanao. Nocua canujiyareeri. Shaanoori quiriquiaa, saa na jaamasucuaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riucuaaree:

—Seetanujuanaa nia sequeyanijia, niaa jaara Pueyasoo cuaja tiuujiaa quiri nioojia nia niqijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhananu sequere: “Quia jaataare shoniacu caminiajinia”. ²² Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu, cante na jiyaronani
(Mr 11.27-33; Lc 20.1-8)

²³ Jesuuri Pueyaso Secojoua tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequeree saniniuujia:

—Janiyari nia nequesotanutaniya saniniunijia. Naa jaara cua riucuaare, janiyacua nia sequerohua saniniunijia cante cua jiyaroquiaari naa cua miiniuriani. ²⁵ Naacuajitij, cua riucuaare coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaaritia juayonuutano coteequiaari jiyasohuaja. Tama seque-toorejaaritia:

—Paa jaara na riucuaareni: “Pueyaso na jiyaroquiaari”, pa sequerucua: “¿Naa-tee? ¿Casaara na niishitiojosanoocua nia tiuyaquiquianucuaaraarini?” ²⁶ Saniniuujia, paa jaara sequereni: “Nojuajaari nareja pueya jiyarosano quiquiaari”, ipuereta quiniutianiyari pajaniyara! Paacuajaari niishiyani puetunu pueyajanaari sequequiaa Tiuquinijiona Juana seetanujuanaa Pueyaso sequesano caminiujiunia quiquiaari.

²⁷ Naaratej canaa Judiocuaca jiyaniijianucuaari Jesu riucuaare:

—Maja canaa niishiniu canariquitijia na jiyaroquiaaritiaj.

Jesuuri nojori sequeree:

—Janiyajuhua, majaari cua sequenu quiniutianiya niajaniya cante cua Jiyaronani, naa cua miiniuriatej.

Jesu pohuatasano pueyano niquihuajiniji

²⁸ Jesuuri naa nojori sequerohuacuhua:

—¡Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiaritia”. ²⁹ Neyanuuri saaja na riucuaare: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰ Na queeri naa na nuhuajishana sequereejuhua. Neyanuuri na riucuaare: “Maniniacuaja, cua quena. Janiya quianutaniyani”. Na nuhuaji, majaari na quianu quiquiaari saaja. ³¹ ¿Taa nia sequeyani pueyanaa? ¿Teyano cuno caapiqui necohuajinijiniote na que tojijia quiquiaarini?

Nojoriiri Jesu riucuaare:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneca masejonaa pa pueyajiniji Roma tiacajinia quijia jiyaniijiarani, mariyata paanaturinio, cuno nia soosano pueyari nia shocotanutaniya Pueyaso muerasura nojori quiniuria. ³² Cua tojitiare casaara naa cua sequeree niajaniyani. Tiuquinijiona Juanri niqiaari na niishitiojonura juucua niajaniya, maninia nia quiniuria Pueyaso niqiaara. Majaari nia tiuuniu quiquianu nocua. Niaari saaja na tojiaquiquianu. Cumaneca masejonaa nia soosano pueya cutaraari nocua tiuquianu, paanaturinio. Nojoriiri na tojitajara quiquianu. Niaacuajaari na niquiquianu taa cuno sesa miijia pueya maninia pueyara jatacanuni. ¡Niajaniyaritiaj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

Jesu niishitiojosano cuhuariquia cojuanaa sesa miijiacajiniji

(Mr 12.1-12; Lc 20.9-19)

³³ Socua tamonu cua pohuatasano nia tojiri. Tamonu pueyanoori cuhuariquiajinia uva nattooquiaari. Maninia maticoquiaari puetunu na shuriuquiocojuanaari maja

casaa tiuquitianura nocua. Saajia quejaquiaarijiaariuhuj uva rapijiojuara, na caaca reratesaanura. Jyaconajara tiaquiaarijiaariuhuj, cojuana niquijiaara tiji nohuasejo-juaacuaji. Na nuhuaji, na camaruuri tamasaca pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuacaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacua. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricuajani. ³⁵ Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na camaruuri socua queraatia seya jiyaramiquiquiaariuhuj. Nojoriiri naquiya mi-shaaquiaarijiaariuhuj.

³⁷ 'Na nuhuaji, na camarujuanaari tama sequereejaja: "Jiyaroreera cua niyanu. Maja cutara nojori rerequetenu quiniutianiya cua niyanu". ³⁸ Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetooreejaja: "¡Cunocujajaqui cuhuariquia camaru quiriqiano na que niti, na que jaara shaajequee! ¡Pa morej! Naacuajitij, pocua nio cuhuariquia camaruhuara quiquiini". ³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojitianaari na riucaturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricujaja nio, tariucuaaanu Pueyaso Rupaajiniani?:

"Pueyari saitia tiariquiaa. Nojoriiri tamonu saajia jiyaniquiaari saajia sesarujaujau naasucua. Cuno saajiacujajaari socua panishano saajia quiquiaari. Jiyaniijia-janaari naa na jiyatequiaari. Cuno saajia tiaree maninia cutaraari. Pueya niquishacari, jiuujiatecoreeri".

Naa naajiotasano quiyacuajaari.

⁴³ 'Camarucuaanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojitianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. ⁴⁴ Cuno saajiajiniji saniniuujia, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacaaura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocuaca tojitasacari naa Jesu pohuatasantej, nojoriiri niishiquii Jesuuri nojoriijiniji pohuatariquiaa miriqui.

⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujuanaa Pueyaso sequenu panishano caminiuujia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

Jesu pohuatasano miriqui camishacari queranacunujiniji (Lc 14.15-24)

¹ Na nuhuaji, Jesuuri socua niishitiojoquiaari miriqui pohuatasanota. Naa pohu-
ataquiaariti:

²—Pueyasoori pueya masuya nojoritia na quiniuria shuquiriaatia, taa tamonu cutara
jiyaniijia miiquiaari mijiriacaani. Cuno jiyaniijiaari shuquiriaatia quiniu paniriquiaa
queraatia pueyata, neyanu camishacari. Naaratej, jiyaniijiaari queraatia sumatute-
quiaari, queraatia pueya miaquesocoriquiano. ³ Na nuhuaji, na seya jiyaramiquiri-
iri na masuusano pueya numootenura nojori niniuria queranacunura. Masuusano
pueyari maja na niniu paniniu quiquiaari saaja. ⁴ Jiyaniijiaari socua tamasaca na seya
sequeree: “Cua masuusano pueya nia numootejocoo. Nia sequeese: ‘Jiyaniijia nia
sashiya. Puetunujuanaari tari jeenucuasano nia queranacunura. Tari puecoosaaree na
juyaca, na shiyoshitishano seyano. Tariucua rariyosanoori quiya. Ritia nia nimia. Nia
miaquenuusee’ ”. Naa na seya na rootanu nuhuajitij, jiyaniijiaari nojori jiyaramiquirii.
⁵ Masuusano pueyari saaja tojitiaaquirii. Puetunujuanaari tama na panishanojuaaja
miiriquiaa saaja. Tamonuuri na cuhuariquiajinia quiaaree. Tamonuuri na casami
niquitiojosaqui quiaareecujua. ⁶ Tamasacaari saniniuujia jiyaniijia seya quiooree.
Jiyanohua naquiya nojori miiriiri. Na nuhuaji, nojori puecootureeri. ⁷ Jiyaniijia
niishishacari, jiyanohua juaariiri. Nocuaji na soldadohua jiyaramiquiriiri cuno monaa
nojori naminiuria saniniuujia, nojori tiaca na catijiatanurajuhuj. ⁸ Na nuhuaji, jiyani-
ijiaari na seya sequeree: “Puetunujuanaari tari jeenucuasano pa queranacunura cua
niyanu camishacari. Cua masuusano pueyacuajaari saaja cua ruuretareeni. Namitia
majaari nojori nijionu quimiaa, saaja cua rerequetajaca nojori quiniuucua. ⁹ Quiarijia
cutara, nia quiaare nuu tuneequetajajinia, tee queraatia pueya tajiniuucuaataquiaacua-
jani. Nia masuure puetunu nia niquishano pueyajanaa”.

¹⁰ ‘Na seyari quiojoquiaari tiaca nucuaco. Nojoriiri puetunu na riuriatasano
pueyajanaa rerejoteree, maninia pueya, sesa pueyano. Queranacunuusaquiiri
mishiquiaari masuusano pueyata. Camarnu seyari puetunu pueyajanaa cushiyote-
quiaari camishacari cushiyosano toqueya, nojori tiuquitasacari tiaco queranacunura.

¹¹ ‘Na nuhuaji, jiyaniijiajanaari tiuquiquiaari masuusano pueya na niquiniuria.
Tamonu pueyano niquishiiri camishacari cushiyosano toqueeju. ¹² Jiyaniijiaari na
sequeree: “Pueyanonaa, ¿taa quia tiuquimiaa camishacari cushishano toqueejuni?”
Pueyanoori sanaa na tojiriqiaa. Majaari na riucuanu quirii. ¹³ Cunora, jiyaniijiaari na
seya sequeree: “¡Nia morojore na cashacucua, na numatucuanio! ¡Niocua na jartarohua
carijiniacuma ninishiqui! Tii sapuenutaniyari. Na quiaa miaquenutaniyajaariuhua
na noonuta, naquiya na miishacari”.

¹⁴ ‘Naajuhuj pueyanaa, Pueyasoori queraatia pueya masuya quiarijia na muerasu
nojori quiniuria. Saniniuujia, secajaari saquiriojosaanutaniya nojorijinijinio seetanu-
juanaa na muerasura nojori quiniuria.

Jiya jiyaniijia cuaara niquitiojosaaria na sequesano cumaneeca (Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucuaji tama nojori niishitiojo-
toonurajaaja. Nojoriiri Jesu pocuatenu paniquiaari sesa juucua, nocuara nojori saquiri-
ojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii
Jesuucua, jiyaniijia Herodes panijiaa pueyata. Herodesri jiyaniijia César jiyatesano
quiquiaari Judea jiyajinia jiyaniijia na quiniuria. Fariseocuaca jiyaramiquishano
pueyari Jesu sequeese:

—Niishitiojonanaa, canaari niishiyani quiaari maninia pueyano. Majaari quia
cuaracashionu. Quiaari seetanujuanaa casaa niishitiojoquiaa cutara taate canaa

naata maninia quiniu Pueyaso niquliarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquniu pueya.¹⁷ Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijiajanaa Césarra, taa cuno tahue César sequequiaar-icujani. Quiajanियariuhuj, ¿taa quia sequeya saniniunijia?

¹⁸ Jesuuri ritia niishiquii, nojoriiri naa na nequesotariquiaa na sapojonuta. Nocujaji nojori sequereeri:

—Sapuenu maninia quijiacanaa, ¿casaara nia saniniujiya naa janiyani? ¹⁹ Cua niquti-tiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqutirii cumanee. ²⁰ Jesu niquishacari cuno cumanee, nojori neque-sotareeri:

—¿Cana naaquiti nio nocuani? ¿Cana sesate nocua naajiotasanojaniuhuj?

²¹ Nojoriiri na riucuaaree:

—Jiyaniijia César naaquicujaja, na sesajuhuj.

Jesuuri nojori sequereeri:

—Jaara naa quiritij, César nia niqutiojore tama na casaajaaja. Nojuacuajaari na camaru. Saniniuujia, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesanotej, jiuujiatecoreeri. Na tarinitiatoreeri. Quiojijiarohuari.

¿Macunucuate samiitiaconutaniuhua?

(Mr 12.18-27; Lc 20.27-40)

²³ Cuno juucaja, Saduceocuaaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiiria mashiquio, mueya na mueratenura tarajanu niti. ²⁵ Tariija, tamonu pueyanoori niya quiquiaari. Siete niqiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoju. Naaratej, na mashiquioori camitishaaquiaari neyaca tarajanuta. ²⁶ Nojuajaari muetuhuoju shaajequiaarijuhuaj. Naaratej, neyaca tara-januuri mashiquio camiquiaarijuhuaj. Nojuajaari mueyaju cusoquiaarijuhuaj. Naa cusonuquiaariiri puetunu cuno siete canuujuaanaa. ²⁷ Na nuhuaji, mashiquioori cu-soquiaarijuhuaj. ²⁸ Saniniuujia, macunucua jaara samiitiacorohua, ¿teyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹ Jesuuri nojori riucuaaree:

—¡Niaari jiyanohua jiyajeneya nia niishiyaquishacari Pueyaso Rupaajinia naajio-tasano, Pueyaso cumaacanio! ³⁰ Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaa quiniutianiya juhua jiyocuacaanu quijiaa Pueyaso seya, maja camiyosano. ³¹ Socua cua toji-tiare. Macunucuaari seetanujuaanaa samiitiacoriquianohua. ¿Majateeri nia serojonu quiquiaacujaja taa Pueyaso sequequiaari niajaniyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuate seetanujuaanaa Pueyaso muerasuni, nojori cutaraari pueyara-caanu quijiaa.

³³ Pueya tojishacari naa Jesu niishitiojosanotej, nojoriiri jiyanohua jiuujiatereeri.

Puetunu Pueyaso rootasanojinijianaani, teyanote socua na pueya to-jishocoriquianoni

(Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniujiuniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijinijinioori Moisés Rootasanojiniji niishitiojona quiquiaari. Na saniniujiuniuria, nojuajaari Jesu nequesotaree:

³⁶ —Niishitiojonanaa, ¿Pueyaso rootasanojinijini, teyanote socua pa to-jishocoriquianoni?

³⁷ Jesuuri na riucuaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitiajatajanaanio”.

³⁸ Niocuaajaari socua na pueya tojishocoriquiano Pueyaso rootasano. ³⁹ Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰ Puetunu Moisés rootasanojuanaa, mariyata puetunu tariucuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaaja.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

⁴³ Jesuuri nojori sequerohuacuhuj:

—Taaquiririnij. Jaara naa quiritij, ¿niaateeri niishiyacuaja casaara David sequesquiaari “cua Jiyaniijjata” Cristocuaaraarini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequesquiaari: ‘Cua miaquetajara quia cajirijiaara, janiya cuara quia paraa shocojotare quiocuajijiaatijia’ ”.

⁴⁵ ¿Cristotucua taa David niquiohuacuaji supuereni, David jaara Cristo jyaniquiya na jyanijjata?

⁴⁶ Nojoriiri Jesu niquitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

23

Jesu juaashacari Fariseocuaca, Moisés Rootasano niishitiojonaanio

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, canaa na saquiriojosano pueyano:

² —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. ³ Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaaja. ⁴ Nojoriiri tama nojori niishishanojuaaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jyanohua niiquia casaa pueya nitiasocoriquiano. Nojoriiri maja que-naaja na naacutanu quiquiaa na juaashiquia sacasaruta. ⁵ Nojoriiri puetunu na

miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiqiora cusupuequiaa pueya shootiasocoriquiano. Naajuhuaaj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucuacujuara na tunujutaquiaa saaja pueya niquishocoriquiano, pueya shootianura nojori. ⁶ Nojori jaara masusaare tamonu tiajinia queranacunura, nojoriiri secooquiaa socua panishano cajitiujinia nojori cajitiuniuria tia camaru shuriucua. Naajuhuaaj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. ⁷ Nojori rucuanijosacari tiacajinia, nojoriiri paniquiaa pueya saruhatanura nojori. Panitiuquiaajaarihua pueya jiyaniuniuria nojori “niishitiojonaata”.

⁸ 'Niajaniya saniniuujia cua pueyanaa, majaari pueya shanacunu niaacua, nojori jiyaniuniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajanijajanaari niarta Pueyaso pueya tapueyocuaca. ⁹ Naajuhuaaj, majaari tamonu pueyano mijiria nia jiyaniuniu “cua queta”. Niaacua-jaari niquiriyatu Queraca. Nojuajaari jiyocuacaanu Quinia. ¹⁰ Naajuhuaaj, majaari pueya nia shanacunu niaacua, nojori jiyaniuniuria niajaniya “cua jiyaniijata”. Niaari niquiriyatujua Jiyaniijiaracacujia. Nojuacuajaari Pueyaso jiyarosano nia Jiyaniijiaranoni. ¹¹ Cante jiyaniijajanaa cutara niajanijajinijinioni, cuno cuara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuaaj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijiaara jiyatesaanutaniya cutara.

¹³ '¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuaaj, niaari cocuaatia miiquiaa! ¡Niaari sapuenu juhua maninia quijiaca niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasocua. Naajuhuaaj, majaari pueya nia tarinitianu nojori tiuuniuria Pueyasocua, na muerasura nojori quiniuria.

¹⁴ '¡Niaari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacajuhuaaj! Niaari sapuenu juhua maninia miijiaca niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacua-jitij, niaari nojori tiaca masequiaa tama niajanijarajaaja. Naa nia miiniu nuhuajitij, niaari shitiarayocua secojoquiaa najuhuana Pueyaso, pueya niquiara, maninia pueya nia jyanishaanura. Naaratej, niaari socua jyanohua saniitiosaanutaniya tamasaca pueyajiniji.

¹⁵ '¡Niaari puereeta miishaanutaniya Moisés Rootasanojiniji niishitiojonaanaa, niajanijajuhuaaj Fariseocuacanaa! Niaari sapuenu juhua maninia miijiaca niquishano. Niaari tucuacaanu rucuanajoquiaa jiya caco, shoniniacu caminia taquijirianio, tamonu nia niishitiojonura najuhuana Pueyaso tojijiara na quiniuria juucua, juhua tama niajanijajaaja. Nia niishitijosano pueyano jaara nia tojijiara quiri, nojuajaari socua jyanohua saniitiosocoriquiano quiya niajanijajiniji, sesa nia rootasano tojijia na quiniucua.

¹⁶ '¡Niaari taraatia miishaanutaniya mosanucuananaa! Niajanijari juhua cariyujuaru, cante tamonu pueyano jaatucuya juucuanu, nuu nia niishiyaquishacari. Naacua-jitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secojojua tiajinia pueyaracaanu quiyacuaani, naajuhuaaj, cua sequesano quiajanijari seetanujuanaa tohuateenutaniya quiara”. Saniniuujia, niaari sequequiaa, Pueyaso Secojojua tiajinia

oro jaara sequeyaquishaare, majaari na sequesanoocua tiuushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequere: “Taa Pueyaso Secojoua tia pueyaracaanu quiyacuaani, naajuhuaaj, cua sequesano quiajanियari seetanujuanaa tohuateenutaniya quiara”. Niaari sequequiaa cuno sequesanoocuaari maja tiuushaanu. ¹⁷ ¡Mosanucuaanaa, niaari juhua cariyoujuaru! ¿Teyanote socua pueresanoni, cuno orotee, Pueyaso Secojoua tia soj? Cuno oroori naa pueresanora jiyatesaaquiaari saaja Pueyaso Secojoua tiajinia na quiniuucua. ¹⁸ Niaari rootaquiaajuhuaaj, pa sequesacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: “Seetanujuanaa quia sequeyanijia. Naatej, taa casaa Pueyasocuara catijiaja juhuacutuucua niasano jiyanoehua maninia quiyacuaa Pueyasorani, naajuhuaaj, cua sequesanoori saaja maniniajuhuaaj. Majaari cua sapojonu”. Naacuajitij, niaari sequequiaa, paa jaara naa sequerene, paa cuaara miiria pa sequesano. Saniniuujia, niaari sequequiaa: “Pa sequesanoori najuhuaana sequesano, paa jaara saaja Pueyasocuara catijiaja juhuacutu sequerene. Majaari nocua tiuushaanu”. ¹⁹ ¡Cariyoujuarujurinia! ¿Majateeri nia niishiniu? ¿Teyanote socua maniniani, Pueyasocuara catijasocoriquiano casaatee, Pueyasocuara catijiaja juhuacutu soj? Catijasocoriquiano casaari narejajuhuanajaj, jaara Pueyasocuara catijiajaacua niasoo quiyaquiri. ²⁰ Naaratej, cante Pueyasocuara catijiaja sequeree seetanujuanaani, nojuajaari maja saaja Pueyasocuara catijiaja na sequenu quirii. Nojuaja cutaraari na caco niasano sequereehuaaj. ²¹ Naajuhuaaj, cante Pueyaso Secojoua tia sequeree najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaaja, Pueyaso Secojoua tia na sequesacari. ¡Pueyasocuajaari na Secojoua tiajinia quijia! ²² Naajuhuaaj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereehuaaj, Pueyasouanaa sequereehuaaj, jiyocuacaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, niajanijuhuaaj Fariseocuacanaa! Niaari sapuenu juhua maninia miijiaca niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaguesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuajani. ¡Niaari saniniuujia socua pa tojishocoriquiano Moisés rootasano tojitiaaqui quiaa! ¡Naacuajitij, majaari maninia pueyano nia quiniu taa Moisés rootaquiaaricuajani! ¡Majaari nia taraajenu quiquiaa niarta pueyanoocua! ¡Majaari nia tiuuni Pueyasocuua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, ¡naa nia tojitiarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia niishitiosacari Moisés Rootasanojiniji juucua, niaari juhua cariyoujuaru cante narta cariyoujuaru jaatucuya juucua. Niaari juhua tamonu pueyanouhuaaj. Na ratusacari, nujujua taquirii na mashacajinijiri. Socua na ratusacarihua, ¡saaja cuartia miataaree juhuaajanियari!

²⁵ ¡Niaari cocuaatia miiquiaa, Moisés Rootasanojiniji niishitiojonaanaa, niajanijuhuaaj Fariseocuacanaa! Niaari sapuenu juhua maninia miijiaca niquishano. Niaari juhua noo pueyajuhuaaj, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanoehua curuutuucua quiyajaa. Nio miriqui cua sequesano nia niishiri. Nioojaari naa quiyajuhuaaj. Niaari nohuasenuujua, jamuejaciono. ²⁶ ¡Cariyoujuaru Fariseocuacanaa, nia ratujua jiniacuma nia jeequere coteenu, nia miacojua jiniacumano! Naacuajitij, na cuaqueyari maninia jeequesano quiniutianiyajuhuaaj.

²⁷ ¡Niaari taraatia miishaanutaniya, Moisés Rootasanojiniji niishitiojonaanaa, nia-

janiyajuhua Fariseocuacanaa! Puetunu niajanijajanaari sapuenu juhua maninia miijiaca niquishano, juhua macunucua quiquio shanohua niquishano, cohujata noshijosano. Saniniuujia na jiniacuma quiyari sacuaraatia jaanujua pueya nucuhua mocuaca. ²⁸ Niaari naajuhua. Niaari sapuenu juhua maninia pueya niquishano. Saniniuujia nioojiaari jiyanoehua sesa, jiyanoehua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhua Fariseocuacanaa! Niaari sapuenu juhua maninia miijiaca niquishano. Niaari macunucua niojotajara shanohua niquishano shipinijioquiaa, tariucuacaanu pueyara Pueyaso sequesano caminiujiuniaa nucuahuacuaji. Naajuhua, niaari tariucuaaanu Pueyaso tojitiajaca puecoosano quiquio maniniushitijia. ³⁰ Naa nia miishacartij, niaari juhua sequequiaaruhua: “Paa jaara shipinijosaaquiaari pa supuetanaa quishacarijia tariucuacaanuni, paa maara nojori cojiyaquiquiaari cutarani, nojori puecoosacari Pueyaso sequesano caminiujiuniaa”. ³¹ Saniniuujia, naa nia sequesacartij, niaari tama niaacuara toreejaacujua. Naaquiiri cuno tariucuacaanu Pueyaso sequesano caminiujiuniaa puecoonaacuajinio supuenocujua. ³² Naa Pueyaso sequesano caminiujiuniaa puecoonaacuajinio supueno nia quishacartij, Pueyaso Jiyarosano nia morejuhua, nia tucuatnura nia supuetanaa cotesano.

³³ ¡Sesa miijiaca pueyanaa, niaari noonacuraca, juhua sacocua! ¿Niaateeri jiyaniya niaari saniitioyaquishaanutaniya mani quiquiojinia nia supuetanaata? ³⁴ ¡Cua tojitiare! Janiyari Pueyaso rupaa caminiujiuniaa jiyaramiquiniutianiya niaacuani, Pueyaso Rupaa niishijiacajuhua, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijijianaa, naquiya nia miiniuria nojori. ³⁵ Niaacuajaari niishiya, coteenujanaa mosaaquiaariiri Abel, maninia miijia pueyano. Naa puecoosaaquiaariiri queraatia Pueyaso tojitiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiacajinia, Pueyasoocua catijiasaqui shuriucua. Monu porocua nia quiniucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuacaanu Pueyaso tojitianaa puecoosaanuucujanaa. ³⁶ Seetanujanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

*Jesu nujuquesacari Jerusalén tiacajinia quinia pueyacua
(Lc 13.34-35)*

³⁷ ¡Jerusalén tiacajinia quinia pueyanaa, jiyanoehua taraajeya niaacuaniija! Niaari Pueyaso sequesano caminiujiuniaa pueya puecojuaca. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucua nia taraatia nia miyaquishaanucujua cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajanija. ³⁸ Cua tojitiare. ¡Niaari nia quiquiojiniji sanaajasaanutaniya niiquiji! ³⁹ Seetanujanaa nia sequeyanijia, majaari socua nia niquiniu quiniutianiya janiya, niaa cuara cua tiuquishacariuhua sequerejaatijia: “Pueyaso cuara shuquiritiiria pa jiyaniija quiriquiano na jiyarosano.”

24

*Jesu pohuatasacari, Pueyaso Secojojua tia niyartasaanutaniya
(Mr 13.1-2; Lc 21.5-6)*

¹ Jesuuri Pueyaso Secojoua tiajiniji tohuataarohua. Nata canaa quiojosacari nu-cuaco, canaa, na saquiriojosano pueyani, canaari nocua catecanoquiaarini. Canaari Jesu niqutiriquiaa Pueyaso Secojoua tiani, shanohua niquishano tia. ² Jesuuri saa canaa riucuaareejaa:

—Jaa, na niquiyacujanijia. Niaa cumaati maninia na niquiyacujua. ¡Seetanujuanaa nia sequeyanijia, cuno tia niaa na niquiyani, cunoori niyartasaanutaniya puetunujua-naa! ¡Majaari quenaaja tamonu saajia manu quiniutianiya tamonu caco!

Taa pa niishiniutianiyan quera jiya puequesacari

(Mr 13.3-23; Lc 21.7-24; 17.22-24)

³ Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaaja, canaari na nequesotareeni:

—Canaa quia sequere ¿taacari Pueyaso Secojoua tia niyartasaanutaniyani? Naa-juhuaj, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, ¿taacari jiya puequenutaniyani?

⁴ Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuaacari supuenutaniya. Nojoriiri tama na cuaqueyajaaja sequenutaniya: “Janiyacuja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyani. ⁶ Naajuhuaaj, niaari pueyapue miaquetoojonujiniji tojiniuuniutianiya, niya, tamonu jiyacajinianio. Niaari miaquetoojonura miananajotoonujiniji tojiniuuniutianiyajuhuaaj. Niaa jaara naa tojiniuuritij, majaari puerenu. Naa quiniutianiyari mijiria. Naajaa, juhuanoujaajaari maja jiya puequesacari quiniutianiya. ⁷ Tamonu pueyari tamasaca pueyata miaquetoojonutaniya. Tamonu jiyajiniji jiyaniijiaari tamonu jiyaniijiaata miaquetoojonutaniyajuhuaaj. Jiyacaritij, jiyanoehua miaajenuuri quiniutianiya queraatia jiyacajinia, cusonuunujuhuaaj. Rijiaari queraatia jiyacajinia jiuuquiujiutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyani naquiya miishacari, mijiria cua tiuquiyaquishacarijaa.

⁹ Jiyacaritij, niaari jiya camarucua niqutiojosaanutaniya cua muerasu nia quiniuu-cua, naquiya nojori miitianura niajaniana. Niaari puecoosaanutaniya. Puetunu jiyacajinijinio pueyajanaari nia niquniu paniyaquiniutianiya, cua muerasu nia quiniuucua.

¹⁰ Jiyacaritij, queraatia cucua tiuuniaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquniu paniniu quiniutianiya tarijia narta Pueyaso muerasu. ¹¹ Queraatia sapojonuujuaaca Pueyaso rupaa pohuatanaari supuenutaniya. Nojoriiri queraatia pueya sapojonutaniya.

¹² Jiyacaritij, sesa miiniuuri socua jiyanoehua jiyacatenutaniya mijiria. Cunora, queraatia pueyari narta pueya paniniu tarinitianutaniya.

¹³ Saniniuujia, cucua tiuujia jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuuca quijiara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuatasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ Pueyaso sequesano caminiujiunia Danielri tariucuaacaanu pahuataquiaari sacuaraatia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaraatia casaa niquri Pueyaso Secojoua tiajinia nujuatesano, niocua mashiri.

¹⁶ Jiyacaritij, canapuate Judea jiyajinia quiyani, nojori cuaara mashiria tuhuananuhua. ¹⁷ Canapuate na tia cacojiria quiyani, nojori cuaara tiuquiyaquiri na tiajiniaaco maja na tarishiniuria na casamiicua. ¹⁸ Canapuate cuhuariquiajinia

quiyani, cuaara tacateyaquiuhua na tiajiniohua na toqueyacua. ¹⁹ Jiyacaritij, jiyanohua taraatia quiniutianiyari maajipohuara, canapuete manajaatohua quiyani, mariyata canapuete supuejaca muerasu jitiaani. ²⁰ Juhuacarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. ²¹ Cuno quishacari, jiyanohua naquiya miiniuuri quiniutianiya seetanujuanaa. Jiya coteenujiniji, jiyano naquiya miiniuuri maja na niquishaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

²³ Jiyacaritij, majaari nia tojiniu, tamonu jaara sequere niajaniya: “¡Cua tarajanunaa, Cristoqui tari tiuquiriohua! Nia quiyano”. Naajuhuj, majaari nia tojiniu tamonu jaara nia sequere: “Nooj, jati quiyatej”. ²⁴ Queraatia sapojonuujuaacari supuentaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujua: “Janiyari Pueyaso sequenu panishano caminiujuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniya jaariuhuj. ²⁵ Pueyanaa, naa cua sequesacari niajaniyatej, janiyacuaajaari juhuacarijia nia numootereeni. ²⁶ Naaratej, majaari nia quianu cua pajenucua, pueya jaara sequere niajaniya: “Cristo jati cariiquia jiyajinia quiya”. Naajuhuj, majaari pueya nia tojiniu nojori jaara sequere niajaniya: “Miji, Cristo sohuacamara cajiya. Nia niquishiijia”. Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. ²⁸ Tee casaa mocua quiyani, mohuari tii rerequejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiyani Cristo tiuquishacariuhua
(Mr 13.24-37; Lc 21.25-33; 17.26-30, 34-36)

²⁹ Jesuuri naa canaa pahuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jitiyajacaari tetecatunutaniya. ³⁰ Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanohua nojori taraajenuta. Na nuhuaji, cua niquitiuniutianiyari cohuaja najacajinia roseyano, jiyanohua cua cumaacata, jiyanohua shacantuuca. ³¹ Janiyari jiyocuaaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacujanaa. Nojori tojitiasacari trompeta jonenenu jiyanohua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

³² Nia pahuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiyua. Naa nia niquishacaritij, niaari niishiya tacarejonuqui quera quiniutianiya. ³³ Naajuhuj, niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquiuhua. Tari jiya puequesacari quera. ³⁴ Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanajuaja, nojori cuaara puetunujuanaa cua pahuatasano niquirijaatijia. ³⁵ Jiya, jiya cajiniocuanio, cunoori shaajenutaniya. Cua sequesano

cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenu-taniyani, mariyata taacari cua niniutianihuani. Jiyocuacaanu quiniaa Pueyaso seyari maja na niishiniujuhuaj. Majaari quenaaja cua niishiniujuhuaj. Saaja cua Queeri tamajaaja na niishiya cutara.

³⁷ 'Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. ³⁸ Jiyacaritij, nio jiya pajaashitiaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhuj. Juhuajaniya necohua camiyoteriquiaajaariuhuj Noé jaara tiuquitiaquiaarijiaatijia na puereetuca buquejiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniuujia. ⁴¹ Naajuhuj, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. ⁴³ Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinjinio
(Lc 12.41-48)

⁴⁵ 'Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinjinio jiyatequiaari juhua na tia camarura, narta seya na mianuutenura maninia, puetunu ju-ucajanaa. Cuno seruuri niishijia quiquiaari, na camarnu tojijiajuhuaj. ⁴⁶ Cuno seruuri shuquiriaatia quiniutianiya na camarnu jaara na riuriasuhua maninia poonijiyano taa na camarnu sequequiaari na nuhuajiriacuajani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. ⁴⁸ Saniniuujia, cuno seru jaara sesa miijia quiri, nojuajaari tama sequenutaniya-jaacujua: "Cua jiyaniijiaari jiyanoehua tarishiniutianiya". ⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenuujuaca cojiniutianiya-jaariuhua queranacunuunura. ⁵⁰ Naa juhuajaniya na quishacaritij, na jiyaniijiaari jiyacari na jiyajenetenutaniya. ⁵¹ Naa sesa na quiniuucuatej, na jiyaniijiaari jiyanoehua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano miijiaa pueyata. Nojoriiri tii nujuquetunutaniya. Na quiaa miaquenuunutaniyari, naquiya na miiquiosacari.

25

Jesu pohuatasano diez niyacoojorijiniji

¹ 'Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhuani. Nojoriiri juhua diez niyacoojori quiniutianiya, canapuate camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijinijiiri mosanucua quiquiaari. Tamasacaari saniniuujia niishijiaa quiquiaari cutara. ³ Mosanucuaari

saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaca cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuriiri. Nocuaji niishijiaca niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹ Cuno cinco niishijiaca niyacoojoriiri nojori riucuaaree: “Maja. Maja maninia canaa niqutionura niajaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. ¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiotiuuri mishiquiosaaree. ¹¹ Na nuhuaji, mosanucua niyacoojoriiri tiuquiijoquiaariuhua. Tia tohuateyaji jiiquioonuusuhuari. Sequetureeri: “¡Jiyaniijianaa, jiyaniijianaa, canaacuaji quia riatareja tiotiu!” ¹² Jiyaniijiaari saa sequereejaa: “Seetanujuanaa nia sequeyanijia, maja cua niishiniu niajaniya”.

¹³ Naa na pohuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniu-tianihuani, casaa juucatej.

Miriqui Jesu pohuatasano cumaneeca poonitijionaajiniji
(Lc 19.11-27)

¹⁴ Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pohuataquiaaritij:

—Tamonu jiyaniijiaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijasocoriquiano. ¹⁵ Naacuajitij, coteenu seru niqutiooree cinco mil cumaneecaari. Tamonuuri niqutiosaaree dos mil. Tamonuuri niqutiosaaree mil cumaneeca. Na jiyaniijiaari naa nojori niqutiojoquiaari na niishishacari nojoriiri rimiajata niishijiaca quiquiaari, socua cuno cumaneeca nojori canijianura. Na nuhuaji, nojori jiyaniijiaari quiaquiaari. ¹⁶ Cinco mil cumaneeca jiiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijiaara. Naacuajitij, cuno seruuri socua cinco mil cumaneeca reratequiaari coteenu na jiiitiasanojiniji. ¹⁷ Naajuhuj, dos mil cumaneeca jiiitianaari socua dos mil cumaneeca reratequiaari na jiiitiasanojiniji. ¹⁸ Mil cumaneeca masenaari saniniuujia maja na poonitijionu quiquiaari na jiyaniijia niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. ¹⁹ Seya jiyaniijiaari camueenujuquiaari jiyanohua. Socua tiuquiquiaariuhuari na cumaneeca na masejonuhua na seyajiniji. ²⁰ Coteenu nocua tiuquiquiaariiri cante cinco mil cumaneeca niqutiosaaquiaaricujani. Nojuajaari na jiyaniijia sequeree: “Jiyaniijianaa, quiaari cua niqutioicanu cinco mil cumaneeca. Niya quiyari socua cinco mil cumaneeca quiaara, cua poonijosanojiniji cua reratesano”. ²¹ Na jiyaniijiaari na sequeree: “Maniacuaja. Quiaacuajaari maninia cua seru. Majaqui najuhuana cua tiuuniu quiquianu quiocua. Quiaacuajaqui maninia miiquianu seaja cua niqutiosanota quiajaniya. Janiyari quia jiyatenutaniya queraatia jiiitanarani. Miji quia tiuquimia. Niya cuata quia quishii shuquiriaatia”. ²² Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niqutiosaaquiaaricujani. Na jiyaniijia sequereeri:

“Jiyaniijianaa, quiaari cua niqutiocanu dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji”. ²³ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuana cua tiuuniu quiqiuianu quiocua. Quiaacuajaqui maninia miiqiuianu secaja cua niqutiosanota quiajaniya. Janiyari quia jiyatenutaniya queraatia jiiitianarani. Miji quia tiuquimia. Shuquiriaatia niya quia quishii cuata”. ²⁴ Na nuhuaji, tamonu seruuri tiuquishiijuhuaj cante mil cumaneeca niqutiosaaquiaaricujani. Na jiyaniijia sequereeri: “Jiyaniijianaa, janiyari niishiyani quiaacuajaari quiarta pueyacia taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuj. ²⁵ Naaratej, janiyari quia cumaneeca pueretacanu nohuasenuujuacani. Cunora janiyari quia cumaneeca jamocanu raamani. Quia niquri. Niya quiyacuaja quia cumaneeca puetunujuanaa”. ²⁶ Na jiyaniijiaari na juaarii: “¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuj? ²⁷ Quiaa jaara cua jiyaniqiuianu naa quijiatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. ²⁸ Jiyacaritij, jiyaniijiaari tamasaca na seya sequeree: “Nio sesa cua serujiniji nia jaariutiare cua mil cumaneeca. Nia niqutiore cutara cua maninia seru, cante diez mil jiiitiaa tariucuajani. ²⁹ Naacuajitij, cante casaa jiiitiaacuani, nojuajaari socua niqutiosaanutaniya, queraatia jiiitaja na quiniuria. Saniniuujia, cante secaja jiiitiaa najuhuanani, nojuajaari secaja na jiiitasano jaariutiasaanutaniya puetunujuanaa. ³⁰ Nio najuhuana quijia seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

Jiya puequesacari, puetunu pueyapuejanaan nequesoreesaanutaniya saniitiosoriquiano

³¹ Puetunu cua seyajanaari jiyocuacaanuji cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijiajanaa cua quiniuria mijiria. Janiyari shanohua puereeta jiyaniijia cajituijina cajiniutianiya, pueya cua nequesoresacari. ³² Puetunu pueyapuejanaan cucua rerejotesaanutaniya puetunu nio jiyajiniujiajuana. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniya: “Miji, cua Que shuquiritasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori niajaniyara, maninia miijiaca nia quiniucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanesacari, niaari nia tiaco cua tiuquinijia. ³⁶ Toqueeju cua quishacari, niaari cua niqutioquiaari. Cusosu cua quishacari, niaari cua niqiniucua quiaja. Nujuatejojuajinia cua quishacari taraatia, niaari cucua quiujojua cua cumanijianuucua”. ³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niqiuquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqiuquiaari quiajaniya jiyamueyanoni? ¿Canaateeri quia raatequiaarini? ³⁸ ¿Taacari canaa niqiuquiaari quiajaniya canaa jiyajinia rucuaneyanoni? ¿Canaateeri canaa tijajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuj, taacari canaa niqiuquiaari quiajaniya toqueejuni? ¿Canaateeri quia niqutioquiaari toqueni? Maja. ³⁹ ¿Taacari canaa niqiuquiaari quiajaniya cusosuni, nujuatejojuajinianio? ¿Canaateeri quiocua quiujoquiaari canaa niqiniuria quiajaniya? Maja”.

⁴⁰ 'Janiyari cuno maninia pueya riucuanutaniyani: "Seetanujuanaa nia sequeyanijia. Naa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhuaj".

⁴¹ 'Na nuhuaji, janiyari cua muenecara nujuatiuyano sequenutaniyani: "¡Cua shuriucuaaji niiquiji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucuanesacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijuhuaj, majaari toque nia niqutionu quijia janiya. Nujuatejojuajinia cua quishacari, cusosu cua quishacarijuhuaj, majaari nia quianu quijia cua niqiniuucua quenaaja".

⁴⁴ 'Jiyacaritij, cuno pueyari cua nequesotanuniya: "Jiyaniijianaa, ¿taacari canaa niqiquiaari quiajaniya miaajeyanoni, jiyamueyanujuhuaj? Majaari canaa niqiniu quijia quiajaniya canaa jiyajinia rucuaneyano tiaaju, toqueeju quiyano, cusosu quiyano, nujuatejojuajinia quiyanujuhuaj. Canaa jaara naa quiyano quia niqiquiaarini, canaa maara quiocua taraajequiaarini". ⁴⁵ Janiyari nojori riucuanutaniyani: "Seetanujuanaa nia sequeyanijia, nia taraajeyaquiniuucua tamonu cua muerasuniyojuacua, niaari seetanujuanaa cucua taraajeyaquiquiaari". ⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniujia maninia miihia pueyari Pueyaso shuriucua quianutaniya, pueyaracaanu shuquiriaatia nojori quiniuria.

26

Judiocuaca camarucua roojotoosacari Jesu nojori quianura (Mr 14.1-2; Lc 22.1-2; Jn 11.45-53)

¹ Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niqitiosaanutaniyani, mosocoriquiano niyacutesanojinia teetesano.

³ Jiyacarijuhuaj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijiajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. ⁵ Nojoriiri tama sequetooquiaarijiaaja: "Maja pa monu Pascuara queranacusacari, paa mariqui pueya juaatiriiri".

Tamonu maaji totasacari na shanohua jaanutaja Jesuucua (Mr 14.3-9; Jn 12.1-8)

⁶ Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusonujiniji Jesu naatanishano quiquiaari. ⁷ Miaquejajinia Jesu cajishacari, tamonu maajiiri nocua catecanoquiaari. Shiitianiyojua shucuariquiaja pataconiyojua cacatariquiaari, cohuaja saajiajiniji quejasano. Tii quiriquiaari shanohua jaanutaja. Cuno jaanutajaari jiyanojua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa jaara niqiquiaari naa cuno maaji miishanotej, canaari juaaquioreeni. Noojiaqueya canaajinijioori naa sequeturee:

—¿Casaara cuno maaji niitiaree najuhuana shanohua jaanutajani? ⁹ ¡Cuno jaanutaja maara queraatia cumaneecara niqitiosaare, casamiiuniucua niqitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanoehua maninia quiria! ¹¹ Casamiijiuniucuaari niaata quiriquiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹² Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuatasaanutaniyajuhua puetunu jiyacajiniajanaa. Naa na miishano janiyani, majaari na niyajetasaanu quiniutianiya pueyaracaanu.

Judas tacartasacari Jesu, na quiatenura

(Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajinijinio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequeeseeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶ Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸ Jesuuri canaa riucuaaree:

—Paacuajaari miaquenutaniyani tari cua sequesano pueyano tiajinia Jerusalén tia-cajinia. Tii nia quiaare. Tia camaru nia sequeese: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹ Canaari naa miiquiaarini taa Jesu sequequiaari canaacujani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata miaquejajinia cajitiuriquiaa.

²¹ Canaa miaquenuusacari, Jesuuri canaa sequere:

—Seetanujuanaa nia sequeyanijia, tamonu niajaniyajinijinioori cua tacartanutaniya, cua paraa na quiatenura janiya, nojori monura janiya.

²² Canaari jiyanoehua taraajequeeni naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riucuaaree:

—Cante cuata tureneetaa pa miacojuajinijini, nojuacuajaari cua quiatenutaniya mosocoriquiano. ²⁴ Janiyacuajaari mosaanutaniyani taa janiyajiniji naajio-tasaaquiaaricujani tariucuaaanu Pueyaso Rupaaajinia. Saniniuujia, jiyanoehua taraatia miishaanutaniyani cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

²⁵ Na quiateriquiano Judasri socua Jesu nequesotareejuhujaj:

—¿Janiya jiyoteeri Niishitiojonanaa?

Judas riucuaaree:

—Taaquiriirinij. Quiajaniyacuaaquiniatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu nijaniyajanaa. ²⁸ Nioori cua nanaca, Pueyaso jiyanooniuria nijaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. ²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijiajanaa cua quiniuria. Jiyacaritij, jiyanohua maninia quiniutianiyari cuno quishacari. Paari mariyata jiyanohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya
(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua. ³¹ Jesuuri jiyacari canaa sequeree:

—Puetunu nijaniyajanaari cucua tiuuniu tarinitianutaniya quiari niucuaaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niaaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴ Jesuuri Pedro sequeree saaja:

—Seetanujuanaa nio niucujani, caacaraja niunijiyaquishacarijia, quiaari naa pachtejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuara moora janiyaqui, naajaa, majaari cua seetanu quiniutianiya quiocuaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

Jesu secojosacari Getsemaní cuhuariquiajinia
(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquiiioquiaari canaa na saquiri-ojosano pueyata. Cuno cuhuariquia sesaari quiquiaari Getsemaní. Jesuuri canaa sequeree:

—Niyaja nia cajitiuri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niqiuoahuanio. Jesuuri juhuacate-cara taraajequiaari. Jiyanohua tacaariquiaajaariuhaj. ³⁸ Jiyacaritij, Jesuuri nojori sequeree:

—¡Coojia quera jiaqueya jiyanohua cua taraajenuta! ¡Quera cusoyanijia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucujaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quena, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niqushuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujiushaare. See-tanujuanaa, poojiaari maninia miiniu panijia. Pa cuaqueyari saniniuujia sasaca quiy-acujua. Naacujitij, majaari pa naata maninia miiniu Pueyaso cumaquiaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuara miishaariaqui taa quia paniyacuajani.

⁴³ Jesuuri na pueyacia tacateyarohuacuahuaj. Maquetiuyano nojori riuriatasuhuariuhuj. Nojori namijiaari saaja seecutayariquiaa jiyanohua nojori maquenu paniniutia.

⁴⁴ Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucuajani. ⁴⁵ Na nuhuaji, na pueyacia nimiohuariuhuj. Nojori sequesuhuari:

—Quiaritia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniu-tianiya taa na panitiuyacuajani. ⁴⁶ ¡Nia saneecuaure! Pa quiaare. Cumaji tari cua quiateriquiano.

*Moronucua na paraa jaatucutasacari Jesu
(Mr 14.43-50; Lc 22.47-53; Jn 18.2-11)*

⁴⁷ Jesu pocuasacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judocuaca camarucua jiyaramiquishano pueyajuhuj. Nojoriiri nijinaquetucujaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujajaari nojuaja. Niocua na quiasee ritia”. ⁴⁹ Naacujitij, Judas tiuquishacari Jesuucua, na sequeseeeri:

—Quiocua tiuquiyanijia Niishitiojonanaa.

Jiyacarijia na nujuureeri. ⁵⁰ Jesuuri na sequereeri:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijinaquetucujaja mueruu na shuucuaji. Nata jaateree secojonaa jiyaniijia seru numocoori. ⁵² Jesuuri na sequereeri:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuj? ⁵³ ¿Quiaate ni-shiyaquiyajuhuj, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhuj, janiya jaara naa cua Que sequere na cojuatenura janiyani, ¿tariucuacaanu Pueyaso Rupaaajinia janiyajiniji naajiotasanotucua taa tohuateereni?

⁵⁵ Jiyacaritij, Jesuuri na paraa sequereeri:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucujanaa Pueyaso Secojoua tiajinia cajiiano, pueya cua niishitiojosacari. ¿Casaara tii nia quiaaquiquianu janiyani? ⁵⁶ Naajaa, naacujitij puetunu nia miishanojuanaari tohuateenutaniya, taa tariucuacaanu Pueyaso Rupaaajinia naajiotasaaquiaari janiyajiniijicuajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriy-atuni. Puetunu canaajanaari mashiyocuatreeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuquiaari jiyaniijia Caifáscua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucujaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniijia tiajiniara. Cuno puereetuuca tia shocuaari mataca quiquiaari. Pedroori tii carijiniacuma tiuquiquiaarijiuhuj. Jiyaniijia Caifás seya tajinia cajishiiri, na niquniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucuatajanaa pajeriquiaa pueya, nojori saquiriojotanura na sapojonuta Jesuucuaara, na mosaanura. ⁶⁰ Queraatia pueyari najuhuaana Jesuucuaara saquiriojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. ⁶¹ Nojoriiri naa sequere:

—Cuno pueyano naa sequecanutej: “Janiya jaara Pueyaso Secojojua tia niyartareni, janiyari na tianu tucuatanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocujaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiriquiaa. Nocujaji secojonaa jiyaniijiaari Jesu sequere:

—¡Cua tojiri! Paa niya quia Pueyaso niqiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaare:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niquniutianiya Pueyaso miaquetajara cajiyanu. Niaari cua niquniutianiyajuhuj jiyocuacaanuji tacateyanohua cohujajinia.

⁶⁵ Pueyacuara secojonaa jiyaniijia jaara tojiquiaari naa Jesu sequesanotej, tama na toque sutareejaarijia na juaaniutia. Nata quiniaa sequereeri:

—¡Juhuej! ¡Nia tojishuriucuaara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuaraatiaari na sequesano Pueyaso niqiarara! ¿Paatucua casaara sashiri socua tamonu saquiriojotanura nocuaraarini? Niaacuaja shusha tojitiaree tama na sequesanojuaaja sacuaraatia Pueyaso niqiarara.

⁶⁶ ¿Taa pa miiniutianianoj? ¿Taa nia sequeyani?

Nojoriiri pueyacuara secojonaa jiyaniijia riucuaare:

—¡Cuaara mosaaria!

⁶⁷ Jiyacaritij, tamasacaari Jesu jiquioco riocojoree. Na jiquioco na masetejotureejaariuhuj. Tamasaca saniniuujia, Jesu namijia na morotunu nuhuaji, na mocoritia na piquitiuriiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucujaji

(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niqishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuanajojua, cuno Galilea jiyajinijinio pueyanotani!

⁷⁰ Pedroori jiyacari seetaree puetunu pueya niqiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuateyajiria canujiyaree. Jati, tamonu niyacoori na niquiriiiuhuj. Cuno seruuri jiyacari tii quiniaa sequere:

—¡Nio pueyanoori cuno Jesuta quijiajuhuaj, cuno Jesu, Nazaret tiacajinijinio pueyanoni!

⁷² Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocuajaari niishiya, seetanujuanaa nia sequeyanijia!

⁷³ Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajinijinio! ¡Quiaari juhua nojori pocuaajuahuaj!

⁷⁴ Jiyacaritij, Pedroori socua jiyacaterree sapojonura. Naa cuno pueya sequereeri:

—¡Pueyasocuajaari niishiya maja cua niishiniu cuno pueyano, niaa na sequeyani! ¡Pueyasocuajaari cua sequesano tojiya! ¡Majaari cua sapojonu nijaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa cuno niucuja Jesu sequesano niishiQUI: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua matacainijini tohuataquiaari ritia. ¡Jiyanohua nujuquequeeri na taraajenuta!

27

Judiocuaca camarucua niquitiosacari Jesu jiyaniijia Pilato (Mr 15.1; Lc 23.1-2; Jn 18.28-32)

¹ Tariquicuaji, puetunu pueyacuara secojonaa jiyaniijianucujanaari rerejoree narta Judiocuaca camarucua. Nojoriiri roojotooree taa na miitiuniutianiya Jesu na motenurani. ² Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyanoohua macuhajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niqutionuhuara cuno treinta cumaneeca. ⁴ Judasri nojori sequeese:

—¡Janiyaqui sesa miiriucuaani, najuhuana cua quiatenuucua maninia pueyano nijaniya!

Nojoriiri saa na riucuaareejaa:

—Naajaa. Maja canaa miishano. Cunocuajaari tama quia miishanojuaja.

⁵ Judasri nojori cari cuno treinta cumaneeca jatatee Pueyaso Secojoua tiajinia. Tiji quiacuahuari. Na riquiajiniji morotaquiaari sohaneyocuaari. Naa cusoquiaariiri. Sohaneyocuaacuaji jaasutaari. ⁶ Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷ Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau panioru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari ruconaa jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacuajitij, Pueyaso sequenu panishano caminiujiunia supuetana Jeremías sequesanoori maninia tohuateequiaari. Nojuajaari na sequequiaaritij:

“Nojoriiri na treinta cumaneeca pataquiaari cuhuariquia masenura marau paniyuru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’ ”.

Pilato nequesoreesacari Jesu
(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

¹² Secojonaa jiyaniijianucua, canaa Judiocuaca camarucuanio, nojori jaara Jesu-ucuaara saquiriojotariquiaa, Jesuuri sanaa tojiriquiaa nojori. ¹³ Naaratej, jiyaniijia Pilatoori Jesu sequeree:

—¿Majate quia tojiniu nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquiya quenaajani.

Pilato sequesacari Jesuuri mosaanutaniya
(Mr 15.6-20; Lc 23.13-25; Jn 18.38–19.16)

¹⁵ Puetunu Pascua juucarajanaa, Pilatoori nujuatejojuajinia nujuatesano pueyano cartenu jitiquiaari. Judiocuaca panishano pueyanoori cartesaquiaari pueyaracaanu.

¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jyanishano. Puetunu pueyajanaari na niishijia sesa na miiniuucua. ¹⁷ Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuaanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosana.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaquiriquiaa, nojori tojtianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanoocujini!”

²⁰ Jiyacaritij, secojonaa jiyaniijianucuaari, canaa Judiocuaca camarucuaata pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. ²¹ Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuahuaj:

—¿Casaarateni? ¿Sesa miiritijiaara?

Pueyari saaja socua jiyanoahua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniuujishacari Jesu juucua, pueyari saaja socua jiyanoahua na-cooriquiaa. ¡Socua jiyanoahua juaaquioriquiaari! Pilato niishishacari maja na naata

quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuqutiareeri. Na shuquitiasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaja!

²⁵ Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niqiuoacuano!

²⁶ Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macatiniuria. ²⁹ Nojoriiri juhuacontucua maaturee na nacaquerajuhuj. Na nuhuaji, na cushititurii Jesuuri. Naajua niquitiosaarejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucua mojuquetacoquiaari. Nojoriiri naa na macatirii:

—¡Jejee, Judiocuaca jiyaniijiana!

³⁰ Nojoriiri Jesu riocojoree. Na naajua na jaariutiatureeri. Nataja na naca piq-uitiuriiri. ³¹ Naa nojori macatiniu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetajara niyacutesano. ³³ Nojoriiri tiuquijiosee sesa miijia puecoosaqui. Pueya puecoosaquini, na sesa quiquiaari “Gólgota”. Nioori pueyano rupajinia sequeya “Pueyano nacaco”. ³⁴ Quiniqui, soldadohuari Jesu raateree vino juucua, casaa piyajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijoree nojori niishiniuria cante Jesu toque poonutaniya nerani. Naacujitij, tama nojoriijaarijia Jesu toque seraatiaquiaari. Naa tohuateequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari: “Pueyari saitia tacuarishijoree cua toque nojori seraatianura”.

³⁶ Na nuhuaji, cuno soldadohuari cajitiuquiaari Jesu na cojuanura.

³⁷ Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenuujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹ Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojoua tia niyartare, quia naata na tianu tucatanuhua jiuujianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Niyanu quiri seetanujanaa!

⁴¹ Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macatiriquiaajuhuj. Tama sequetooriquiaajaarijia:

⁴² —Saaja tamasaca naatanijiojuaquiiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiarijia pa niquiara niyacutesanojiniji, nocua pa tiuuniuria. ⁴³ ¡Pueyasooqua tiuujia naatiijia! Jaara naa quiritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴ Cuno caapiqui nohuasenuujuaca Jesu shuriucua teetejosano quiriquiaani, nojoriiri Jesu macatiriquiaajuhuj.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵ ¡Panacari, mijiriaari ninishiquiria quiquii! Pananu mueecosacari cuhuatemohuari. ⁴⁶ Jiyacaritij, Jesuuri jiyanojua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujiunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura.

⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

⁵⁰ ¡Jiyacaritij, Jesuuri jiyanojua nacarohua! ¡Na nuhuaji na sohanu tohuataniriiri! ¡Cusoqueeri! ⁵¹ Pueyaso Secojoua tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. ¡Jesu cusosacari, cuno toqueeri sutequee jiyocuacaanuji jiyocuara puetunujuanaa! ¡Rijiaari jiya jiuuquiutiaquiaari jiyanojua! ¡Sairi jiaquetacoquiaari noojiaacoji! ⁵² ¡Macunucua raacaari riataquequiaari! ¡Queraatia tariucuaaanu Pueyasooqua tiuuniaari samiiticoquee na raacajinia! ⁵³ Jesu jaara samiitiaquiaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacu mueataquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niquitiuquiaari jiuuquiutiaano, socua puetunu nojori niquishanojuanaanio, nojoriiri jiyanojua puereturee. Sequetureeri:

—¡Nio pueyanoqui seetanujuanaa Pueyaso Niyanu quiquianu!

⁵⁵ Queraatia maajipohuari tii quiriquiaajuhuj. Nojoriiri tucuacaanuji shootia-turiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríanio, mariyata Zebedeo niquiohua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiquiaari Arimatea tiacajinijinio. Jiyanojua casamiriaca quijiaari. Na sesa quiquiaari José. Nojuajaari tarijia Jesu tojijia quiquiaari. Joseeri Jesu cusonu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniooreeri

quenaarunque cohuaaque toquejina. ⁶⁰ Na nuhuaji na niaquiaari tama na raacojaar-
ijia. Quiarinio raa quiquiaariiri, José jiuutianishano saajiajina. Na nuhuaji, Joseeri
puereetuuca saajia saquitiniquiaari raa tiotuuria. Quiacuhuari. ⁶¹ María Magdalenaari
na sesaanucuata cajituriquiaa raa caneja taquijiria.

Soldadohua cojuasacari Jesu raa

⁶² Pascuara jeenucuanu juuca nuhuaji, secojona jiyaniijianucuaari Pilatoocua quio-
joquiaari Fariseocuacata. ⁶³ Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na seque-
sano saminio na quishacarijia. Nojuajaari sequeja: “Janiyari jiuujianaraca juucajina
samiitianutaniuhuaani”. ⁶⁴ Nocuaji na raa quia cojuatere maninia tiosano, jiuujianaraca
juuca cuara shocorejaatijia, na pueya mariqui niucua macu nohuasequeeri. Nojori
jaara na nohuasere, nojoriiri sequenutaniya Jesu samiitiarohuacuaa. Nojori jaara naa
sapojore pueyatej, socua jiyacatenutaniyari Jesu sequesano, nojuaja jaara sequecanu:
“Janiyari Pueyaso Jiyarosani”.

⁶⁵ Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia
paniyacuajani.

⁶⁶ Nojoriiri soldadohua nujuatejoquiaari raa nojori cojuanura. Raa tiotiuuri rupana-
cusaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca seamaanajinijinio juhuaque-
sacari, shusha cuhuatesacari, María Magdalenaari raa niquiniucua quiariquiaa na
sesaanucuata. ² ¡Canashiyaquiji, rijiaari jiyanoehua jiuuquiutiaree! Cunoori quiquiaari
Pueyaso seru rosenuucua jiyocuaaanuji raacua. Raa tiotiu saajia saquitinishiiri.
Na nuhuaji, saajiaacua cajiriohuari. ³ ¡Pueyaso seruuri niquishaaquiaari shacantuuca
juhua miacana! Na toqueeri jiyanoehua cohuaaque quiquiaari, juhua sohuanatuu.
⁴ Raa cojuatunaari jiyanoehua shiriiquituuquiaari nojori niquishacari Pueyaso seru.
Jiyanoehua tetecatureeri. Na puerenuta socua cusojonuureeri. ⁵ Maajipohua jaara
tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesano-
jina mosanotej. ⁶ Maja niya na quiniu. Tari samiitiarohuano, taa nojuaja sequequiaari
niajaniyacujani. Miji. Nia niquishushiiria na masaqui. Shaaqui. ⁷ Ritia nia quiaaro-
hua. Na saquiriojosano pueya nia sequesuhua: “Jesu tari samiitiarohua. Nojuajaari nia
puetanutaniya Galilea jiyajinia. Niaari jati na niquiniutianiya”. Janiyacuajaari tari nia
sequereeni. Naa nia pohuatasuhua na pueya.

⁸ Maajipohuari masaacujutanuuriquiohua raajiniji na puerenuta, na shuquiriniuti-
ajuhua. Nojoriiri socua netecuatiuyarohuaquij, canaa na pohuatanuhua Pueyaso
seru sequesano nojori. ⁹ ¡Jiyacaritij, Jesujuanaari canashiyaquiji nojoriicua muetaquee
nuujinia! Nojori saruhuatereeri. Maajipohuari nocua catecanoree. Na cariquimiaji
mojoquetacoreeri. Jesu niohuaca quiatureeri. Jesu shootiatureeri na jiuujiatenuta.
¹⁰ Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuara
quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua
niquitiuniutianiya.

Raa cojuanaa pohuatasano

¹¹ Maajipohua quiojosacariuhua, noojiaqueya raa cojuanaajiniinioori tiacajinia quiojoquiaariuhua pueyacuara secojonaa jiyaniijianucua nojori pohuatanura nojori niquishano. ¹² Pueyacuara secojonaa jiyaniijianucuaari canaa Judiocuaca camarucuta rerejoree na roojotoonura taa na miitiuniutianiyani. Na nuhuaji, nojoriiri queraatia cumaneeca niquitioquiaari raa cojuanaa, pueya niquiara nojori pohuatanura tamaatia nojori niquishanojiniji. ¹³ Soldadohuari naa rootasaaquiaaritij:

—Niocua naa sequere pueyatej: “Canaa maquesacari, Jesu pueyaquiiri niucua nohuasequee Jesu quete raajiniji”. Niocua naa sequeretej. ¹⁴ Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shiniajanutaniyani jaara juaari. Naacuajitij, majaari na juaaniu quiniutianiya nijaniya.

¹⁵ Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasaareecuajani. Nojori cuaracashishanoori ritia caminiujuushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuucuanu. Jesuuri canaa sequequiaari canaa quiojonura tiriara, tii canaa coquetonura nata. ¹⁷ Canaa niquishacari Jesu quiyano tii, canaari nocuara mojuquetacoquiaari canaa shuquiritianura nojuajani. Tamasaca canaajiniinioori jiyaniriquiaa maja naasucuaari Jesu. ¹⁸ Jesuuri canacua catecanoree. Canaa sequereeri:

—Janiyari puetunu cumaacajanaa niquitiosaareeni, Jiyaniijiajanaa cua quiniuria jiyocuacaanu, mijirianio. ¹⁹ ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa nijaniya, nojori tojishocoriquiano. Nia niishiri nio: ¡janiyacuaajaari niaata quiniutianiya pueyaracaanuni, jiya cuara puequerejaatijia!

MARCO NAAJIOTASANO JESUCRISTOJINIJI

Cariiquia jiyajinia Tiuquinijiona Juan poojotasacari Pueyaso rupaa
(Mt 3.1-12; Lc 3.1-9, 15-17; Jn 1.19-28)

¹ Pueyaso Niyanu Jesucristojiniiri naa coteetasaaquiaari pohuatanutej.
² Tariucuacaanu pueyara Pueyaso sequesano caminiujiunia Isaíasri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojijia nojori quiniuria. Isaíasri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano.

³ Na nacanuari tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’ ”

⁴ Quiari naataja, Tiuquinijiona Juanri seetanujuanaa naa miiquiaari cariiquia jiyajini-atej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniuiniiji, moojinia cua tiuquinijionura niajaniya! ¡Pueyasocua sesa nia miishanojiniji nia jiyanoori puetunujuanaa!

⁵ Puetunu Judea jiyajiniinio pueyajanaari nocua nijioquiaari nojori tojitanura nojuaja, Jerusalén tiacajiniinio pueyano. Cuno pueya jaara sesa na miishano pohuataquiaari Juan niqiuara, Pueyaso niqiarajuhua, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitiasano quiquiaari. Na cajin-iocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷ Juanri pueya niqiuara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyani-ijiajanaa cutara janiyajiniji. ⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaaca nia jitianura, seetanujuanaa maninia miijia nia quiniuria.

Jesu tiuquinishacari moojinia
(Mt 3.13-17; Lc 3.21-22)

⁹ Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niqiquiaari riatelyano. Pueyaso Sohuanu niqiriiri nocua roseyano juhua mococoonu. Nocua tiuushiiri. ¹¹ Jiyacaritij, jiyocuacaanuji tojishaaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanohua quia timitiaanijia!

Samaruhua jiyaniijia saniniujiushacari Jesu
(Mt 4.1-11; Lc 4.1-13)

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara.
¹³ Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojijiaara Jesu

quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

Jesu coteesacari poonijionu Galilea jiyajinia

(Mt 4.12-17; Lc 4.14-15)

¹⁴ Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojo-taquiaari tii, maninia pohuatasano Pueyasojiniji, taa Pueyaso jiitianutaniya na muera-suni. ¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojitiajaca nia quiniuria.

Jesu saquiriojosacari pueya, na tarajariquiano

(Mt 4.18-22; Lc 5.1-11)

¹⁶ Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajinia. ¹⁷ Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

¹⁸ Nojoriiri ritia na shiyaru tiujiaquiaari. Jesuta quiojijareeri.

¹⁹ Socua shiitaniyoyua na tacoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰ Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano

(Lc 4.31-37)

²¹ Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. ²² Pueyari jiyanohua jiuujiatequiaari na rootasano nojori tojishacari. Jesuuri juhua jiyaniijiajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. ²³ Samaruraca pueyanoori Pueyaso secojojua tiajinia quiriquiaa tiijihuhuj. Nojuajaari nacaquiaari:

²⁴ —¡Nazaret tiacajinijinio Jesunaa!, ¿quiaateeri tari canacua nimiaa, canaa quia shaajanura? Janiyari quia niishiyani. ¡Quiaacuajaari Pueyaso Nyanu!

²⁵ Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

²⁶ Jiyacaritij, samaruuri jiyanohua taraatia miirii cuno pueyano. Jiyanohua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷ Puetunu pueyajanaari shiriiquitiquiaari. Tama nojoriijaarijia nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

²⁸ Pueyari ritia caminiujuquiaari Jesujiniji puetunu Galilea jiyajiniajanaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹ Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juantanio. ³⁰ Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa.

³¹ Jesuuri nocua canujiyaree. Na juaashiquiajiniji cusosu sanaseeri. Na cusonuuri seetanujuanaa ritia tajiqluaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³² Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyanio. ³³ Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijijaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinia

(Lc 4.42-44)

³⁵ Jesuuri jiyanoehua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶ Na nuhuaji, Simónri Jesu pajenuucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:

—¡Puetunu pueyajanaa quia juuretaa!

³⁸ Jesuuri saaja nojori sequeree:

—Pa quiaare juhuari catecanaataja tiacajinia. Tii pa pohuatarehujua Pueyaso rupaa pueya niqiuara. Janiyacuajaari cunora jiyasohuaja tohuataareeni.

³⁹ Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secojojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijihuaj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaaji mojqetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

⁴¹ Jesuuri nocua taraajequiaari. Na juaashiquia niaree nocuajari. Na sequereeri:

—Taaquiriirinij. Quia naataniniu paniyanijia. Quia cuaqueya cuara jeequehuara.

⁴² Jesu jaara naa na sequequiaaritij, na lepraari ritia cushiriiquii. Na cuaqueyajiniji shaajequiaariiri na cusonu. Na cuaqueyari maniniara quiquiaariuhua. ⁴³ Na jiyaroyaquishacarijia na naatanishano pueyano, Jesuuri jiyanoehua na rootaquiaari. Na sequereeri:

⁴⁴ —¡Cua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niqitishii, na cartenuhuara quiajaniya, pueya tajinia quia rucuanefonuhua juhuajaniya. Mariyata ritia quia niqitiore quia seru Pueyasooacara catijasocoriquiano. Naa quia miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niqiniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiaquishaqui rucuanajojua. Naajaa, puetunu cuno jiyajiniji pueyajanaari saaja nocua nijioquiaari na niqiniuria.

2

Jesu naatanishacari cumatacuruhuana cusosu

(Mt 9.1-8; Lc 5.17-26)

¹ Na rucwanejonu nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tiajinia tiuquiriohua, ² queraatia pueyari nocua nijioquiaari cuno tiajinia. Nojoriiri tiaco mishiquiaari, tohuatayajiiuhuj. Jesuuri cuno pueya niquiara pohuataquiaari Pueyaso rupaa. ³ Jesu quishacari tii, nocua patasaaquiaari pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyara-caanu, cumatacuruhuana na quiniuucua. ⁴ Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuatayaji. Nocuaiji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijiana cuhuataturee tiaari. Na nuhuaji, tia cuhuo-cojiniji, Jesuucua roshinitiasaareeri cusosu na matujinia. ⁵ Jesuuri cusosu patanaa pueya niquirii seetanujanaa nocua tiuyano. Naaratej, Jesuuri cusosu sequeree:

—Quiyanaa, sesa quia miishanojiniji quia jiyanoorii taricujanijia.

⁶ Moisés Rootasanojiniji niishitiojonaari tii cajituriquiaa. ⁷ Nojori tojishacari Jesu jiyanojano cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooniu sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanojua sacuraatia! ¡Saaja Pueyaso cutaraari na naata pa jiyanooniu!” ⁸ Jesuuri tamajaaja ritia niishiquiaari nojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojijani? ⁹ ¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuhuj: “Quia sanere. Quia matu quia pataarohua”? ¹⁰ Seetanujanaa nia sequeyanijia, janiyari quiarijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiiitiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

¹¹—Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niquiara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaar-itij, na shuquiritiasacari Pueyaso:

—¡Majaari quenaaja pa niqiniu quiquiaari naa miishanotej!

Jesu sequesacari Leví na nuhuajiniuria
(Mt 9.9-13; Lc 5.27-32)

¹³ Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojoniaari Pueyaso rupaa. ¹⁴ Na nuhuaji, Jesu quiojosacari na saquiriojosano pueyata cuniquiji, Jesuuri Leví niquimíaa cajiyano Roma tiacajinia quijia jiyaniijiaa cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucujaja, Jesuuri Leví tiajinia miaqueriquiaa. Leví tiajinia miaquenuuriquiaajaariuhua queraatia narta cumaneeca masejonaa. Queraatia tamasaca pueyari nojoritia miaquenuuriquiaajuhuj, canapue Judiocuaca camarucua sequiquiaari sesa pueyatacuajani. Nojoriiri Jesuta miaquenuuriquiaa, Jesu saquiriojosano pueyatano. Jiyanojua queraatia pueyari Jesu rupuenaa quiriquiaa. ¹⁶ Moisés Naajioneejiniji niishitiojonaa, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacaatani? ¿Casaara cuno pojoritia na ratuyajaaniuhuj?

¹⁷ Jesuuri cuno pueya sequesano tojirii. Nojori sequeree miriquiiri:

—Jiyotuucaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacaacua. Niqviaari cutaranijia nia sequesano sesa miijiaca cua jiyanooniuria sesa nojori miijosanojiniji.

Pueya nequesotasacari Jesu, casaara na pueya miaquenu carteyaquiya, nojori shuquiritiniuria Pueyaso
(Mt 9.14-17; Lc 5.33-39)

¹⁸ Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuaacari naa miiquiaajuhuj. ¿Casaara naa quia pueya miyaquiyaajaaniuhuj?

¹⁹ Jesuuri nojori riucuaaree miriqui:

—¿Masuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ 'Seetanujuanaa nia sequeya cutaranijia, toque mocua cuhucoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhucoori socua queraaquetaaree. ²² Naajuhuj, quiariniacu uva caacari maja na naata racatasaanu shoque tariucuajinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuana niitiaa uva caacani, shoqueno. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoqueno.

Jesuuri naa pahuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajiniaaco na saquiriojosano pueyata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niqiquiaari, Jesu sequetureeri:

—¡Quia niqiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

²⁵ Jesuuri nojori sequere:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiiitaaquishacari na coseyaca? ²⁶ Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niqitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipiniinu quiquiaari pueya, samaatenu juucara. ²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeecasacari pueyano juaashiquia cuseetucojuara joojequetano (Mt 12.9-14; Lc 6.6-11)

¹ Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriqiaari pueyano, cuseetucojuara joojequetano juaashiquiaraca. ² Cuniqii quiniaa Fariseocuacaari shanacutariquiaa na niqiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucujua pueyano juaashiquia jeeccanutaniya samaatenu juucani?

Nojoriiri Jesuucua saquiriojotanu paniriquiaa, nojuaja jaara samaatenu juuca poonijiore. ³ Jesuuri jiyacari sesarucujua pueyano sequeree:

—Quia sanere. Niya quia nujuasee canaa tajinia pueya niqiara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niqutiariquiaa saaja, Jesu sequesacari naatej. ⁵ Jesuuri na shocuaqueya nujuatiuyano pueya niqiniijioree na juaaniutia. Nojoriicua taraajeriquiaajaariuhuj, cumajiuujiaaca nojori quiniucua. Majaari nojori niishiniu paniniu quiquiaari taa Pueyaso paniya pueyacua taraajeja pa quiniuriani. Jesuuri sesarucujua pueyano sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!
⁶ Fariseocuaca niqishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijaca pueyata pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhua Galilea jiyajiniji. ⁸ Pueya niishishacari puetunu Jesu maninia miishanojinijijanaa na cumaacata, queraatia pueyari nocua nijioquiaari na niqiniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhuj, Idumea jiyajinijinio pueyano. Nijioquiaarijuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhuj na niqiniuria Jesu. ⁹ Nocuaji Jesuuri na saquiriojosano pueya sequequiaari:

—Niocua juhuacaritia bote cojuare quiria, cua tacajara pueyacuaji, maja pueya tanuujunura janiya.

¹⁰ Jesuuri jiyacari jiyanojua queraatia pueya naatanijioriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusunujiniji nojori naataconuhua.

¹¹ Samaruhuaraca pueya jaara Jesu niqitiquiaari, nojoriiri nocuara mojuquetacokuiaari. Naa nacatuquiaariiri:

—¡Quiaacuajaari Pueyaso Niyanu!

¹² Nocuaji Jesuuri nojori sequequiaari na juaaniutia, maja nojori sequenura pueya niqiara cante nojuajani.

Jesu saquiriojosacari doce pueya na pueyajinijinio, na rupaa pohuatariquiano (Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujani. Nocua nijioquiaariiri na jiyaniquishano pueya. ¹⁴ Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. ¹⁵ Nojori niqitioree na

cumaacaari, cusosuhua nojori naatanijionura, samaruhua nojori tohuatejonurajuhuj. ¹⁶ Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiohwa quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaa pueya maanujinijinio quiquiaari. ¹⁹ Quiquiaariijaariuhua Judas Iscariote, Jesu quiatequiaari mosocoriquianoni.

Judiocuaca camarucua sapojosacari, Jesu samaruhua cumaaca jiitiaa
(Mt 12.22-32; Lc 11.14-23; 12.10)

²⁰ Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijuhwa cuno tiajinia Jesuucua. Naacuajitij, majaari nojori naata miaquenu quiquiaari. ²¹ Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaajaariija:

—Jesuqui tari paatecara quiriijuhuanajaj!

²² Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niqutiorucuaa cuno pueyano. Cunora, samaruhua tohuatanijia pueyajinijiiri.

²³ Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴ Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasaanutaniya. ²⁵ Naajaariuhuj, pueyano jaara tapueyocucata juayonuutare, majaari nojori naata jatiqui quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijioquiaa samaruhuanu. Satanás jaara naa miiritij, cuno maara tari quiri na shaajasaanurajanaa.

²⁷ Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸ Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. ²⁹ Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocucacajinijinio
(Mt 12.46-50; Lc 8.19-21)

³¹ Jiyacaritij, Jesu nucuuari tiuquijioquiaari, Jesu tapueyocucacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicua. ³² Jesu shocuaqueya cajitiuniaari Jesu sequeturee:

—Quia nucuana quia tapueyocucata jati carijiniacuma nujuatiuya. Quia pa-jenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocucacajuhuj?

³⁴ Na nuhuaji, na shocuaqueya cajitiuniaa niqunijioreeri. Sequereeri:

—Nio pueyari cua nucua, cua tapueyocuacanio. ³⁵ Cante cua Que panishano miiijani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natoojouja pueyanojiniji

(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojtianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ² Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

³—Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. ⁴ Na jacutasacari, nucucotequiaariiri tajaaca. Shuhuari na miojoree. Majaari na moritianu quiquiaari. ⁵ Tajaacaari totequiaari sai tajiniaqueyajuahua. Majaari cuniqui puera jiya quiniu quiquiaari na maashiniuria. Naacuajitij, najuhuaana ritia moritiaquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiucua quiquiaari saniniuujia. Naaratej, majaari na muetunu quirii. ⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuaaj socua cien jajau tanajajiniji.

⁹ Jesuuri nojori sequeree:

—Cante numaacani, cuaara cua sequesano tojtiaara.

Casaarate miriqui pohuatasanoni

(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyano. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Caaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pohuatashiyacujua. ¹² Naacuajitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Naajuhuaaj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji

(Mt 13.18-23; Lc 8.11-15)

¹³ Jesuuri nojori sequequiaarijuhuaaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanoni? ¹⁴ Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuatana. ¹⁵ Noojiaqueya pueyari juhua nucucoto toteno jajau. Najuhuaana Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupaaajanaa noojiajinia natasano jaariutiaquiaa. ¹⁶ Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja

nujuacaraca moritiano jajau, sai tajinia na moritianuucua. Majaari na rishiniu. Naajuhuj, cuno pueya jaara saniniujiushaare taraatia, jaara naquiya miishaarejuhuj Pueyaso Rupaa tojijia nojori quiniuucua, nojoriiri ritia Pueyasocua tiuuniu tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaariuhuj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacujitij, nojoriiri juhua muetuhuo quiya. ²⁰ Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuj, tarajanuuri jiyanojua queraatia muetujua. Naajuhuj, cante Pueyaso Rupaa tojijia cutarani, nojuaari juhua maninia muetujua natau.

*Pueyaso muerasuuri juhua samari
(Lc 8.16-18)*

²¹ Jesuuri nojori sequerejuhuj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuj? Maja. Samaritiu jaara noshitishaare, morijiuucua morotashiyari, tiajiniaaco na cuhuatanura maninia. ²² Naajuhuj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiajanaa na cuhuatanura. Naajuhuj, Pueyaso Rupaa jaara nioojiajinia jamosaare, juhua muetunutanitari puetunu pueya niquishocoriquianojuanaa. ²³ Niajaniya, canapuate numaa jiiitiani, nia tojitiare cua pohuatasano.

²⁴ Jesuuri naa nojori sequequiaarijuhuj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyahuj. Naacujitij, niaa jaara capora quiriqia tamacata, Pueyasoori socua capora quiniutianiya niaarajuhuj. ²⁵ Cante na rupaa tojijiani, socua na niishitiojonutanitari. Saniniuujia, canapuate na rupaa tojitiaquiiani, secaja na niishishanoori puetunu jaariutiasaanutanijanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuj:

—Nia niishitiojonu saniriiri taa Pueyaso muerasu supuequiaani, Pueyaso jiiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiquiaari juuca, niucuanio. Maashiquiaariiri na camaru maquesacari, na niquishacarijuhuj. Tamonu juuca, na camaru tacatesacariuhua na natasano na niquiniuria, tariucua puereetuucaari quiquiaari. Majaari na camaru niishiniu quiquiaari taa na moritiareeni. ²⁸ Jiyari tamajaaja moritianojinia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiasa na noshiniuria. ²⁹ Na natau jaara noshimia, na senoonari na senoojua na racatasocoriquiano. Pueyaso muerasuuri naa miishaanutaniyahuj.

*Miriqui pohuatasano mostaza jajaujiniji
(Mt 13.31-32; Lc 13.18-19)*

³⁰ Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniu-jiuniuni, taa Pueyaso Rupaa poonijiya pueya jiuujiajiniani? Quiarijia nia pohuata-reeraj. ³¹ Pueyaso Rupaari pueya jiuujiajinia quiya juhua mostaza jajau. Mostaza jajauri jiyanoehua socua shiitianiyojua puetunu tamasa jajaujinijijiana, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari. ³² Mostaza jajau jaara natasaare, maashiyari socua puereetucara tamasa nataujiniji. Na cashacucuaari maashiya puereetucucara. Shuhuari na cashacucua cariquiaco nujuatujua shinishiQui.

Pueyaso Rupaari pueyano jiuujiajinia naa cumaacaracajuhua, na jataniniuria na tojijia, maninia miijia na quiniuria.

Jesu niishitiojosacari pueya saa na miriqui pohuatasanotaja
(Mt 13.34-35)

³³ Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴ Naacuajitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasanota. Tamajaaja nojori quishacari saniniuujia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio
(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶ Cuniquijia pueya tiujiatiuyareeri, nojori quianura caminia taquijiria. Na pueyari Jesuta quiojyaree cuno botejiniaja, tee nojuaja quiriquiaacuajani. Jesu quiasacari caminia taquijiria, tamasa boteeri nata jaatequetariquiaajuhua. ³⁷ Maja puera na quenaacoyaquishacarijia, maruuri paratuta canashiyaquiji jiyanoehua niquiaari nojoriicua nojori niuutiasacari. Paratuuri jiyanoehua cajiniuucuatequiaari mohuaca nojori botejiniaacumara. Nocuaji na boteeri tari quera tiuquitariquiaa mohuacata. ³⁸ Jesuuri jiyacari bote pajamaji maqueriquiaa juhujaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequetureeri:

—¡Niishitiojonanaa!, ¿majateeri quia puerenuujua paa tari tiuquitiaareeni?

³⁹ Jesuuri sanemaa. Paratu sequereeri, caminianio:

—¡Quia suraajere! ¡Tariucujaja!

Paratuuri tajimiohua. Caminiaari pootia maquee. ⁴⁰ Jesuuri na saquiriojosano pueya sequere:

—¿Casaara nia puereya puerani? ¿Niaateeri Pueyasoocua tiuyashijiaca quiyajaaruhua?

⁴¹ Nojoriiri jiyanoehua shiriiquitiurii. Tama nojoriijaarijia sequetooquiaari:

—¿Cantejaaranononi? ¡Paratu, caminiaari na tojirii!

5

Gerasa jiyajinijinio samaruhuaraca pueyanojiniji pohuatasano
(Mt 8.28-34; Lc 8.26-39)

¹ Na nuhuaji, nojoriiri caminia taquijiria tiuquiiioquiaari, Gerasa jiyajinia. ² Jesu tacasacari botejiniji, nocua niquiaariiri tamonu pueyano raacajiniji, macunucua nu-cuhua paaquiosaquiji. Cuno pueyanoori samaruraca quiquiaari. ³ Raacajinia quijia quiquiaariiri. Majaari na naata moronu quishaaquiaari quenaaja cumayocua ship-inishano casaata. ⁴ Pueyari juucua na morojouja, na cashacucua, na juaashiquia-canio. Saaja na turojotajaari. Majaari quenaaja na nujuataja pueyano quiniu quijia.

⁵ Pueyaracaanu tuhuananuhuacua rucuanejoquiaariiri, raacajinianio. Na rucuanes-josacari sariyacojojaari, juuca, niucuanio. Tama na cuaqueyajaaja piqijia saitiaari. ⁶Nojuaja jaara Jesu niqiquiaari tucuacaanuji, nocua netequiaariiri. Jesu cariquimiaji mojoquetaseeri. ⁷Jesuucuaa nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia secojiyanijia maja naquiya quia miiniuria janiya!

⁸ Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹ Jesuuri na nequesotaree:

—¿Taa sesanaacatequia?

Na riuacuareeri:

—Canaa jiyanoohua queraatiani, cunora cua sesa “Queraatia”.

¹⁰ Cuno samaruuri jiyanoohua Jesu secojoriquiaa maja nojori na taanuunura cuno jiyajiniji. ¹¹ Cushiyari jiyacari cateca naataja miaquenuuriquiaa tuhuananucari. Jiyanoohua queraatia cushiyari quiriquiaa. ¹² Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

¹³ Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tajojiniji totesee caminiajinaari. Puetunujuanaari tii shushiniuquiaari.

¹⁴ Cushiya cojuanaari jiyacari netecuaturuhua na shiriiquiniutia. Na tiacajinia pueya poojotanuuhua nojori niquishanoori, cuhuariquiacajinia quiniaa pueyano. Nocuaji pueyari nijioquiaari nojori niquniuria casaate quiquiaarini. ¹⁵ Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niqutiushiiri panaatia cajiyno, toqueraca. Naa nojori niquishacari nojuajatej, pueyari pueretuquiaari. ¹⁶ Jesu miishano niqutiuniaari cuno pueya pahuataquiaari taa samaruhuaraca pueyano miishaareeni, mariyata cushiyajinijinio. ¹⁷ Cunora, cuno pueyari Jesu secooteree na quianuhua cuniquiji, nojori jiyajiniji.

¹⁸ Jesu jaara tacaquiaariuhua na botejinia, cuno tarijia samaruhuaraca quijia pueyanoori nata quianu paniquiaari juucua. ¹⁹ Majaari Jesu paniniu quiquiaari. Na sequeree saajaari:

—Quia quiaarohua quia tiajinia quia pueyacua. Quia pahuatasuhua nojori taa Pueyaso miirii quiajaniani, quiocua na taraajenuucua.

²⁰ Pueyanoori quiaarohua. Nojuajaari pahuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

Jairo niyatujiniji pahuatasano, Jesu toque quiana maajijinijijihuaaj

(Mt 9.18-26; Lc 8.40-56)

²¹ Jesu jaara niuutiaquiaariuhua botejinia caminia taquijiriohua, queraatia pueyari nocua tiuquijioquiaari na quishaqui. ²² Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojojua tia jiyaniiija. Na sesa quiquiaari Jairo. Jaara Jesu niqiquiaari, na cariquimiaji mojoquetaseeri. ²³ Naa Jesu secojoree jiyanohuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

²⁴ Jesuuri jiyacari nata quiaaree, na saquirojosano pueyano. Puera jiyanoohua queraatia pueyari na nuhujiriquiaa. Jesu tanuujuturiquiaari. ²⁵ Cuno pueya tajinia quiriquiaajaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. ²⁶ Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaana na cumaneeca puecaquiaariiri na

naarojosaanura juucua. ²⁷ Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiasee pueya tajiniaari. ²⁸ Cuno maajiiri tama sequequiaarijiaaja: “Janiya jaara quenaaja na toque quiareni, janiyari naatanutaniuhuani”. ²⁹ Naacujitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaarjia: “¡Cua cusonu tari tajiyatema!” ³⁰ Jesuuri jiyacari niishiquii nojuaja na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquiriojosano pueyari na sequere:

—Quiaacuajaari queraatia pueya niquiya quia tanuujiyano. Quiaari najuhuana nequesotariquiohua saajuhaj: “¿Cante cua quiareeni?”

³² Jesuuri saaja na shocuaqueya niquinijioriquiaa, na niquiniuria cante na toque quiareeni. ³³ Maajiiri jiyacari tetecariquiaa na puerenuta. Jesu cariquimiaji mojuquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequere puetunu seetanujuanaari. ³⁴ Na nuhuaji, Jesuuri na sequere:

—Sanaunaa, cucua quia tiuuniuucua, quiaacuaja tari quia cusonujiniji naatarohua. Juhuajaniya quia quiaarohua. Quia cusonucujaja tari tajiyatemohua quiocuaji.

³⁵ Jesuuri cuno maajiicua pocuariquiaajaa pueya tiuquiiijosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajiniaari.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸ Nojori jaara tiuquiiioquiaari Jairo tiajinia, pueya niquishii nujuquetiuyanoori, sariyocuatiuyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quituriquiaani. ⁴¹ Macu juaashiquiajiniji quiasaeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

⁴² Jiyacaritij, maaji samiriuuri ritia sanequee. Jhuacatecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. ⁴³ Jesuuri jiyanohua nojori rootaree maja nojori pohuatanura pueya niquiara na miishano. Saaja sequere cutaraari maaji samiriu cuara mianuutesaaria.

6

Jesu quishacari Nazaret tiacajinia (Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajinihuajaaja. Na saquiriojosano pueyari nata quiojoquiaarijiuhaj. ² Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani? ³ Nojuacuajaari suruhuatujiniji casaa shipinijiona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhuj pa tiacajiniani.

Cunora, majaari nojori tojitianu paniniu quiquiaari Jesu. ⁴ Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhuj, tama na tiajinia quiniaajaajanio.

⁵ Naacujitij, nocua nojori tiuyaquiniuucua, majaari na naata na cumaacata na miiniu quiquiaari. Saaja secaja cusosuhuacua niojoquiaari na juaashiquiaari, nojori na naatanijionura. ⁶ Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura
(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacaari samaruhua nojori tohuatanijionura pueyajiniji. ⁸ Nojori sequereeri maja nojori panura nojori panishano, saaja nojori miojotu cutara. Nojori sequereajaariuhuj, maja nojori panura caashoque, coseyaca, cumaneecanio. ⁹ Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰ Nojori sequereajaariuhuj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijiuhuj, niocua cuniquiji quiaare. Niocua nia niohuacaacuaji jiya jooqua piitiare nojori niqiuara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

¹² Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuuquiaari pueya tacatonuhua nojori jiuujia Pueyasooqua. ¹³ Nojoriiri queraatia samaruhua tohuatanijioquiaari. Naajuhuj, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari
(Mt 14.1-12; Lc 9.7-9)

¹⁴ Jesu miishanojinijiiri caminiujiushaaquiaari puetunu cuno jiyajiniajanaa. Naacujitij, Galilea jiya jiyaniijia Herodesri Jesujiniji pohuatasaaquiaarijiuhuj. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniuujia, nojori jiyajenesacarijiuhuj. Naa sequetuquiaariiri:

—¡Nojuacuajaari tariucuacaanu pueyara Pueyaso sequesano caminiujiunia Elías!

Tamasaca pueyari saniniuujia naa sequequiaari, nojori jiyajenesacarijiuhuj:

—Nojuacuajaari quiarjia nio pa quishacari Pueyaso sequesano caminiujiunia pa-janiyara, juhua tariucuacaanu pueyara Pueyaso sequesano caminiujiuniaajuhuj.

¹⁶ Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijona Juan, cana cua nacataniquianucujani. Samiitiaro-huacuaaquiiri.

¹⁷ Tiuquinijona Juan moyaquishacarijia, nojuajaari Herodías rupaajinia nujuate-saaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara.

¹⁸ Nocuaji, Tiuquinijona Juanri Herodes nacasujujua. Naa na sequejaari:

—¡Pueyasora, majaari maninia quia jiitianura quia tarajanu niquiocua!

¹⁹ Cunora, cuno maaji Herodíasri maja na niquiniu paniniu quijia Tiuquinijona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijona Juan puereja. Nojuajaari niishiquiaari Tiuquinijona Juanri maninia pueyano, Pueyaso tojijia pueyano, maja sesa miiijia. Naaratej, Herodesri maninia na cojuateja nujuatejo-juajinia. Majaari na shanacunu quiquiaari sesa na miishaanura. Herodesri Tiuquinijona Juan pahuatasano tojiniu maniniucujaja. Nojuajaari saaja noojia niquijoteja quiquiaari. Majaari na niishiniu quijia taa na miiniutianiyani. ²¹ Saniniuujia, cuno maaji Herodíasri pueyaracaanu niishiriojoriquiaa, Tiuquinijona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajiniijinio jiyaniijianucua masuuquiaari, tama na soldadohua jiyaniijianucujajaa-janio. ²² Jiyacaritij, Herodías niyatuuri tiuquiquiaari queranacusaqui, tii na ni-anujunura puetunu pueya niquiarajanaa. Herodesri niyacoo nianujunu shuquiritiaquiaari jiyano-hua. Nata miaquenaa pueyari jiyano-hua na shuquiritiaquiaarijihuaj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niquitioreni.

²³ Herodesri socua puetunu pueya niquiarajanaa na sequerohuacuhuj:

—¡Seetanujuaana quia sequeyanijia, maja cua sapojonu! Janiyari quia niquitionutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niquitionutaniyani.

²⁴ Niyacoori tohuataquee na nucua Herodías na nequesotanura. Na sequeeseeri:

—Cua nucuaana, ¿casaa cua masenutaniya cua quenuni?

Na nucuaari na sequeree:

—¡Quia masere Tiuquinijona Juan naca!

²⁵ Cuno niyacoori ritia tiuquiquiuhua jiyaniijia Herodes quishaqui. Na sequereeri:

—¡Quiarijia cua niquitiore Tiuquinijona Juan naca miacojuajinia!

²⁶ Naa jiyaniijia Herodes tojishacaritij, jiyano-hua taraajequeri. Naajaa, seetanujuaana na sequenuucua na masuusano pueya niquiara, majaari tari na naata ruuretanu quiquiaari cuno niyacoo masesano. ²⁷ Naaratej, jiyaniijiaari ritia jiyaroree na soldado, Juan naca na niquitionura cuno niyacoo. ²⁸ Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niquitiosuhua. Nojuajaari na nucua na niquitiose saniniuujia.

²⁹ Tiuquinijona Juan pueya jaara na niishiquiaari, na maanu patuquiaariiri, na jamotusocoriquiano.

Jesu mianuutesacari cinco mil pueya
(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquijioquiaariuhua Jesuucua nojori rucuanerionu nuhuaji Pueyaso rupaa nojori pahuatanura. Nojoriiri Jesu pahuataquiaari puetunu nojori miitushanojuanaa, nojori niishitiojosanojinijinio. ³¹ Na nuhuaji, Jesuuri nojori sequeree:

—Miji, pueya quiyaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoriicua nijioriquiaa. Tamasacaari quiojoriquihuacuaa. Tamasacaari saniniuujia shusha tiuquiijioriquiaacujua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiyaramiquishano pueyata quiaquiaari botejinia, pueya quiyaquishaqui. ³³ Queraatia pueyari saaja nojori niquitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquioco tiacajinijijianaa pueyari netecuatuquiaari. Nojoriiri Jesuucuaaji cutesee. ³⁴ Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵ Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. ³⁶ Pueya quia sequere, nojori cuara quiojoora cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucuaaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoriirijanaa? ¡Pa mianuutenura nojori, panishiyari dosciento cumaneeca! Majaari pa jiitiano.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiyasocujinia, na mianuutesocoriquiano. ⁴⁰ Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuaaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. ⁴² Puetunu pueyajanaari maninia miaquenuquiaari. Maninia tooquioreejaariuhuj. ⁴³ Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuunaa quiquiaari.

Mohuaca caco Jesu rucuanenujiniji pohuatasano

(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhuara na tiacajiniahua. ⁴⁶ Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujiajinia jaaretariquiaa. Jesuuri juhuanojuaja na jateesaqui quiriquiaajaa. ⁴⁸ Jesuuri nojori niquiquiaari najuhuana juaarioconuyano. Majaari nojori naata jaaretanu quiriquiaa, puera paratu piyarojosacari nojoriicua. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niquitiuquiaari mohuaca caco canujiyano, nojoriiri na jiyanitiuquiaari samaru. Nocuaaji sariyocuatereeri. ⁵⁰ Puetunu nojorijianaari na niquitiurii. Shiriiquitiuriiri. Jesuuri ritia pocuaaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajanjia.

⁵¹ Botejinia tacasee nojoriicuaari. Paratuuri jiyacari pueyajee. Nojoriiri na shootiariquiaa tacuriitia, jiyanohua na jiuujiatenuta. ⁵² Nojoriiri juhuanojuaja maja na

niishiniu quiquiaari Jesu miishano, queraatiara na jiyatesacari pan, pueya miaqueso-
coriquiano. Nojori jiuujiacaari juhua ninishiqui quiquiaarijia.

Jesu naatanijosacari cusosuhua Genesaret jiyajinia
(Mt 14.34-36)

⁵³ Jesuuri na pueyata caminia niuutiaquiaari. Tiuquijioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohareetaquiaari botejiniji, cuniqui-
jinio pueyari ritia Jesu niishiquiaari. ⁵⁵ Pueyari jiyacari netecuatuquiaari, Jesujiniji
nojori pohuatanura puetunu cuno jiyajiniajanaa. Cusosuhuari juhuacatecara pa-
tootasaquiaari na matucujinia tee Jesu quiriquiaa na rucuanijosacari nojori jiyajini-
acuajani. ⁵⁶ Tiquiyocua Jesu rucuanijosacari, cusosuhuari nocuaji niojotasaquiaari
nucuo, tuhuaqui tiacajinia, queraatia shiitianiyojua tiacajiniajuhuaj, cuhuariquia-
jiniano. Pueyari Jesu secojoree cusosuhua na quiatenura quenaaja na toque casaca.
Canapuate na toque quiaquiaarini, puetunu nojorijianaari na cusonujiniji naataco-
quiaariuhua.

7

Casaate sesoriquiara pa jiyateja Pueyasorani
(Mt 15.1-20)

¹ Jesuucua catecanoquiaariiri Fariseocuaca, Moisés Rootasanojiniji niishitiojonaanio,
canapuate Jerusalén tiacajiniji nijioquiaaricuajani. ² Cuno pojori quishacari tii, nojori-
iri noojiaqueya Jesu pueyajinijinio niquiquiaari shuquitioojua miaqueyano. Nojoriiri
jiyanijia, nojori rucuanijosacari sesa miijiaca pueya tajinia, sesa nojori quiniu na naata
nojoriicua pacunu. Nojoriiri cunora shuquitianu jiitiquiaari, nojori jiyanihacari no-
jori jiuujia naasucua curuushiniutianiya, shuquitioojua nojori miaquesacari. Naaratej,
cuno pueyari Jesu pueya pocuanu coteequiaari. ³ Cuno Fariseocuaca, puetunu narta
Judocuacajanaanio, nojoriiri maja na cartenu quijia tariucuacaanu nojori supuetanaa
niishitiojosano. Naaratej, majaari nojori miaquenu quijia shuquitioo. ⁴ Naacujitij,
nojori jaara miaquesano niquitiojosaquiji tacatequiohua, majaari nojori miaquenu
shuquitioojua. Socua queraatia quiyari cuno pojori niishishano. Naacujitij, nojoriiri
jiyaniquiaa, sesa nojori quiyaquiniucujia Pueyaso niquiara, nojori cuara na ratu-
jua jeequejora, pataco, coshi, na maquetucuanio. ⁵ Naaratej, Fariseocuaca, Moisés
Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojitiaaquiya pa supuetanaa niishitiojosanoni? Nojoriiri maja
na shuquitianu quiquiaa na miaquenuunura.

⁶ Jesuuri cuno pojori riuquaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa
miijiaca! Pueyaso sequesano caminiujiunia Isaíasri maninia sequequiaari niajaniya-
jinijicujia, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniujia tucua-
caanu quia janiyajiniji. ⁷ Nojori miishano quiriani, cunoori najuhuanaj. Naa
nojori miishanoni, majaari na shuquiritiniu janiya. Nojori niishitiojosanoni,
cunoori tama pueya niishitiojosanojuaaja, maja cua sequesano”.

⁸ Niaari cua pueya pocuariquiaa. ¿Niajaniyariuhuj? ¿Casaara Pueyaso sequesano nia to-
jiyaquiquiaanijia? Niaacuajaari Pueyaso sequesano tojiyaquiya, tama nia supuetanaa
niishishanojuaaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jiitishanoocua nia miiniurijaaja, ¡niaari Pueyaso sequesano
shocortaa saaja! ¹⁰ Moisés cuajaari naa rootaquiaari: “Maninia quia miiri quia que,
quia nucuanio. Majaari nojori rerequetenu. Cante na que, na nucua sesacajani, cuno
pueyano cuara mosaaria”. ¹¹ Niaari sequeya saniniujia, maniniacuaja, pueyano

jaara na que, na nucua sequere: “Maja cua naata naacutanu niajaniya cua casamitia. Janiya tari Pueyasora jiyateree puetunu cua jiiťiasanojuanaani”. ¹² Niaari sequerquiaajuhuaaj, pueyano jaara naa sequeretej, maniniacuaja maja na naacutanura na que, na nucuanio. ¹³ Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuaajaari saaja nia supuetanaajiniji caminiujiushano. Niaari socua queraatia casaa miiquiaa juhua cunojuhuaaj.

¹⁴ Naa na nacasunu nuhuaaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu niajanijajanaa, maninia nia niishiniuria. ¹⁵ Casaa pa miagueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. ¹⁶ Cante nu-maacarani, nojuaja cuara tojitiaara cua sequesano.

¹⁷ Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸ Jesuuri nojori sequeree:

—¿Niaateeri cua sequesano niishiyaquiyajuhuaaj? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. ¹⁹ Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaaji pocoma tajiyari pa marecuhuacuma.

Nio sequesanota, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰ Jesuuri sequereejuhuaaj:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹ Pueyano jiuujiajiniji supueya cutaraari sesa niishiriojosano, sesa na miiniuria. Naacuajitij, pueyanoori na camishoo maajipohua numuetucujua, seya numuetucujuhuaaj. Tamonu pueyano casami nohuasejoquiaari. Pueya moquiaajaariuhuaaj. ²² Narta pueyano niquiocua numuetucquiaari. Tamonu pueyano casamiicua jiaati-aquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu jiiťishanota. Narta pueyano miananajoquiaari. Tamonuucara tonujuquiaari. Naajuhuaaj, saaja tama na cuaqueyajaaja shuquiritiaja quiquiaari. Juhuaaniya sesa miiquiaajaariuhuaaj, moseeca na quiniuucua. ²³ Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiara pueya jiyateja Pueyaso niquiara.

Taatu tiushacari Jesuucua (Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. ²⁵ Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiaari. Na cariquimiaji mojuquetaseeri. ²⁶ Cuno maajiiri Sirofenicia jiyajinijinio taatu quijia. Jesu secojoseeri samaru na tohuataniniuria neyatujiniji. ²⁷ Jesuuri maaji sequereeri miriqui:

—Quia tarinitiare, muerasu cuara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiri Jesu riucuaaree:

—Jaa, Jiyaniijianaa. Naajaa, sareyacuaajaari miaqueja cariquiacoji tatucuaja, muerasu totinijosano miaquesano shiriya.

²⁹ Jesuuri na sequeree:

—¡Quiaacuaja maninia cua riucuaaree! Quia tacateyarohua. Samarucuaajaari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuriatasuhuari na maquetujinia mataano. Samaruuri tari tohuatano quiriquiaa nocuaji.

Jesu jeecasacari numueeju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³² Tii na quishacari, nocua jaatucusaquiaariiri numueeju, tiquia pueyano. Na jaatucunaari Jesu secojotuchiaari na juaashiquia na nianura nocua, na jeecanura cuno pueyano. ³³ Jesuuri pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniajaaja riocoreeri. Na riacau cojuata pocuaashijia niti quiareeri. ³⁴ Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

³⁵ Jiyacaritij, numueeju numaari riatequequee. Na nitiiri jeequequeejuhuj. Ritia pocuaquee maniniaari. ³⁶ Jesuuri cuno pojori rootaree maja nojori pahuatanura na jeecasano pueyanojiniji tamasaca niquiara. Nojoriiri saaja tiquiyocua pahuatanuquiaari. Naa Jesu rootasacari na naatanijosano pueyatej, maja nojori pahuatanura na miishanojiniji, nojoriiri saaja socua jiyacatequiaari pahuatanura. ³⁷ Pueyari jiyanohua jiuujiatequiaari Jesu miishano na niquitiushacari. Tama nojorijiaarijia sequetooquiaari:

—¡Puetunujuanaa miya maniniaari! Numueejunucua jiyateya tojitiajacaraari. Tiquianucua pohuateyajaariuhuj.

8

*Jesu mianuutesacari cuatro mil pueya
(Mt 15.32-39)*

¹ Jiyacaritij, jiyanohua queraatia pueyari rerejoquiaari Jesu na tojitianura. Majaari nojori jiitianu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequereeri:

²—Nio pueyacua taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³ Janiya jaara nojori jiyaramiquiriohua na tiajinia miaqueyojuani, nucuaco cusojoniyarohuacua. Noojiaqueya nojorijinijiniori niyara nijiorucuaa tucuacaanuji.

⁴ Na saquiriojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequereere:

—Nareja siete.

⁶ Jesuuri na pueya sequereere, nojori cuaara sequereera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa. ⁷ Secaja sapitiaaja jiitiatuquiaaariuhuj. Jesuuri socua nocuara secojorohuacuhuj. Na nuhuaji, na pueya sequereeri nojori niquitiojonura pueya. ⁸ Puetunu pueyajanaari maninia miaquenuuree. Tooquiorejaariuhuj. Miaquesano cureenota mishinijosaaquiaariiri siete canaasatu. ⁹ Na miaquena pueyari quiquiaari cuatro mil pueya. Na nuhuaji, Jesuuri nojori sequereere nojori quiojonuhua. ¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

*Fariseocuaca niquniu panishacari Jesu miishano Pueyaso cumaacata
(Mt 16.1-4; Lc 12.54-56)*

¹¹ Fariseocuacaari Jesuucua tiuquiiiose. Nata juayonuutaseeri. Nojori saniniu-jiuniuria Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. ¹² Jesuuri noojia niaree na taraajenuta. Sequereeri: —¿Casaara nio pueya niquniu paniya Pueyaso cumaacata miishanoni? Seetanujua-naa nia sequeyanijia, majaari cua niquitiniu quiniutianiya niajaniya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejina tacataarohuari. Caminia taquijiria niuutiaareeri.

*Jesu numootesacari na pueya Fariseocuaca niishitiojosanoocuaji
(Mt 16.5-12)*

¹⁴ Jesu pueyari na coseyaca niyajetatuquiaari. Nareja niquiriyatujua panniyojua jiitiatuquiaa botejiniaari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijiuhaj.

¹⁶ Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa saso-coriquiano.

¹⁷ Jesuuri na saquiriojosano pueya niishiriojosano niishiqui. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanojuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? ¹⁸ ¿Majateeri cua miishano nia niquniu quiquiaacuaja nia namijiata? ¿Majateeri nia tojiniu quiquiaa nia numaatajuhujaj? ¿Niaateeri ritia niyajetarucuaa cua miishano? ¹⁹ Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuaaree:

—Doce.

²⁰ —Naajuhujaj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuaaree:

—Siete.

²¹ Naaratej, Jesuuri nojori sequeree:

—¿Majateeri juhuanojuaja nia niishiniu naa cua miishanojinijitij?

Jiyacariti nojoriiri Jesu sequesano niishiqui.

Jesu jeecasacari cariyojuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaquiaariiri cariyojuaru pueyano. Pueyari Jesu secotujuquiaari cuno cariyojuaru namijia na quianura quenaaja. ²³ Jesuuri cariyojuaru quiaree na juaashiquiajiniji. Tiaca jiyaquiria na jaatucuyareeri. Cariyojuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquniu shiitianiyojua quenaaja?

²⁴ Cariyojuaruuri niquniu sanirii. Jesu sequereeri:

—¡Jaa! ¡Pueya niquiyanijia, juhua nacuhua rucoyano!

²⁵ Jesuuri socua pacuterohua na juaashiquia nianu cariyojuaru namijiaacua. Cariyojuaruuri niquniu saniriohuacuahuaj. Jiyacaritij, tojetaarucujanaa maninia niquijiara quiqiiri. ²⁶ Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

Pedro sequesacari, Jesu seetanjuanaa Pueyaso Jiyarosano
(Mt 16.13-20; Lc 9.18-21)

²⁷ Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipo tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸ Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacujua quiaanaari supuetana Elías. Naajuhuj, tamasaari quia sequequiaa, quiaa naasucuaanaari tariucuacaanu pueyara Pueyaso sequesano caminiujiunia, samiitianohuatuhuj.

²⁹ Na nuhuaji, Jesuuri nojori nequesotaree:

—¿Niajanियarijataj, taa nia sequeyani, cante janiyani?

Pedroori na sequere:

—Quiajanियacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasa niquiara nojuajiniji Pedro niishishano.

Jesu numootesacari na pueya, nojuaja mosaanutaniya
(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Niyanu miishaanutaniya jiyanoehua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutianiya, pueyacuara Pueyaso secojonaa jiyaniijianucujuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca jucajinia samiitianutaniuhuan.

³² Jesuuri naa seetanjuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqum na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—¡Cua shuriucujaji quia quiaare, Satanásnaa! Quia niishiriojosanoori maja Pueyaso-jiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqui quiniaa pueyajanaanio. Nojori sequereeri:

—Pueyano jaara cua tojijiara quiniu paniri, nojuaja cuaara niiria cucua, seetanjuanaa nojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. ³⁵ Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyanoehua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijijuhuj, cuno pueyano cutaraari pueyaracaanu quiniutianiya shuquiriaatia. ³⁶ ¿Niaarate maninia, pueyano jaara puetunu nio jiya casamijianaa jiitiare, na nuhuaji na sohanu jaara jataaare mani quiquiojinia pueyaracaanura? ³⁷ ¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririquiya sesa miijiaca pueya niquiara nio jiyajiniani, janiyari nojori caririquiniutianiyajacuhuj. Naajuhuj, cante caririquiya mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuj. Janiyari jiyacari cua

Que cumaacata jiyocuacaanuji tacatenutaniuhuani, maninia miijiaca cua Que seyatajuhuj.

9

¹ Jesuuri nojori sequequiaarijuhuaj:

—Seetanujuanaa nia sequeyanijia pueyanaa. Noojiaqueya niya quiniaajinijinio quiarijiani, majaari nojori cusuunu quiniutianiya juhuanajuaja, nojori cuaara niquirijiaatijia Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara

(Mt 17.1-13; Lc 9.28-36)

² Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaariiro Pedro, Santiago, Juannio. Jesu quishacari tuhuananujiniji, na cuaqueyari tamaatiuucara jataquiaari nojori niquiara. ³ Na toqueeri shacantuquera jataquiaari, socua jiyanoehua cohujara sohuanatuujiniji. Nio jiyajinia toqueya jeequejonaari maja na naata jiyanoehua cohujaquera toque na jiyatenu, taa Jesu toque jataquiaaricuaani. ⁴ Jiyacaritij, nojoriiri supuetana Elías niqutiutuquiaari, supuetana Moisésjuhuj, Jesuta pocoojiyano tii. ⁵ Jiyacaritij, Pedroori Jesu sequere:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiara, Moisésra, Elíasranio!

⁶ Jesu pueyari shiriqutiuriquiaa. Nocuaji Pedroori naa juhujaniya pocuariquiaa. Majaari na niishiniu quiriquiaa casaa na pocuariquiaani. ⁷ Jiyacaritij, jiyocuacaanuji cohujaja najacaari nojoriicua rosequiaari. Cohujajari nojori mishiquioma. Cohujaja najacajiniji, Pueyasoori tojishaaree pocuaano. Naa sequequiaaritij:

—¡Niocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸ Jiyacaritij, nojori jaara ritia niqunijionuuquiaari na shocuaqueya, majaari que-naaja tamonu na niqutiuniu quiquiaari socua. Saaja Jesuuri tamajaaja quiriquiaa.

⁹ Nojori rosetasacariuhua tuhuananuucocoji, Jesuuri nojori rootaquiaari maja nojori pohuatanuhuaa tamasaca niquiara nojori niquishano. Jesuuri nojori sequequiaari cuaara noojiajania racatatuura, nojuaja jaara samiitarohujiaatijia. ¹⁰ Cunora, tama nojorijiaarijia maninia racataquiaari noojiajania nojori niqutiushano. Maja cutaraari nojori niishituniu quiquiaari, casaara naa Jesu sequere nojorini “cua samiitiasacariuhua”. ¹¹ Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianihua Pueyaso Jiyarosocoriquianoocuaji?

¹² Jesuuri nojori riucuaare:

—Seetanujuanaacuaaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhuj”. ¹³ Janiyari seetanujuanaa nia sequeyani, Elíascuajajari tari niquiaari. Pueyari naquiya na miiquiaari taa nojori paniquiaaricujani. Pueyaso Rupaajiniacuajajari naajiotasaaquiaari nojuajajari naa miishaanutaniyaquij. Seetanujuanaa tari naa miishaquiaariiri.

Jesu tohuatesacari samaru, caya samijajiniji

(Mt 17.14-21; Lc 9.37-43)

¹⁴ Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quitiuriquiaajariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. ¹⁵ Pueya jaara Jesu niqutiutuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuatanura. ¹⁶ Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinijinioori Jesu riucuaaree:

—¡Niishitiojonanaa, quiocua nitiaaree quiyanunijia! ¡Samaru jiitiaano! ¡Samaruuri na jiyatequiaari tiquiara! ¹⁸ Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miaquequiaajaariuhuj. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹ Jiyacaritij, Jesuuri naa sequeree:

—¡Niaaqui Pueyasocua tiuyashijacaja! ¿Janiyatucua pueyaracaanu nia jiitiariquiani? ¿Janiyateeri pueyaracaanu nia rejeretanutaniyajaaniuhuj? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushaariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucuaaree:

—Na naatujuajiniji naa quijiajuhuanajaj. ²² Na cusojuanura juucua, cuno samaruuri sequerayucua na pojotequiaa manijinia, moojiniajuhuj. Naaratej, ¡jaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya noojiata seetanujanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

²⁵ Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatate nio caya samijiajiniji! ¡Puetunu quia tohuatatejanaa! ¡Majaari socua quia tacatenuhua, nocua quia tiuquiniuhua!

²⁶ Samaruuri sariyocuaquee. Caya samijia taquiriocuaterohuariuhuj. Na tohuatate sacari caya samijiajiniji, juhua macu na tiujiaqueeri. Nocuaji, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquiajiniji na quiaaree. Na sanareeri. Caya samijiaari juhuajaniya nujuaquiaariuhua.

²⁸ Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucuaaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pohuatanu pacutesacariuhua nojuaja mosaanutaniya
(Mt 17.22-23; Lc 9.43-45)*

³⁰ Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitiosaanutaniyani, nojori miiniuria janiya taa nojori paniyacujani. Nojoriiri cua monutaniya. Jiuujianaraca juucajinia, janiyari samititanutaniuhuni.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijajanaa cutarani?

(Mt 18.1-5; Lc 9.46-48)

³³ Nojoriiri Capernaum tiacajinia tiuquiiiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴ Nojoriiri saaja sanaajetaquee. Na juayonuutanujiniji niishitiuriquiaacuajaari. Nucuamaji, nojoriiri riutioconeetariquiaa teyano nojorijinijiniote socua tojishano pueyanoni. ³⁵ Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

³⁷ —Cante jiyano mueya maseja na paniniutia janiyani, nojuajaari cua maseya-jaacuhuj. Cante cua maseyani, majaari saaja na masenu janiya. Jiyocuacaanu Quijia cua Jiyarona maseyajaariuhuj.

Tamonu pueyano tohuatanijosacari samaruhua Jesu cumaacata

(Mt 10.42; Lc 9.49-50)

³⁸ Tamacari, Juanri Jesu sequeree:

—¡Niishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijionura pueyajiniji! Nojuajaari maja pajaniyajinijinio. Nocuaji, ¡canaari na tenujureeni maja socua naa na miiniuriatej!

³⁹ Jesuuri nojori sequeree:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰ Nia niishiri, cante maja pa paracani, nojuajaari pa jiyano. ⁴¹ Nia rucanejosacari, cante nia raateya mohuacaniyojua na paniniutia janiyani, cua pueya nia quiniuucujuhuj, Pueyasoori saniniujia maninia casaa na niqutionutaniya na jiiiasanojiniji.

Puereeta quiniutianiyari sesa miijiacara

(Mt 18.6-9; Lc 17.1-2)

⁴² 'Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujajau saajia jaara morotasaare na riquiajiniji, caminia queronijinia jartasocoriquiano. ⁴³⁻⁴⁴ Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijiaara, nia juaashiquia nia rashiquiare juhuari niaa mariqui mani quiquiojinia jatasaaereeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jatasaanura caapiquiquiojuata? Jiyanhua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶ Naajuhuj, nia niohuaca jaara nia jiyatere sesa miijiaara, nia rashiquiarenoj maja nia jatasaanura mani quiquiojinia. ¿Niaateeri paniya tii nia jatasaanura caapiquin-iocuata, pueyaracaanu tii nia saniitiosaanura? Jiyanhua socua maniniaari niqin-iocuata Pueyasocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸ Naajuhuj, nia namijia jaara sesa miitiriquia niajaniya, nia jiaterejoj. Naa nia tarinitiare sesa nia miiniu, maja nia jatasaanura caapiqui namijata pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu.

Maniiri tii pueyaracaanu noshiya. Majaari na maquesanu. Jiyanohua socua manini-aari nia tiuquiniuria Pueyasocua niquiriyatujua namijiata pueyaracaanu shuquiriaa-tia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarini-tianura jiyanohua na miiniu panishano, cuno jaara sesa miijiara jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujuanaari saniniujiushaanutaniya juhua manitia, taa shu caquishiyacuaani na moqueyaquiniucujaji. ⁵⁰ Naajuhuaaj, shoniiri jiyanohua maninia, shu moqueyaquiniucujaji. Saniniuujia, shoni jaara shaacara quiri, ¿maatucua taa tiquiriiquiara quiriohua saajaniuhuaaj? Maja na naata. Naajuhuaaj, Pueyaso cumaaca nia jiitiare nioojiajania, niaa mariqui najuhuaana quijia quiriiri juhua Pueyaso ni-ishiyashijia pueya. Naajuhuaaj, jiyanoojiaca nia quiri, jatiqui nia quiniuria shuquiriaa-tia.

10

Jesu niishitiojosano maja pueya cartenura necocua
(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquiriojosano puey-ata. Judea jiyajinia quiojiyareeri, Jordán moo taquijiriajuhuaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocuacaari Jesuucua nijioquiaari na saniniujiuniuria nojori neque-sotanuta, nocuara nojori saquiriojotanura juucua. Cunora, cuno pojoriiri Jesu neque-sotaree:

—¿Maninate pueyano cartenura necocua?

³ Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniani?

⁴ Cuno pueyari Jesu riucuaaree:

—Moisésri pa sequequiaaricuaaja, pueyanoori na naata necocua cartenu. Ney-aca cuara coteenu na niqutioora na cartetaja naajionee, necocua na cartenura. Moiséscuajaari naa pa sequequiaaritij.

⁵ Jesuuri cuno pojori sequeree:

—Moisésri naa sequequiaari niajaniatej, pueyaracaanu cumajiuujiaaca nia quini-uucua, nia niqiuocuaacua taraajeyashijia nia quiniuucujuhuaaj. ⁶ Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya ship-iniquiaari, niquiriyatu maajinio”.

⁷ Naaratej, pueyanoori na queya tiujianutaniya necocuara na caminiuria. ⁸ Nojori jaara camitioore, nojoriiri juhua niquiriyatujua pueyanora quiquii. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari.

⁹ Cunora, pueyano cuara necocua carteyaquiiira, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequeso-taquiaari casaa na sequenu paniriquiaa naani. ¹¹ Jesuuri nojori sequeree:

—Cante necocua carteya tamonu maajitia na caminiuriani, cuno pueyanoori jiyanohua sesa miya coteenu necocua. Pueyasora, naa na miishacaritij, nojuajaari juhua narta pueyano niqiuocuata quijia. ¹² Naajuhuaaj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuaaj.

Jesu niasacari na juaashiquia naatujooriicua
(Mt 19.13-15; Lc 18.15-17)

¹³ Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. ¹⁴ Jesu jaara na niquiquiaari, juaaquiiri. Nojori sequereeri:

—¡Nia tarinitiare naatujoori cuara niiria cucua! ¡Maja na tenujunu! Canapuede Pueyaso muerasura quiniu paniyani, nojori cuara juhua nio naatujooriria jataara. ¹⁵ Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jiitiasano nia quiniuria.

¹⁶ Jesuuri jiyacari cuno naatujooriniyosua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyanohua casamiriaca mashaja pocojosacari Jesuta
(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimijaji mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequereeri:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moisés cuajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujunu sapojonuta. Maja cuaracashijionu. Quia queya tojijia quia quiriquia”.

²⁰ Pueyanoori Jesu riucuaaree:

—Niishitiojonanaa, janiyacuaajaari puetunu cuno rootasanojuanaa tojijia pueyaracaanu cua naatujuaajiniini.

²¹ Jesuuri na paniniutia na niquirii. Na sequereeri:

—Juhuanajuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niquitiojocoo. Na nuhuaji, casamijiuniucua nareja quia niquitiojore quia masesano cumaneeca quia casami sami. Naacuajitij, quiaari quia casami jiitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

²² Cuno pueyano jaara tojiquiaari naa Jesu sequesantej, jiyanohua taraajequeeri. Na taraajenuta quiacuhua na tiajiniaari. Nojuajaari jiyanohua casamiriaca pueyano quiquiaari. ²³ Na nuhuaji, Jesuuri na shocuaqueya niquinijioree. Na saquiriojosano pueya sequereeri:

—¡Jiyanohua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanohua jiyajenetaari casamiriaca pueyano quiniuria Pueyaso pueyanora. ²⁵ Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquiriojosano pueya jaara na tojitiaquiaari, nojoriiri socua jiyanohua jiuuji-ateere. Naaratej, tama nojorijiaarjia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequeree:

—Jiyaniijanaa, canaari puetunu canaa jiitiasanojuanaa tiujiaquiaarini quia pueya canaa quiniuria.

²⁹⁻³⁰ Jesuuri nojori riucuaaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiitiasano tiujiaja cua tojijia na quiniuucuaani, janiyajiniji pohuatana na quiniuucuaajuhuaaj. Cante na tia tiujiajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarjia mijiria na quishacarijia. Nojuajaari socua jyanohua queraatia niqutiosaanutaniuhua na tiujiasanojiniji. Niqutiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhuaaj, naquiya miishano quiniutianiyari cua tojijia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarjio jiyajinia. ³¹ Saniniuujia, queraatia tojishano pueyari najuhuana quiijaca quiniutianiya Pueyasora, nojori tojiyaquiniuucua nojuaja. Saniniuujia, Pueyaso ru-uretajacara, queraatia Pueyaso pueyari quiarjia juhua najuhuana quiijaca niquishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojitiajaca nojori quiniuucua.

Jesu pacutesacariuhua pohuatana nojuaja mosaanutaniya

(Mt 20.17-19; Lc 18.31-34)

³² Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhuaaj. Nuujajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

³³ Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Nyanu niqutiosaanutaniya pueyacuara secojona jiyaniijianucuaani, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niqutiosaanutaniyani. Janiyari jyanohua naquiya miishaanutaniyani. ³⁴ Nojoriiri cua rerequetenutaniya. Cua riocojotunutaniyari. Cua piquitiuniutianiyajaariuhuaaj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuaani.

Santiago, tarajanu Juanta, nojori sequesacari Jesu, maninia nojori na miiniuria

(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquihua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶ Jesuuri nojori nequesotaree:

—¿Casaa nia paniya cua miiniuria niaarani?

³⁷ Nojoriiri Jesu riucuaaree:

—Pueyaso jaara quia jiyatere pueya jiyaniijiaara, quiocua canaa cajitijiore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

³⁸ Jesuuri nojori sequeree:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jyanohua noonu quiniutianiya juhua pueyano jaara mani noshiyanojinia tiuquinishaare.

³⁹ Nojoriiri na riucuaaree:

—Taaquiriirinij, canaa naatacuaaquiniateja naquiya miiniu rejeretanu juhua quia-janiya.

Jesuuri nojori sequeree:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanojua naquiya na miishaanutaniyani, na cusosacari pueyacuara. Jesuuri naa nojori sequeree socuatej:

⁴⁰ —Maja cutara cua naata niqutionu nijaniya nia masesano, cua cajitiniuria nijaniya cua miaquetajara, cua muenecarano. Cunoori noo pojori niquticosaanutaniya cutara, canra tari na jeenucuasaaquiaaricujani.

⁴¹ Narta saquiriojosano pueya jaara tojiquiaari nojori masesano Jesu juucua, nojoriiri juaaquoiquiaari. ⁴² Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiitiaquiaa juhua na seya, tama nojori panishano na miiniurijaaja nojoritia. Naajuhuj, pueya jiyaniijianucuaari na jiitiasano pueyacu paaretaquiaa na cumaaca, tojishano pueya nojori quiniuria. ⁴³ Nijaniya saniniuujia, majaari naa nia quiniu quiniutianiya. Cante tojishano pueyanora quiniu paniya nijaniyajinijini, cuno cuara jiyateera tama na cuaqueyajaaja juhua narta Pueyaso pueya serura na quiniuria. ⁴⁴ Cante nia jiyaniijia quiniu paniyani, nojuaja cuara quiria narta Pueyaso muerasu cumaquinia.

⁴⁵ Janiyajuhuj, majaari mijiria cua ninu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niquiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeecasacari Bartimeo namijia

(Mt 20.29-34; Lc 18.35-43)

⁴⁶ Nojoriiri jiyacari tiuquijioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariojuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariojuaru na quiniuucua. Nojuajaari maja na naata poonijionu quijia tamajaaja. ⁴⁷ Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nakanu coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujuriquiaa na sanaajanura juucua. Saaja socua nacaree jiyanohuari:

—¡Pueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariojuaruuri naa sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

⁵⁰ Naa na tojishacaritij, cariojuaruuri na tucuaque toque jataquee. Ritia jaaqueeri Jesuucua na catecanonura. ⁵¹ Jesuuri na nequesotaree:

—¿Casaa quia paniya cua miiniuria quiajaniyani?

Cariojuaruuri na riucuaaree:

—¡Niishitiojonanaa, niqijiara quiniu paniuhuanijia! ¡Cua namijia quia jeecarohua quiria!

⁵² Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariyajuaruuri tari na naata niquniu quiriquiaa. Nucuaco Jesu nuhuajiyareeri.

11

Jesu tiuquishacari Jerusalén tiacajinia
(Mt 21.1-11; Lc 19.28-40; Jn 12.12-19)

¹Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijioosee Olivo cuhuariquia tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ²Nojori sequereeri:

—Cuno tiacajinia nia quiaare, pa tajoji niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niquishiinij, niocua na samaacartasee. Niocua na jaatucumohua miji. ³Pueya jaara naa nequesotare niajaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutaniuhuacuaa”.

⁴Nojoriiri quiojoquiaari. Burro riuriatatuseri morotasano nuujinia, tamonu tia tohuateya shuriucua. Nojoriiri na samaacartasee.

⁵Tamasaca tii quiniaari nojori sequere:

—¿Casaa nia miyani? ¿Casaara nia samaacartaa cuno burroni?

⁶Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. ⁸Queraatia pueyari na toqueya muevojoquiaari nucuaco, Jesuucuaaji nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucuaaji nojori niojotasocoriquiano na nucuacohuaj. ⁹Jesu puetanaa, mariyata na nuhuaji nijionaari jiyanojua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanojua maniniacuaja pa Jiyaniijia, cuno, Pueyaso cumaacata tiuquiyani! ¹⁰¡Pueyaso cuara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuacaanu Quijia pa Pueyasocuajaari pa shuquiritiasano!

¹¹Jesuuri naa tiuquiquiaari Jerusalén tiacajiniatej. Pueyaso Secojoua tiajinia tiuquishiiri. Na niqunijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana
(Mt 21.18-19)

¹²Tariqui, nojori quiojosacari Betania tiacajiniji, Jesuuri miaajeriquiaa. ¹³Tucuacaanuji niquirii higo naanaari queraatia jaamasucuaraca. Nocua canujiyareeri na niquniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴Jesuuri naa sesacaree higo naana:

—Maja quiojuaaji socua quia jajau miasaanu quiniutaniya.

Na saquiriojosano pueyari na tojitiariquiaa naa na sequesacaritij.

Jesu jaacasacari seya niqutiojonaa Pueyaso Secojoua tiajiniji
(Mt 21.12-17; Lc 19.45-48; Jn 2.13-22)

¹⁵ Nojori jaara tiuquiiioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapute Pueyasoocua puecosocoriquiano seya niqutiojoriquiaa cumaneecaracuajani. Na masejona tohuatanijioreejaariuhaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucua cumaneecacuajani, Pueyaso Secojojua tiajinia niqutiojosocoriquiano cumaneecaracuajani. Naajuhaj, Jesuuri mococoonu niqutiojona cajitiucua caponeetaree. ¹⁶ Naajuhaj, majaari na shanacunu quiquiaari pueya niyacunura najuhana Pueyaso Secojojua tia, na nitiootasano casamitia. ¹⁷ Na nuhaji, pueya niqiara niishitiojonu coteereeri. Naa sequereeri:

—Tariucuacaanu Pueyaso Rupajinia naa naajiotasanocuaajaari quiya:

“Cua tia sesaari quiniutianiya, Pueyaso Secojojua tia. Puetunu jiyacajinijuanaa pueya secojonuujuara quiniutianiyari”.

Niaari saniniuujia na jiyatequiaari nohuasenujuaca quiquiora.

¹⁸ Pueyacuara secojona jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri rojotooquiaari taa na motunutaniya Jesuni. Saniniuujia, puetunu pueyajanaari jiuujiateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puerturiquiaa, puetunu pueyajanaa tojishacari na niishitiojosano. ¹⁹ Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojiniji pohuatasano

(Mt 21.20-22)

²⁰ Tariquiiuaj, nojori shocosacari higo naana, na niqutiuquiaariiri tariucua soreno, puetunu na nujuacatajanaa. ²¹ Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soreree!

²² Jesuuri nojori riucuaaree:

—Pueyasocua nia tiuuri. ²³ Seetanujuanaa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niqii. Quia jaataare shoniacu caminiajinia”. Niaa jaara naa sequere seetanujanaa Pueyasocua nia tiuuniutia, niaari nia sequesano niqiniutianiya. Naacuajitij, Pueyasocua nia taacanuyaquishacari, nia sequesano cuajaari tohuatenutaniya taa nia sequereecuajani. ²⁴ Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiiitaa tari. Na nuhaji, niaari seetanujuanaa na masenutaniya. ²⁵ Nia secojosacari, niaa jaara niishiquii niaa sesa quiya tamonu pueyanota, sesa na miiniuucua niajaniya, nojuaja nia jiyanoori. Naacuajitij, jiyocuacaanu Quijia nia Queeri nia jiyanooniutianiya sesa nia miishanojinijijuhaj. ²⁶ Niaa jaara jiyanoashijia quiriquia, jiyocuacaanu Quinia nia Queeri nia jiyanoyaquiniutianiya, sesa nia miishanojinijijuhaj.

Pueya nequesotasacari Jesu, cante na jiyaronani

(Mt 21.23-27; Lc 20.1-8)

²⁷ Na nuhaji, nojoriiri quiaquiaariuhua Jerusalén tiacajiniohua. Jesu rucuanecosacari Pueyaso Secojojua tiajinia, nocua catecanoquiaariiri pueyacuara secojona jiyaniijianucua, Moisés Rootasanojiniji niishitiojonaajuhaj, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniijia quia quiniuriani?

²⁹ Jesuuri nojori riucuaaree:

—Janিয়া nia nequesotanutaniya saniniunijia. Niaa jaara cua nequesotasano riucaare coteenucuaa, janiyari nia sequenutaniyajuhaj cante cua jiyaroquiaari naa cua

miiniuriani. ³⁰ Cua riucuaturotoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucuaturo.

³¹ Jiyacaritij, cuno pueyari jiyasohuaja tama juayonuutunu coteequiaariijaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucuarucua: “¿Casaara nocua nia tiuyaquiuanucuararini?” ³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueya-janaari niishiquiaari Tiuquinijiona Juanri seetanujuanaa Pueyaso sequesano camini-ujiauni quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. ³³ Naacuajitij, maja na naata na riucuatunu quishacari, Jesu sequetureeri:

—Maja canaa niishiniu.

Jesuuri nojori sequereeri:

—Janiyajuhuaaj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pohuatasano sesa miijiaca poonijionaajiniji (Mt 21.33-46; Lc 20.9-19)

¹ Jiyacaritij, Jesuuri miriqui pohuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiajinia uva nattooquiaari. Na nuhuaji, na shuri-uquioco maticoreeri. Naajuhuaaj, saajia quejaquiaariiri uva rapijiojuara, na caaca reratesaanura. Jiyaconajara tiareejaariuhuaaj, tiji na cuhuariquia na cojuajara nohuasejojuaacuaji.

’Na nuhuaji, tamasaca poonijionaa pueya na niquitioreeri nojori cojuasocoriquiano nera. Naacuajitij, uva carojotasacari, nojoriiri nojuaja niquitionutaniya tijijihuaaj, na camarujuanaa na quiniucua. Na nuhuaji, nojuajaari tucuaaanu quiaquiaari, tii marijia na shocotejonura. ² Jaara tari quiquiaari uva carojotasacari, saniya cuhuariquia camarujuanaari na seru jiyaroquiaari cuhuariquia cojuanaa pueyacua. Na jiyaroquiaariiri cuhuariquia cojuanaa niquitionura nojori carojotasanojiniji, taa na camarujuanaa pocoojoquiaaricuaaja nojoritia tarijiani. ³ Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnucuaari. ⁴ Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaaree saajiata jasano. Na sesacatureejaariuhuaaj. ⁵ Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijinijinojuanaani, tamasacaari piquishaaquiaari. Tamasacaari puecoosaaquiaari cutara.

⁶ ’Cuhuariquia camaruuri saaja niquiriyatujua niyanuniyojua jiitiaquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaariijaaja: “Cuno pueya jaara niquiri cua niyanu, nojoriiri na tojiniutianiya cutara”. ⁷ Cuno cuhuariquiajinia poonijionaa niquishacari nojori camarunu niyanu nojoriicua niyano, nojoriiri saaja tamajaaja niishitiojotooquiaari:

—¡Niioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuaa quiquii tamajaajani!

⁸ 'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

⁹ Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojua-jaari cuhuariquia cojuanaa puecoonutaniya. Na nuhuaji, tamasaca pueya niqutionu-taniya cuno cuhuariquiaari, nera nojori cojuanura.

¹⁰ '¿Majateeri tariucuacaanu Pueyaso Rupaajinia nia serojonu quiquianucuaaja nio? Naa sequeyari:

“Tiajonaa pueyari tamaatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajiaara jiyatesaarohua tamasaca saijiniji. ¹¹ Cunoori pa Jiyaniijia miishano. Pajaniyara, na miishanoori jiyano-hua maninia. Nocuaji jiuujiate sano”.

¹² Jiyacaritij, cuno Judiocuaca camarucuaari niishiriicuaaja miriqui Jesu pohu-atasanoori tama nojoriijinijiaaja quiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori mi-iniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijiaaja pohuatariquiaa.

Jiya jiyaniijia cuaara pueyaracaanu niquitiosaaria na sequesano cumaneeca

(Mt 22.15-22; Lc 20.20-26)

¹³ Na nuhuaji, Jesuucua jiyaramiquishaaquiaariiri noojiaqueya Fariseocuaca-jinijinio, Herodes panijiaca pueyajinijiniojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquirojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari see-tanujuanaa sequeja. Majaari rimiajata quia niquiniu pueyajuhua. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojua, taate pa naata maninia quiniu Pueyaso niqiarani. Naaratej, canaa quia sequere, ¿maniate pa niqutiojonura pa cumaneecajiniji jiyaniijia Césarra, taa cuno tahue sequequiaari pajaniyacuaajani? ¿Taa quia sequeyani, niqutiojoshiyatee, maja soj?

¹⁵ Jesuuri ritia niishi-quii, naa nojori nequesotasacari nojuajatej, cuno pojoriiri na saniniuujiquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocoriquiano.

¹⁶ Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhua?

Nojoriiri na riucuaaree:

—Jiyaniijia César naaquicuaja, na sesajuhua.

¹⁷ Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niqutiore na camaru. Saniniuujia, Pueyaso nia niqutiore nerano tama na casaajaaja.

Jesu jaara naa nojori riucuaquiaaritij, nojoriiri jiyano-hua jiuujiatequiaari.

¿Macunucuate samiitiaconutaniuhua?

(Mt 22.23-33; Lc 20.27-40)

¹⁸ Fariseocuaca nuhuaji, noojiaqueya Saduceocuacajinijinoori Jesuucua nijio-quiaari. Saduceocuacaari jiyaniya macunucua maja na samiitiaconu quiniutaniuhua. Naaratej, nojoriiri Jesu nequesotasee nojori niishiniuria taa na sequenutaniya ma-cunucuaajinijini. Na sequetuseeri:

¹⁹ —Niishitiojonanaa, supuetana Moisés-cuaajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. ²⁰ Tariija, tamonu pueyanoori niya quiquiaari. Siete niquiohuaraca

quiquiaariiri, saa canuujua. Jiyapueranuuri camiquiaari. Na nuhuaji, shaajequiaari-iri muetuhuojuua. ²¹ Naaratej, na nuhuajishanaari tarajanu mashiquio camiquiaari. Nojuajaari muetuhuojuua cusoquiaarijuhuaj. Naajuhuaaj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhuaaj. ²² Cuno siete canuuri naa camiyocquiaari cuno maaji. Puetunu nojorijianaari cusunuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. ²³ Naacuajitij, macunucua jaara samiitiacorohua, ¿teyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁴ Jesuuri nojori riucuaaree:

—Niaari jiyanhua jiyajeneya Pueyaso Rupaajinia naajiotasano nia ni-ishiyaquishacari, Pueyaso cumaacanio. ²⁵ Macunucua samiiticosacariuhua, majaari canuu camiyonu quiniutianiya maaji. Naajuhuaaj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaca Pueyaso seya, maja camiyosano. ²⁶ Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moisés cuaja nequeru casaja noshiyanojinijini? Pueyasoori naa sequequiaari Moisés: “Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

²⁷ Naacuajitij, paari niishiyani Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanhua jiyajeneya nia ni-ishiyaquiniucua Pueyaso Rupaa.

Puetunu Pueyaso Rootasanojinijianaani, teyanote socua pa tojishocoriquianoni (Mt 22.34-40)

²⁸ Tamonu pueyanoori Jesu tojiriquiaa Saduceocuaca rihuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

²⁹ Jesuuri na riucuaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijianaa. Majaari tamonu quiniu socua. ³⁰ Nia Jiyaniijia Pueyaso nia paniri puetunu nioojiatajanaa, puetunu nia sohuanutajanaa, puetunujuanaa nia niishitajata, puetunu nia cumaacatajanaa”. Nio rootasanoori socua pa tojishocoriquiano puetunu Pueyaso rootasanojinijianaa. ³¹ Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonanaa. Seetanujanaari quia sequesano: quiyacuaaquinateja niquiriyatujua Pueyaso. Majaari socua tamonu quiniu juhua nojuaja. ³³ Seetanujanaa jiyanhua maninia cutaraari Pueyaso pa paniniuria puetunu poojiatajanaa, puetunujuanaa pa niishitajata, puetunu pa sohuanutajanaa, puetunujuanaa pa cumaacatano. Naajuhuaaj, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaca quirini, cunoori jiyanhua socua maninia Pueyasora, puetunu seya catijasanojinijianaa nocuara, mariyata puetunu pueya niqutiojosano na casamijinijianaa nera.

³⁴ Jesu jaara tojiquiaari naa cuno pueyano riucuasano maniniatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriquiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojona sequequiaacuaraarini: “Cristonaari supuetana David niquiohuacuajinio supenuantaniya”? ³⁶ Pueyaso Sohuanu pohuate-sacari supuetana David, nojuacuajaari sequequiaari:

“Jiyaniijia Pueyasoora cua Jiyaniijia Cristo sequere: ‘Quia cajirijiaara cua miaqueta-jara, janiya cuaara quia paraa shocojotare quiocuajijiaatijia, Jiyaniijiajanaa quia quiniuria pueyaracaanu cutara’ ”.

³⁷ Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jyaniquiya “cua Jiyaniijiaata”.

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaaja nojori rucuanejotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucujinia. ³⁹ Nojori jaara masusaare tamonu tiajinia queranacunura, nojoriiri ritia secoquiaa socua panishano cajitujinia nojori cajitiuniuria tia camaru shuriucua. Naajuhuj, Pueyaso secojojua tiacajini-aqueya pueya rerejosacari, nojoriiri camarucua cajitiucujinia cajitiuniu paniquiaa, pueya shootianura nojori. ⁴⁰ Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojojuaa shitiarayocua pueya niquiara, maninia pueya nojori jyanishaanura. Naaratej, Pueyaso saniitiosacari maninia miyashijiaa pueya, nojoriiri socua jyanohua naquiya miishaanutaniya tamasaajiniji.

Casamijiu mashiquio niquitiosacari na cumanee juuranee Pueyasora

(Lc 21.1-4)

⁴¹ Tamacari, Jesuuri cajiriquiaa Pueyaso Secojoua tiajinia cumaneeca niquitiojojua tacoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niquitiojijano. Queraatia casamiriaca pueyari queraatia cumaneeca niquitiojoriquiaa. ⁴² Jiyacari tiuquishijiaariuhua casamijiu mashiquio. Caapiqui cumaneeniyoua niasee cumaneeca niojojuaajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. ⁴³ Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niquitioree puetunu tamasaajinijijianaa. ⁴⁴ Puetunu pueyajanaari na cumaneeca cureenoinijia niquitiojoriquiaa. Saniniuujia, nio maajiri puetunujuanaa na miaqueso-coriquiano na masetajarano niquitioree cutara.

13

Jesu sequesacari Pueyaso Secojoua tia niyartasaanutaniya

(Mt 24.1-2; Lc 21.5-6)

¹ Jesu tohuareetasacari Pueyaso Secojoua tiajiniji, tamonu na saquiriojosano pueyajinijinoori na sequere:

—Niishitiojonanaa, quia niquiri Pueyaso Secojoua tia, puereetujuaaca saitia tiasano. jJiyanohua shanohua tia!

² Jesuuri na riucuaaree:

—¿Quiaateeri cuno shanohua tia niquiya, saijiniji tiasano jiyaconajani? Cuniqui, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiyari.

Taa pa niishiniutianiyani jiya puequesacari quera

(Mt 24.3-28; Lc 21.7-24; 17.22-24)

³ Na nuhuaji, nojoriiri quiojoquiaari olivo cuhuariquia tuhuananuucua. Cuniquiji, maja puera tucuacaanu quiquiaari Pueyaso Secojoua tia. Na taquijiriaja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

⁴ —Canaa quia sequere taacari Pueyaso Secojoua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

⁵ Jesuuri nojori riucuaaree:

—Tama nia cuaqueyajaaja nia cojuare tamasaca sapojiyaquiniuucuaaji niajaniya.

⁶ Nia numooteyacuajanjia, queraatia sapojonuujuaacari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷ 'Niaa jaara tojiniuuri miaquetoojonujiniji niya, tucuacaanujuhuaaj, majaari najuhuaana nia shiriiquitiuniu. Seetanujuanaa naa quiniutianiyari. Naajaa, jiyacari, majaari jiya puequesacari quiniutianiya juhuanojuaja. ⁸ Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajiniji miaquetoojonutaniya tamonu jiyajinijinio pueyata. Naajuhuaaj, rijiaari jiuuquiujutianutaniya queraatia tiquiyocua tiacajinia. Jiyanohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miiniu cotesacari quiniutianiya.

⁹ Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya saniitiosocoriquiano. Naajuhuaaj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuhua tiaca jiyaniijiaacua, jiya jiyaniijianucuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatatare nojori niquiarajuhuaaj. ¹⁰ Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. ¹¹ Cua tojiri, niaa jaara jiyatashiyare jiyaniijianucuaacua nequesoreesoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitiojosano niajaniya. Nia pocuasanoori maja niajaniyajiniji quiniutianiya, nia pocuasacari nojori niquiara. Cunocuaajaari Pueyaso Sohuanu niishitishano quiniutianiya, na pocuatesacari niajaniya. ¹² Jiyacarijuhuaaj, pueyanoori sesa miiniutianiya tama tarajanujuaaja, cua tojijia tarajanu quiniuucua. Tama tarajanujuaarijia na niquitionutaniya mosocoriquiano. Jiyacaritij, pueyari tama necohuaajaaja miiniutianiya sesa, cucua tiuujiaa necohua quiniuucua. Naajuhuaaj, necohuari tama na queya tacartanutaniya monujuaaja, na queya tojiniuucua Pueyaso rupaa. ¹³ Puetunu nio jiyajinijinio pueyajanaari maja na niquiniu paniniu quiniutianiya niajaniya, cua tojitiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quiijara jatanishaanutaniya, pueyaracaanu cuata na quiniuria shuquiriaatia.

¹⁴ 'Niaa jaara cuno jiyanoohua sacuaraatia casaa niquiri Pueyaso Secojoua tiajinia nujuatesano, taa supuetana Daniel sequeya na naajioneejiniaacuajani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuananuhuacua, cuno sacuaraatia casaa

jaara nujuatesaare Pueyaso Secojoua tiajinia. ¹⁵ Canapuate jiyacari quiya na tia cacojiriani, nojori cuara tiuquitiaquiiria tiajiniaaco na casaa na riniuria juucua. ¹⁶ Canapuate jiyacari quiya na cuhuariquiajiniani, nojori cuara tacateyaquiuhuara na toqueya na poonuhuara. ¹⁷ Jiyacaritij, jiyanohua taraatia quiniutianiyari maa-jipohuara, nojori jaara manajaatohua quiya, jaara jiyacari jiitiare supuejaca conaa-jajuhuj. ¹⁸ Nia secojosacari, Pueyaso nia maseriquia juhuacarijia, nia mashiyocuatucacari cuara quiyaquiiria shiniquia quishacari. ¹⁹ Cuno quishacari, jiyanohua naquiya miiniuuri quiniutianiya. Tariucuacaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuj, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. ²⁰ Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaaari ritia tajitiniutianiya cuno naquiya miiniu, na saquiriojosano puey-acua na taraajenuucua.

²¹ 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuaj: "Nooj, jati quiyatej", majaari na tojitianunoj. ²² Jiyacaritij, queraatia sapojonuujuaaari supuenutaniya. Nojoriiri sequenutaniya: "Janiyacuaaja Cristoni". Tamasaari sequenutaniyajuhuj: "Janiya Pueyaso sequenu panishano caminiujiuniani". Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³ Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano

(Mt 24.29-35, 42, 44; Lc 21.25-36)

²⁴ 'Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. ²⁵ Riyari totenutaniya. Jiyocuacaanu cumaacaraca quijiacaari tetecatunutaniyajuhuj. ²⁶ Jiyacari, janiya Pueyaso Niyanuuri niquishaanutaniya jiyocuacaanu roseyano cohujajiniani, jiyanohua shacantuca cua cumaacata. ²⁷ Jiyacaritij, janiyari cua seya jiyaramiquiniutianiya nojori rerejotenura puetunu cua saquiriojosano pueyajanaa. Nojoriiri puetunu nio jiyajiniujuanana rerejotesaanutaniya, socua jiyanohua tucuacaanu jiya cajiniocua puequetujinijinio.

²⁸ 'Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹ Quiarijia saniniuujia, naatej taa nia niishiquiaa higo naanacuaani, niocua naa niishirijuhuj janiya quera tiuquiuhuani, niaa jaara puetunu cua pohuatasanojuanaa niquiri tohuateyano. ³⁰ Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³² 'Maja cutaraari nia niishiniu taacari cua tiuquiniutianihuani, casaa juucatej. Majaari jiyocuacaanu quijiaca Pueyaso seya niishiniuujuhuj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ 'Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. ³⁴ Cunoori quiniutianiya juhua tamonu pueyano quianu panishacari tamonu jiyajiniara tucuacaanu. Na quianura, nojuajaari na seya seerataaree maninia nojori cojuanura na tia. Tamasaca niqutioyaree na poonijosanoori, nojori

poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuarajaatijia. ³⁵ Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniutianiuhuani, shusha nin-ishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianiuhuani? Johuaj, maja pa niishiniu. ³⁶ Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacariuhua niaacua. ³⁷ Cua sequesano niajaninyani, cunoori puetunu pueyarajanaa: “¡Nia sutereja! ¡Maja maquenu!”

14

Judiocuaca camarucua roojotoosacari nojori quianura Jesu (Mt 26.1-5; Lc 22.1-2; Jn 11.45-53)

¹ Jiyacari, juhuanujuaja querajaa juuca quiriquiaajaari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano. ² Nojoriiri na sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiri-iri.

Tamonu maaji totasacari na shanhua jaanutaja Jesuucua (Mt 26.6-13; Jn 12.1-8)

³ Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitaniyojua shucuariquiaja pataconiyojua catariquiaari, shanhua cohuaaja saajiajiniji quejasano. Mishaja quiriquiaari shanhua jaanutajata, nardo jaamasucujiniji shipinishano. Jiyanhua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuataree, na totanura Jesu nacaacua. ⁴ Tamasaca tii quiniaa pueyari juaarii naa cuno shanhua jaanutaja niitiasaanuucua. Tama nojoriijaarijia sequetooriquiaa:

—¿Casaara cuno shanhua jaanutaja niitiasaaree najuhuanani? ⁵ ¡Cuno jaanutaja maara niqitiosaacanu queraatia cumaneecara, casamijiuniucua niqitiosocoriquiano!

Nojoriiri juhuacatecara cuno maaji juaarii.

⁶ Jesuuri nojori sequeree saaja:

—¡Nia tarinitiare! ¿Casaara nia rimiaaqueya nio maajiucarani? Naa na miishano janiyani, cunoori jiyanhua maninia quiria. ⁷ Casamijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniujia, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanhua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹ Seetanujuanaa nia sequeyanijia, puetunu jiyacajiniajanaa tee Pueyaso rupaa pohuataaanutaniyani, nio maaji miishanoori pueyaracaanu pohuataaanutaniyajuhuj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura (Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secojonaa jiyaniijianucuaata roojotoonura taa nojori na quiatenutaniya Jesuni. Nojuajaari Jesu saquiriojosano

pueyajinijinio quiquiaarijuhuaj. ¹¹ Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanoehua shuquiririi. Nojoriiri Judas sequeree:

—Canaa quia niqutionutaniya cumaneecani, canaa quia quiatenu sami Jesu. Cunora, Judasri niishiriojonu coteequiaari taacari nojori na quiatenutaniya Jesuni.

Jesu miaquesacari na nuhuajiria na pueyata
(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu marijiajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaquiaariiri Pascuara riuriotaca borregohua, Pueyaso niqiuara miacquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarjia Pascuarani?

¹³ Jiyacaritij, Jesuuri caapiqui na saquiriojosano pueyajinijinio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojina. Niaa jaara na riuriatasee, niocua na nuhuajimia.

¹⁴ Jaara tiuquishii tiajina, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarjia Pascua niucuan?’ ” ¹⁵ Jiyacaritij, nojuajaari nia niqitiniutianiya puereetuca sohuaca, jiyocuacaanu nataco, tariucua maninia jeenucuasano. Niocua cuniqui borrego majetese, niucua pa miaquesocoriquiano.

¹⁶ Na saquiriojosano pueyari quiojoquiaari. Tiacajinia tiuquiiijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majetese borrego, Pascuara miaquesocoriquiano.

¹⁷ Jaara niniquiaari, Jesuuri tiuquiiijiose na saquiriojosano doce pueyata. ¹⁸ Nojori miacquenuusacari, Jesuuri nojori sequeree:

—Seetanujuanaa nia sequeyanijia, tamonu nijaniyajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹ Jesu sequesacari naatej, nojoriiri jiyanoehua taraajequee. Jiyacaritij, tama nojoriijaarijia na nequesoretanu coteeree:

—¿Janiya jiyoteeri quia quiatenutaniyani Jiyaniijianaa?
Puetunu nojoriijianaari naa na nequesotaree.

²⁰ Jesuuri nojori riucaaree:

—Niquiriyatujua doce nijaniyajinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. ²¹ Janiyacuajaari maninia tohuatenu-taniya puetunujuanaani, taa tariucuacaanu Pueyaso Rupaajinia janiyajiniji naajio-tasaquiaaricujani. Saniniuujia, jiyanoehua taraatia quiniutianiyari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²² Nojori miacquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequerquiaariiri:

—Jajaa. Nia miaquere. Nioori cua cuaqueya.

²³ Na nuhuaji, Jesuuri ratujua pataree. Na Que Pueyaso secojoreeri nojori ratu-socoriquianoocuara. Na secojonu nuhuaji, na saquiriojosano pueya niqutioreeri nojori ratunura tiji. Puetunu nojoriijianaari ratujuajiniji raturee. ²⁴ Nojori sequeree miriquiiri:

—Nioori cua nanaca. Cua nanacaari queraatia pueyacuara shoonutaniya. Naacua-jitij, Pueyasoori seetanujuanaa jiyanooniutianiya pueya, saaja nojori tiuuniuucua cucua, taa Pueyaso sequequiaaricujani. ²⁵ Seetanujuanaa nia sequeyanijia, maja

socua cua ratunu quiniutianihua uva caacajiniji, janiya cuara tacatemohuajaatijia pueyaracaanu Jiyaniijiajanaa cua quiniuria. Jiyacaritij, janiyari shusha niaata na ratunutaniuhua.

Jesu sequesacari Pedro, nojuaja nocuaji seetanutaniya
(Mt 26.30-35; Lc 22.31-34; Jn 13.36-38)

²⁶ Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. ²⁷ Na quiojosacari, Jesuuri nojori sequeree:

—Nio niucujani, puetunu niajanijajanaari cucua tiuuniu tarinitianutaniya. Naa naajiotasano quiyacuajaari niajanijajiniji tariucuacaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸ Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹ Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

³⁰ Jesuuri saaja na sequeree:

—Pedronaa, janiya seetanujanaa quia sequeyani, nio niucujani, quiaari janiyajiniji naa seetanutaniya pueya niqiuara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

³¹ Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuara mosaaria quiataqui, naajaa, majaari cua seetanu quiniutianiya quiocuaji!

Narta saquiriojosano pueyari naa sequetureejuhuj.

Taraatia Jesu secojosacari Getsemani cuhuariquiajinia
(Mt 26.36-46; Lc 22.39-46)

³² Nojoriiri jiyacari tiuquiiioquiaari tamonu cuhuariquiajinia. Cuno cuhuariquia sesa quiquiaari Getsemani. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia tacoji.

³³ Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaajaariuhuj. ³⁴ Nojori sequereeri:

—¡Coojiajinia taraajeya jiyanojuanijia, quera cusoyanijia! Niyaja nia jiyojetare. ¡Niocua niqutiareja! ¡Majaari maquenu!

³⁵ Jesuuri socua shiitaniyujua quiaaree nojori tacoji. Na secojonura Pueyaso, mojuquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaaritij:

—Cua Quenaa, quiaara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiyaquiiiria juhua cua panishano. Saaja cuara quiiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

³⁷ Na secojonu nuhuaji, na saquiriojosano pueyacuatacateyarohuari. Nojori riuri-atasuhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secojore niaa mariqui sesa miitishaareeri. Seetanujanaa, poojiaari maninia miiniu panijia. Pa cuaqueyari

saniniuujia sasaca quiyacujua. Majaari pa naata maninia miiniu pa panishano tamaaja. Cunora, Pueyaso nia secojore na cumaquiniuria niajaniya maninia nia miiniuria.

³⁹ Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuara. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutanianoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaja! ¡Quiarijia cutara janiyari sesa miijiaa pueya quiatesaanutaniani, nojori miiniuria janiya taa nojori panitiuyacuajani! ⁴² Nia saneecuatere. Pa quiaare. Cua quiaateriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucujaja mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. ⁴⁴ Judas, Jesu quiaateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocujajaari nojuaja. Niocua na quiasee. ¡Niaari maninia morojosano jaatucutaarohuaquinioj!

⁴⁵ Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiasee. Morojosanoori jaatucutashiyarohua.

⁴⁷ Cuniqum Jesuta quiniaa pueyajinijinioni, niquiriyatu nojorijinijinioori na shuucujaji shitiaquiaari nijiniaquetucujaja mueruu. Nata jaateree pueyacuara secojonaa jiyaniijia seru numocoori. ⁴⁸ Jesuuri nocua nijionaa pueya sequereeri:

—¿Casaara cucua nia nijioree nijiniaquetucujaja mueruutani, macacatanio, morojosano nia riniuria janiya juhua nohuasejojuani? ⁴⁹ Janiyacuajajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niqiuara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniji Pueyaso Rupaajinia naajiotasano tohuateenura.

⁵⁰ Jiyacaritij, puetunu Jesu saquiriojosano pueyajanaari na shuriucujaji mashiyocuatiquiaari. Tamajaaja Jesu tiujiatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetueque lino toquerauta cuhuajaatiariquiaa. Jesu quiatunaa niquishacari nojuaja, na quiatueejaariuhua. ⁵² Nojuajaari saaja na toque tiujiaquee nojori juaashiquiajinia. Juhuasuari ritia netequee. Mashimiaari. Janiyacuajajaari cuno pueyano quiquiaarini, nio naajiona-juhuaj.

Judiocuaca camarucua nequesoreesacari Jesu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesu quiatunaari Jesu jaatucucujajaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujahuaj, Moisés Rootasanojiniji niishitiojonaanio. ⁵⁴ Pedroori

Jesu nuhuajiquiaari tucuacaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia cajishiiri. Mani jitiuriquiaa nojoritia cuniquiiri.

⁵⁵ Pueyacuara secojonaa jiyaniijianucua, puetunu Judiocuaca camarucuajanaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. ⁵⁶ Queraatia pueyari nocuara tonujuriquiaa juucua, nojori sapojonuta. Nojori saquiriojotanoori saaja rimiajata quiriquiaa puetunujuanaa. ⁵⁷ Na nuhuaji, tamasacaari sanetaquiaari nocuara nojori tonujunura na sapojonutajuhuj. Nojoriiri naa sequetuquiaariti:

⁵⁸ —Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujanaraca juucajinia, janiyari tamajaaja na tianu tucuatanutaniuhuani. Cunoori maja pueyata tiasano na quiniu quiniutianiya”.

⁵⁹ Nojori saquiriojotanoori saaja rimiajata quiquiaari jiyaniijianucua niquiara.

⁶⁰ Jiyacariti, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruhua quiocuara tonujiya!

⁶¹ Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶² Jesuuri na riucuaaree:

—Jaa, nojuacuajaniija. Niaari cua niquiniutianiya jiyocuacaanu cumaaca Jiitiana mi-aquetajara cajiyano. Na nuhuaji, niaari cua niquiniutianiya tacatehuano cohuajajinia jiyocuacaanuji.

⁶³ Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaaniutiaari. Sequereeri:

—¿Casaara pa sashiya tamasaca saquiriojotanura saa nocuarajaaraniuhuj?

⁶⁴ Niaacuaja shusha tojirii Pueyasocuara na sequesano sacuaraatia. ¿Niajanijarijataj, taa nia niishiriojiyani?

Puetunu pueyajanaari sequequiaari:

—¡Cuaara mosaaria!

⁶⁵ Jiyacariti, tamasacaari Jesu riocojonu coteequiaari. Na jiquioco morotureejaariuhua maja na niquiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiurijiuhuj.

Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

⁶⁶ Pedroori jiyaniijia tia carijiniacuma quiriquiaa. Jiyacariti, tamonu niya-coori rucanejoriquiaa carijiniacuma. Nojuajaari pueyacuara secojonaa jiyaniijia seru quiquiaari. ⁶⁷ Pedro niquishii cajiyanoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacujaruhua Jesuta rucanejojuajuhuj, cuno Nazaret tiacajinijinio pueyanotani.

⁶⁸ Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujiyaree. Mataca tohuateyaji nujuaseeri. Caacarajaari jiyacari niunijioree. ⁶⁹ Cuno niyacoo jaara Pedro niquiquiaariuhua socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiojuhuaj!

⁷⁰ Pedroori socua na seetaquiaari. Pasaja na tarishishacari, cuniqui nata quiniaari Pedro sequereee socua:

—Seetanujuanaa, quiaari cuno pueyajinijinio. Quiaacuajaari Galilea jiyajinijinio pueyano. Canaa tojishacari quiajaniya, quia pocuanuuri juhua nojori pocuanujua.

⁷¹ Pedroori socua jiyanoohua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiyani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

⁷² Jiyacaritij, caacarajaari niunijionu pacuterohuacuhuj. Pedroori jiyacari niishiquii naa Jesu sequesano nojuajatej: “Jhuanajuaja caacaraja niunijionu pacutejijaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiquii naa Jesu sequesano nojuajatej, jiyanoohua nujuquequeeri.

15

Jesuucuaara pueya saquiriojotasacari Pilato

(Mt 27.1-2, 11-14; Lc 23.1-5; Jn 18.28-38)

¹ Tariquicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuaj, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilatoocuaajaari Judea jiya jiyaniijia quiquiaari. ² Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

³ Pueyacuara secojonaa jiyaniijianucuaari Jesuucuaara tonujuriquiaa queraatia sesa casaa. ⁴ Pilatoori Jesu nequesotarohuacuhuj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

⁵ Jesuuri maja na riucuanu quiriquiaa quenaaja. Cunora, Pilatoori jiyanoohua jiuujiatequiaari.

Na paraa sequesacari Jesu cuaara mosaaria

(Mt 27.15-31; Lc 23.13-25; Jn 18.38-19.16)

⁶ Puetunu marijijarajanaa, Pascuara queranacunu juuca, Pilatoori nujuatesano pueyano tohuitaniniu jitiqiaari nujuatejojuajiniji, cana pueya paniquiaari na cartesaanuracuajani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jitianuucua Judiocuaca.

⁸ Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijijarajanaani.

⁹ Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaarijiaaja, pueyacuara secojonaa jiyaniijianucuaari Jesu niquiniu paniyaquiquiaari pueya shocotenuucua nojori saniniuujia Jesuucuaara.

¹¹ Pilato nequesotasacari nojori, pueyacuara secojonaa jiyaniijianucuaari jiyacari

pueya shiniujiuquiaari nojori sequenura Pilato, nojuaja cuaara carteera Barrabás.
¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jiyanoehua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanoehua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadoehua na niqutioreeri, niyacutesanojinia na teetsaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. ¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatinuria:

—¡Jejee, Judiocuaca camarnuna nooj!

¹⁹ Nojoriiri na naca piquirii naajuata. Na riocojotureejaariuhuj. Nocuara mojuquetacoreeri juhua jiyaniijiajanaa cariquimiaji, nojori sapojonuta na macaatinuria nojuaja. ²⁰ Naa na rerequetesaanu nuhuajitij, toque naatuqueeri nocuaji jocuasaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹ Soldadoehua jiyatasacari Jesu, tamonu pueyanoori jiyacari tacateriquioehua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitianiyojua tuhuananuucua jiyatasaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”.

²³ Soldadohuari Jesu raatequiaari vino juucua, mirrata cojitishano. Saaja na ratuyaquiriiri. ²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacujitij, nojoriiri Jesu toqueya seraatiaquiaari tama nojoririajaaja.

²⁵ Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷ Jiyacaritij, caapiqui nohuasenujuacaari Jesu shuriucua teetejosaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸ Naa tohuateequiaariiri taa tariucuacaanu Pueyaso Rupaajinia na naajiotasaquiaaricujajani. Naa sequeyari: “Na sesaari sesa miijiaa pueya sesacata cojiritiasaquiaari naajiotasaanujuhuj”.

²⁹ Pueya tajishacari nucuaco Jesu shuriuquioco, nojoriiri na macaatiquiaari. Na maanuquenuta naa na sequetuquiaariiri:

—¡Jaj! ¿Majateeri quiajaniya cumaacaracuaja? ¿Quiaateeri jiyaniriquiaa, quiaa jaara Pueyaso Secojoua tia niyartare, quia naata na tianu tucuatenuhua jiuujianaraca juucujinia? ³⁰ Quiaa jaara naa cumaacaraca quiritij, niyacutesanojiniji quia roserecuarajaj.

³¹ Pueyacuara secojonaa jiyaniijianucua, Moisés Rootasanojiniji niishitiojonaari na macaatiquiaarijiuhuj. Tama nojorijaarijia naa sequetooquiaari:

—¿Maatucua saa tamasaca naatanijioriquiajaari? Tama nojuaja cutaraari maja na naata niyacutesanojiniji rosenu. ³² Jaara seetanujuanaa quiri Pueyaso Jiyarosano, pa jiyaniijia na quiniuria, cuaara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, nojoriiri na sesacariquiaajuhuj.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. ³⁴ Jiyacaritij, Jesuuri jiyanohua na rupaa paaretaciaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵ Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

³⁶ Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuaacuaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

³⁷ Jiyacaritij, Jesuuri jiyanohua na rupaa paaretarohuacuhuj. Cusoqueeri.

³⁸ Jiyacaritij, Pueyaso Secojoua tiajiniaacuma, shiquiiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasocua nojori tiuquishacari juucua, jiyanooshoojua nojori quishacari. ³⁹ Cuno Romano soldadohua jiyaniijaari Jesu tacoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuanaa Pueyaso niyanu!

⁴⁰ Maajipohuari tii quiriquiaajuhuj. Tucuaanuji Jesu shootiaturiquiaari. María Magdalenaari nojoritia quiriquiaajuhuj, socua narta maajipohuano. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji.

⁴¹ Puetunu nio maajipohujanaari Jesu nuhuajiniaa quiquiaari. Nojoriiri nera pueraquenuunaa quiquiaari, Galilea jiyajinia na quishacari. Socua queraatia maajipohuari tii quiriquiaajuhuj, canapuate Jerusalén tiacajiniara nijioquiaari Jesutacujani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴² Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujuanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajininio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquiniucua jiaatiaja quiquiaarijiuhuj, canaa Jiyaniijaanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura.

⁴⁴ Pilatoori jiyanohua jiuujiatequiaari na tojishacari Jesu tari cusoquee. Pilatoori

soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuniocoreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanohua puereetuuca quejasano saajiata. ⁴⁷ María Magdalena, José nucua Maríanio, nojoriiri na niqutiariquiaa tee na niasaareeni.

16

Jesu samiitiasacariuhua

(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Maríajuhuj, Salomeenio, nojoriiri shanohua jaanutaja masequiaari macuucua na tuujutasocoriquiano. ² Jiyanohua tariquiicuaaji Domingo juuca, shusha pananu muetasacari, nojoriiri raajinia quiojoquiaari. ³ Nucuo na quiojosacari, tama nojoriijaarijia seque-tooriquiaa:

—¿Canteeri pocuaji shuquitiniutianiya tamocora raa tiootiuni?

⁴ Nojori jaara niqiquiaari raa, saajia niqutiuriiri tariucua tamocora shuquitishano. Puereetuuca saajiaari quiquiaari raa tiootiu. ⁵ Nojoriiri raaco tiuquitiamaa. Mashaja niqutiushiiri tii cajiyo nojori miaquetajara, cohuaja tucuaque toque cajitiaano. Nojoriiri jiyanohua shiriiquitiuquiaari na niqutiushacari nojuaja. Cuno mashajaari Pueyaso seru quiriquiaa. ⁶ Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetesaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷ Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niquniutianiya, taa na sequecanu nijaniyacujani”.

⁸ Maajipohuari netecuatuquiaariuhua raajiniji. Nojoriiri tetecaturiquiaa na shiri-iquiniutia. Majaari quenaaja tamasaca pueya na sequetunu quiquiaari na puerenuta.

Jesu muetasacari María Magdalenaacua

(Jn 20.11-18)

⁹ Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujuanaa muetaquiaari María Magdalenaacua. Jesucuaajaari tarijia siete samaruhua tohuatanijioquiaari cuno Maríajiniji. ¹⁰ María Magdalena niqiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹ María Magdalenaari nojori sequeese:

—Pueyanaa, ¡Jesu tari samiitiarohua! ¡Janiya na niqiriini!

Nojoriiri María sequesano cuaracashitirii saaja.

Jesu muetasacari caapiqui na saquiriojosano pueyacua

(Lc 24.13-35)

¹² Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriiria. ¹³ Nojori niishishacari nojuacuaja Jesu quiquiaari, nojoriiri ritia riujuuquiaariuhua tamasaca nojoriijinijinio nojori numootenuhuara. Naajuhuj, Jesu saquiriojosano pueyari nojori pohuatasano cuaracashitirijuhuj.

Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)

¹⁴ Tamacari, Jesuuri na once saquiriojosano pueyacua muetaquiaari. Nojoriiri mi-
aquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori
quiniuucua. Majaari quenaaja nojori tiuuniu quiquiaari nojorijinijinio pueyacua,
nojori sequesacari: “Canaa Jesu niquiriini, samiitiarohuacuaaqui”. ¹⁵ Na nuhuaji,
Jesuuri nojori sequeree:

—Nia quiaare puetunu jiyacajiniajanaa, janiyajiniji Pueyaso rupaa nia pohuatanura,
puetunu nia pohuatasanoocua tiuujiaa pueyapuejanaa jiyanooshaanura. ¹⁶ Cante
moojinia tiuquinishiya Pueyaso rupaacua na tiuuniuucua, Pueyasoori na jiyatenu-
taniya na pueyanora. Saniniuujia, cante Pueyaso rupaacua tiuyaquiiani, nojuajaari
saniitiosano quiniutianiya. ¹⁷ Cucua tiuujiaaari nocuaji pueya jiuujiatesano casaa
miiniutianiya cua cumaacata, pueya niishiniuria Pueyaso rupaaqui seetanu rupaa-
janaa. Naacujitij, cucua tiuuniaa pueya nia quiniuucua, niaari samaruhua tohuatani-
jionutaniya cua cumaacata, nia jiyaniquishacari cua sesa. Niaari nia niishiyaquishoo
rupaaca pocujaca quiniutianiyajuhua. ¹⁸ Naajuhua, niaa jaara soconu sajitishaare,
niaa jaara casaa raatesaarejuhua nia cusojuasaanura juucua, majaari nia cusunu
quiniutianiya. Naajuhua, cusosuhuacua nia niasacari nia juaashiquia, cusosuhuari
naataconutanihua.

Jesu tacasacariuhua jiyocuacaanu na Queecua
(Lc 24.50-53)

¹⁹ Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. No-
juajaari Pueyaso miaquetajara cajiquiaariuhua. ²⁰ Na nuhuaji, na saquiriojosano
pueyari quiojoquiaari Pueyaso rupaa nojori pohuatanura puetunu jiyacajiniajanaa.
Jiyaniijia Jesuuri pueyaracaanu nojori cumaquiriquiaa. Pueya niqitirijiaariuhua na
cumaacata na pueya miijosano, pueya niishiniuria maatia, Jesu jiyaramiquishano
pueya pohuatasanoori seetanu rupaajanaa.

LUCAS NAAJIOTASANO JESUCRISTOJINIJI

Niya pohuatashiyari casaara Lucas naajiotaquiaari nioni

¹ Queraatia pueyari suraatia naajionu saniniuuiuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohuatanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. ⁴ Naacuajitij, quiocuara naajiyaniija na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohuatasacari Tiuquinijiona Juan rasaanutaniya

⁵ Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquihuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquihuacuajinio supueno quiquiaari. Nojori supuetanaari mariyata tariucuaaanu pueyacuara secojona quiquiaari. ⁶ Zacaríasri necocua Isabelta maninia miijiaca quiquiaari Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiuuiunaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyajaru Isabel quiniucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari. ⁹ Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saaja naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiyani, shanohua jaanutaja na catijanura tii. Cuno juuca saniniuujia, saajiari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijanura. ¹⁰ Na catijasacari, puetunu pueyajanaari Pueyaso secojonuuriquiaa Secojoua tia cariiniacuma. ¹¹ Jiyacaritij, Pueyaso seruuri Zacaríascuua muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriiquirii na niquishacari Pueyaso seru. Jiyanohua na puerereeri. ¹³ Pueyaso seruuri na sequeree:

—Maja puerenu Zacaríasnaa. Pueyasocujajaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. ¹⁶ Nojuajaari queraatia Israel pueya tacatonutaniuhua nojori Jiyaniija Pueyasocua. ¹⁷ Nio Juanri pa Jiyaniija puetana quiniutianiya. Nojuajaari pueyara Pueyaso sequesano caminiuuiunaa supuetana Elías sohanu jiitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojitiaashijia pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiaacari jeenucuasano quiniutianiya pa Jiyaniijaacujia.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niquiocuaari motajajuhuj.

¹⁹ Pueyaso seruuri na riuquaree:

—Janiyacuajaari Gabrielni, Pueyaso tacoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyaso-jiniji. ²⁰ Quiarijia saniniuujia, cua sequesanoocua quia tiyaquiniuucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriquitiurii pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua tohuatamohua. Majaari na naata pocuanu quiriqiaa. Nareja shishinioriquiaari. Naacuajitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. ²⁴ Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaariiatijia cinco raca. Nojuajaari tama sequequiaarijaaja: ²⁵ “Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶ Seis raca jaara shocojoquiaari Isabel manajesacaricuua, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacocua na jiyaroreeri, cante tari sequesaaquiaaricuajani José jyanishano pueyanota na caminiuria. Na camiriquianoori supuetana jyanijia David niquihuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoona. Jiyaniija Pueyasoori quiata quia, socua shuquiriaatia quia quiniuria tamasaca maajipohuajiniji.

²⁹ Maríari jyanohua tacaquiaari naa Pueyaso seru sequesacari nojuaja. Nojuajaari tamajaaja niishirioriquiaa: “¿Casaara naa na sequeree janiyani?” ³⁰ Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuquiritiniutianiya. Quiaacuajaari na timitiasano. ³¹ Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Nyanu”, jiyocuacaanu Quijia Nyanu. Pa Jiyaniija Pueyasoori na jyatenuutaniya Jiyaniijiarajanaa na quiniuria na supuetana David niti. ³³ Israel pueya jyanijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniija na quishacari.

³⁴ Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Nyanu quiniutianiya. Nojuajaari seetanujuanaa Pueyaso tojijia quiniutianiya. ³⁶ Naajuhuj, quia supuetanajinijinio motaja Isabelri neyanu ranutaniyajuhuj. Cuno maajiiri sequesaaquiaari “niyajarua maajitia”. Naajaa, seis racaari tari na shocojiya na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸ Maríari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuaara miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niquniuucua

³⁹ Maríari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhuananuhuaraca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María sequesano nojuaja, ¡conaa-jaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jitianura. ⁴² Naacuajitij, Isabelri jiyacari na rupaa paaretaree. Naa María sequereeri:

—¡Pueyasocuaajaari socua maninia miiriucuaa quiajaniya tamasa maajipohuajiniji! ¡Maninia miiniutianiya quia niyanujaariuhua! ⁴³ ¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquniuria janiya? ¡Maja! Naajaa, ¡jiyanohua timiyanijia! ⁴⁴ Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. ⁴⁵ Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶ Maríari sequeree:

—¡Coojia jiyanohua shuqiritiaa cua Jiyaniijia Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua najuhua quijianijia. Naajaa, Pueyasoori cua jiyanoorii. Cua saquiriojorucuaari na tojijia cua quishacari. Quiarijiani, pueyari pueyaracaanu cua sequenutaniya: “Pueyaso shuqiritiasano María”. ⁴⁹ ¡Pueyasoori jiyanohua maninia miirii janiya! Nojuajaari puetunu cumaacacajanaa. Nojuajaari tojetaarucujanaa maninia quijia. ⁵⁰ Nojuajaari pueyaracaanu jiyanoquiaa na tojitianaa, canapuate na rerequeteyaquijiacacuajani. ⁵¹ ¡Nojuajaari jiyanohua maninia miiquiaa na cumaacata! Nojuajaari niishijiaca pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. ⁵² Nojuajaari cutara jiyaniijianucua jataree, cuno pojori jiyanishano niishiyashijiaca pueya jiyatesaanura jiyaniijiaara nojori niti saniniuujia. ⁵³ Miaajeejunucua tootijioreeri maninia sumatuuta. Puera casamiriaca pueya taanuquiaariiri, casaaju nojori quiojonura. ⁵⁴ Na pueya Israel naacureeri. Majaari na niyajetanu quiquiaari nojoriicua na taraajenu. ⁵⁵ Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequequiaari: “Seetanujanaa quiocua taraajenutaniyanijia, quiocuajinio superiquiano pueyacuanio”.

⁵⁶ Na nuhuaji, Maríari queraatia tarishiquiaari Isabel tiajinia. Jiuujianaraca raca nuhuaji, Maríari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na shuriucua quiniaa, mariyata na jiyasocujinio supueno pueyajuhua, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuani, na shuqiritiniuria neyanuta. Nojoriiri Isabelta shuquiriquiaarijuhua. ⁵⁹ Nojoriiri Zacarías tiajinia rerejoquiaari conaaja jitiiasacari ocho juuca, na cararaatiuquia co mialesaanura, taa Moisés rootaquiaaricuajani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰ Na nucuaari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura taa na sesojonu paniriquiaa neyanuni. ⁶³ Zacaríasri naajiooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! ⁶⁴ Jiyacaritij, Zacarías nitiiri sasaquitiacuhua. Juhuacatecara pocuarohuari. Pueyaso miishano pohuataree pueya niquiaraari, na shuquiritiasacari Pueyaso. ⁶⁵ Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujanaa cuno Judea tuhuananuhuacua quijiaca pueyara. ⁶⁶ Puetunu nio tojitianaa pueyajanaari niishiriojonuuquiaari. Tama nojorijiaarjia nequesoreetooquiaari:

—¿Casaanquitijia cuno mueya quiniutianiya na nuhuajitijaj?

Pueyari niishiquiaari Pueyasoori seetanujanaa cuno mueyata quiriquiaa, na cumaquiniuria.

Zacarías sequesano na shuquiritiasacari Pueyaso

⁶⁷ Na que Zacarías jiuujiaari jyanohua mishaja quiriquiaa Pueyaso Sohuanuta. Pueyaso Sohuanuuri na pohuataree. Naaratej, Zacaríasri naa sequequiaari:

⁶⁸ —¡Jyanohua maninia pa Jiyaniijia Pueyaso, pa supuetana Israel Jiyaniijia! ¡Cuara jyanohua shuquiritiasaaria mijiria na niniuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuacaanucujani. ⁷⁰⁻⁷¹ Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niquiniu paniyaquijia pueyano. ⁷² Nojuajaari sequequiaarijuhuj, majaari na niyajetanu quiniutianiya na sequesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijuhuj maninia quijia pa jataniniutianiyaquiniaari, saaja nera pa quiniuria pueyaracaanu. ⁷⁶ Quiajaniya saniniuujia, quiyanuniyojuanaa, quiaari sesojosaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquirojosano pueya niishitiojore, nojoriiri na naata jyanoooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jyanohua jyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucanejonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰ Conajaari maashiquiaari. Nojuajaari tama na cuaqueyajaaja cumaquiquiaari socua seetanujanaa Pueyasocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaarijiaatijia narta Israel pueya niquiara.

2

Jesu rasacari (Mt 1.18-25)

¹ Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jiitiasano pueyapuejanaa cuara serojosaaria puetunu nojori jiyacajiniajanaa. ² Pueya jaara coteenujuanaa serojosaaquiaari, Cirenio

jiyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. ³ Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. ⁵ Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. ⁶ Belén tiacajinia nojori quishacari, jiyacari tari quiquiaari María ranu juuca. ⁷ Tii jiyapueratereeri. Conaaja jiunioquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria ruconaa tiuquijia tiajinia.

Pueyaso seya muetasacari borrego cojuanaa pueyacua

⁸ Belén tiaca shuriucua cuno niucuaaja, borregohua cojuanaari suteriquiaa cuhuariquiajia, na seya nojori cojuasacari. ⁹ Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanoehua shiriqitiuri! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanjia, jiyanoehua maninia casaa cua pohuatanura niajaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhaj. ¹² Niaa jaara nocua quiaare, niaari conaaja riuritanutaniya toqueraacuacajinia jiuniosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano niajaniya.

¹³ Jiyacaritij, narta Pueyaso seyari na cojishii. Jiyanoehua queraatia quiriquiaari. Nojoriiri naa maniniuhuaqueetariquiaa Pueyaso:

¹⁴ —¡Jiyanoehua maninia pa Pueyaso, jiyocuacaanu Quijia! ¡Nojuajaari jiyanoehua pa shuquiritiasano, na jiyaronuucua jiyacua quiniaa Jiyanoonia! Naacuajitij, cana Pueyaso shuquiritiaani, nojoriiri jyanootioonutaniya narta pueyata.

¹⁵ Pueyaso seya jaara tacataquiaariuhua jiyocuacaanu na quiquiojinioehua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree pajaniyacujani!

¹⁶ Nojoriiri ritia quiojoquiaari. Conaaja riuriatatuseeri, María, Josénio. Conaajaari juyaca miaquejajinia niasano mariquiaa. ¹⁷ Nojori niquishacari conaaja, nojoriiri ritia tii quiniaa pueya caminiujiuri conaajajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriquiaani, nojoriiri jiuujateree. ¹⁹ Majaari María niyajetanu quiquiaari puetunu nojori pohuatasanojuanaa. Noojiajia na niishiriojoriquiaa pueyaracaanuuri. ²⁰ Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niquishanojinijio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojoua tiajia, Pueyasora jiyatesocoriquiano

²¹ María conaaja jaara ocho juuca jiitiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacuajani, na mana-jeyaquishacarijia.

²² Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueyaasaanu nuhuaji.

Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miiquiaariti, tariucuacaanu Pueyaso Rupaajinia naajiotasano tojitiajaca nojori quiniuucua. Naajiotasanoori naa quiyatej: “Puetunu nia jiyapueranuhajanaa cuaara Pueyasora jiyatesaaria”. ²⁴ Naaratej nojoriiri quiaaree na seru mosaanura nojoriicuara Pueyaso Secojojua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinijia”.

²⁵ Jiyacariti, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niquiara. Pueyacaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacuaji Tacuriquiano. Nojuajaari Pueyaso Sohuanu jiitijaja. ²⁶ Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojati, Pueyaso jiyarosaariquiano. ²⁷ Pueyaso Sohuanuuri na jiyatequiaari namitia cuno juuca Pueyaso Secojojua tiajinia. Naacujitij, Jesu jaara pasaaquiaari Secojojua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. ²⁸ Simeónri Jesu paree. Na cacanuureeri. Naa Pueyaso sequeree jiyanojua na shuquiriniutiaari:

²⁹ —¡Cua Jiyaniijiana, tariucujaja! ¡Quiaritia cutara cua naata cusonu juhujaniya, shuquiriaatia cua quishacari! Quiaacuajaari tari cua niquitirii tarijia quia sequesano janiya, quia seru cua quiniuucua. ³⁰ Tari niquirii quia Jiyarosanocujani, canacuaji Tacuriquiano. ³¹ Nojuajaari quia niquitiosano puetunu jiyacajinia quinia pueyapueecuarajanaa. ³² Nojuajaari puetunu taucua jiuujajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritiasano quiniutianiya na seera.

³³ Jesu que, na nucuajuhuj, nojoriiri jiuujiateree naa Simeón sequesacari conajajini. ³⁴ Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucia María sequereejariuhuj:

—¡Cua tojiri! ¡Nio conajaari cutara pueyano quiniutianiya! Queraatia Israel pueyari juhua tiiriiniutianiya nojori ruuretasacari nojuaja. Saniniuujia, queraatia Israel pueyari cumatia nujuatujuaca quiniutianiya, nocua nojori tiushacari. Na cumacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵ Naacujitij, tama pueya niishiriojosano nojiacajiniajaarijia niishishaanutaniya. Quiara saniniuujia, jiyanojua taraatiaari quiniutianiya. Quioojiaari juhua mueruuta tohuariquitishaanutaniya quia mueyacu quia miishacari.

³⁶ Cuniqijia, Pueyaso Secojojua tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiuujia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquihuacuajinio supueno maaji quiquiaari. Jiyanojua motaja quiquiaariiri. Shusha niyaco na quishacari, nojuajaari camiquiaari. Na nuhuaji, siete marijaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojojua tiajinia, Pueyaso na shuquiritiasacari juuca, niucuanio. Nojuajaari sequerucua miaqueyaquiquiaari Pueyaso na secojosacari pueyaracaanu. ³⁸ Simeón pocuasacarijia, jiyacariti, Anaari nocua nimiaa. Na niquishacari conaja Jesu, Anaari

noojiajinia niishiquiaari cante nojuajani. Cunora, Pueyaso sequeree na shuquiriniuti-aari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiaca pueya niquiara. Nojori sequereeri:

—¡Niocujaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniohua

³⁹ Jesu queyari puetunu Moisés naajioneejinia Pueyaso rootasanojuanaa tucataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuajaaja, Nazaret tiacajinia. ⁴⁰ Naatujua Jesuuri maashiquiaari. Socua cumueecara quiquiaariiri, maninia niishijiaranio. Pueyasoori jiyanohua na naacujua.

Mashajaniyojua Jesu quishacari Pueyaso Secojojua tiajinia

⁴¹ Puetunu marijarajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaaricujani puetunu marijarajanaa. ⁴³ Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacujitij, nojoriiri juhuajaniya rucuaneree puetunu cuno juucajanaa. Cuno niucujua, nojoriiri Jesu pajequiaari nojori pueya tajinia, nojori niishishano pueya tajiniano. ⁴⁵ Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojojua tiajinia, Moisés Rootasanojiniji niishitiojonaa pueya tajinia cajiyano. Nojori tojiriquiaari. Nojori nequesoreetariquiaajaariuhuj. ⁴⁷ Puetunu pueyajanaa, canapute na tojitariquiaani, nojoriiri jiuujiatequiaari niishijia Jesu quishacari. Jesuuri maninia nojori rihuaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriiquitiquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pakeriquiaani jiyanohua canaa tacaaniutia quiocua!

⁴⁹ Jesuuri na riucuaaree:

—¿Casaara nia pakeriquiaa janiyani? ¿Majateeri nia niishiniu, janiyari cua Que Secojojua tiajinia quiniuucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijia quiquiaariijaariuhuj. Pueyaso shuquiritasano quiquiaariiri. Puetunu pueyajanaari na shuquiritiaquiaarijuhuaj.

3

Tiuquinijiona Juan pohuatasacari Pueyaso rupaa cariquia jiyajinia (Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijiajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajiniano. Lisanasri jiyaniijia quiriquiaa Abilinia jiyajinia.

Puetunu cuno jiyaniijianucujanaani, nojoriiri jiyaniijianucua César Tiberio jiyate-sano quiquiaari cuno jiyacajinia. ² Jiyacaritij, Anásri Caifásta Judiocuacaacua seconaa jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquioco jiyacajanaa taji quiaari na poojotasacari Pueyaso rupaa pueya niquiara. Nojuajaari naa pohuataquiaritij:

—¡Nioojia nia tacatore maja socua sesa nia miiniuria, moojinia cua tiuquinijionura niajaniya, Pueyaso jiyanooniuria niajaniya sesa nia miishanojiniji!

⁴ Naacujitij, supuetana Isaías naajiotasanoori tohuateequiaari. Pueyaso sequenu panishano caminiujunia na quiniucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria! ⁵ ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhajanaa cuaara jiuurioosaaria jacananu na nuu quiniuria! ¡Shuyorocotunu nuu cuaara pocuareesaaria! ¡Puetunu surocoshiquiajanaa cuaara mishiquiojosaaria jacananu na nuu quiniuria! ⁶ Naacujitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanooni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaa quiaari:

—¡Niaacuajaari juhua sacocua! ¿Cante nia numooteree nia mashiniuria jiyanohua Pueyaso saniitionu panishacari niajaniyani? ⁸ ¡Maninia miijiara nia quiri, canaa niishiniuria niaari seetanujuanaa nioojiaca tacatoree sesa nia miiniujiniji! ¡Majaari najuhuana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua”! ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niquiohwarajuhuj! ⁹ ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijiasocoriquiano. Naajuhuj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacujaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riucuaaree:

—Cante querajaqueya toqueracani, nojuaja cuaara niquitioora taque cante toqueejuni. Naajuhuj, cante miaquesanoracani, nojuaja cuaara niquitioora miaquesanoojunucua.

¹² Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

¹³ Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuaaree:

—Niaacuaajaari puecootajaraca. Naajaa, majaari pueya casami nia jaariuutianu, nojori nia miananajonuta, nojoriicuara nia tonujusacarijiuhua nia sapojonuta. Juhua-janiya nia quiri saaja nia jiyaniijia niquitiosano cumaneecata.

¹⁵ Pueyari jiyanoehua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquiniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. ¹⁶ Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiajinia, na cumaaca nia jiitianura, seetanujuanaa maninia miijia nia quiniuria! ¡Nojuajaari juhua manitia nia saniniujiuniutianiyajuhua, maninia jiuujiaraca nia quiniuria! ¡Nojuajaari socua jiyanoehua cumaacaraca janiya-jiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhua, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jatasaanutaniya manijinia! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹ Jiyaniijia Herodesri jiyacari tarajanu Felipe niquiocua jiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa miijia quiquiaari. ²⁰ Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

Jesu tiuquinishacari moojinia

(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijiuhua. Jesu tohuatasacari moojiniji, na que Pueyaso secoriquiaari. Jiyacaritij, jiya cajiniocuaari riatequee. ²² Pueyaso Sohuanuuri Jesuucua roseyaree juhua mococoonu niquishano. Jiyocuacaanu, Pueyaso rupaari tojishaaree sequeyano:

—¡Quiaacuaajaari cua panishano quianuniyojua! ¡Jiyanoehua quia shuquiritiaanjia!

Jesu supuetanaa sesaca

(Mt 1.1-17)

²³ Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari.

Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyaqui cariiquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucuaaree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanoehua jiyaconaja tuhuananuucua. Sesaacaari ritia niqutirii Jesu puetunu mijiria jiyacajanaa. ⁶ Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijiaara na quiniuria. ⁷ Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri.
¹⁰ Pueyaso Rupaajiniacuaajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹ Nojoriiri quia quianutaniya, saajiaacua quia jiriataaquiniucuaaji”.

¹² Jesuuri na riucuaaree saaja:

—Naa naajiotasano quiyajaariuhua Pueyaso Rupaajinia:
 “Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiri quiaa sesa na miitiniuria. Naaratej, rupaquijia na tarinitiaquiaari tamacaririaari.

Jesu coteesacari na poonijosano miiniu Galilea jiyajinia
 (Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutioquiaari.

¹⁵ Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia
 (Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaaquiaaricuaajani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucuaajani. Nojuajaari nujaquiaari Pueyaso Rupa serojonura pueya niquiara. ¹⁷ Pueyari na niquitioree tariucuaaanu Pueyaso sequesano caminiujiunia Isaías naajionee jiuniocosano, pueya niquiara na serojosocoriquiano. Jesuuri na saacartaree. Serjonu coteereeri tee nio naajiotasano quiyacuajani:

¹⁸ “Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiri-ohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niquijiaara nojori quiniuhuara. Cua jiyaroreejaariuhua taraatia miitiasusano pueya cua jiyatenura shuquiriaatia quijiacara.
¹⁹ Cua jiyaroreejaariuhua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

²⁰ Na serjonu nuhuaji, Jesuuri naajionee jiuniorohua. Na niquitiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa.

²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niquiara.

²² Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocooriquiaa Jesujiniji. Tama nojorijiaarijia nequesoree-tooriquiaa:

—¿Majate nio pueyano José niyanucuaaja, niya pa tiacajinia maashiniotej?

²³ Jesuuri nojori sequereeri:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniajaajani, taa nia tojiqianucuaaja cua miishanojiniji Capernaum tiacajiniacuaani.

²⁴ Jesuuri socua sequereeri:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniajaaja. ²⁵ Supuetana Elías

quishacari, queraatia mashiquiopueeri quiquiaari Israel jiyajinia. Jiyanoehua miaa-jesacari quiquiaariiri maru niyaquishacari pueyaracaanu. Jiuujianaraca mariijaari shocojoquiaari socua seis racanio, maru niyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasooocua tiuujia, cuno taatu miaquesanoori maja na pueetanu quiquiaari nojoriria. ²⁷ Naajuhuaaj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

²⁸ Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanoehua juaaquioree. ²⁹ Nojoriiri saneecuatuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricuajani. Nojoriiri na capotunu paniriquiaa juucua tacobijaji naa na monura. ³⁰ Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano
(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

³³ Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoehua nacareeri:

³⁴ —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajaniija, cante quiajaniani! ¡Quiaacuajaari sesa miyashijia Pueyaso Niyanu!

³⁵ Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶ Puetunu pueyajanaari shiriiquitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoehua cumaacaraca! ¡Cunora samaruhua tohuataniriiri!

³⁷ Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

Jesu naatanishacari Simón Pedro reyarucua
(Mt 8.14-15; Mr 1.29-31)

³⁸ Jesuuri Pueyaso secojojua tiajiniji tohuareetaquiaari na pueyata. Quiojiya-reeri. Simón tiajinia tiuquitiushiiri. Simón reyarucuaari jiyacari jiyanoehua naseeca matariquiaa. Pueyari Jesu sequeree na naataniniuria. ³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacuajanaa. Nojoriiri queraatia tamaatia cusonu jiitiaquiaari. Jiyacari na naatani-jjoree puetunujuanaari. ⁴¹ Naajuhua, queraatia samaruhuari tohuareetaquiaari cusosuhuaajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujua tiajiniaqueya
(Mr 1.35-39)

⁴² Tariquiicuaji, Jesuuri tiacajiniji quiaquiaari tamaquiicua tamajaaja. Pueyari na pajequiaari. Nojoriiri socua nocua tiuquiiijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³ Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooni paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajiniajaniuhua. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

5

Sapitiaajara jaquerootanaa shiriiquitiushacari
(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoehua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

⁶ Nojori jaara socua na shiyaruhua jartaquiaariuhua, jiyanoehua queraatia sapitiaaja ritiatureeri! Shiyaruhuari sureequetanu coteequiaari. ⁷ Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoriiriatej, Jesuucuaara mojuquetareeri. Jesu sequereeri:

—¡Jiyaniijianaa, maja cua rpuenu socua! Janiya puera sesa pueyanoni quia rpuena cua quiniuria.

⁹ Simónri shiriiquirii, jiyanoehua queraatia sapitiaaja nojori quiasacari. Nata quiniaa pueyari shiriiquitiuriijihua. ¹⁰ Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

Jesu naatanishacari lepraraca cusosu
(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiriirinij. Quia naataniniu paniyanijia. Quia cuaqueya cuaara jeequehuara.

Naa na sequesacaritij, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhara juhuajaniya. Naajuhaj, quia seru quia niquitiosee Pueyasooacara catijasocoriquiano. Naa quia miiri taa Moisés rootaquiaaricujani, puetunu pueyajanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jyanohua socua tamaquicua caminiu-jiushaaquiaari pueya niquiara. Naaratej, jyanohua queraatia pueyari nocua nijioquiaari na tojiniuria, mariyata Jesu naatanijonura nojori, nojori cusonujiniji.

¹⁶ Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu
(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquiaa. Na tojtianaa tajinia cajituriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajinijinio. Jesuuri jyanohua Pueyaso cumaaca jiitariquiaa cusosuhua na naatanijonura. ¹⁸ Jiyacaritij, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocujaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequereeri:

—Pueyanonaa, quiaacuaja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucujaji taacanuyajaa? ²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”? ²⁴ Cunora, janiyari quiarijia nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhuana pueyano sequereeri:

—Cua tojiri. ¡Quia sanere! ¡Quia matu quia pataarohua quia tiajinia!

²⁵ Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiuhua na tiajiniohuari Pueyaso na maniniuhuaqueetanuta. ²⁶ Puetunu pueyajanaari shiriiquitiurii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaari-jiuhuj:

—¡Paari quiarijia jiyanoohua maninia miishano niquiriini! ¡Nocuaji jiuujiatesano!

Jesu sequesacari Leví, na pueyano na quiniuria

(Mt 9.9-13; Mr 2.13-17)

²⁷ Nio nuhuaji, Jesuuri tohuataquiaari. Tamonu pueyano niquiriiri jiyaniijajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiitiasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jiyanoohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhuj. Nojoritia miaquejajinia cajitiuriquiaari, socua tamasaca pueyano. ³⁰ Moisés Rootasanojiniji niishitiojona, mariyata narta Fariseocuacaari juhuacatecara Jesu pueyacuara rimi-aquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacar-tajacatajaajanio? Nojoriiri pa paraa sequera cumaneeca masejona.

³¹ Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. ³² Naajuhuj, majaari mijiria cua niniu quiquiaari maninia miijia pueyacu. Niquiaari cutaranijia sesa miijia cua tacatonuhua Pueyasocua, maninia miijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

³³ Pueyari Jesu sequeree:

—Tiuquinijiona Juan pueya cutaraari sequerarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuj. Quia pueya saniniujia, saaja miaquequiaari, ratuquiaari. ¿Casaarateni?

³⁴ Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariuti-asaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniujia, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua ru-paari naajuhuj, juhua quiarinio toque. ³⁷ Naajuhuj, majaari na naata quiarini-acu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitashiya. Shoqueeri najuhuana sesoshiyajuhuj. ³⁸ Naaratej, maninia cutaraari quiariniacu uva caaca shuujiyonu shoque quiariquiojinia, maja vino niitiasaanuucuaaji, na quiquio shoqueno. Naajuhuj, nia niishitiojosanoori juhua tariucuaco shoque. ³⁹ Naajuhuj, pueyano jaara vino tariucuanacu ratujua quiri,

majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuj, majaari cua niishitiojosano nia paniniu, quiarinio na quiniuucua.

Jesu pueya carojotasacari trigo samaatenu juuca
(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajini na shuuquiojoriquiaa na corequetanura. Na nuhuaji, na jajau miojonuuriquiaari. ² Fariseocuacaari na niqutiariquiaa. Nojoriiri Jesu pueya juaarii:

—¿Casaara nia tojitiaaquiya Moisés Rootasanoni, taa na sequequiaaricuajani maja pa poonijionura samaatenu juuca?

³ Jesuuri nojori riucaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijihuhuj? ⁴ Nojuajaari Pueyaso Secojoua tiajini tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

Jesu jeecasacari pueyano juaashiquia, cuseetucojuara joojequetano
(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojoua tiajini tiuquiquiaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara. ⁷ Moisés Rootasanojiniji niishitiojonaa, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeecare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequere:

—¡Quia sanere! ¡Niya quia nujuasee pueya tajinia!

Pueyanoori sanee. Nujuaseeri tee Jesu sequequiaari na nujuanuracuajani.

⁹ Jesuuri nocuara tonujunu panijaca pueya sequere:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niquinijoree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequee! ¹¹ Cuno pueyari jyanohua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano
(Mt 10.1-4; Mr 3.13-19)

¹² Jiyacaritij, Jesuuri tamonu tuhananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojitajaca pueya sequequiaari nocua nojori nijionura. Puetunu nojorijinijinijuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón.

Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaaquiaarijuhuaj, Judas Iscariotenio. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya

(Mt 4.23-25)

¹⁷ Na nuhuaji, Jesuuri tuhuananujiniji rosetaquiaariuhua na saquiriojosano puey-ata, jamatujiniara. Cuno jamatujinia, queraatia na nuhuajiniaa pueyari tari nocuaji quiriqiaa. Mariyata jyanohua queraatia pueyari tii quiriqiaa puetunu Judea jiyajinijinio, Jerusalén tiacajinijiniojuhuaj, shoniniacu caminia shuriuquiumia quijiaca-jinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori to-jiniuria Jesu, na cusonujiniji nojori naatanijiosaanurajuhua. Jesuuri nojori naatani-jioree. ¹⁸ Naajuhua, taraatia samaruhua miishano pueyari naatanijiosaaquiaarijuhuaj. ¹⁹ Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacari jyanohua poonijioriquiaa. Naaratej, puetunu pueya-janaari naatanijiosaariquiaa, saaja nojori quiasacari nojuaja.

Jesu pohuatasano shuquiriaatia quijiajiniji, taraatia quijiajinijinio

(Mt 5.1-12)

²⁰ Na nuhuaji, Jesuuri na pueya niquirii na pocuanura. Naa sequereeri:
—Niaari Pueyaso shuquiritasano, niaa jaara niishiriquia nioojia saaja sesa miihia. Niaa jaara niishiri nioojia naa quiyatej, niaari Pueyaso jiiitasano pueya quiniutianiya.

²¹ 'Niaari Pueyaso shuquiritasano, niaa jaara maninia miihia quiniuucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniuucua jiaatiaa, Pueyasocujaaari nia jataniniutianiya maninia quijiara nia quiniuria.

'Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutianiya nia shuquiriniutia, niaa jaara jiyanooshaaruhua.

²² 'Niaari Pueyaso shuquiritasano, pueya jaara nia niqiniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijia nia quishacari. ²³ Niaa jaara naa miishaaretej, jyanohua nia timiri. Nia jaacuatara nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiiitiaa jiyocuacaanu, na niqitiosocoriquiano niajaniya. Nia paraa supuetanaari naa taraatia miiquiaari tariucuacaanu Pueyaso sequenu panishano caminiujiuniaa pueyajuhua.

²⁴ 'Niaari saniniuujia taraatia quijiaca quiniutianiya, jamuejaca casamiriaca pueyanaa. Niaacuajaari tari shuquiriaatia quiquianu, puetunu nia panishanojuanaa nia jiiitasacari.

²⁵ 'Taraatia quijiacaari niajaniya, cante sequejani: “Janiyacujaa maninia pueyanoni. ¿Janiyatucua casaara paniri Pueyaso jiyanooniuria janiyani?” Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiacaari niajanijuhua, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutianiya Pueyasooju nia quishacari pueyaracaanu.

²⁶ 'Taraatia quijiacaari niajaniya, puetunu pueyajanaa jaara maninia pohuataquiaa niajanijiniji, maninia nia cojiniuucua cuno pueya, Pueyaso tojiyashijia pueyani. Cuno pojori supuetanaacuajaari naa shuquiriaquiaari cuno sapojonuujuaa, canapete maja seetanujuanaa Pueyaso sequesano caminiujiuniaa quiquiaaricujani.

*Pa paraa panijiaca pa quirij
(Mt 5.38-48; 7.12)*

²⁷ 'Niajaniya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niquiniu paniyashijia pueya. ²⁸ Saaja maninia nia riucua nia juayano pueyano. Sesa nia miijiaca pueyacuara nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijiuhuj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niquitiorohua. ³⁰ Pueyano jaara quia sequere quia casamijiniji quia niquitionura nojuaja, quia niquitiorohua. Pueyano jaara quia casaa jaariutiare, majaari na sequenu: "Cua niquitiorohua". ³¹ Maninia nia miiri tamasa, taa nia paniquiaa tamasa miiniuria niajanijacuaani.

³² 'Niaa jaara saaja nia panijiaca paniriquia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiacajuhuj. ³³ Maja puera maninia miijia niajaniya, niaa jaara maninia miiquiaa saaja noo pojori, canapuate maninia miiquiaa niajanijacuaani. Sesa miijiaca pueyari naa maninia miiniu niishiquiaajuhuj, noo pojori canapuate maninia miiquiaa nojoricuaani. ³⁴ Maja puera maninia miijia niajaniya, niaa jaara nia masena niquitioquiaa na panishano, nia niishishacari nojuaja ritia niquitionutaniuhua niajanijajiniji na masano casaa. Sesa miijiaca pueyari na casaa rupaquijia niquitioquiaa narta sesa miijia pueyajuhuj, na niishishacari nojori ritia niquitionutaniuhua nojori masano casaa rupaquijia. ³⁵ Nia paniri nia paraa. Maninia nia miiri nojori. Nia casami nia niquitiorohua, pueya jaara na paniya rupaquijia. Majaari nia taraajenu cuno pueyano jaara nia niquitioyquiriohua nia casaa. Naa nia miishacaritij, niaari seetanujanaa Jiyocuacaanu Quijia muerasu. Pueyasoori socua jiyanohua queraatia nia niquitionutaniya tamasa nia niquitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitiojoquiaa sesa miijiaca pueya, mariyata canapuate na sequeshijiacani "paacarasho". ³⁶ Naaratej, jiyanootio nia quiri, taa nia Que Pueyasocuaani, jiyanoojia.

*Maja sesa nia niishiriojonu niarta pueyanoocuara
(Mt 7.1-5)*

³⁷ 'Maja nia rimiaaquenu tamasaacuara, Pueyaso mariqui saniniuujia nia jiyanooyquiriiri. Niaa jaara tamasaacuara tonujiyashijia quiri, naajuhuj, Pueyasoori maja na saneenu quiniutianiya sesa nia miishanojuhuj. Niaa jaara jiyanootio quiri, Pueyasoori nia jiyanooniutianiyajaacuhuj. ³⁸ Niaa jaara tamasa niquitioquiaa na panishano, Pueyasoori naa nia niquitionutaniya nia panishanojuhuj, maninia shanacusanano, jiuuquiutiasano, maninia quianujusano, mishaja quera niitiano. Pueyasoori mariyata juhua nia shanacutajajinia nia niquitionutaniya niajaniya, taamueca shanacutajajinia nia niquitioquiaa pueyacuani.

³⁹ Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

⁴¹ '¿Casaara nia niquiya rucucua maano quia tarajanu namijajiniani, niaa jaara puereetuca maca jitiiaa tama nia namijajiniajaaja? ⁴² Niaa jaara puereetuca maca shanacuya tama nia namijajiniajaaja, ¿niaatucua casaara sequere quiarta pueyanoni: "Cua tarajanunaa, cuno rucucua pa taquiri quia namijajiniji"? Sesa jiuujiaracanaa, tama nia namijajinijiaaja nia pare coteenu cuno maca. Na nuhuj cutara nia naata maninia niquiniu, cuno rucucua nia taquiniuria nia tarajanu namijajiniji. Naaratej, majaari nia rimiaaquenu niarta pueyanoocuara.

Naanaari niishishano na jajaujiniji

(Mt 7.17-20; 12.34-35)

⁴³ 'Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴ Puetunu naanajanaari maninia niishishano na muetusanojiniji. Majaari pa naata satuna carojonu shuunijajiniji. Naajuhuj, majaari pa naata tuharacona carojotanu saarianajiniji. ⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinijinio

(Mt 7.24-27)

⁴⁶ ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa? ⁴⁷⁻⁴⁸ Cua tojiri. Cante cua rupuenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucuaaji. Na nuhuaji, moo jaara pajaashiquiaari, pajaacaari jiyanojua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. ⁴⁹ Saniniuujia, cante najuhuaa cua niishitiojosano tojiyaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanojua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru

(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ² Romano soldadohua capitánri quiniqui quijia quiquiaari. Jiyanojua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. ⁴ Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanojua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, ¡nojuajaari jiyanojua maninia pueyano! ¡Quenaaja quia miiri na panishano! ⁵ Nojuajaari parta Judiocuaca panijia. ¡Nojuacuajaari Pueyaso secojua tiatequiaari canaara tama na cumaneecatajaaja!

⁶ Naacuajitij, Jesuuri nojoritia quiaquiaari capitán tiajinia. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷ Nocuaaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸ Janiyari niishiyajaaniuhuj, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadohua jiiitiaajuhuj. Janiya jaara tamonu sequereni, ‘Quia quiaare’, nojuajaari quiaquequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyanjia quiaari jiyano cumaacaracajuhuj”.

⁹ Jesu tojishacari cuno pojori caminiujiushano capitán sequesano, Jesuuri jiuuji-aterree. Jesuuri na nuhuajiniaa pueya niqinijioree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, ¡ma-jaari quenaaja cua niqiniu quiquianu Pueyasocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhujaj, socua queraatia tamasaca pueyano.

¹² Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. ¹³ Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: “¡Quia sanere!”

¹⁵ ¡Macuuri cajiQUII! Juhuacatecara pocuareeri. Jesuuri na nucuaacua na jaatucuree. ¹⁶ Puetunu pueyajanaa jaara naa Jesu miishano niquiquiaari, jiyanoehua pueretureeri. Nojoriiri Pueyaso shuquiritiaree jiyanoehua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanoehua cumaacaraca!

Nojoriiri naa sequetureejuhujaj:

—¡Pueyasoori shusha quiarijia na saquiriojosano Israel pueya niishiriohuacuhujaj, na cumaquiniuria pajaniya!

¹⁷ Jesujiniji pueya pohuatasanoori caminiujiushaaquiaari puetunu Judiocuaca jiyajinijanaa, mariyata puetunu na shocuaqueya jiyacajinijanaanio.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucuaaanu sequesano niriqianotej, tamonute sashishiyajaara soj?”

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriqianotej, canaate tamonu sashiyajaara soj?”

²¹ Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niqiara; cusosuhua, pueyaracaanu nootunejaca, samaruhuaraca pueyano. Mariyata queraatia cariojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pohuatasuhua taa nia niquiriicujani, nia tojishanonio. Nia sequesuhuanoj: “Cariojuarujuriiri niquijiacara quiriohua. Shipiiniuquiuijuniara maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojijiacara quiriohua. Macunucuaari samiitianijiosaarohua. Casamijuniucua pueyari Pueyaso rupaa pohuatasaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyaní”.

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhuacate-cara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquniuucua nia quiojocanu cariiquia jiyajiniani? ¿Niaate noojia niqijoteja niquniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niquniuucua nia quiojocanunitioj? ¿Niaate maniniuqui toque cushijia niquniuucua quiojocanu? Niaacuajaari niishiya, shanohua toqueya cushiyonuujuaaari saaja jiyaniijianucua tiajinia quiyano niquis-hano. Nojoriiri tama na panishanojuaaja miijiaca. ²⁶ ¿Taateerinitioj? ¿Casaa niquniu-ucua nia quiojocanuurini? ¿Pueyaso sequenu panishano caminiujiuniate quiquianu? Taaquiriirini. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianaa. ²⁷ Cuno Juanjinijicua-jaari tariucuacaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaaritij:

“Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujiuni-aajinijiniojuanaani, majaari tamonu socua cutara pueyano quiniu quiquiaari Tiuquini-jiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ 'Puetunu pueyajanaa, mariyata cumaneeca masejona Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojiniijiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

³⁰ 'Saniniuujia, Fariseocuaca, mariyata Moisés Rootasanojiniji niishitiojonaani, no-joriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhua. Nojori-iri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

³¹ Jesuuri socua sequere:

—¿Quiarjia nio pa quishacari pueyarijataj? ³² Nojoriiri juhua naatujoori, na tacuar-ishijionu panishacari, na cajitiushacari tiaca jiuujiajinia cajitiucua curaotasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniuujihua”. ³³ Naajuhua pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhua. Cunora niaari cua sequequia: “Cunoori sacuaraa-tia miaquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejona rupuenanio”. Naa nia sequesacaritij, niaari cua tojiti-aaquiyajaacuhua. ³⁵ Naajaa, pueya jaara canaa pohuatasano tojijiaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojijiaca jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuuquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri. ³⁷ Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhua. Shiitaniyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸ Maajiiri Jesu cashacuucuma mojoquetasee.

Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujiunia quiri, mariqui niishiri cante na coyani, taamueca maajitijianojoni”. ⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari rupaquijiara tamonu cumaneeca niqutiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano. ⁴² Na nuhuaji, nojori sequesano juuca jaara tari quiquiaari na camaru nojori niqutionuhua na cumaneeca, majaari nojori jitianu quiquiaari cumaneeca. Naaratej, cumaneeca niqutiojonaari nojori sequeree: “Naajaa, maja socua nia niishiriojonu nia niqutionuhua tarjia cua niqutiojona cumaneeca nijaniya”. Cumaneeca niqutiojonaari naa cuno caapiqui pueya jiyanoquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niqutiojona panijara quiniutianiyani?

⁴³ Simónri Jesu riucuaaree:

—Cunocujani, cante socua queraatia cumaneeca niqutiosaaquiaaricujani.

Jesuuri na sequeree:

—Taaquiririnij.

⁴⁴ Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari.

⁴⁵ Majaari quenaaja quia nujuunu quirii janiya, quia sarhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari.

⁴⁶ Naajuhuj, majaari quia totanu quirii miesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiiri jiyanohua sesa miijia quiriquiaa. Naaratej, jiyanohua cua paniyari puetunu sesa na miishanojinijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiuyanoori juhuacatecara tama sequetoorejaaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

8

Jesura pueraquena maajipohuajiniji pohuatasano

¹ Na nuhuaji, Jesuuri rucuanajoquiaari queraatia tiacajinia, shiitianiyojua tiacajinia-juhuj. Nojuajaari tii Pueyaso rupaa pohuatariquiaa, taa Pueyaso jitianu paniya na muerasuni. Na doce saquiriojosano pueyari na cojiriquiaajaacuhuj. ² Noojiaqueya maajipohuari na tarajariquiaajuhuj. Cuno maajipohuari tamaatia cusonujiniji Jesu

naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhatej. Nojorijinijinoori quiquiaari María Magdalena. Jesuuri cuno Maríajiniji tohuatanijioquiaari siete samaruhua. ³ Quiriquiaajaariuhua Juana, Cuza niquiocuani. Cuzaari jiyaniijia Herodes jiidiasano casami cojuana quiquiaari. Susaanaari nojorijinijinio quiquiaarijiuhuj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jiidiasano casaatajaaja. Nojoriiri nera pueraquenuunaa quiquiaarijiuhuj, tiqiyocua nojori rucuanesacari Jesuta.

Jesu pohuatasano natoojona pueyanojiniji
(Mt 13.1-9; Mr 4.1-9)

⁴ Queraatia cuno jiya tiacajinijinio pueyari nijioquiaari nojori niquiniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasana. Nojori sequereeri:

⁵ —Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na miojoquiaari. ⁶ Tajaacaari totere sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari totere riyocuaca tajinia. Riyocuacaari socua ritia maashiquiaari. Na natasanoori tarinitiucua quirii. ⁸ Socua tajaacaari maninia jiyajinia totere. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pohuatasano!

Casaarate miriqui pohuatasanoni
(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitiojonu paniani. ¹⁰ Jesuuri nojori riucuaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiniani, na muerasura nojori quiniuria. Cunoori tariucuaaanu pueya niishishoo. Janiyari tamasa pueya niquiara pohuataquiaa miriqui cutarani. Naacujitij, nojoriiri cua pohuatasano niishiyaquiaa na tojitasacari. Naajuhuj, cua cumaacata cua miishano cariyoshitiquiaari, nojori niquiara cua miishacari.

Jesu niishitiojosacari na pueya, miriqui na pohuatasano natoojonajiniji
(Mt 13.18-23; Mr 4.13-20)

¹¹ 'Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. ¹³ Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasoocua tiuquiaa shuquiriaatiaari. Naa miijiaacari juhua puera shiitianiyojua nujuacaraca. Naacujitij, nojori jaara saniniuujishaa, nojoriiri ritia Pueyasoocujia rupatequiaa. ¹⁴ Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiucua riyocuaca tariyoshitishano. ¹⁵ Maninia jiyajinia toteno jajauri saniniuujia juhua noo pueya, canapuate maninia tojitiareecuaja Pueyaso rupaani. Na racataa maninia noojiajiniaari. Pueyaracaanu na tojtiaquiaari. Majaari na pishiniu Pueyasoocujia. Naacujitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶ Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitiasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuatasaaaria puetunu pueya niquiarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijosanojuanaari niishishaanutaniyajuhuj. Cuhuatasaanutaniyari maninia niquishocoriquiano. ¹⁸ Cunora, cua sequesano tojitiajaca nia quiri maninia. Cante maninia jiitiaa cua rupaani, nojuajaari socua na niishijiaari jiyatesaanutaniya. Saniniuujia, cante cua rupaa tojiyashijiani, secaja najuhuaana na niishishanoori jaariutiasaanutaniya, puetunu shaaquiriajanaa.

Jesu tapueyocuaca tiuquijiosacari Jesuucua nojori nucuata
(Mt 12.46-50; Mr 3.31-35)

¹⁹ Jiyacaritij, Jesu nucua Jesu tapueyocuacata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritiariquiaa saaja tia tohuateyaji. ²⁰ Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niqutiuniu paniyaquinia.

²¹ Jesuuri tii quiniaa niquiara sequeree saaja:

—Canapuate seetanujanaa Pueyaso Rupaa tojitiajacani, nojoriiri cua nucua cutara, cua tarajanuhanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²² Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyanohua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari.

²⁴ Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucuaja! ¡Nia suraajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacuaja juucua Pueyasoocua tiuujiaa. ¿Casaa nia tojetareerini?

Nojoriiri Jesuucujia jiuujiatecoree. Shiriiquitiuriquiaari Jesu miishano nojori niquishacari. Tama nojorijiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

Gerasa jiyajininio samaruhuaraca pueyanojiniji pohuatasano
(Mt 8.28-34; Mr 5.1-20)

²⁶ Na nuhuaji, nojoriiri shiitaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajininio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuahua paaquiosaqi.

²⁸ Na niquishacari Jesu, na cariquimiaji mojuquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyanjia! ¡Quiaacuaaari Jiyaniijiajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

²⁹ Samaruharaca pueyanoori naa sequeriquiaa Jesutej, Jesu sequesacari tari nojuaja, cuaara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruharaca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quiniuria. ³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucuaaree:

—Cua sesa “Queraatia”.

Naa Jesu sequequiaariiri jiyanohera queraatia samaruhua na jiiiasacari. ³¹ Samaruhuari jiyanohera secojoree Jesu, maja nojori na jiyaronura puequeetuaju raama saniitiosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuatere. Tacinijiji totesee caminiajinaari. Tii shushiniuuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariquiaajiniajuhuaj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pohuatanuusanoiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. ³⁶ Jiyacaritij, Jesu miishano niquituniarari shusha nijiono pueya pohuataree taa samaruharaca pueyano naatanishaarohuani. ³⁷ Cunora, puetunu Gerasa jiyajinijinio pueyajanaari jiyanohera puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejia tacataquiaariuhua na pueyata na quianuhua. ³⁸ Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tajiinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajiniajanaa pohuatasuhuari taa Jesu miirucuaa maninia nojuajani.

Jesu naatanishacari Jairo niyatu, Jesu toque quiana maajinio
(Mt 9.18-26; Mr 5.21-43)

⁴⁰ Jesu jaara niuutiaquiaariuhua caminia taquijiria na pueyata, pueyari na timiitarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojuquetaseeri na secojonura na tajiinia Jesu quianura. ⁴² Neyatuniyojuuari quera cusoriquiaa jiyacari. Majaari socua niquioharaca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanohera queraatia pueyari nata quiojoriquiaajuhua. Pueyari jiyanohera na tanuujuriquiaa, nata nojori quiojosacari nucuaco.

⁴³ Tamonu maaji cusosuuri cuno pueya tajiinia quiriquiaajuhua. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na

naata na naataniniu quiquiaari. ⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquniucuaaja? Queraatia pueyacuaajaari quia tanuujiya.

⁴⁶ Jesuuri saaja sequeree:

—Maja. Cusosu cua quiareeni. Niishiyaniija cua cumaacaari tari na naatanirii.

⁴⁷ Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojuquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareejaariuhuj taa na naataquee ritiani, Jesu na quiasacari. ⁴⁸ Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujaniya quia quiaarohua.

⁴⁹ Jesu pocoojosacariija cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajiniara.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaaja naatanutaniuhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhuana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricuaajaari niishiriquiaa maaji samiriuri seetanujuanaa macu quiriquiaa. ⁵⁴ Jiyacaritij, Jesuuri macuucua tiuquiquii. Na juaashiquiajiniji na quiaseeri. Jiyanojua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶ Na queyari jiyanojua jiuujiateree. Jesuuri nojori sequeree, maja nojori pohuatanura tamasa niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura (Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumaacaari, puetunu tamaatia sesa samaruhajanaa nojori tohuatejonura, cusosuhua nojori naatanijionurajuhuj. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Niaa jaara

tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. ⁵ Niaa jaara tamonu tiacajinia tojiniu paniyaquishaare, cuno tiacajiniji nia quiaare. Nia nuhuajiria, cuno pueya niquiara niocua nia niohuacajiniji cuno tiaca jaaquia nuutare. Naacujitij, cuno pueyari niishiniutianiya, Pueyasoori nojori jiyanoyaquiniutianiya, nojori tojtianu paniyaquiniucua Pueyaso rupaa pohuatanaa.

⁶ Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniijia Herodes niishiniu panishacari cante Jesuni
(Mt 14.1-12; Mr 6.14-29)

⁷ Jiyaniijia Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucujajaari jiyaniijia Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuj: “Supuetana Elíascaja tari tiuquiriohua”. Nojuacuajaari tariucuacaanu Pueyaso sequenu panishano caminiujiunia quijia. Saniniuujia, tamasa pueyari sequeriquiaajuhuj: “Jesucujajaari tamonu tariucuacaanu Pueyaso sequenu panishano caminiujiunia samiitianohua”. ⁹ Herodesri saniniuujia sequeree:

—Janiyacujajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰ Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

¹² Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocua. Na nuhuaji na neecasereeri. Na pueya na niqitioreeri puetunu pueyajanaa nojori serotasocoriquiano. ¹⁷ Puetunu

pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijosaaquiaari pan raacuata, sapitiaaja raquiquiatanio.

Pedro sequesacari Jesuuri seetanujuanaa Cristo

(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquirojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhuaaj, quiaana Elías, tariucuacaanu Pueyaso sequenu panishano caminiujiunia. Tamasacaari saniniuujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujiunia samiitianohua.

²⁰ Jesuuri saniniuujia nojori nequesotaree:

—¿Niajanियariuhuaaj? ¿Taa nia sequeyani, cante janiyani?

Pedroori na sequeree:

—Quiajanियacuajaari Cristo, Pueyaso Jiyarosano.

²¹ Jesuuri jiyanoehua nojori rootaree maja nojori pohuatanura tamasaca niquiara cante nojuajani.

Jesu numootesacari na pueya, nojuaja mosaanutaniya

(Mt 16.20-28; Mr 8.30–9.1)

²² Jesuuri naa nojori sequerohuacuhuaaj:

—Janiyani jiyanoehua naquiya miishaanutaniyani. Pa Judiocuaca camarucuaari cua niquiniu paniyaquiniutianiya, na tojitianu paniyaquishacari janiya. Naajuhuaaj, pa pueyacuara secojonaa jiyaniijianucuaari cua niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyani samiitianutaniuhuaani.

²³ Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuara niya-jetaara tama na miiniu panishanojuaaja. Cuara panitiaara tama na cuaqueyajaaja puetunu juucajanaa, cua tojijia na quiniuria seetanujuanaa. ²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanoehua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijianaa jiiitiana quiri, cuno maara najuhuaana quiri, nojuaja jaara na shaajesacari jatasaare mani quiquiojonia Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyani nojori jiyaniijiani, naajuhuaaj janiyani nojori seera caririquiniutianiyanii cua tiuquishacariuhua Jiyaniijia cua quiniuria. Janiyari shanoehua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaaj. Naajuhuaaj, cante cua rupaa pohuatanu caririquiya sesa miijiaca pueya niquiarani, janiyani nojori seera caririquiniutianiya-juhuaaj. ²⁷ Seetanujuanaa nia sequeyanijia, noojiaqueya niajanियajiniijinioori maja nia cusonuunu quiniutianiya juhuanojuaja, niaa cuara niquirijiaatijia Pueyaso cumaaca tiuquiyano cucua, na muerasu jiiitariquianoni.

Jesu jatasacari shacantuucara

(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juanio. ²⁹ Jesu secojosacari Pueyaso, na jiquiocoori tamaatiara jataquiaari. Na toqueeri jiyanhua cohuajara jataquiaarijuhuaj, shacantuquera. ³⁰ Jiyacaritij, caapiqui pueyari nocua muetaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Elíasnio. ³¹ Nojori nujuatusaquiiri shacantuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanhua maquenuujuriquiaa, nata quiniaajuhuj. Naajaa, majaari nojori maquenu quiriquiaa. Naacuajitij, nojoriiri Jesu shacantuca niquiquiaari. Cuno caapiqui supuetanaa niquitiuriijaariuhuj, Jesuta pocoojiyano. ³³ Cuno caapiqui pueya quiojonu panishacariuhua Jesu shuriucujaji, Pedroori Jesu sequeree najuhuanaj: —¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elíasranio!

Pedroori naa najuhua pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojinu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaatijiaj.

Caya samijajiniji Jesu tohuatesacari samaru
(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyaniojuanaari quiyanuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocatequiaajaariuhuj! ¡Na rupaamajiiri cushaaquiaa! ¡Na cuaqueya miiquiaa moquitiuriuriaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojtiaashijiicanaa, niaaqui Pueyasocua tiuyashijiacajuhuanajaj. ¿Janiyateeri pueyaracaanu rejeretanutaniya niajaniani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiri-ocuatereeri. Jesuuri samaru sequeree na tohuatanura. Caya samijia naataniriiri. Na niquitorohua na queeri. ⁴³ Puetunu pueyajanaari jiyanhua jiuujiatereeri nojori niquishacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya niajaniani. Majaari na niyajetanu. Janiyari niquitiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhuj, casaa nojori na pohuatasano sequenu paniriquiaani.

Cante jiyaniijiajanaa cutarani
(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijinijiniote jiyaniijiajanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniucuanani, nojuajaari cua rupueyajuhuj. Cante cua rupueyani, cua Jiyarona rupueyajaariuhuj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijiajanaa quiniutianiya puetunu narta Pueyaso muerasujinijinojuanaa.

Cante maja pa paracani, nojuajaari pa jiyano
(Mr 9.38-40)

⁴⁹ Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniuucua pajaniyajinijinio.

⁵⁰ Jesuuri na riucuaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyani, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵² Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³ Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuacaanu Pueyaso sequenu panishano caminiujiunia Elías miiquiaaricuaani?

⁵⁵ Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojiyaree tii maquenura.

Tamasaca pueya quiniu panishacari Jesu pueyara juucua
(Mt 8.19-22)

⁵⁷ Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiqiyocua quia rucuanesacarijianaa.

⁵⁸ Jesuuri na riucuaaree:

—Quiojuapueeri na raaca jiitiaa cutara. Shuhuari na jesuhua jiitiaajuhuj. ¿Saniniuuujia Pueyaso Niyanuurijataj? Majaari cua jiitianu tama cua maquejarajaaja.

⁵⁹ Jesuuri tamonu pueyano sequeree:

—Cua nuhajiniara quia quiri.

Nojuajaari saa sequereera:

—Cuaara Jiyaniijianaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiata rucuanejore cutarani.

⁶⁰ Jesuuri na riucuarree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequeree:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niquiniuria cua nuhuajiria.

⁶² Jesuuri miriqui na riucuarree:

—Pueyano jaara na juyaca poonitijiya, jiya jiicataja na jayotanura na cuhuariquia na jeenucuanura, maja cumaati na nijiniara na niquiniu. Na camaru jaara na nijiniara niquiri, sesa naaniutianiyari shuyorocotiuyocuara. Naajuhuj, cua pueyano jaara na quiquiojinia tacatenu panijiohua quiri, nojuajaari maja maninia Pueyasora poonijiona.

10

Jesu jiyaramiquishacari setenta y dos na pueyajinijinio, Pueyaso rupaa nojori pohuatanura

¹ Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuj. Puetunu nojorijianaa jiyaramiquiriiri caapiqui, caapiqui. ² Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoonari quiya. Cunora, cuhuariquia camaru nia secojore, socua senoonaa na jiyaramiquiniuria puetunujuanaa na senoosaanura. ³ Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. ⁴ Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhuatasacari. ⁵ Tamonu tiajinia nia tiuquishacari, coteenu nia saruhuatare na camaru nio sequesanota: “Juhujaniya nia quiri, nio tiajinia quini-aanaa”. ⁶ Cuno tiajinia quiniaa pueya jaara jiyanoojiaca quiri, naa nia sequesacaritij, Pueyasoori nojori miiniutianiya maninia. Nojori jaara juaajiaca quiri saniniuujia, Pueyasoori nojori shuquiritiyaquiniutianiya. ⁷ Tee nia masesaareni, cuno tiajinia nia jiyojere. Nia miaquere, nia rature nojori niquitiosano niajaniya. Nia pohuatanucua Pueyaso rupaa nojori niquiara, niajaniya cuaara niquitiosaaria nia panishano. Majaari tamasaca tiajinia nia pacunujunu tii nia miaquenura. ⁸ Nia tiuquiiijosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹ Cusosuhua nia naatanijiore cuno tiacajinia. Pueya niquiara nia sequere: “Pueyasoori quiarjia nia jiyatenu paniya na muerasu nia quiniuria”. ¹⁰ Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucuajinia naa nacare pueya niquiara: ¹¹ “Nia tiacajinijinio jaaquiani, canaari canaa niohuacaacuaji na majiriutiaani. Cunoori nia niishiniuria, Pueyaso jaara nia saniitioire, majaari canaacua na tiutiasaanu quiniutianiya. Pueyasocuaajaari nia jiyanooni paniriquiaa juucua, na muerasu nia quiniuria”. ¹² Seetanujuanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutianiya Sodoma tiacajinia quiniaa pueyajiniji.

*Jesu piriyojosacari Pueyaso tojitiaashijiaca pueya
(Mt 11.20-24)*

13 '¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanoehua saniitiosaanutaniya! ¡Niaari socua Pueyaso tojiyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijiaca nojori quiniuucua. 14 Niaa cutaraari cua cumaacata cua miiijosano niquijiaca. Naajaa, majaari nioojia nia tacatonu quiquianu Pueyasoocua. Naaratej, Pueyaso saniitionu juucajinia, ¡niaari socua jiyanoehua saniitiosaanutaniya Tiro tiaca pueyajiniji, Sidón tiaca pueyajinijinio! 15 Niajanijarijataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Niaari puequeetuuj raama quejoosaanutaniya saniya!

16 'Cua pueyanaa, cante nia tojitiajacani, nojoriiri cua tojitiajacajuhuj. Naajuhuj, cante nia ruuretaa cua rupaa nia pohuatasacarini, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

Jesu jiyaramiquishano setenta y dos pueya tiuquiiijosacariuhua nocua

17 Jesu jiyaramiquishano setenta y dos pueyari Jesuucua tiuquiiioquiaariuhua. Nojoriiri jiyanoehua shuquiriaatia quiriquiaa. Jesu sequetereeri:

—¡Jiyaniijianaa, samaruhuari canaa tojitiacanuni canaa tohuatanijosacari nojori, canaa jiyaniquishacari quia sesa!

18 Jesuuri nojori sequeree:

—Taaquiriirinij. Janiyari Sesaaca niquiquianuni juhua niaco tiyano jiyocuacaanuji.

19 Janiyacuajaari cua cumaaca nia niquitioacanuni, juhuajaniya nia rucuanenura sacocua caco, turucuaniniu cacionio. Cua cumaacata, niaari puetunu Sesaaca cumaa-cajanaa shocotanutaniya, juhuajaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nia-janiya. 20 Naajaa, majaari saaja shuquiriaatia nia quiniu samaruhua tojitianuucua nia-janiya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari

(Mt 11.25-27; 13.16-17)

21 Jiyacaritij, Pueyaso Sohuanuuri Jesu shuquiritirii jiyanoehua. Cunora, Jesuuri na Que Pueyaso sequeree:

—¡Quia shuquiritiaanijia cua Quena! ¡Quiaacuajaari Jiyaniijiajanaa quiya jiyocua-caanu, mijiriano! ¡Quiaari maninia miirii! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacaacuaji. Jaa, cua Quena, quiaacuajaari naa nojori panitiaja.

22 'Cua Queeri tari cua niquitioquiaari puetunu na jiiitiasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecuajani.

23 Na nuhuaji, Jesuuri na pueyacuata tacateree. Saaja nojori sequereeri:

—Shuquiriaatia quijiaca cutaraari niajaniya, nia niquiniuucua puetunu nia niquishanojuanaa nia rupenuucua janiya. 24 Seetanujuanaa nia sequeyanijia, queraatia tariucuacaanu Pueyaso sequesano caminiujuniana pueya, mariyata jiyaca jiyaniijianucuanio, nojoriiri nia niquishano niquiniuucua jiaatiaquiaari juucua. Majaari na

niquitiuniu quiquiaari. Nojoriiri cuata nia quishacari nia tojishano tojitianuucua jiaatiaquiaari juucujuhuj. Majaari na tojitiuniu quiquiaari.

Samaria jiyajinijinio maninia miijajiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niqiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucuaaree:

—¿Taate Moisés Rootasanojinia naajiotasanoni? ¿Taa quia niishiriojoquiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riucuaaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishitijatajanaanio. Naajuhuj, quiarta pueyano quia paniri taa quia paniyacuaa tama quia cuaqueyajaajani”.

²⁸ Jesuuri na sequeree:

—Quiaacuajaari maninia riucuaaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaaree. Puetunu na jiitiasanojuanaa na jaar-iuutiatureeri, na cushishano toquenio. Na piquitiuriiri. Quera macu na tiujiatuqueeri.

³¹ Na nuhuaji, pueyacuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquiocora, na shocortamaa saajaari. ³² Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj.

³³ Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree. ³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia. Ritia na jiyataaree rucoojuaca tiuquijiojua tiajiniaraari. Cuniqiu na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneece pueraree. Ruconaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneece nocua puecare, janiyacua saniniuujia quia niquitiorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijinioni, ¿teyano cuno pojorijinijiniote narta pueyanoocua taraajeja cutarani?

³⁷ Moisés Rootasanojiniji niishitiojona pueyanoori Jesu riucuaaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririni. Quia quiaarohua. Naa pueyacuataaraajeja quia quirijiuhuj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquiaari. Naaratej, na tiajinia na

tiuquinitiareeri. Cuno maaji sesa quiquiaari Marta. ³⁹ Martaari tarajanu jiitiaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na mi-shocoriquiano na jiitiasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijosanotajanaa. ¡Quia sequere na naacutanura janiya!

⁴¹ Jesuuri saaja na sequere:

—Martanaa, quioojia quia cajitiri sanaunaa. Quiaari puera quia miishano tacaatiaa.

⁴² Saaja niquiriyatu casaa cutaraari jyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

11

Jesu niishitiojosacari na pueya nojori secojonura Pueyaso (Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinoori na sequere:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacuaani.

² Jesuuri nojori sequere:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuaani. ³ Canaa quia niqutioriquia canaa miaqueso-coriquiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jyanooquiaacuaa sesa canaa miiniaani. Naajuhua, canaa quia cojuare, maja sesa canaa miitishaanura”.

⁵ Jesuuri naa sequereejuhua, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura nojuajiniji, ¿nojuajatucua taa quia sequerene?, quiaa jaara na sequere: “Cua rupuenanaa, cua niq-uitiore jiuujianaraca pan. ⁶ Tamonu cua cojiniaari shusha tiuquiriohua tucuaaanuji, miaajeyari. Shaaquiiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupena jaara na tiajiniaacumaji quia riucua?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura niajaniya puetunu nia panishanojuanaa. Majaari na sanenu quiniutianiya saaja nia rupena na quiniucua. Sanenutaniyari pueyaracaanu taajeta nia piquishacari na tia tiotiu. ⁹ Naajuhua, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiootiu nia piquiriquia. Niaara riatasaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

¹¹ ¿Niaatucua nia niyanu niqutiore saajia, neecaru na masesacari niajaniya? Maja.

¿Niaatucua soconu niqutiore nia niyanu, sapitiaaja na masesacari niajaniya? Maja.

¹² ¿Niaatucua turucuaniiinu niqutiore nia niyanu, caacaraja riuriuquiu na masesacari niajaniya? Maja. ¹³ Puetunu niajaniyajanaari sesa miiniu niishijia. Naajaa, niaari maninia casaa niqutionu niishiya nia niqiuohua. ¿Taatucua socua jiyocuacaanu Quijia

nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuete na masequiaacuajani.

Pueya sequesacari Jesu, samaru cumaacaracana
(Mt 12.22-30; Mr 3.20-27)

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri.

¹⁵ Tamasaca pueyari saa sequequiaarijia:

—Cuno pueyanoori samaruhua tohuatanijia samaruhua jiyaniijia Satanás cumaacata.

¹⁶ Tamasaca pueyari Jesu saniniuuniu paniriquiaa. Naaratej, nojoriiri na seque-
turee na cumaacata na miiniuria casaa, na niqitiniuria nojori, nojori niishiniuria no-
juajaari seetanujuanaa Pueyasojinijinio. ¹⁷ Jesuuri nojori niishiriojosano niishiriquiaa.
Nocuaji nojori sequereeri:

—Tamonu jiyajinia, cuno pueya jaara miaquetoojiya tama nojori pueyatajaaja, no-
joriiri maja na naata na paraa nujuatanu, na paraa jaara nocua tiuquitiare raquiritano
nojori quishacari. Naajuhuaaj, niquiriyatu tiajinia quiniaa jaara tama nojorijiaaja
juayonuujutaquiaa, nojoriiri maja na naata jatiqúi quiniu. ¹⁸ Naajuhuaaj, niaari
cua sequeriquiaa, janiyana samaruhua tohuatanijia Satanás cumaacatani. Jaara
naa quiritij, ¿Satanástucua taa pueyaracaanu quiri jiyaniijiani, nojuaja jaara tama na
samaruhuaajaaja tohuatanijia tama na cumaacatajaaja? ¹⁹ Naajuhuaaj, janiya jaara
samaruhua tohuatanijia Satanás cumaacatani, taa nia sequeyacuajani, ¿nia niishitio-
josano pueyariuhuaaj, cana cumaacata nojori tohuatanijioquiaa samaruhuani? ¿Taa
nia sequeyani? ¿Satanás cumaacataree? Majaruhua. Naacuajitij, tama niajaniyajaaja
nia niishiri, niaari jiyajeneya. ²⁰ Naa Pueyaso cumaacata cua tohuatanijosacari
samaruhuatej, naacuajiti nia niishiri, Pueyasoori tari nia masuya seetanujuanaa na
muerasu nia quiniuria.

²¹ Niojinia nia niishiriojorejuhuaj: cumueeca pueyano jaara na tia cojuaa queraatia
na miaquejotaja casaata, majaari tamonu naata na jiitiasano casami jaariuutianu.

²² Saniniuujia, socua cumueeca pueyano jaara nocua tiuquiri, na miaquejotaja casaa
jaariuutiaari, cuno, nocua na tiuushano juucuani. Na nuhuaji, na jaariuutiasano
casami paari, na pueya na serotasocoriquiano. Naajuhuaaj, janiyari Satanás jiitiasano
jaariuutiajani.

²³ Cante cua jiyano quiaquiyani, nojuajaari cua paraca. Cante cua naacu-
taaquia pueya rerecojonura Pueyasorani, nojoriiri saaja pueya cocuataa Pueya-
soocuaji. Naaratej, jacaria nia niishiriojore casaa nia niishiriojiya janiyajinijini.

Samaruhuari riujiuujia na quiquiojiniohua
(Mt 12.43-45)

²⁴ Samaru jaara tohuatare pueyanojiniji, joojuashiquio rucuaneyari na samaate-
jara na pajenura. Jaara na riuriataaquiri, niishiriojiyari: “Cua quiquiojinia riu-
jiuyarohuaraqú teje cua tohuatacanucuajani”. ²⁵ Samaru tiuquishacariuhua cuno
pueyanocua, na riuriasuhuari shaaco, juhua maninia netoonujusano tia, maninia
jeenucasanojuhuaj. ²⁶ Naaratej, cuno samaruuri socua sesa miijiaca nojuajiniji siete
narta samaruhua riquiohua nata na quiniuria. Puetunu nojorijianaari cuno pueyano-
jinia tiuquitasuhua. Naacuajitij, cuno pueyanoori socua sesara jiyacateja, tarijia na
quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—¡Shuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucuaaree:

—Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaaniuhuj.

Sesa pueyari saaja Pueyaso cumaacata miishano niqiniu panijiaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuatatee nojori niqiuara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosaroni. Seetanujuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. ³⁰ Jonás miishaanuuri nocuaji jiuujiate-sano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosaroni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanohua tucuacaanuji niqiuari narta jiyaniijia Salomón tojiniuucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijia-janaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoresacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pohuataquiaari nojori niqiuara. Pueyaso sequenu panishano caminiujiunia quiaritia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano

(Mt 5.15; 6.22-23)

³³ Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. ³⁴ Pa namijiaari juhua pa cuaqueya cuhuatanajuhuj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casaa niqiniuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niqijiara quiri puetunujuanaa, juhua samaritiu cuhuatasacari niajaniya. Naacuajitij, niocua niishijia quiri, maninia miijia nia quiniuria.

Jesu nacasusacari Fariseocuaca, Moisés Rootasanojiniji niishitiojonaanio

(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucojosacari tamasaca

pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niaari juhua noo pueya, canapuate saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhuaaj. Niaari sapuenu maninia pueya niquishano. Saniniu-ujia nioojiacaari jiyanoohua sesa quiya, casami nia masejonuucua nia nohuasejonuta, puetunu sesa nia miiniutiajanaajuhuaaj. ⁴⁰ Mosanucanaa, ¿niaateeri niishiyaquiya, pa cuaqueya Shipiniaari poojia shipiniquiaarijihuaaj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴² ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucuaajiniijiojuanaa, Pueyasora nia niqutiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuajani. Naajaa, Moisésri niishitiojoquiaarijihua maninia pa miiniuria parta pueya, Pueyaso pa paniniuriajuhuaaj. Majaari cuno na sequesano nia miiniu quiquiaa. Puetunu na sequesanojuanaa tojijica nia quiri. Majaari saaja jaamasucua niqutiojojuaca nia quiniu.

⁴³ ¡Niaari taraatia miishaariquiano, Fariseocuacanaa! Niaari jiyaniijianucua shuriucua cajiniuucua jiaatiaquiaa, Pueyaso secojojua tiajinia nia quishacari, juhua cutara pueya nia quiniuria pueya niquiara. Naajuhuaaj, niaari pueya paniquiaa nojori saruhutanura niajaniya juhua jiyaniijianucua, nia rucuanajosacari tiacajinia.

⁴⁴ ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucooquiaa na niishiyaquishacari. Naajuhuaaj, pueyari juhua-janiya nia rupuequiaa, nojori niishiyaquishacari nioojiaari jiyanoohua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojonaari Jesu sequeree:

—¡Niishitiojonanaa, naa quia sequesacari Fariseocuacatej, quiaari canaa sequeyajuhaaj!

⁴⁶ Jesuuri na riucuaaree:

—Taaquiriirini. ¡Niaari taraatia miishaariquianojuhuaaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanoohua niiquia casaa nitiasocoriquiano. Majaari nia tojitiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeretanu nia niishitiojosano.

⁴⁷ ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiuniaa nucuahuacuaaj, teyano nia supuetanaa puecooquiaaricuajani. ⁴⁸ Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhaa.

⁴⁹ Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya pueconutianiya. Tamasacaari naquiya miishaanutaniyajuhuaaj”.

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapuate nio jiya coteejajiniiji puecoosaaquiaaricuajani. ⁵¹ Coteenujuanaa mosaaquiaariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuaaj. Nia supuetanaari na moquiaari Pueyaso Secojojua

tiajinia, Pueyaso Shuriucua Quiquio tacoji, Pueyasooacara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² Niaari taraatia miishaariquiano, Moisés Rootasanojiniji niishitiojonaanaa! Niaari najuhuana Pueyaso Rupaa jiiitaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasaca jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jyanohua juaaquioree. Jyanohua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua.

⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jyanohua jyanohua queraatia pueyari Jesuucua rerejoree. Tama no-jorijiaaritia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniu-jiniji. Nojoriiri sapuenu maninia miijiaca pueya niquishano tamasaca niquiara. Saniniuujia, nojori jiuujiaari saa sesaja pueyaracaanu. ² Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuaaj. ³ Puetunu nia sequesanojuanaa ninishiquini, cuhuashiqui caminiujushaanutaniyari. Naajuhuaaj, nia sasacojosano tama nia sohuacamarajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

Cante puereshiya cutarani

(Mt 10.26-31)

⁴ Cua rupuenanaa, majaari nia puerenu canapuate nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani.

⁵ Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajaniya mani quiquiojiniani, na cusojuanu nuhuaji niajaniya. Saaja nojuaja nia puerere cutara.

⁶ Cinco shuhuari saaja caapiqui cumaneecaniyojuata masesano. Pueyara, cunoori najuhanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷ Naajuhuaaj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jyanohua Pueyaso panishano cutara queraatia na cojuasano shuhuaajiniji.

Tamasaca niquiara pa sequere paari Jesucristo pueyani

(Mt 10.32-33; 12.32; 10.19-20)

⁸ Cua tojitiare. Cante tamasaca niquiara sequejani: “Janiya Jesucristo pueyanoni”, naajuhuaaj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹ Cante saniniuujia tamasaca pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhuaaj.

¹⁰ Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohanu sesacareeni.

¹¹ Cua muerasu nia quiniuucua, niaari Pueyaso secojojua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia

sequenutaniyajaaniuhuj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquisitionura janiya canaa shipininio jiidiasanojiniji, taa canaa shipininio sequequiaari canaacuajani, saminio na quishacarijia.

¹⁴ Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

¹⁵ Jesuuri naa nojori sequequiaarijiiuhuj:

—Jiyanohua nia cojuare tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quiniu casamiijiu. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

¹⁶ Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanohua casamiriaca. Na cuhuariquiajinia na natoosanoori jiyanohua muetuquiaari. Naacuajitij, queraatia miaquesocoriquiano jiidiaquiaariiri na cuhuariquiajiniji na carojotasano. ¹⁷ Tama sequereeriaarijia: “¿Taa cua miiniutianiyani? Cua tiajosano cua racatajara cua carojotasanoori puetunujuaanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸ ¡Jaj, niishiQuiinijia! Coteenu cua tiajosano cua casamiicuaaji niyaroorohuaraquij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiojuanaani, puetunu cua jiidiasano casamijianaano. ¹⁹ Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriaca cuaja, queraatia marijara. Quiaari queraatia quia miaquesocoriquiano jiidiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. ²⁰ Cuno niucuaaja, Pueyasoori na sequequiaari: “Mosecanaa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jiidianutaniya quia nuhuajini? ¿Canra na quiniutianiyarini?” ²¹ Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamiijiuniucua Pueyasora.

Pueyasoori na muerasu cojuaja maninia

(Mt 6.25-34)

²² Na nuhuaji, Jesuuri na saquirojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutianiyani. ²³ Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴ Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiidianu na miojosano na racataja. Majaari tiaca nojori jiidianu na carojotasano nojori racatajarajuhuj. Naajaa, Pueyasoori nojori miojotequiaa. Niaa cutaraari socua jiyanohua Pueyaso panishano cuno riquiacuhujiniji. ²⁵ Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanohua nia tacaaniutia? Maja nia naata. ²⁶ Naaratej, nia tacaaniu jaara najuhuaa quiya socua shiitianiyojua nia rishiniuria, ¿niaatucua casaara tacaari tamonu casaacuani?

²⁷ 'Natau shuucuaca nia niquishurij, taa nojori corequetaani. Majaari nojori poonijonu. Majaari na cusupuenuunujuhuaaj. Supuetana jiyaniijia Salomónri jiyanoehua shanohua toqueyaraca quiquiaari. Cuno jiyanoehua shanohua niquishano na cushishano toqueni, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaquijia naa shanohua niquishocoriquianotej. Jaara sorere, tariqui catijiashiya saniniuurijia pan majeetetajara. Pueyaso jaara naa maniniushitiyacuaa shuucucatej, ¿majateeri na naata cushitiniu niajaniyajuahuaaj, jatarinitiaja Pueyasocua tiuujiacanaa? ²⁹ Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰ Pueyaso niishiyashijia pueyari pueyaracaanu na panishano casaacua tacaquiaa. Niajaniya cutaraari Queraca. Nojuacuajaari tari niishiya puetunu nia panishanojuanaa. ³¹ Naaratej, nia niishiriojore Pueyaso panishano nia miiniuria. Nojuajaari saniniuurijia nia niquitionutaniya puetunu nia panishanojuanaa.

*Nia casami nia racatare Pueyaso shuriucua
(Mt 6.19-21)*

³² 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, ¿nia niquitionutaniya puetunu na jiiitasanojuanaari! ³³ Nia casami nia niquitiojore cumaneecara. Na nuhuaji, cuno cumaneeca nia niquitiojore nareja casamijiuniucua pueya. Naa nia miishacaritij, niaari jiyocuacaanu racataa nia jiiitasano. Tee Pueyaso racataa nareja nera nia niquitiosanocujani, cuniqui, nia cumaneeca quiquioori maja na piquiniu. Niaari tii nia racatasano jiiitanutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuaaj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuaani.

Jeenucuasano nia quiri nia Jiyaniijiaacuaji

³⁵ 'Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaaj. ³⁶ Naa jeenucuasano nia quiriujuhuaaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapueete na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹ Nio nia niishirijuhuaaj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. ⁴⁰ Naajuhuaaj, jeenucuasano nia quiri pueyanaa, juhua cuno sutejaca seyaja. Naa jaara jiyaniya juhuanojuaja maja cua tiuquiniu quiniutianihua, janiyari jiyacari nia jiyajenetanutaniyani.

*Jesu pohuatasano maninia serujiniji, sesa serujinijinio
(Mt 24.45-51)*

⁴¹ Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴² Jiyaniijiaari na riucuaaree:

—Tamonu seru jaara maninia seru quiri, nocua tiuushano, niishijajuhuaaj, na jiyaniijiaari cuno na seru jiyatenutaniya narta seya jiiitariquiano na niti na niyacari. Nojori

jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijiajanaa mianuutequiaa nojoricuaani. ⁴³ Cuno seruuri shuquiriaatia quiniutianiya na jiyaniijia jaara na riuriatasuhua naa maninia miyanojua, taa na sequesaaquiaari na miiniuriacuajani. ⁴⁴ Seetanujuanaa nia sequeyanijia, na jiyaniijiaaari cuno maninia seru jiyatenutaniya puetunu na jiitiasano casamijianaa cojuana na quiniuria. ⁴⁵ Saniniuujia, cuno seru jaara sesa miiniuria niishiriojore, na jiyaniishacari na jiyaniijiaari jiyanoehua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaaj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuaaj. ⁴⁶ Na jiyaniishacari na jiyaniijia juhuanojuaaja maja na tiuquiniu quiniutianihua, jiyacaritij, cuno juucaja, na jiyaniijiaari tiuquiniutianihua canashiyaquiji. Naa cuno seru miiniuucua sesatej, na jiyaniijiaari jiyanoehua na saniitionutaniya. Na jatanutaniyari Pueyaso tojiyashijiaca pueyata na saniitiosocoriquiano.

⁴⁷ Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanoehua majacusaanutaniya cutara. ⁴⁸ Saniniuujia, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuaaj, cante queraatia niqutiosaareeni, cuno serujiniijiri queraatia masenu panishaanutaniya. Naajuhuaaj, cante jiyatesaaree queraatia jiitiana na quiniuriani, na jiyaniijiaari nocua tiuuniutianiya socua jiyanoehua maninia miijia na quiniuria.

Jesuucua tiuujiaaari narta pueya panishoo
(Mt 10.34-36)

⁴⁹ Mijiria niqiaarinijia, juhua mani cua noshitiniuria pueya tajinia. ¡Seetanujuanaa na noshitiriqiaa tarinij! Cua rupaari juhua mani quiniutianiya. ⁵⁰ Coteenu, janiyari jiyanoehua saniniujiushaanutaniya juhua manitiani. Nocuaji coojiaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. ⁵¹ ¿Niaateeri jiyaniya janiyari niqiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niqiaarini pueya cua raquiriojotanura. ⁵² Naaratej, pueyari quiarijia juayonuutanu coteenutaniya. Pueyano jaara necocuaata jiitiare jiuujianaraca niqiuohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiacaari saniniuujia nojori juaajiaca quiniutianiya. Naa noojiaqueya pueyajinijinio tiuuniuucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, querajaa pueyari caapiquiriyatu cucua tiuujiaa juaajiaca quiniutianiya. ⁵³ Pueyari necohua paracaajia quiniutianiya, necohua tiuushacari cucua. Naajuhuaaj, necohuari na que paracaajia quiniutianiya na que tiuushacari cucua. Naajuhuaaj, maajipohuari necojori paracaajia quiniutianiya necojori tiuushacari cucua. Naajuhuaaj, necojoriiri na nucua paracaajia quiniutianiya na nucua tiuushacari cucua. Naajuhuaaj, maajipohuari necohua niqiuocohua paracaajia quiniutianiya, necohua niqiuocohua quiniuucua cucua tiuujiaa. Naajuhuaaj, pueya niqiuocohuari na quinia paracaajia quiniutianiyajuhuaaj, cucua tiuujiaa na quinia quiniuucua.

Pueya cuaara niishiiria quiarijia Pueyaso miishanojiniji, casaa na niishitiniu paniyani
(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuaaj:

—Niaa jaara niqutioocua niqiuquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵ Naajuhuaaj, paratu jaara piyarojoquiaa pananu shuucuaaji, niaari sequequiaa: “Tacareejonuqui quiniutianiya”.

Naa quiquiaari. ⁵⁶ Pueyanaa, ¿niaateeri seetanujuanaa niishijiaca? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarjia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaca nijaniya.

Niaacuara tonujunata nia jecatoore
(Mt 5.25-26)

⁵⁷ 'Niaacuajaari niishiya, sesa miijiacaari saniitiosaanutaniya. Naaratej, tama nijaniyajaaja nia niishiriojore, casaate maninia nia miiniuriani. ⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanoocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jecatoy-aquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niqutionutaniya na pueya, quia nujuatesaanura nujuatejojuajinia. ⁵⁹ Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niqutiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquiiioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooocua nojori puecoosano seya nanacata!

² Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanoohua sesa miijiaca nojori quiniuucua narta Galilea pueyajiniji? ³ Seetanujuanaa nia sequeya cutaranijia, nojoriiri maja socua sesa miijiaca quiqianu nijaniyajiniji. Nijaniya-juhuaj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaj. ⁴ ¿Cuno dieciocho pueyariuhuj, canapute cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiqianu narta Jerusalén tiacajinia quiniaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaca quiqianu nijaniyajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

Miriqui Jesu niishitijosano muetuhuo naanajiniji

⁶ Jesuuri na nuhuaji pueya niishitiojoquiaari nio miriqui pohuatasana:

—Tamonu pueyanoori higo naana jiitiaquiaari na uva cuhuariquiajia. Tamacari, na camaruuri nocua quiaquiaari na niqiniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niqiri nio naana. Janiyari pueyaracaanu najuhuana niqiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”. ⁸ Cuhuariquia cojuanaari na riucuaare: “Jiyaniijianaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiyani. ⁹ Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

Jesu jecacari porocuatucua samaatenu juuca

¹⁰ Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. ¹¹ Tamonu maaji cusosuuri tii quiriquiaajuhuj. Dieciocho mariji-aari na shoconujuquiaari porocuatú na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹² Jesu jaara na niquiquiaari, na sequereeri:

—¡Maajiniaa miji! ¡Quia nijiniacuaaja tari jeequerohua!

¹³ Jesuuri na juaashiquia niaree maajiicua. Jiyacaritij, maajiiri maninia jeeque-quee. Nojuajaari Pueyaso maniniuhuaqueetanu coteeree naa na miishaanuucuatej. ¹⁴ Pueyaso secojojua tiajinia jiyaniijiaari juaarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacuajaari quiya puetunu semaanajiniajanaa pa poonijionura! ¡Niocua cuno juuca nijioriquia nia naatanijiosaana, maja samaatenu juuca!

¹⁵ Jiyaniijia Jesuuri sequeree:

—¡Sapuenú juhua maninia mijiaca niquishano pueyanaa, puetunu niajanijajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! ¹⁶ ¿Nio maajiiriuhuj? Nojuaja cutaraari supuetana Abraham niquiohuacuajinio supueno. ¿Majateeri maninijuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuatú na quishacari.

¹⁷ Naa Jesu sequesacaritij, puetunu na paraajanaari caririquitiurii. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji
(Mt 13.31-32; Mr 4.30-32)

¹⁸ Jesuuri sequequiaari:

—¿Taate cua naata niishitiojonu niajanijani, nia niishiniuria taa Pueyaso poonijiya pueya jiuujiajinia na rupaatani? ¹⁹ Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiajinia puetunu nio jiyajiniajanaa maninia mijiaca nojori quiniuria.

Miriqui Jesu pohuatasano pan poreetajajiniji
(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitaniyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojua-juhuj.

Juhua shiitaniyojua tohuateyari quiya Pueyasoocua pa quianura
(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucua na quiasacari, pueya niishitiojoriquiaa tiacajiniaari, shiitaniyojua tiacajinianio. ²³ Jiyacaritij, tamonu pueyanoori na nequesotaree:

—Jiyaniijiana, ¿saaja quenaaraqui pueyateeri Pueyaso pueyara jiyatesaanutaniya? Jesuuri nojori riucuaaree miriqui:

²⁴ —Jiyanohua nia saniniujiuri shiitaniyojua tohuateyaco nia tiuquiniuria, Pueyaso nia rupuenura. Jhuacarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵ Cua tojitiare.

Tia camaru jaara sanere, tohuateya tionutaniyari. Niajaniya, cante na tia carijini-acuma quiyajaani, niaari tohuateya piquiniuuniutianiya najuhuanaj. Naa jaara naa nacare: “¡Jiyaniijiana, canaacuaji quia riatate tohuateya!”, nojuajaari nia riucuanutaniya: “Maja cua niishiniu tejenote niajaniyani”. ²⁶ Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucuacajinia niishitio-joju”. ²⁷ Tia camaruuri nia riucuanutaniya: “Janiyacujaari tari nia sequereeni, maja cua niishiniu tejenote niajaniyani. Nia quiojorohua niiquiji, puetunu niajanijajanaa sesa miijiacanaa”. ²⁸ Naa na taanuusacari niajanijatej, niaari nujuquetunutaniya. Niaari nia quiaa miaquenutaniya jiyanojua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyanocuaa. ²⁹ Queraatia tamasa pueyapueeri nijionutaniya puetunu jiyacajinijiniojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucujaji jiyacajinijinio, pananu muetasamaji miaquetajara jiyacajinijiniojuhuaj. ³⁰ Quiarijiani, queraatia pueyari juhua tojishoo quia narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojtiajaca nojori quiniucua mijiria. Naajuhuj, quiarijiani, queraatia pueyari juhua tojishano pueya quia narta pueyara. Saniniuujia, jiya puequesacari, nojoriiri najuhua quijiaa quiniutianiya Pueyasora, nojori tojtiaaquiniucua nojuaja.

Jesu taraajesacari Jerusalén tiacajinia quinia pueyacu
(Mt 23.37-39)

³¹ Jiyacari nojiaqueya Fariseocuacaari Jesuucua tiuquijioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohutanijiyani. Janiyari cusosuhua naatani-jiyajaaniuhuj. Janiyari naa miya quiarijiani, tariquijiuhuaj. Janiyari tama tariqui tucuanutaniya puetunu cua miiniu panishanojuanaani”. Naa nia sequesuhua cuno pueyano. ³³ Cuaara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaricuaani. Majaari tamaqui cua monu quishaanutaniya.

³⁴ Jerusalén tiacajinia quinia pueyanaa, niaacuajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura niajaniya.

³⁵ ¡Cunora, cua tojitiare! Nia quiquioori tojetaarucujanaa shaaqui quiniutianiya. Naajuhuj, majaari socua nia niquiniu quiniutianiya janiya, niaa jaara nia timiti-asacari janiya sequerejaatijia: “¡Cuaara shuquiriaatia quiiria pa Jiyaniijia, Pueyasojinijij tiuquiuhuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasa Fariseocuatania. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani.

² Jiyacaritij, tamonu pueyanoori Jesu tajoji nujuariquiaa, poreeno cusotaano. ³ Jesuuri Moisés Rootasanojinijij niishitiojona nequesotaree, Fariseocuatania:

—¿Taa nia serojoquiaa Moisés Rootasanojiniani? ¿Maninate cusosu pa naataniniu samaatenu juuca?

⁴Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniri-iri. Na jiyarorohua na tiajiniaari. ⁵Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masu-ushiyajaaniuhuaj

⁷Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

⁸—Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajaniyajiniji. ⁹Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanooquaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia.

¹⁰Nocujaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajaniya, nojuajaari quia sequenutaniya: “Cua rupuenanaa, jiniya quia cajishii socua panishano cajitiujiniani!” Naacuajitij, cuniqui quiata quiniari niishiniutianiya, quiajaniyaqui nia masuuna panishano pueyano. ¹¹Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹²Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojori-iri quia masuunutaniya saniniuujia. Naacuajitij, quiaari tari namishaarohuacujia. Cunora, majaari socua quia masenu quiniutianiya Pueyasojiniji. ¹³Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujanucua pueya, cariyojuarujurinio. ¹⁴Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniutianiya quiajaniya saniniuujia, na samiitianiijosacariuhua maninia miijiaca pueya.

Miriqui Jesu pohuatasano na queranacunujiniji

(Mt 22.1-10)

¹⁵Jesuta cajiyano pueyano tojishacari naa Jesu pohuatasantej, Jesu sequereeri:

—¿Shuquiriaatia quijia cutaraari cuno, cante Pueyaso shuriucua miaquenutaniya jiy-ocuaaanuni!

¹⁶Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. ¹⁷Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaa-ree niaacuaji. Nia miaquesee”.

¹⁸Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niqiniucuanu. Cua

jiyanoori quenaaja. Maja cua naata quianu quiata queranacunuucua”. ¹⁹ Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinia”. ²⁰ Tamonu masuusano pueyanoori sequerejuhuaj: “Shusha camiriinijia. Cunora, maja cua naata quianu”. ²¹ Seruuri tamajaaja tacateyarohua na camarnu tiajiniohua. Na jiyaniijia pahuatasuhua na masuusano pueya sequesanoori. Na jiyaniijiaari juaaquii. Na seru sequereeri: “Ritia quia quiaare tamasaca pueya masuunuu-cua tiaca nucuaacaco. Miji quia rijiooco casamijiuucua pueya, sesaruneca pueya, sesacujua pueya, cariojuarujuri pueyano”. ²² Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequeree janiyacujani. Juhuanajuaja maja tia mishiniu”. ²³ Na jiyaniijiaari na sequeree: “Socua pueya quia pajecoo tiaca nucuaacaco, tamasaca tiacajiniara nucuaaconio. ¡Socua pueya quia nenecojocoo nojori niniuria, cua tia mishiniuria! ²⁴ Seetanujanaa nia sequeyanijia, coteenu cua masuusano pueyajinijini, majaari quenaaja niquiriyatu nojorijinijinio saniniu quiniutianiya cua sumatusano”.

*Saaja tama na cuaqueya panitiajajaarijia na naata Cristo nuhuajiniu
(Mt 10.37-38)*

²⁵ Jiyanoohua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

²⁶—Cante cucua niya cua pueyano na quiniuriani, nojuaja cuara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujinijinio! Nia niquiocua, nia niquiuhua, nia tapueyocuaca, nia rimiatuhajuhua, nia panishacari nojori socua janiyajiniji, ¡majaari nia naata cua pueyara nia quiniu! Naajuhua, ¡majaari quenaaja nia naata tama nia cuaqueyajaaja panijia nia quiniu socua janiyajiniji! ²⁷ Cante tama na cuaqueyajaaja panitiaquijia cucuarani, majaari na naata cua pueyanora na quiniu. ²⁸ Naa jaara jyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatnura puetunujuanaa? Naajuhua, niaari niishiriojiya, queraatia quiyacuajate nia cumaneeca. ²⁹ Naa jaara coteenu naa miyaquiri, niaari najuhua morijiucua nujuatejonutaniya, na nuhuaji majaari socua nia cumaneeca quiniu nia tucuatnura nia tia. Puetunu nia tia niquiniaajanaari juhuacatecara nia macatiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatnura quiarijia”. ³¹ Naajuhua, jiya jiyaniijia jaara quianu paniri narta jiyaniijiaata miaquetonura, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Saniniuujia, tucuaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jyanootoonura. ³³ Naajuhua, naa jaara carteyaquiri puetunu nia jiiitasanojuanaa, majaari nia naata cua pueyanora nia quiniu.

*Miriqui Jesu pahuatasano shonijiniji
(Mt 5.13; Mr 9.50)*

³⁴ Shoni jaara tiquiriiquia quiya, maniniaari, pa panishano. Jaara shaacara quiqui, ¿taate na naata tiquiriiquiara na quiniuhua? Maja na naata. ³⁵ Najuhua quiyari. Majaari quenaaja maninia na quiniu cuhariquijinia jatasocoriquiano maninia na moritianiniuria nataacuaca. Majaari quenaaja maniajuhuaj, na paatishaanura na moquijianura, natau pajama niojosocoriquiano. Jaara naa maninia quiyacurijitij, nareja jatashiyari. Cante numaacani, cuara tojitiaara miriqui cua pahuatasano.

Cuaara na niishiirijuhuaaj. Seetanujuanaa cua tojitiajaca pueyani, nojoriiri juhua shoni mijiria.

15

Jesu pohuatasano miriqui tashucucano borregojiniji (Mt 18.10-14)

¹ Roma tiacajinia quijia jiyaniijara cumaneeca masejonaa, mariyata sesa miijiaca pueyari Jesuucua nijioriquiaa na pohuatasano nojori tojtianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojonaa soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijiaca pueya shanacuquiaa nocua nojori nijionura. ¡Juhua-janiya nojoritia miaquequiaajaariuhuaaj!

³ Naaratej, Jesuuri nojori niqiara pohuataree nio miriqui pohuatasano:

⁴ —Niaa jaara cien borregohua jiitariquia, nojorijinijinio niquiriyatuniyojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquijinia, tashucucano borrego nia pajenura, niaa cuaara na riuriatarohuaajatijia? Taaquiririnij. Niaacuajaari naa miiquiaaquiri. ⁵ Niaa jaara na riuriatasee, niaari nia shuquiriniutia na paquiohua nia numueecuaji. ⁶ Niaa jaara na tiuquitiarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiaritia! ¡Tari riuriatarohua cua borregoniyojua tashucuanonijia!” ⁷ Seetanujuanaa nia sequeyanijia, naajaariuhuaaj, jiyocuacaanu quiniaari jiyanohua shuquiritiquiaa niquiriyatu sesa miijiaca jaara noojia tacatore sesa na miiniujiniji. Cuno pueyanoori socua jiyanohua shuquiritasano tamasa noventa y nueve pueyajiniji, canapuetucua tari maninia pueyacuani.

Jesu pohuatasano miriqui juurequetesano cumaneejiniji

⁸ 'Naajuhuaaj, tamonu maaji jaara diez cumaneecaraca quiri, jaara niquiriyatu juurequetera tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatatareitijia. ⁹ Na riuriatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” ¹⁰ Seetanujuanaa nia sequeyanijia, jiyocuacaanu Pueyaso seyari naa shuquiriquiaajuhuaaj sesa miijiaca jaara noojia tacatore sesa na miiniujiniji.

Jesu pohuatasano taa tamonu pueyano jiyanoquiaari neyanuni

¹¹ Na nuhuaji, Jesuuri nio pohuatareejuhuaaj:

—Tamonu pueyanoori caapiqui niyanuraca quiquiaari. ¹² Socua naatujuaari na que sequeree: “Cua quena, quiaritia cua niqutiore quia jiiitasanojiniji, quiria quiriquiano quiaa jaara shaajeyare”. Naacuajitij, na queeri puetunu na jiiitasanojuanaa niqutiojoree necohua. ¹³ Socua naatujuaari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuuja tamasa na niqutiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniq, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijanaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquijinia na cushiya na cojuanura. ¹⁶ Mashajaari cushiya miaquesano miaquenu paniriquiaa juucua na miaajenuta. Cunoori tamaatia

purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. ¹⁷ Na nuhuaji, tama sequereearijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhua. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua tacateyarohuaraqij! Janiyacua na sequesuhuani: ‘Cua quena, janiyari Pueyaso miiquianu sesani. Janiyari sesa miiquianu quiajanijuhua. ¹⁹ Majaari socua cua sequenu quia niyanuta. Janiyari puera sesa miiijiani. Cua jiyatere juhuari juhua quia seru cua quiniuria, quiaara cua poonijionura’ ”. ²⁰ Naa na niishiriojonu nuhuajitij, mashajaari quiaquiaariuhua na queecua.

“Tucuacaanu na quishacarijia na que tiajiniji, na queeri na niquirii. Nocua taraa-jereeri. Nocua neteyareeri na naacunura. Na cacaseeri. Na nujuunsequereeariuhua. ²¹ Neyanuuri na que sequeree: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. ²² Na queeri saaja na tiaco seya sequeree: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijuhua! ²³ Pa riuutianishano juunu niqiojua nia quiaaco mosocoriquiano. Quiarijia pa queranacure. Pocua miaquenuureni, quiyanu pa shuquiritiasacari. ²⁴ Nio quiyanuniyojuaari juhua macu quiriquiaa. Quiarijia samitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuniuyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riuuaree: “Quia nuhuajishanacuaja tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niqiojua canaa monura”. ²⁸ Jiyacaritij, jiyapueranuuri jiyanohua juaaquii. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijonu quiquiaa quiajanija. Naa maninia tojijia cua quishacari quiajanijatej, ¡majaari quia niqutionu quiquiaari janiya quenaaja niquiriyatu cabranijuhua, cua queranacunura cua rupuentaata! ³⁰ Quiarijia saniniuujia, quia niyanu seque tiuquishacariuhua, ¡quiaari querasapiquia juunu niqiojua moree nera! ¡Nojuajaari quia cumaneeca puecakanu paanatujuuricua!” ³¹ Na queeri na sequeree: “Sanajanaa, quiaari pueyaracaanu cuata quiya. Puetunu cua jiiitasanojuanaari quia casaa. ³² Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarijia samitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

16

Miriqui Jesu pohuatasano pueyanojiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhua, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaaja. ² Cunora, jiyaniijaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarijia cua niqutiore quia naajiotasano puetunu quia miishanojinijijianaa. Majaari socua quia quiniu quiniutianiya cua casami cojuana”.

³ Cunora, cumaneeca cojuanaari niishiriojoquee. Tama sequereearijia: “¿Taa cua

miiniutianiyarini cua jiyaniijia jaara cua jatara cua poonijiosanojiniji? Janiyari maja cumueecani, cuhuariquiajania cua poonijionura. Naajuhuaaj, jiyanoehua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiinijia taa cua miiniutianiyani tamasa taraajenura cucua, nojori masuunura janiya nojori tiajina cua quiniuria, janiya jaara nio poonijiosanojiniji jataaareni”. ⁵ Naaratej, nojuajaari naa miiquiaari. Juhuacatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?” ⁶ Pueyanoori na riucuaaree: “Cua niqutiojocanu cien patacucua mishaja shiyocuan”. Cumaneeca cojuanaari na sequeree: “Ritia quia cajiri. Niya quia quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacucua mishaja shiyocua”. ⁷ Na nuhuaji, tamonu pueyano nequesotareeri: “¿Quiajaniyariuhuaaj? ¿Casaa cua jiyaniijia niqutiojocanu quiajaniyani?” Na riucuaareeri: “Cua niqutiojocanu cien canaasatu mishaja trigoni”. Cumaneeca cojuanaari na sequeree: “Niya quia quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸ Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanoehua niishijia tama quia cuaqueyajaaja quia cojuanura!”

’Seetanujuanaa pueyanaa, Pueyaso niishiyashijia pueyari socua jiyanoehua niishijia cuhuashiqui quijia pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹ Naarate nia nacasuyanijia, naa capora nia quirijihuaaj, maninia nia miiniuria pueya. Maja nia casami nia jamuenu. Cunocuaajaari nareja Pueyaso niqutiosano niajaniya. Naacuajitij, capora nia quishacari mijiria jaara puequema, nia Jiyaniijaari nia tiuquinitianutaniya pueyaracaanu quishaqui jiyocuacaanu, jiyanoehua na shuquiri-tiasacari niajaniya.

¹⁰ Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaari-uhuaaj. ¹¹ Naajuhuaaj, niaa jaara maninia jitiaaquiquiaa mijiria casami, Pueyasoori niaacua tiuquiniutianiya seetanujuanaa maninia jiyocuacaanuji casami nia jitianura. ¹² Naacuajitij, niaa jaara tamonu pueyano casami cojuaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

¹³ Poonitijosano pueyanoori maja na naata caapiqui jiyaniijiaara poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuaaj, niquriryatu jiyaniijia tojijia quiniutianiya maniniaari, na soosacari tamonu. Naajuhuaaj pueyanaa, majaari nia naata Pueyasoocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacuajitij, Pueyasoori maja na naata nia poonitijionu nera.

¹⁴ Fariseocuaaari jiyanoehua cumaneeca panijiaa quijia. Naaratej, nojori tojishacari Jesu sequesano, nojoriiri saaja na rerequeteree. ¹⁵ Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocuaajaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jitiasacari. Saniniuujia, casaa pueya jiyatequiaa socua jiyanoehua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarjia quiya cutaraari quiarinio Pueyaso Rupaa

¹⁶ Moisés Rootasano, mariyata puetunu tariucuacaanu Pueyaso sequenu panishano caminiujiuniaa pohuatasanojuanaari pueya tojitasocoriquiano quiquiaari, Tiuquini-jiona Juan pohuatasanojuhuaj. Quiarjia saniniuujia, maninia rupaa Pueyasojinijiiri pohuatasaaquiaa, taa Pueyaso jiyanoonu paniya pueyani, na muerasu nojori quini-uria. Quiarjiani, puetunu pueyajanaari jiyanoohua saniniuujia Pueyaso muerasu nojori quiniuria.

¹⁷ Nio jiyari shaajeriquiano, jiya cajiniocuanio. Saniniuujia, tariucuacaanu pueyara Pueyaso sequesano caminiujiuniaa pohuatasano cutaraari maja na shaajenu quiniutianiya quenaaja.

*Jesu niishitiojosano, pueyano carteyaquiniuria necocua
(Mt 19.1-12; Mr 10.1-12)*

¹⁸ Pueyano jaara necocua cartere tamonu maajitia na caminiuria, cuno pueyanoori jiyanoohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinjinio

¹⁹ Casamiriaca pueyanoori quiquiaari. Jiyanoohua maniniuqui toqueya cushiyojuaari, juhua jiyaniijianucua toqueya. Jiyanoohua na shuquiriniutia, puetunu juucajanaa queranacujuaari. ²⁰ Jiyacaritij, casamiiju pueyanoori quiijajuhuj. Jiyanoohua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quiija Lázaro. ²¹ Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. ²² Na nuhuaji, cuno casamiiju pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquojinia. Cuno casamiriaca pueyanoori cusoquiaarijuhuaj. Jamosaaquiaariiri. ²³ Sesa miijiacarano quiquojinia na quishacari, naquiya na miishacari tii, nojuajaari mauquiaari. Cuniqiji tucuacaanu niquirii Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: “¡Cua supuetana Abrahamnaa, cuca quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jiyanoohua naquiya miya nio manijiniani!” ²⁵ Abrahamri saaja na riucuarree: “Sana-janaa, quia niishiri taa jiyanoohua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanoohua taraatia quiquiaari pueyaracaanu, jiyocua na quishacari. Lázaroori quiarjia niya cumanijiashiya. Quiaari saniniuujia naquiya miishiyacujua. ²⁶ Naajuhuj, jiyanoohua tucuaa tacoori pa tajinia quiya. Cunora, cante niiquiji niuuniu paniya cuniqijiria quiocuani, majaari na naata. Naajuhuj, cante quia quiquojiniji niuuniu paniya niiquijiriani, majaari na naatajuhuj”. ²⁷ Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojijanijia, Lázaro quia jiyarorohua cua que tiajinia. ²⁸ Tii quiyajaari cua tapueyocuaca. Cinco tarajanuhuaracanjia. Lázaro cuaara nojori numooteera, maja nojori quejoosaanurajuhua nio saniitiosaqui quiquojinia”. ²⁹ Abrahamri na riucuarree: “Nojoricuajaari Moisés Rootasano jiiitiaa, puetunu Pueyaso sequesano caminiujiuniaa naajiotasanojuanaanio. Quia tapueyocuaca cuaara tojitiaara cuno”. ³⁰ Casamiriaca pueyanoori riucuarree: “Naa naasucuatuhuj, cua supuetana Abrahamnaa. Naajaa, tamonu pueyano macunucujinjinio jaara muetarohua nojoriicua, nojoriiri noojia tacatonutaniya sesa nojori miiniuujiniji”. ³¹ Abrahamri saaja na riucuarree: “Nojori jaara Moisés Rootasano tojitianu paniyaquiquiaa, Pueyaso

sequesano caminiujiuniaa naajionuutasanonio, majaari nojori tojitianu quiniutianiya-juhuj, macu pueyano jaara samiitiarohua”.

17

Puereetaari quiniutianiya sesa miijiacara

(Mt 18.6-7, 21-22; Mr 9.42)

¹ Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyano hua taraatia quijiaari cuno, cante sesa miitirii tamonuni. ² Jiyano pueyanoratej, maara socua maninia quiri nera, puereetuuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojuajinijinio. ³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

’Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jiyanoorinij. ⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

Pueyasocua tiuujia pueyanoori jiyano hua cumaacaraca

⁵ Jesu saquiriojosano pueyari Jesu sequequiaari:

—Jiyaniijianaa, socua jiyano hua canaa quia tiutiri Pueyasocua, socua cumaaca canaa jiitianura.

⁶ Jiyaniijia Jesuuri nojori riucuaare:

—Pueyasocua nia tiuuniu jaara quiri quenaaja juhua mostaza jajauniyojua, jiyano hua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijonatuca taa miijia quiri quianij

⁷ Niaa jaara seruraca quiri quia, nojuaja jaara tiajinia tiuquirio hua quia cuhuariquia-jiniji tee na namitariquiacuajani, quia seya cojuanujiniji soj, ¿niaatucua na sequere: “Miji, quia miaquesuhuaaja”? ⁸ Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterejuhuj. Cua miaquenu nuhuaji, quiocua saniniuujia miaquerohua. Quiocua raturuhujuhuj”. ⁹ Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! ¹⁰ Naajuhuj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajajinijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacu huj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucuaaji nujuatusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricuajani.

Nojori canujuucuatucarijia, nojori cusonuuri shaajequee. ¹⁵ Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu

cariquimiaji mojuquetaseeri. Jiyocuara naniriiri. Jesu sequereeri: “iPaacarasho Jesunaa!” Cuno pueyanoori Samaria jiyajinijinio tahue quiquiaari. ¹⁷ Jesuuri na pueya niqiuara naa sequereeri:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyani? ¹⁸ ¿Saaja nio tahueteeri tacaterohua Pueyaso na maniniuuhuaqueetanura?

¹⁹ Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiyani, Jiyaniijia Cristo tiuquishacariuhua

(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijia na quiniuria mijiriani. Jesuuri nojori riucuaaree saaja:

—Pueyaso Jiyarosano jiiatasacari na muerasu, majaari namijiata niquishano.

²¹ Majaari na naata sequesaaanu: “Niya quiya pa Jiyaniijia quiquio”, “Jati quiyaruhua”. Pueyasocuajaari tari niya jiiitaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niqiniuucua jiaatiantianiya niaata cua quiniuria rupaquijia, taa niaata cua quiya quiarijiacuaani. Majaari nia niqiniu quiniutianiya janiya. ²³ Tamasacaari nia sequenutaniya: “iNiya quiyacuaja nia Jiyaniijia!” Tamasacaari saniniuujia sequenutaniyacujua: “iNooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaquiaacuaani na nunujusacari. ²⁵ Saniniuujia, mijiria cua quishacarijia, janiyari coteenu jiyano hua naquiya miishaanutaniyani. Nio pa quishacari pueyari cua paniyaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacarini. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuuca buquejinia. Canashiyacujia, maruuri jiyano hua niqiuari. Puetunu mijiria quiniaajanaari cusonuquiaari pajaacajinia. ²⁸ Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niqutiojojuaari. Na cuhuariquiaca natoojuaari. Na tiacara tiajojuaariuhua. ²⁹ Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niqiuari jiyocuacaanuji. Puetunu cuno sesa miijiacajanaari manijinia catequiaari. ³⁰ Naa quiniutianiyajaariuhua quera jiya puequesacari. Pueyari juhuajaniya quiniutianiya. Janiyari jiyacari canashiyacujia tiuquiniutianihuani.

³¹ Cuno juuca, pueyano jaara na tia cacojiria quiya, cuaara roseyaquiiria na casamicua tiajiniaaco. Naajuhua, pueyano jaara na cuhuariquiajinia quiya, nojuaja cuaara tacateyaquiuhua na tiajinia. ³² Nia niishiriquia supuetana Lot niqiuocua. Na mashishacari, nojuajaari ritia cusoquiaari na nijiniara na niqiniuucua, na casamiicua na taraajesacari. ³³ Cante saaja shuquiriaatia mijiria na quiniuria niishiriojojuaari, nojuajaari na nuhuaji jiyano hua taraatia quiniutianiya Pueyasooju. Saniniuujia, cante tama na cuaqueyajaaja panitiaja cua tojijiara na quiniuriani, nojuajaari pueyaracaanu shuquiriaatia quiijara jiyatesaanutaniya.

³⁴ Cua tojiri. Cuno niucujuhua, caapiqui pueya jiuriatoosacari juucua na maquetujinia, niquriyatujuaari rishaanutaniya jiyocuacaanura, Pueyaso pueyano na quiniuucua. Tamonuuri tiujiasaanutaniya saniitosocoriquiano. ³⁵ Cuno juucajuhua, caapiqui

maajipohua riiquiniushacari jatiqúi juucua, cucua tiuujaari tarajanu shuriucuaaji rishaanutaniya. Tamonuuri tiujiasaanutaniya saniitiosocoriquiano. ³⁶ Caapiquí pueya quishacari cuhuariquiajiniya, cua pueyanoori rishaanutaniya. Tamonuuri tiujiasaanutaniya saniitiosocoriquiano.

³⁷ Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pahuatasano niquishaanutaniyarini?

Jesuuri nojori riucuarere miriqui:

—Tee casaa moqueyani, mohuari tii rerejiya.

Naajuhuaaj, majaari quenaaja niquiriyatu Pueyaso tojiyashijia cureenu quiniutianiya saniitiosoo.

18

Jesu pahuatasano mashiquojiniji, pueya nequesoreena pueyanojinijinio

¹ Jesuuri na pueya pahuataquiaari nio miriqui pahuatasano nojori na niishitiojonura, nojori cuara Pueyaso secojora pueyaracaanu, nojori taacanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejano. ³ Cuno tiacajiniaja tamonu mashiquoori quiquiaari-ijihuaaj. Mashiquoori cuno nequesoreenaacua rucuanerajua pueyaracaanu. Na secojuaari sesa na miinia pueyano cuara na niquitiohuara na casaa saniniujia, sesa na miishanojiniji nojuaja. ⁴ Majaari nequesoreena tojinu paniniu quijia pueyaracaanu cuno mashiquio. Naajaa, pueyaracaanu nocua na rucuanerajosacari, cuno nequesoreenaari socua tama sequequiaarijaaja: “Janiyari maja Pueyaso puerejani. Janiyari pueya tojiyashijia cutarani. ⁵ Naajaa, naa nio mashiquio taajetesacari janiya pueyaracaantej, janiyari quiarjia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶ Maninia na pueya niishiniuria na pahuatasano, Jiyaniijia Jesuuri naa nojori sequerohuacuhuaaj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷ ¿Nia que Pueyasoarijataj? ¿Niaateeri jiyaniya maja nojuaja tojinu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyajaa? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijia pueyacuaji. Sesa nia miijiaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacarihua, ¿janiyate Pueyasoocua tiuujiaca riuriatanutaniya naa pueyaracaanu secojonuujuacani?

Jesu pahuatasano miriqui Fariseo pueyanojiniji, Romano jiyaniijia cumaneeca masejojuajinijinio

⁹ Jesuuri socua nio miriqui pahuatasano pahuataquiaari noo pueya niqiuara, canapuate tama na cuaqueyajaaja jiyaniyani nojoriiri maninia pueyano. Naacuajitij, nojoriiri tamasa pueya soojea, nojori jiyanihacari cuno pueyari socua sesa miijia nojorijiniji. Cunora, Jesuuri nojori niqiuara naa pahuataquiaari:

¹⁰ —Fariseo pueyanoori quiaquiaari Pueyaso Secojua tiajinia na secojonura Pueyaso. Jiyacarij, Romano jiyaniijia cumaneeca masejoju pueyanoori quiaquiaari Pueyaso na secojonura tiijuhuaaj. ¹¹ Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasa pueyani. Tamasa cutaraari nohuasenujuaca, sesa miijia, maaji porocujuhuaaj. Naajuhuaaj, shuquiriaatia quiyaniija, janiyari maja sesa miijiani juhua nio pueyanojua niya cuata secojiyani, cumaneeca masejona pueyanoni. ¹² Janiyari caapiquí juuca miaqueyacuquiaani puetunu semaanajanaa cua shuqiritiniuria

quiajaniya. Naajuhuj, janiyari pueyaracaanu puetunu cua masesanojinijianaa niqutioquiaa quiarani, taa Moisés rootaquiaaricujani”. ¹³ Cumaneece masejonaari saniniuujia tucuacaanuji nujuasee. Na secojosacari, majaari quenaaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri. ¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoyaquishoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

Jesu niasacari na juaashiquia conaajaacua
(Mt 19.13-15; Mr 10.13-16)

¹⁵ Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jitianura maninia nojori. Jesu saquiriojosano pueya jaara niqiuquiaari conaaja pooshiyano Jesuucua, nojoriiri na poonaa juaarii. ¹⁶ Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. ¹⁷ Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

Casamiriaca pueyano pocojosacari Jesuta
(Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samitianishaanura, pueyaracaanu quijiara cua quiniuria Pueyasotani?

¹⁹ Jesuuri na riucuaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. ²⁰ Pueyanonaa, quiaacuajaari Moisés Rootasano niishijia. Naa naajiotasanocuajaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sapojonuta. Quia que, quia nucua tojjijia quia quiri”.

²¹ Pueyanoori Jesu riucuaaree:

—Janiyacuaajaari cua naatujuajiniji puetunu cuno tojjiajanaani.

²² Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jitiananojuanaa quia niqutiojore cumaneecara. Na nuhuaji, casamijiuniucua pueya cuno cumaneeca quia niqutiojore nareja. Naacuajitij, quiaari jiyanoohua casamiriaca quiniutianiya cutara jiyocuacaanu. Na nuhuaji, quiocua nimiohwa cutara, cua pueyano quia quiniuria.

²³ Na tojishacari Jesu sequesano, nojuajaari jiyanoohua taraajequee, jiyanoohua queraatia casamiriaca na quishacari. ²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanoohua jiyajenetaari Pueyaso muerasu nojori quiniuria.

²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanoohua jiyajenetaari Pueyaso muerasu na jatanishaanura.

²⁶ Pueya tojishacari naa Jesu sequesantotej, nojoriiri naa na nequesotaree:

—¿Canteeri Pueyaso muerasura quiniutianiyantioj?

²⁷ Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequereee:

—Jiyaniijanaa, ¿canaarijataj? Canaari puetunu canaa jiiatasanojuanaa tiujiaquiaarini canaa nuhuajiniuria quiajaniya.

²⁹ Jesuuri na riucuaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

Jesu pacutesacari pohuatanu, nojuaja mosaanutaniya

(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujiunaa sequequiaaricuaja janiyajinijini. ³² Naacuaajitij, janiyari tahua niqutiosaanutaniyani. Nojoriiri cua macaatiutianiya. Taraatia cua miitiuniutianiyari. Cua riocojotunutaniyari. ³³ Cua piquitiuniutianiyajaariuhuj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuanu.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariojuaru pueyano Jericó tiacajinia

(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaaji cajiriquiaa, cumaneeca na masejonura pueya tajishacari nucuaco.

³⁶ Cariojuaru tojishacari queraatia pueya tajiyo, pueya nequesotareeri:

—¿Casaatejanojoni?

³⁷ Pueyari na sequereee:

—Nazaret tiacajinijinio Jesucuaaja tajiya.

³⁸ Cariojuaruuri nacaquee:

—¡Jesunaa! ¡Supuetana David niqiuohuacuajinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¡Supuetana David niqiuohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequereee cariojuaru cuara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajaniyani?

Cariojuaruuri Jesu riucuaaree:

—¡Jiyaniijanaa, niqiujiara quiniu paniuhuanijia!

⁴² Jesuuri na sequereee:

—¡Niquijia quia quiriouhua! Quia namijiacuaaja tari jeequerohua cucua quia tiushacari.

⁴³ Jiyacaritij, cariyujuaruuri maninia niquijiara quiquii. Jesu nuhuaji sacuaareeri na shuquiritianuta Pueyaso. Puetunu Jesu miishano niquniaajanaari Pueyaso manini-uhuaqueetariquiaa.

19

Jesu pocojosacari Zaqueota

¹ Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari. ² Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejona camarnu quiquiaari. ³ Nojuajaari Jesu niishiniu panijia juucua. Majaari na naata niquniu quiriqiaa Jesu, puera jiyanohua pueya quiniuucua Jesu shocua. Naajuhuj, Zaqueori puera posucuashi quijia. ⁴ Cunora, Zaqueori netequiaari Jesu tacoji. Nuu shuucujia sicómoro naanaacua macaseeri, maninia na niquniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tiajinia maquenutaniyani.

⁶ Zaqueori ritia rosemohua. Jesu tiuquinitiaree na tiajiniaari jiyanohua na shuquiriniutia. ⁷ Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacuajitij, janiyari casamiiuniucua nareja niqutiojonutaniya puetunu cua jiiitasano cajiniocuajiniijijianaani. Naajuhuj, janiya jaara puera cumaneeca masecanu tamasa pueyajiniji cua sapojonutani, janiyari nojori niqutionutaniuhua socua jiyanohua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarijiani, nio tiajinia quinia pueyari tari jiyanooshaaree! Nio pueyanocua jaari supuetana Abraham niqiuoacuajinio supuenojuhuj. Nojuajaari cucua tiuuri taa Abraham tiuquiaari Pueyasocuaacuaani. ¹⁰ Janiyacua jaari cunora mijiria niquiarini, tashucuaano pueya cua pajenura, nojori cua jaariutianura Sesaaca.

Miriqui Jesu pohuatasano diez cumaneecajiniji (Mt 25.14-30)

¹¹ Tii quinia pueyari Jesu pohuatasano tojitiariquiaa. Jesuuri tari cateca quiriqiaa Jerusalén tiacajiniji. Pueyari jyaniriquiaa Jesuuri Israel pueya jiyaniijiaara quiniutaniya tari, Pueyaso muerasu na jiiitianura mijiria. Nocujia, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuatareeri:

—Tamonu jiyaniijia niyanuuri quiquiaari. Nojuajaari tucuacaanu tamonu jiyajinia quiaquiaari jiyaniijiaara na jiyatesaanura. Jiyaniijiaara na jiyatesaanu nuhuaji, nojuajaari tacateriquianohua quiriqiaa, narta pueya jiyaniijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niqutiojoree niquriyatuu cumanee, orojiniji shipinishano. Nojori sequereeri: “Nio cumanee nia poonitijiore, janiya cuara tiuquiriohuajaatiinijiaj”. ¹⁴ Na nuhuaji quiaqueeri. Na jiyajinijinio pueyari maja na niquniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵ Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca.

¹⁶ Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niqutiosano cumanee janiya, janiyari socua diez cumaneeca reratecanuni”. ¹⁷ Na jiyaniijiaari na sequeree: “¡Maniniacuajal! ¡Quiaacuajaari maninia cua seru! Quiaari secaja cua niqutiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijia quia quiniuriani”. ¹⁸ Na nuhuaji, tamonu na seruuri nocua nimiaajuhuj. Nojuajaari na jiyaniijia sequeree: “Cua jiyaniijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni”. ¹⁹ Na jiyaniijiaari na sequereejuhuj: “Quiaari cinco tiaca jiyaniijia quiniutianiya”.

²⁰ Na nuhuaji, tamonu na seruuri nocua nimiaajuhuj. Na jiyaniijia sequeeseeri: “Jiyaniijianaa, niya quiya quia cumanee quia niqutiosano janiya. Janiyari na cojuacanu maniniani, toqueraujinia jiuniosano. ²¹ Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacia taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhuj”. ²² Na jiyaniijiaari na juaari: “Sesaacanaa, tama quia sequesanojia janiyari quia nequesorenutaniyani. ¿Naatee? ¿Quiaateeri niishi-quianu janiyari pueyacia taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhuj? ²³ Quiaa jaara jiyaniquianu janiya naa miijiani, ¿casaara cua cumanee quia niqutioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuanu, cua tijinia cua tiuquishacariuhua”. ²⁴ Cunora, na jiyaniijiaari tii quiniaa pueya sequeree: “¡Cua cumanee nia jaariutiare cuno! Nia niqutiore cua maninia seru, cante diez cumaneeca jiitiaacuajani”. ²⁵ Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jiitiaa”. ²⁶ Jiyaniijiaari saaja nojori riucua: “Seetanujuanaa nia sequeyanijia, cante tari jiitiaani, nojuajaari socua niqutiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiuyashijia na quiniuucua. ²⁷ Quiaritia, cua paraa saniniuujia, cuno pojori canapuate cua paniyaquiquianu nojori jiyaniijia cua quiniuriani, miji nia jayore nojori. Niya cua niqiara nia puecoore cua ruuretajaca seque”.

Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetaarecuhuj Jerusalén tiacajiniara. ²⁹ Jaara cateca quiri-quiaa tari Betfagé tiaca, Betania tiacanio, Olivo cuhuariquia tuhananujuhuj, Jesuuri caapiqui na pueya sequeree:

³⁰ —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucua: “Jiyaniijia na paniya”.

³² Jesu pueyari quiaaree. Nojoriiri na riuriatasee taa Jesu sequequiaaricuajani. ³³ Nojori samaacartasacari burro, na camaruhuari nojori nequesotare:

—¿Casaara nia samaacartaa canaa burroni?

³⁴ Nojoriiri na riucua: —Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijia. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muevojiaari nucuaco Jesuucua. ³⁷ Nojori rosetanu panishacari Olivo cuhuariquia tuhananujini, puetunu Jesu

pueyajanaari juhuacatecara nacoquiaari nojori shuquiriniutia. Nojoriiri Jesu manini-uhuaqueetariquiaa puetunu na cumaacata na miishanojuanaa nojori niquniuucua. Nojoriiri cunora jiyanohua shuquiritariquiaa Pueyaso. ³⁸ Nojoriiri naa nacooriguiaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanohua maninia! ¡Pa shuquiritiarenoj!

³⁹ Cuniqúi pueya tajinia quiniaa Fariseocuaca tojishacari naa nojori sequesantej, nojoriiri Jesu sequere:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuquere. ⁴² Cunora, juhua pueyano sequere Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia jiyanooriguianoori juucua niya quia. Majaari quia niishiniu nojuaja, juhua nimishitiu quia quishacari. ⁴³ Cunora, na nuhuajiiri jiyanohua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucujia. Naacuaajitij, quia paraari quiocua juhuacunutaniya na miaquejonura quiajaniya. ⁴⁴ Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquniaari najuhuanaj, quiocuaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuate na seya niqutiojoriqiaacuajani Pueyasoocuara puecoosocoriquiano. ⁴⁶ Jesuuri nojori sequere:

—Tariucuacaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriqiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriguiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriqiaa Jesu.

20

Pueya nequesotasacari Jesu, cante na jiyaronani

(Mt 21.23-27; Mr 11.27-33)

¹ Tamonu juuca, Jesuuri Pueyaso Secojoua tiajinia niishitiojoriqiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijioamaajuhuj, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniijia quia quiniuriani? ¡Canaa quia riucuaare! ¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu panijajuhua. Cua riucuaare. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequetooquiaa: “Juanna seetanujuanaa Pueyaso sequenu panishano caminiujiunia quiquiaari”.

⁷ Nojoriiri cunora Jesu riucuaaree:

—Johua. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyajuhua, majaari cua sequenu quiniutianiya nijaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijiaca poonijionaajiniji
(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu coteerohuacuhua nio miriqui pohuatasanta. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutionquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia. ¹⁰ Uva quishacari noshuriujua, saniya cuhuariquia camarujanaari na seru jiyaroree cuhuariquia cojuanaa pueyacua. Jiyarosaareeri tiji na masenura na camarurajanaa, uva carojotasanojiniji. Na camarujanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. ¹¹ Cunora, cuhuariquia camarujanaari tamonu na seru jiyaroree. Cuhuariquia cojuanaari na miitiurii sesajuhua. Na saarijiotureeri. Na piquitiuriiri. Na jiyaroturohua juhuasujaariuhua. ¹² Cuhuariquia camarujanaari socua tamonu na seru jiyaroree nojoriicua. Nojoriiri sesa miitiurii nojuajuhua. Na nuhuaji, nojoriiri na caponeeree cuhuariquiajiniji tariucua naatishano.

¹³ Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqutioniuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaru niyanujuanaa niquriiri nojoriicua niyano, tama nojorijaarijia sequetoooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini? ¹⁶ Seetanujuanaa nia sequenyajia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequetooquiaari:

—¡Juhuej! ¡Pueyaso cuara naa miyaquiuriatej!

¹⁷ Jesuuri nojori niqutionioree. Nojori sequereeri:

—¿Naatee? ¿Nio naajiotasanooriuhuj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia sojotanutaniya, nojori jiyanihacari cuno saajia sesarujajau. Na nuhuaji, cuno saajiaari socua panishano saajiara jiyatesaanu-taniuhua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiri-ajosano Israel pueya jiitianaa nojori quiniuucua, Jesuuri miriqui pohuatariquiaa no-jorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaca pueya.

Jiya jiyaniijia cuaara niqutiosaaria na sequesano cumaneeca
(Mt 22.15-22; Mr 12.13-17)

²⁰ Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocu-atenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niqutiosaaquiaari saniitiosocoriquiano. ²¹ Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niquiniu pueya. Quiaacuajaari seetanujanaa niishitiojoquiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyan. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojora nera, na jiitiasano pueya pa quishacari. Naaratej, ¿maniateeri pa miiniuria na sequesano?

²³ Jesuuri niishiquii nojoriiri nojuaja nequesotariquiaa najuhuanaj, nojori saponuta. Cunora, nojori sequereeri:

²⁴ —Cua niqutiri quia cumanee. ¿Niooriuhuj? ¿Cana naaquiti nocuani? ¿Cana sesate nocua naajiotasanoni?

Jesu riucuatereeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhuj.

²⁵ Jesuuri nojori sequereeri:

—Jiyaniijia César cuaara tama na casaajaaja niqutiosaaria. Nojuacuajaari na camaru. Saniniuujia, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucuasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucuasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhuani?
(Mt 22.23-33; Mr 12.18-27)

²⁷ Na nuhuaji, nojiaqueya Saduceocuacajinijinoori Jesuucua niquiaari. Saduceocuacaari jiyaniijia macunucua pueya maja na samiitiaconu quiniutianiuhua. Naaratej, nojoriiri Jesu sequereeri:

²⁸ —Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. ²⁹ Tamonu mashajaari seis tapueyocucaraca quiquiaari. Nojuajaari jiya-pueranu quiquiaari. Coteenu camiquiaariiri. Nojuajaari cusoquiaari muetuhujua.

³⁰ Cunora, na nuhuajishanaari na mashiquio camirii. Nojuajaari muetuhuojuua cusoquiaarijiuhuj. ³¹ Naaratej, neyaca tarajanuuri mashiquio camiquiaarijiuhuj. Nojuajaari muetuhuojuua cusoquiaarijiuhuj. Puetunu cuno mashiquiorijianaari naa camiy-oquiaari cuno maajitia. Puetunu nojorijianaari csonuuquiaari muetuhuojuua. ³² Na nuhuaji, pueya mashiquioori shaajequiaarijiuhuj. ³³ Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniu-tianiyani? Cuno mashiquiocuajaari puetunu cuno siete pueya niquiocua quiquiaari.

³⁴ Jesuuri nojori riucuaaree:

—Mijiria pa quishacarijia, canuu, maajipohuari camiyocua. ³⁵ Saniniuujia, ma-jaari noo pojori camiyonu quiniutianiya canapuate samiitianijiosaanutaniuhua-cua-jani, maninia quijiaca nojori quiniuucua Pueyaso niquiara mijiria. ³⁶ Majaari nojori shaajenu quiniutianiuhua. Nojoriiri shaajeyashijiaca quiniutianiya juhua Pueyaso seya. Nojori samiitiaconuucua macujiniji, cuno, nojoriiri Pueyaso muerasujuanaa quiniutianiya cutara. ³⁷ Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸ Naacuajitij, paari niishiyani, puetunu Pueyasocua tiuujiaa shaajecono pueya-janaani, nojoricuajaari saminiucua quia Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quia nera cutara.

³⁹ Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequere:

—Maniniacuajaari quia sequesano, Niishitiojonanaa.

⁴⁰ Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹ Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanaari supuetana David niquiohuacuajinio supuenutaniya? ⁴²⁻⁴³ Supuetana Davidjanaacuajaari naa naajio-taquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajiri-jiaara, janiya cuara quia paraa shocotare puetunujuanaajaatijia’ ”.

⁴⁴ ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijia”.

Cuno pueyari maja na naata na riucuanu quiriquiaa.

Jesu numootesacari na pueya, Moisés Rootasanojiniji niishitiojonaa pueyacuaji

(Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojtiasacarijia Jesu, Jesuuri naa na saquiriojosano pueya sequere:

⁴⁶ —Tama nia cuaqueyajaaja nia cojuare Moisés Rootasanojiniji niishitiojonaa puey-acuaji, nia miyaquiniuucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuanura nojori juhua tojishano pueya, nojori rucuanijosacari tiaca jiuujiajinia curotasano cajitiucuaajinia. Nojoriiri socua panishano cajitiucuaajinia cajiniu maniniucuaquiaa Pueyaso Secojoua tiajinia, tamasa tiajinia-juhuaj, nojori jaara masusaare queranacunura. ⁴⁷ Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori mi-iniu nuhuajitij, pueya niquiara, nojoriiri najuhuaana tucuyocua secojocua Pueyaso,

pueya jiyaniuria nojori maninia pueya cutara. Naa nojori miiniuucatej, nojoriiri jiyanohua saniitiosano quiniutianiya.

21

Casamijiu mashiquio niqutiosacari na cumanee juurane Pueyasora
(Mr 12.41-44)

¹ Pueyaso Secojoua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niqutiosano Pueyasora. ² Jesuuri tamonu casamijiu mashiquio niquiriijuhua caapiqui cumaneeniyojua niaano tiijihuhaj. Na niasanoori nareja cobrejiniji shipinishano cumaneeca quiquiaari. ³ Jesuuri na pueya sequeree:

—Seetanujuanaa nia sequeyanijia, cuno casamijiu mashiquioori socua queraatia niqutioree Pueyaso, cuno casamiriaca pueyajiniji. ⁴ Puetunu cuno pojorijianaari saaja na cureeno cumaneecajiniji niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqutioree.

Jesu pohuatasacari, Pueyaso Secojoua tia niyartasaanutaniya
(Mt 24.1-2; Mr 13.1-2)

⁵ Noojiaqueya tii quiniaa pueyari pocoojoriquiaa Pueyaso Secojoua tiajiniji. Jiyanohua shanohua saitia shipinishano quiriquiaari. Nojoriiri na shootiariquiaa, naajuhuj taa na maniniushitishaaquiaari nareja pueya niqutiojosano casamitiani. Jesuuri nojori sequeree:

⁶ —Puetunu cunujuanaa niaa na niqiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyanaari.

Taa nio jiya puequenu panishacari quiniutianiyani
(Mt 24.3-28; Mr 13.3-23)

⁷ Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutianiyarini, canaa niishiniuria quia sequesanoori quera tohuateya?

⁸ Jesuuri nojori riucuree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supenuutaniya. Nojoriiri sequenuutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojinu cuno sapojonuujuaca. ⁹ Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara juaatiooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanouaja maja nio jiya puequesacari.

¹⁰ Jesuuri naa nojori pohuatariquiaa socua:

—Tamonu rupaa pocuajacaari miaquetojonutaniya tamaatia rupaa pocuajacata. Naajuhuj, tamonu jiyajinijinio jiyaniijiaari miaquetojonutaniya tamonu jiyajinijinio narta jiyaniijiaata. Naa queraatia miaquetojonuuri quiniutianiya. ¹¹ Rijiaari jiyanohua jiuuquiujutianutaniya queraatia jiyacajinia. Jiyanohua miaajenuuri quiniutianiya queraatia tamonu jiyacajiniajuhuj. Paaqueja cusonuuri quiniutianiya niya, tamaquicuajuhuj. Naajuhuj, jiyanohua puereeta casaari niquishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuuja

tiajinaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanucua janiyajiniji pueya niquiara. ¹³ Naacuajitij, nia naata cuno jiyaniijianucua niquiara pohuatanu janiyajiniji. ¹⁴ Nioojiaca nia cajitiri, maja juhuacarijia nia niishiriojonura taa nia riucuanutaniya nojorini. ¹⁵ Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jiyanohua cua niishitijatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya. ¹⁶ Jiyacarijiuhuj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajuhaaj, nia jiyasoocujainio supueno pueyajuhuj, nia rupuenanio. Nojoriiri noojiaqueya niajanijainijinio puecoonutaniya. ¹⁷ Puetunu mijiria quiniaa pueyajanaari nia niquiniu paniaquiniutianiya cua pueya nia quishacari. ¹⁸ Naajaa, majaari nia puerenu. Majaari quenaaja niquiriyatu miesu shaajenu quiniutianiya nia nacajiniji, Pueyaso jaara paniaquiri. Pueyaso jaara naa nia miesu cojuaacuaa, ¿maatucua casaara cojuaaquiri saniya niajanijani? ¹⁹ Naaratej, rejeretajaca nia quiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa niajanijani.

²⁰ Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. ²¹ Jiyacaritij, canapuate Judea jiyajinia quiyani, cuno pojori cuaara mashiiria tuhuananuhuacua. Canapuate Jerusalén tiacajinia quiyani, nojori cuaara ritia mashiiria tiji. Canapuate na cuhuariquijainia quiyani, nojori cuaara tacateyaquiuhuara Jerusalén tiacajinihua. ²² Cuno quishacari, jiyanohua saniitosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenutaniya. ²³ Jiyanohua taraatia quiniutianiyari noo maajipohuara, canapuate manajaatohua quiya jiyacarini, mariyata canapuate conaaja supueja jiitiaani. Jiyanohua naquiya quiniutianiyari cuno quishacari nio jiyajinia. Nio jiya pueyari jiyanohua saniitiosaanutaniya. ²⁴ Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Taucuacaari Jerusalén tiaca jitianutaniya tama nojoririjaaja, Jerusalén tiaca nojori jitianu cuaara puequerejaatijia, taa Pueyaso sequequiaari tamajacuajani.

Taa na quiniutianiyani Jesu tacatesacariuhua

(Mt 24.29-35, 42-44; Mr 13.24-37)

²⁵ 'Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaj. Shoniniacu caminiaacuaji shiriiquitiuniutianiyajaariuhuj, jiyanohua na queyocuasacari. Nojoriiri cushitiniutianiya na pueretunutajuhuj, jiyanohua cojuata shoniniacu caminia cajiniuucuasacari. ²⁶ Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jiyanohua. ²⁷ Jiyacaritij, mijiria quiniaari cua niquitiuniutianiya cohuaja najacajinia niyano, jiyanohua shacantuuca cua cumaacata. ²⁸ Naaratej, niaa jaara nio cua pohuatasano niquiri tari coteyano, niocua tama cumaquitioorejaaja. ¡Niocua timiri! ¡Niaacuajaari quera rijiosaanutaniya niiquiji, pueyaracaanu cuata nia quiniuria!

²⁹ Jesuuri nojori pohuataree nio miriqui pohuatasanojuhuaj:

—Higo naana nia niquiri, tamonu jaranacujua naanano. ³⁰ Na jaamasucua jaara mueratuure, niaari niishiya, tacarejonuqui quera quiniutianiya. ³¹ Naajuhuj, niaa jaara puetunu cua pohuatasanojuanaa niquiri tari tohuateyano, niocua jiyacari niishiri, janiyari quera tiuquihuani, Jiyaniijiajanaa cua quiniuria.

³² 'Seetanujuanaa nia sequeyanijia, puetunu cua sequesanojuanaari tohuateenu-taniya Pueyaso tojitiaashijiaca pueya puequeyaquishacarijia. ³³ Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenu-taniyajanaa cutara, taa cua sequeyacuajani.

³⁴ Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutanio. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵ Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. ³⁶ Cunora, cucuaji jeenucuasano nia quiri juhuacarijia. Pueyaso nia secojore pueyara-caanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojua Pueyaso Secojoua tiajinia. Saniniuujia, niucua quiojowaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuaji quiojowa Pueyaso Secojoua tiajinia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura (Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanohua queraatia pueya paniniuucua Jesu.

³ Jiyacaritij, Satanásri Jesu pueyano Judas Iscariote jiuujiajinia tiuquiquiaari. ⁴ Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacuajuhua. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵ Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶ Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

Jesu miaquesacari na nuhuajiria na pueyata (Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari. Cuno juucajuhuaj, borregoori mosano quijia, Pueyaso niquiara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juannio, nojori miaquesocoriquiano nojori ma-jeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiar-
jia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaaree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹ Cuno tiajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarjia Pascua

niucuari?’ ” ¹² Nojuajaari nia niqutiniutianiya puereetuuca sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquiriojosano pueyata cajitiushii miaquejajinia. ¹⁵ Jesuuri nojori sequereee:

—Janiyari jiyanohua niaata miaquenu paniriquiaa nio Pascua niucuari, pueya moyaquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa. ¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqutiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaraanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniyani taa janiyajiniji juhuacarjia pohuatasaaquiaaricuajani tariucuacaanu Pueyaso Rupaajinia. Saniniuujia, cua tacartanaari jiyanohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetoree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonuutariquiaajaacujua, teyano nojorijinijiniote jiyaniijajanaani. ²⁵ Jesuuri nojori sequereee saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jiiitasano pueya, juhua nojori poonitijosano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. ²⁶ Niajaniya saniniuujia, majaari naa nia quiniu juhua nojorijia. Cante socua tojishano pueyano quiya niajanijajiniinioni, nojuaja cuaara tama na cuaqueyajaaja jiyateyaquiiria na cumaaca paaretaja pueyacu. Cuaara quiiria jacaria pocuaja. Naajuhuj, cante jiyaniijajanaa quiya niajanijajiniinioni, nojuaja cuaara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¿Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuj, naa maninia miijiaca nia quiriquia.

²⁸ Niaacuajaari pueyaracaanu cua cojiriquiaa janiya jaara saniniuujishaariquiaani.

²⁹ Naaratej, janiyari nia jiyatenutaniya jiyaniijianucua nia quiniuriani, taa cua Que

jiyatequiaari janiyacuaani, Jiyaniijia cua quiniuria. ³⁰ Naacuaajitij, niaari cua miaqueja-jinia cajitiuniutianiya cuata nia miaquejonura, cuata nia raruujunurajuhuaaj, Jiyaniijia-ajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreena nia quiniuria.

Jesu sequesacari Pedro, nojuaja nocuaji seetanutaniya
(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequesquiaari:

—Simónnaa, cua tojiri. Satanásri niaacuara sequerucuaa Pueyaso, jiyanoehua na saniniujiuniuria niajaniya. Naacuaajitij, niaari jiyanoehua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. ³² Janiyari saniniuujia Pueyaso secojoree quiocuara cutarani Simónnaa, cucua tiuuniu quia tarinitiaaquinuucuaaji. Naacuaajitij, quiaa jaara quioojia tacatorohua cucua, quiocua quiarta pueya cumaquiriohuajuhuaaj, nojori tiuuniuria seetanujanaa pueyaracaanu cucua.

³³ Simónri Jesu sequere:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaaj! ¡Quiaa jaara mosaare, naajaa, janiya cuaara cojiritiasaaria quiajaniyajuhuaaj!

³⁴ Jesuuri na sequere:

—Pedronaa, seetanujanaa quia sequeyanijia, caacaraja niunijiyaquishacarijia quiarijia, quiaari tari naa cucuaji seetanu caminiujiuniutianiya pueya niquiara: “¡Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoquee-juni, cumaneeca quiquioju, sapatuujunio, ¿niaateeri nia panishano casaa niquitioy-aquishaaquiaari?

Nojoriiri Jesu riucaare:

—Maja. Canaacuaajaari puetunu canaa panishanojuanaa niquitiojosaaquiaarini.

³⁶ Jesuuri nojori sequere:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuaaj. Cante nijiniaquetucuaaja mueruu jiitiaaquiyani, cuno cuaara niquitioora na shiniquiaacuaji toque, nijiniaquetucuaaja mueruu na masenura na toque samitia. ³⁷ Seetanujanaa nia sequeyanijia, tariucua-caanu Pueyaso Rupaa-jinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyaniishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajio-tasaaquiaaricuaajani.

³⁸ Nojoriiri Jesu sequere:

—Jiyaniijianaa, niya quiya caapiqui nijiniaquetucuaaja mueruu.

Nojori riucaareeri:

—Tariucuaaja.

Jesu secojosacari Pueyaso, Getsemani cuhuariquiajia
(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jiitiquiaari. Na saquiriojosano pueyari na nuhuajiyaree. ⁴⁰ Na tiuquishacari tii, Jesuuri nojori sequere:

—Pueyaso nia secojore, niaa mariqui sesa miiriiri niaa jaara saniniujiushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojuquetasee Pueyaso secojonuraari. ⁴² Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴ Jesuuri jiyanoehua naquiya miiriquiaa. Noojaari quera jiaqueriquiaa na tacaaniutia. ¡Jiyanoehua, jiyanoehua secojoriquiaa Pueyasoori! Cunora, na paneyacaari puereetu-juaaca juhua nanaca quiriquiaa, na caatesacari jiyocua. ⁴⁵ Na secojonu nuhuaji, Jesuuri sanerohua. Na pueyacuatacaterohuari. Nojori niquishuhua maquetiuyano saajaari, puera nojori taraajenuucua. ⁴⁶ Jesuuri nojori sequeree:

—¿Casaara nia maquetiuyani? Nia saneecuate. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷ Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta. ⁴⁸ Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinijinioori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. ⁵¹ Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secojonaa jiyaniijianucua, Pueyaso Secojojua tia cojuanaa jiyaniijianucujuhuj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijinaquetucuaja mueruutani, macacatano nia quianura janiyani? ¿Janiyateeri nohuasejojuani, naa nia nijionura cucuatej?

⁵³ Pueyaracaanu cua quishacari niaata Pueyaso Secojojua tiajinia, majaari nia quianu quijia janiya. Naajaa, quiarjia cutaraari niajanijara, nia panishano nia miiniuria janiya. Quiarjiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuacaanuji na nuhuajiriquiaa. ⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishiijuhuj. ⁵⁶ Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuj.

⁵⁷ Pedroori seetaree. Naa sequereeri:

—Niyaconaa, ¡majaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquiriijuhuj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijinijinio pueyanohuj!

Pedroori saa sequerejaa:

—¡Maja, pueyanonaa! ¡Janiya maja nojorijinijinioni!

⁵⁹ Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocuaajaari cuno pueyanota quijia. Nojuajaari Galilea jiyajiniinjiojuhuaj.
⁶⁰ Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. ⁶¹ Jiyaniijia Jesuuri tacate-
 quee. Na nijiniara niquirii Pedroori. Pedroori jiyacari Jiyaniijia sequesano nojuaja
 niishiquii, naa na sequesanotej: “Quiaari tari seetanu caminiujiuniutianiya janiyajiniji
 pueya niqiara, caacaraja niunijiyaquishacarijia”. ⁶² Pedroori cuniquiji tohuataquee.
 Jiyanohua nujuquereeri na taraajenuta, sacuaraatia na seetanuucua.

Pueya macaatishacari Jesu
 (Mt 26.67-68; Mr 14.65)

⁶³ Jesu cojuanaa pueyari Jesu macatiriquiaa. Nojoriiri na piquitiuriquiaa.

⁶⁴ Nojoriiri Jesu namijia morotuquiaari coteenu. Na jiquioco piquitiuriohuari. Na
 nuhuaji, na sequetureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macatiniuria Jesu.

Judiocuaca jiyaniijianucua nequesoreesacari Jesu
 (Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa
 jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri
 Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee
 jiyaniijianucua tajoji, nojori nequesoreenura tii nojuaja. Nojoriiri naa Jesu neque-
 soreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiriirinij”, niaari saaja cua sequenutaniya:
 “Quiaa sapojiya”. ⁶⁸ Saniniuuja, janiya jaara nia nequesoreere Pueyaso Jiyarosanojini-
 jini, majaari nia riucuanu quiniutianiya janiya. ⁶⁹ Naajaa, quiarijiani, janiyari puetunu
 cumaacaraca Quijiajanaa miaquetajara cajiniutianiya jiyocuacaanuni.

⁷⁰ Naa Jesu sequesacaritij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiriirinij. Naacuaaquinatejaj, taa nia sequeyacuajani.

⁷¹ Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquianoni?
 Paacuajaari tari tama pa numaatajaaja sesa na sequesano tojitiareeni.

23

Pilato nequesoreesacari Jesu
 (Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pi-
 latoocua. ² Cuniqui, nojoriiri juhuacatecara Jesuucua saquiriojotaree na sapojonuta.
 Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa
 pocuara. Nojuajaari niishitiojoquiaajuhuj, maja canaa Israel pueya niqutiojonura
 canaa cumaneeca pa jiyaniijiajanaa Césarra, taa César sequequiaaricujani. Naajuhuj,
 tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia
 cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Taaquiriirini. Naacuj, taa quia sequereecuajani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miijia.

⁵ Nojoriiri saaja socua jiyacaterree Jesuucuaara tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucuaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niquiniuucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niquiniu panijia juucua. Naacuajitij, na niquishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. ¹⁰ Pueyacuara secojonaa jiyaniijianucuaari tii quiriquiaajuhua, Moisés Rootasanojiniji niishitiojonaanio. Cuno pojoriiri jiyanoehua Jesuucuaara saquiriojotariquiaa queraatia sesa casaa. ¹¹ Herodesri na soldadohuata Jesu rerequeteriquiaa. Na macatiriiri. Na cushitirii jiyanoehua shanoehua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹² Herodesri cuno juuca Pilato rupenara quiquiaari. Coteenu, majaari nojori niquitioonu paniniu quijia. Nojoriiri saaja shocotetoojua.

Puetunu pueyajanaa sequesacari Jesu cuaara mosaaria

(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhua, tii quiniaa pueyanio. ¹⁴ Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niquiarani. Niaacuajaari cua tojitariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanojuanaari maja seetanujuanaa. ¹⁵ Jiyaniijia Herodesquiiri tari niishiyajuhua, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. ¹⁶ Janiyari na majacutenutaniya narejani, cartesaaruari.

¹⁷ Pascua juucara queranacusacari, Pilatoori nujuatesano pueyano cartenu jitiquiaari nujuatejojuajiniji. Nojuajaari naa miiquiaari pueyaracaanutej, pueya na shuquiritiniuria. ¹⁸ Jiyacaritij, puetunu pueyajanaari juhuacatecara jiyanoehua nacaree jatiqui:

—¡Jesu quia more! ¡Barrabás quia cartere saniniuujia!

¹⁹ Tarijia cuno Barrabásri niarta nasojosano Judiocuacata Romano pueya taanuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoorohua socua. ²¹ Pueyari saaja jiyacaterree jiyanoehua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

²² Pilatoori pueya sequenu pacuterohuacuhuj:

—¿Maatucua casaara mosaarejaarani? ¿Sesa miiritijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenu-taniya narejani. Na nuhuaji cartesarohuari.

²³ Pueyari saaja socua jiyanoohua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanoohua nacooriguiaa. Puera jiyanoohua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanohuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari
(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosacari, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. ²⁹ Na nuhuaji, jiyanoohua taraatia quishacariiri quiniutianiya niaara, jiyanoohua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuanu, mariyata cante mueya supueteyashijianucuanuhuj”. Mueyaraca maajipohuari jiyacari jiyanoohua taraajenutaniya, nojori niquishacari necohua miishacari naquiya. ³⁰ Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” ³¹ Jiyacariiri jiyanoohua naquiya miishacari quiniutianiya. Quiaritia, janiya jaara naa naquiya miishiyacuaani, ¿taaqitijia Pueyaso tojitiaashijiaa miishaanutaniyatejaj?

³² Caapiqui sesa miijiacaari jaatucunuusaariquiaajuhuj, mariyata teetejosocoriquiano Jesuta. ³³ Nojoriiri puecoosacari tiuquijiosee. Cuniqui pueya puecoosacuini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaareejuhuj, niquiriyatu na miaquetajara, tamonu na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequereeri:

—¡Cua Quenaa, quia jiyanoori nio pojori! Majaari nojori niishiniu casaa na mitiuyani.

Na nuhuaji, soldadohuari saitia tacuarishijiooree, nojori niishiniuria taa nojori seraanutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiaritia, nojuaja jaara seetanujuaana Pueyaso Jiyarosano Cristo quiri, cuara roseera niyacutesanojiniji pa niquiara.

³⁶ Soldadohuari Jesu macatiriquiaajuhuj. Nojoriiri Jesu raateree piiquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

³⁸ Jesu nacaacuma, suruhuatuneeri rupotasaaquiaari naajiosano Griego rupaaajinia, Romano pueya rupaaajinia, Hebreo rupaaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹ Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuaaj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuaaj!

⁴⁰ Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuaaj. ⁴¹ Pajaniya cutaraari sesa pa miiniuucua naquiya miishiyani. Paacuajaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

⁴² Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riucuaaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari. ⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojoua tiajinia, jiyanoohua shiquiigua toquejiniji sohuacaari noojiaacoji sutequiaari puetunujuanaa querajaquera! ⁴⁶ Jiyacarijuhuaaj, Jesuuri nacaree:

—¡Cua Quena, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriquiaaja piquiniuuquiaariuhua, jiyanoohua nojori tacaaniutia naa nojori monuucua Jesu. ⁴⁹ Saniniuujia, puetunu Jesu niishishano pueyajanaari tii jiyojetarohuaaja, maajipohuaajuhuaaj, canapuate Jesu nuhuajiquiaari Galilea jiyajinijicujani. Puetunu nojorijianaari tucuacaanuji niquitiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojijia pueyano quiquiaari Arimatea tiacajinijinio. Cuno tiacaari Judea jiyajiniajuhuaaj. Cuno pueyano sesa quiquiaari José. Nojuajaari Judiocuaca jiyaniijianucujinijinio quiquiaari. ⁵¹ Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijiaara jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuara mosaaria.

⁵² Naacuajitij, Jesu cusosacari, Joseeri Pilatoocua quiaquiaari, Jesu quete na masenura.

⁵³ Na nuhuaji, Jesu quete roshinirii niyacutesanojinijiiri. Na jiuniocoreeri cohua-jaque quenaaruque toquejinia. Jesu quete niaree tarijia na jiuutianishano saajajini-aari. Cuno raajinia, juhuanouaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori

samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajinjicujani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni.

⁵⁶ Nojori riujiuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricujani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquijiosacari raajinia, saajiajiniji quejasano raa tiotiu niquitiushiiri tariucua tamocora shuuquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? ⁶ Maja tari niya na quiniu. ¡Tari samiitiarohuano! ¿Niaateeri tari niyajetaree na sequesano niajaniya, Galilea jiyajinia na quishacarijia? ⁷ Nojuajaari tari nia sequescanucujaja, nojuaja sesa miijiacaa niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiunuaa pueyajanaanio. ¹⁰ Cuno maajipohua, Jesu saquiriojosano pueya pahuataquiaariuhuani, nojoriiri nio maajipohua quiquiaari: María Magdalena, Juana, Santiago nucua Maríajuhuaaj, socua tamasa maajipohuanio. ¹¹ Jesu once pueyara, maajipohua pahuatasanoori juhua paateca sequesano quiquiaari saaja. Nojoriiri saa cuaracashitiriijaa maajipohua pahuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunocotaja cohuaaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquishanojiniji, maajipohua pahuatasanojinijinio.

Jesu tojitiana pueya niquishacari Jesu, nojori quiasacari Emaús tiacajiniara

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, nioluacata quiasacari tiriara. ¹⁴ Nojori quiojosacari nucucaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵ Naa nojori pocoojosacari nucucotej, Jesujuanaari jiyacari nojori rupuesee. Juhuaajaniya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajiniinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quiijaari na cumaacata na miijosano, na niishitiojosanojuhuaj! Pueyaso timitiasano quiijaari, puetunu pueya panishanojuanaano. ²⁰ Pueyacuara secojona jiyaniijianucua, mariyata pa camarucuaari na niqutiorucuaa Romano jiyaniijia na motesocoriquiano. Niyacutesanojinia mosaarucuaari. ²¹ Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji. ²² Tamasaca maajipohua canaa maanujiniiniori canaa shirioree nojori pohuatasanota. Nojoriiri quiarijia tariquicuajji quiojomaa Jesu raajinia. ²³ Nojoriiri maja na riuriatanu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! ²⁴ Na nuhuaji, tamasa canaajiniiniori raajinia quiojiyareejuhuj. Seetanujuanaa naa quiriquiaari, taa maajipohua sequeree canaacuajani. Maja cutaraari nojori niqiniuquirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiiri juhuanujuaja nia niishiniu. Niaari taacanuyajaa puetunu tariucuacaanu Pueyaso sequesano caminiujiuniaa naajiotasanoocuajanaa nia tiuuniuria. ²⁶ ¿Majateeri naa na pohuatasaanu quiquiaaricuaja: “Cristoori coteenu naa mosaanutaniyaquij. Na nuhuaji cutara, jiyanohua cumaacaracara quiijara jiyatesaanutanihuari Jiyaniijiajanaa na quiniuria”?

²⁷ Jesuuri juhuacatecara nojori niishitiojoree puetunu tariucuacaanu Pueyaso Rupaajiniijianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijianaano.

²⁸ Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujoriquiaa. ²⁹ Nojoriiri nojoritia na jiyojetenu paniriquiaa jiyanohua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijiaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. ³² Nojoriiri sequetooree:

—¡Jesucuaajaquiiri quiriquiaa! ¡Cunora poojiaqui jiyamitia timiriquiaa na pocojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanotej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴ Tariucua tajinia quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquiiijionaari nojori pohuatareejuhuj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasesacari nojoriria.

Jesu muetasacariuhua na saquiriojosano pueyacua

(Mt 28.16-20; Mr 16.14-18; Jn 20.19-23)

³⁶ Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriiquituuquii. Jiyanojua puereturiquiaari. Nojoriiri Jesu jiyaniriquiaa naaqui. ³⁸ Jesuuri nojori sequereeri:

—¿Casaara nia pueretiuyani? ¿Casaara nia jiyajenetaa janiyani? ³⁹ Cua juaashiquia nia niquiri, cua nioluacanio, nia niishiniuria janiyacuaajaari quiyani. ¡Cua cootiuri! ¡Cua niqutiuri! Naaquiiri maja cuaqueyaraca, maja nucuahuaraca taa nia niquiya janiyacujani.

⁴⁰ Naa nojori na sequesacaritij, Jesuuri nojori niqutiijioree na juaashiquia, na nioluacanio. ⁴¹ Puera nojori jiuujiatesacari, puera nojori shuquirishacarijuhuaj, nojoriiri taacanuuriquiaajaa, maja naasucua Jesu. Cunora, Jesuuri nojori sequereeri:

—¿Niaate miaquesocoriquiano jiiitiaacuaa?

⁴² Nojoriiri Jesu niqutioree sapitiaaja raqui caquishano. ⁴³ Jesuuri na maseree. Nojori niquiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari niajaniryacuajani, pueyaraaanu niaata cua quishacari tarijia. Nia sequequiaaricujani, janiyari naa miishaanutaniyani, taa Moisés naajiotaquiaari janiyajinijicujani. Puetunu Pueyaso sequesano caminiujunaaajanaari janiyajiniji naajionuutaquiaarijuhuaj. Supuetana Davidri janiyajiniji naajiotaquiaarijuhua na jaaquequejoneejinia. Quiarijia tari tohuaterucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuacaanu Pueyaso Rupaa naajiotasano.

⁴⁶ Nojori sequereeri:

—Tariucuacaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujanaraca juucajinia samiitianutaniuhuari”. ⁴⁷ Naa naajiotasaquiaarijuhuaj, Jerusalén tiacajinia, janiyajinijiiri pohuataaanutaniya pueya niquiara, na nuhuaji puetunu jiyacajiniajanaano. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuajaari puetunu cua miishanojuanaa niquijia. ⁴⁹ Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuacaanuji niriqiuano cumaaca maserejaatijia.

Jiyocuacaanu Jesu tacasacariuhua

(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqii nojori quishacarijia, Jesuuri na juaashiquia shiitioquiaari nojoriicuara na secosacari Pueyaso, Pueyaso jiiitianura maninia pueyaracaanu nojori. ⁵¹ Nojoriicuara na secosacarijia, Jesuuri nojori shuriucuaji tacanishaquiaari jiyocuacaanu. ⁵² Nojoriiri na shuqiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanojua shuquiriaatia quiriquiaa. ⁵³ Nojoriiri pueyaracaanu quijia Pueyaso Secojua tajinia. Tii Pueyaso maniniuhuaqueetatujua pueyaracaanuuri. Tariucuaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. ² Jiya coteesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipinina quiniu socua. ⁴ Nojuajaari quijiajuhuanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanerujua quiquiaari. Pueyari tama nojori Shipinijiaaja niishiyaquiquiaari. ¹¹ Tama na saquiriojosano Israel pueyacu niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuquiquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miiijosano niquiquiaariini. Jiyanojua maninia quiquiaariiri. Na Que Pueyasoori na cumaquijia jiyanojua maninia na miiniuria, Neyanuniyojua na quishacari. Nojuajaari saaja seetanu rupaaajanaa sequeja Pueyasojiniji. Jiyanojua quijiaari. ¹⁵ Tiuquinijiona Juanri Jesucristojiniji pohuataquiaari pueya niqiara. Jiyanojua na rupaa paaretaquiaariiri pueya tojitianura nojuaja. Naa sequejaari:

—Janiyacuaajaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijiajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyaniijiajanaa Jesucristo quiniuucua, puetunu pajaniyajanaari na jiiijasanojiniji masequiaani. Jiyanojua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajiotequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajuhuj, seetanu rupaaajanaa pa niishiniuria nojuajiniji. ¹⁸ Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pahuatasano Jesucristojiniji
(Mt 3.11-12; Mr 1.7-8; Lc 3.15-17)

¹⁹ Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijinijinioori quiquiaarijuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujiunia Elías soj? ¿Quiaa jiyoteeri samiitarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujiunia, nooj tariucuacaanu sequesaaquiaari niriqianotej?

Juanri saaja nojori riucuaaree:

—Maja.

²² Cuno pueyari socua na sequeree:

—Canaa quia pahuatareja, ¿cante quiajaniyani? Canaacua saniniuujia canaa camarucua pahuatasuhanijia.

²³ Juanri saaja naa nojori riucuaaree:

—Janiyacuajaari nooni, cariiquia jiyajinia nacajatej, taa supuetana Isaías juhuacarjia naajiotaquiaari janiyajinijicujani: “¡Jiyaniijiaacuaji nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiaquiri Cristo, Elíasjuhuaj, cuno tariucuacaanu sequesaaquiaari niriqiano Pueyaso sequenu panishano caminiujiuniatej, ¿casaara pueya quia tiuquinijia moojiniacuaraarini?

²⁶ Juanri nojori riucuaaree:

—Janiyari nareja moojina tiuquinijia pueyani. Saniniuujia, tamonuuri niya quia, nia niishiyaquishoojua. ²⁷ Nojuajaari cua nuhuaji niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jyanishano tiacajinia, Jordán moo taquijiria, tee cuniqui Juan tiuquinijioriquiaa moojina pueyacuajani.

Jesu juhua Pueyaso borregoniojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niqiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaa-nura! ³⁰ Janiyacuajaari nojuajiniji nia pahuatajani janiya jaara nia sequejani: “Cua nuhuaji niniutianiyaari Jiyaniijiajanaa cutara. Nojuajaari tari rishijia cucuaji cua quiaquishacarijia”. ³¹ Janiyari na niishiyaquijiajuhuaj, cante nojuajani. Naajaa,

janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuj:

—Janiyari Pueyaso Sohuanu niquiriucuaani jiyocuacaanuji roseyano nocua juhua mococoonu. Nocua tiuushiiri. ³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanocua roseyano, nocua na tiuuniuria, quiocua niishiri, cunocujaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajini cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniuujia nia pohnuataani pueyanaa, jnojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohnuatasano

³⁵ Tariqui, Tiuquinijiona Juanri tii quishiiquiuhua caapiqui na pueyata. Janiyari niquiriyatu cuno caapiqui pueyanojinijinio quiriquiaani. ³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—jNia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷ Naa canaa tojishacari Juan sequesantej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Caaa nia paniani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaaree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

⁴⁰ Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jitiiaja. Na sesaari quijia Simón Pedro.

⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriatasacari, na sequereeri:

—jCua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarosocoriquianotej!

⁴² Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaaajinia, nioori sequeya Pedro. Pedroori saniniuujia pueyano rupaaajinia sequeya “Saajia”.

Jesu saquiriojosacari Felipe, Natanaelnio

⁴³ Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrotu cuno tiacajinijinio quiquiaarijuhuaj. ⁴⁵ Na nuhuaji, Felipeeri Natanael pajeree. Na riuriatasacari, na sequereeri:

—jCanaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso sequesano caminiuujinuaa pueyari nojuajiniji naajionuutaquiaarijuhuaj. jNojuajaari Nazaret tiacajinijinio Jesu, José niyanu!

⁴⁶ Natanaelri saa riucuaareejaa:

—¡Jaj! ¿Na naatate maninia miijia pueyano supuenujuaara cuno sesa miijia Nazaret tiacajiniji?

Felipeeri na sequeree saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquihuacuajinio supuenojuanaa cutara. Majaari na niishiniu sapojonu.

⁴⁸ Natanaelri na sequeree:

—¿Taa quia niishiya janiyarini?

Jesuuri na riucuaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyani-ijiaranojuhuaj!

⁵⁰ Jesuuri na sequeree:

—¿Quiaateeri cucua tiuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niqiniutianiya cutara.

⁵¹ Jesuuri cuniqui quiniaa pueya sequereejuhuj:

—Seetanujuanaa nia sequeyanijia, niaari jiya cajiniocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaa-juhuaj. ² Jesuuri na saquiriojosano pueyata masuusaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj.

³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. ⁴ Jesuuri na nucua riucuaaree saaja:

—Maajiniaa, ¿casaara quia sequeya janiyani? Juhuanajuaja maja cua poonijosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

⁶ Tii cajitiuriquiaari seis conatu, saajajiniji quejasano. Canaa Judiocuacaari sequeyarucua shuquiriojua tijinia nojori tiuquishacariuhua, juhua jeequesano nojori quiniuria Pueyaso niqiara. Nojori mohuaca cajitiacojua quiquiaari cuno conaa. Jiyanojua puereetucocua quijiaari. Cuno conatuuri setenta tumococua mishaja mohuacata mishinishano quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecacosee.

⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca

mishinijioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereeri:

—Pueyaruhatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua ratusanoni, cunoori socua maniniuniacu vino coteenu quia raato-jotesanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapueyocuacata-juhuaj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niqutiojonaa Pueyaso Secojoua tiajiniji
(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. ¹⁴ Na tiuquishacari, Pueyaso Secojoua tiajinia quiaamaari. Tii niquishii pueyari juyaca niqutiojiyano Pueyasooacara puecoosocoriquiano, borregohua, noseyanio. Pueyari tii na juhuacutucujinia cajituriquiaa-juhuaj, pueya na tacatojonura taucuaca cumaneeca, Pueyaso Secojoua tiajinia niqutiojosocoriquiano cumaneecara. ¹⁵ Naa na niquishacari pueya miyano Pueyaso Secojoua tiajinatej, Jesuuri seya morojotaja jiyocua tatucuaaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaanio. Cumaneeca rerecojoree jiyocuaara juhuacutucujinijiiri. Naajuhuj, cumaneeca juhuacutucua caponeetareeri. Pojotaariquiaacuaari. ¹⁶ Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquiini, seetanujuanaa tariucuacaanu Pueyaso Rupaajinia naa naajiotasanoori quiya:
“Quia tiaacua juaatishaaree jiyanojuanijia, jiyanohua cua panishacari quia tia”.

¹⁸ Naa Jesu miiniuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqitiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹ Jesuuri nojori riucuaaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

²⁰ Narta Judiocuaca camarucuaari na riucuaaree:

—¡Cuarenta y seis marijaari shoconujuquiaari pueya tucuatnura nio secojoua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari.

²² Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na

miiijosano niquiquiaari. Naaratej, queraatia pueyari nocua tiuuquiaari. ²⁴ Naajaa, majaari Jesu tiuuniu quiriqiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. ²⁵ Tamonu pahuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuajinijinio quijia, Fariseocuaca maanujinijiniojuhuaj. Tojishano pueyano. ² Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³ Jesuuri Nicodemo sequeree:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiiitianura nojuaja.

⁴ Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

⁵ Jesuuri na riucuaaree:

—Seetanujuanaari cua sequesano. Cua tojiri. Paari coteenu rasaquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiiitiasanoniyojua na quiniu quiniutianiya.

⁶ Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷ Naaratej, majaari quia shiriiquiniu puera, naa cua sequenuucua quiajaniyatej, quiaa cuaara rasuhua, seetanujuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaaaniuhua. Naajaariuhua, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuahuaj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucuaaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujuanaa pahuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pahuatasacari niajaniya seetanu rupaajanaa. ¹² Niaa jaara saaja cuaracashitiquiaa cua pahuatasano mijiria casaajiniji, ¿niaatucua taa niishiriquiani, janiya jaara nia pahuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquinia pueyari naatacoquiaariuhua. Naajuhua, janiyari macaacua nujuaretasocoriquianoni. ¹⁵ Naacujitij, puetunu cucua tiuuniaajanaari pueyaracaanu quijiaa quiniutianiya.

Pueyasoori puetunu mijiria quiniaa pueyajanaa panijia

¹⁶ Jiyano hua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ 'Cante cucua tiuujiani, majaari na saniitosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niqiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitosaanutaniya. ²⁰ Puetunu sesa miijiacajanaari cua niqiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaa cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijiosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niqiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiquianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojiya tiuquinijiosano nojori quiniuria.

²⁷ Tiuquinijiona Juanri nojori riucuaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajaniyacuaajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹ Pueyano rupuena jaara camiya necocuara, quiarijia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhuj, janiyari cunora shuquiriaatia quiarijia quiyani pueya rupuesacari Jesucristo. ³⁰ Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuuara carteera janiya, Cristoocua nojori pacunura saniniuujia, nojori tojiniuria nojuaja. ³¹ Cante jiyocuaaanuji niqiaaricuajani, nojuajaari Jiyaniijiajanaa cutara. Janiyari saaja mijiria quiniiani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuaaanuji ninio cutara. Nojuajaari Jiyaniijiajanaa. ³² Naacujitij, na pohuatasanoori tama na niquishanojuaja jiyocuaaanu, na tojishanonio. Pueyari na pohuatasano cuaracashitiquiaa saaja. ³³ Canapute Jesucristo pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴ Pueyasoori jiyano hua queraatia na Sohanu niqutioquiaari na Jiyarosano. Naacujitij, seetanu Pueyaso rupaajanaa pohuataari. ³⁵ Pueyasoori jiyano hua panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. ³⁶ Canapute

Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapueete Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocojosacari Samaria jiyajinijinio maajitia

¹ Fariseocuacaari pohuatasaaquiaari, jyanohua queraatia pueya Jesuucua quiojiya na tojitiana nojori quiniuria. Nojoriiri pohuatasaaquiaarijuhuj, Jesuuri socua queraatia pueya tiuquinijiya Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriquiaani.

⁵ Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niquitiosano nojuaja. ⁶ Cuno cuhuariquiajia quiriquiaari cuari, supuetana Jacobo juutiasano tariucuaaanu. Pueyaracaanu Jesu rucuanenuucua nucumaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaa cana miaquesocoriquiano cana masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitia-nura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quia-janiyani? Quiaacuajaari Judio.

Cuno maajiiri naa sequeree Jesutej, na niishiniuucua Judiocuacacuajaari maja na niquiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiidiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹ Maajiiri na sequeree:

—Jiyaniijianaa, majaari quenaaja quia jitianu casaa, mohuaca quia taquiriatajara. Nio cuariiri jyanohua tucuaa. ¿Quiaatucua teje taquitiare cuno mohuacani, pueya samiitianijiani? ¹² ¿Quiaateeri jiyaniijiajanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyano.

¹³ Jesuuri na riucuarere miriqui:

—Puetunu nio cuarijiniji ratujuacajanaari saaja jiyamuecoquiaa. ¹⁴ Saniniuujia, cante cua mohuaca ratunutaniyani, majaari socua na jiyamuenu quiniutianihua. Cua mohuacaari juhua samo naca pacartanutaniya pueyaracaanu noojiajia, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¡Pueyanonaa, cuno mohuaca cua niquitiore cua ratusocoriquiano, maja socua cua jiyamuenura, naajuhuj, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequeco coteenu.

¹⁷ Maajiiri na riucuarere:

—¿Janiyate niyacaracajaarani, quiaa jaara naa cua sequere?
Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. ¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarjia quiata quiyani, majaari quia niyacajuhuj.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijianaa, ¡quiaaqui Pueyaso sequenu panishano caminiujiunia! ²⁰ Canaa supuetanaa pueyari niya nio tuhananuucua Pueyaso secojonuuja tarijia. Nia-janiya saniniujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹ Jesuuri na riuucaree:

—Seetanujuanaa quia sequereera maajinia. Cua sequesanoocua quia tiurii. Quera quiniutianiyari Pueyaso nia secojosacari puetunu tiquiyocua nia quishacarijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhuj, taa quia sequereecujani. ²² Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana cana secojoquiaani. Pueyasocuajaari canaa Judiocuaca supuetanaa niishitioquiaari pueyacuaji Tacunaari supenutaniya tama cana Judiocuacajiniujuaaja. ²³ Quiarjia cutara, cante seetanujuanaa Pueyaso shuquiritiajani, nojoriiri na Que Pueyaso secojonutaniya puetunu nojiatajanaa, seetanujuanaa na tojijaca nojori quishacari. Pueyasoori naa paniya pueya secojonura nojuaja, cante na secojonuujuacacujani. ²⁴ Pueyasoori sohanu. Naaratej, cante Pueyaso shuqiritiniu panijacani, nojori cuara secojoora Pueyaso puetunu nojiatajanaa, Pueyaso Sohanu tojijaca nojori quishacari.

²⁵ Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini cana niquishacari Jesu pocoojiyano cuno maajitia. Majaari quenaaja cana nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

³² Jesuuri saaja cana sequeree:

—Janiyacuaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui cana sequeree:

—Cua miishacari cua Jiyarona panishano, cunoori cua miaquesano, naajuhuj, cua tucatasacari na panishano. ³⁵ Niaari sequequiaa: “Cuara shocojoraara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatate

maninia nia niquniuria. Nataacuacacuja tari noshiquia, carojotasocoriquiano. ³⁶ Na carojotanaari na poonijionu sami niqutioshiya. Na carojotasanoori pueyara-caanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. ³⁸ Janiyari saniniuujia nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinioori Jesuucua tiuquuaari, nojori to-jishacari naa cuno maaji sequesantej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquuijoquiaari, nojoriiri na masuquuaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinioori Jesuucua tiuquuaari, nojorijanaa jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canaacujaari tama canaa numaatajaaja tojirii na pohuatasani. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quinia pueyajanaano.

Jesu naatanishacari jiyaniiija Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataaree Galilea jiyajiniara. ⁴⁴ Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujiuniaari maja tojishano quijia tama na jiyajiniajaaja’”. ⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaari-iri tamonu pueyano, Galilea jiya jiyaniiija jiyatesano camarnura. Cuno pueyano niyanuuri jiyanohua cusosu matariquiaa. ⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeeri:

—¡Jiyaniijanaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucuaaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

⁴⁹ Cuno camarnuuri saaja Jesu sequeree:

—¡Jiyaniijanaa, mijijiaj, jati pa quiaare cua tiajinia, quiyanu cusoyaquishacarijia!

⁵⁰ Jesuuri na sequeree:

—Quia quiaarohua. Quia niyanucuja tari naatarohua.

Cuno camarnuuri Jesu sequesanoocua tiuuri. Quiaarohuari. ⁵¹ Jiyacari na tiajinia, na seyari niqiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riucuaaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiurii, puetunu neco-huatajanaanio.

⁵⁴ Judea jiyajiniji Jesu tiuquishacariuhuaaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj. ² Jerusalén tiacaari puetunujuanaa puereetuuca sohuacajiniacuma quiya. Tohuateyacaari quiya tiuquiti-ajara. Tamonu tohuateya sesa quiquiaari “Borregohua tiuquiti-ajara”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco. ³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariojuarujuri, shipiiniquiujuunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojua-jaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajuhuaaj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishiriijaariuhuaaj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuaaree:

—¿Cantucua cua naacure cuarijinia cua rosenurani, mohuaca jaara queyaquetesaare-cuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujuaj!

¹¹ Cusosu naatanohuari nojori riucuaaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuaareeri:

—Johuaaj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacua-jitij, Jesuuri ritia tajiniocuareequiaari pueya tajinia, na naatanishano pueyanoocuaji.

¹⁴ Na nuhuaji, Jesuuri na riuriataquiaari cuno juucaja Pueyaso Secojua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miinihuara socua, quiaa mariqui socua taraatia miiriiri.

¹⁵ Naacujitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiyajaacuhuj.

¹⁸ Naa Jesu sequesacari nojoritij, narta Judiocuaca camarucuaari jiyanoehua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanoehua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiqutiuniutianiya. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacujani. ²² Cua Queeri maja na nequesoreenu quiniutianiya pueya. Nojuacuajaari tari cua niquitiocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

²⁴ 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutaniyari juhua macunucua quijiaca samiitiacosacari. Seetanujuanaa quiarijiaari, juhua macunucua quijiacaari cua rupaa tojitianutaniya. Cua rupaa tojitiajacaari samiitiaconutaniya, pueyaracaanu rishijia nojori quiniuria. ²⁶ Cua Queeri quiijajuhuanajaj. Majaari na naata shaajenu. Nojuajaari naa quijiara cua jiyatequiaarijuhuj, juhua nojuarajuhuj. Naacujitij, cua naata pueya jiyatenu naa quijarajuhuj. ²⁷ Pueyanora cua quiniuucua, na cumaaca cua niquitioreeri cuarta pueya cua nequesoreenura, nojori cua saniitionurajuhuj. ²⁸ Cua tojitiare. Majaari nio sequesanoocujani nia shiriiquiniu. Tamacari, puetunu macunucujanaari cua rupaa tojitiuniutianiya. ²⁹ Macunucua tojitiushacari cua rupaa, nojoriiri samiitiaconutaniya, na jamacajiniji nojori tohareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa miijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijajanaa na quiniuucua, Jesu tama nojuajiniji pohuataajaaja

³⁰ 'Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa miijiaca juaaquiaacujani, saaja cua Que niishitishacari janiya, nojori miishanoori sesa. Tama cua panishanojuaaja miyashijia cua quiniuucua, janiyari namitiajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijiaaja pohuataa narta pueyano,

na pohuatasanoocua maja tiuushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaja maara najuhuana quiriquiaj. ³² Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishiyani nia pohuatasano janiyajinijiiri maja najuhanaj.

³³ 'Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijiaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiqianu na pohuatasano. ³⁶ Tiuquinijiona Juan pohuatasano janiyajinijiiri seetanujuanaa. Niaa jaara na pohuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaa quiri, niaari naa pueyaracaanu quiijara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninu paniaquiquiaa cua jiyatenura niajaniya pueyaracaanu quijiacara cutara.

⁴¹ 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaa, nia paniaquishacari nojuaja. ⁴³ Cua Quecuajaari cua jiyaroquiaari cua niishitiojonura niajaniya nojuajiniji. Quiarijiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosadora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jiyaniyu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijiaa nia quiniucua. Niaari jiyaniya niaa Pueyaso muerasu, juhua Moisés tojijiaa nia quishacari. ¿Niaateeri seetanujuanaa Moisés tojijiaa? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiurijiuhuaj. ⁴⁷ Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuanii?

6

*Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)*

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanoohua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquioco. ³ Canaa shiitiasacari caminia taquijiria, Jesuuri

canaa tacatamaa tuhananuucua. Tii cajitiasee canaari. ⁴ Jiyacaritij, quera Pascuara queranacusacariiri quiriquiaa. ⁵ Jesu niquishacari jiyanoehua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. ⁷ Felipeeri na riucuaaree:

—¡Paa jaara cumaneeeca jiitiare doscientos juuca pa poonijosanojiniji pan pa masetajarani, cuno maara najuhuana secaja quiri puetunu nojoririjanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu sequeeseeri:

⁹ —Jiyaniijanaa, caya samijia niya cinco pan jiitaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰ Jesuuri saaja canaa na saquiriojosano pueya sequereeri:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajituijia. Naaratej, pueyari cajitiurii. Puetunu cuno pueya maanujinijinojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajituiyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhuaaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiaajanaa nia reraterohua, maja najuhuana na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. ¹⁴ Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujiunia, nooj, tariucuacaanu sequesaaquiaari pocua niriqianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jyaconaja tuhananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriojosano pueyani, canaari rose-taarohua caminiajinarani. ¹⁷ Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhuanojuaja canaacua. ¹⁸ Tari canaa niuti-asacari, paratuuri jiyanoehua piyarojoriquiaa. Caminiaari cunora jiyanoehua cajiniucuariquiaa. ¹⁹ Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquitiurii jiyanoehuanani! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacujanijia!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitiriquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa

cutara canaata. ²³ Jiyacaritij, Tiberias tiacajiniji boteeri tiuquiiioquiaari catecaja nojorijiniji, tee Jesu mianuutequiaari nojoricuajani. ²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuaaj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua poojia miaquesano

²⁵ Cuno pojori tiuquiiiosacari caminia taquijiria, Jesu riuriatatuseri. Na nequesotatureeri:

—Niishitiojonanaa, ¿taacari quia niyarohuacuarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mianuutesacari niajaniya. ²⁷ Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

²⁸ Cuno pueyari Jesu nequesotaree:

—¿Casaa canaa miiniutianiya Pueyaso panishano canaa miiniuria, Pueyaso shuquiritiasano canaa quiniuriajuhuaj?

²⁹ Jesuuri nojori riucuaaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niquitiniutianiya canaa tiuniuria quiocuani? ³¹ Canaa quia niquitiricuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacaanuji pan tiquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuacaanu Pueyaso Rupaajinia: “Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Pueyaso jiyarosano quiquiaari.

³² Jesuuri nojori riucuaaree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarjia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno, Pueyaso niquitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeree:

—¡Jiyaniijianaa, quiocua pueyaracaanu canaa niquitioriquia cuno pan!

³⁵ Jesuuri nojori sequeree:

—Janiyacujaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijiaanihuaj, majaari na jiyamuenu quiniutianiyajuhuaaj. ³⁶ Taa cua sequeree tari niajanuyacuajani, niaari juucua cua niquiya. Majaari quenaaja cucua nia tiuuniu. ³⁷ Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua roseno quiquiaari cua

miiniuria tama cua miiniu panishanojuaaja. Mijiria niquiaarinijia saaja cua Que panishano cua miiniuria, cante cua jiyaroquiaaricujani. ³⁹ Majaari cua Jiyarona paniniu cua juurequetenura quenaaja niquiriyatujua na niquitiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuete cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucujaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucujaja! ¡Maja nia juaaquiону! ⁴⁴ Pueyanoori maja na naata tiuuniu cucua tamajaaja, cua Que jaara noojiajinia poonijiaquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuaaanu pueyara Pueyaso sequesano caminiujiunia naajiotasanocujajaari naa sequeya:

“Pueyasocujajaari puetunu nojorijianaa niishitiojonutaniya”.

Naacuajitij, cante cua Que niishitiojosano tojijia seetanujuanaani, nojuajaari cucua tiuya.

⁴⁶ Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricujani. ⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiaara jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. ⁵⁰ Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niquitionutaniya puetunu mijiria quiniaa pueyacuaraajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa sequetooree tamajaaja na juaanuitia:

—¿Nio pueyanotucua taa miaquetere tama na cuaqueyajaaja pajaniyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijiaca nia quiniuria. ⁵⁴ Cante cua shu miaquereeni, cante cua nanacaturatejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuaa jiya puequesacarini.

⁵⁵ Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojuatiajinia Capernaum tiacajinia.

Queraatia Jesu nuhuajinia pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajinia pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaarajaanijia?

⁶¹ Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? ⁶² ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricuajani? ⁶³ Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaniya. ⁶⁴ Noojiaqueya niajanijajiniinooori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeree socua cuno pojoriiri:

—Janiyacujaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶ Jiyacaritij, queraatia Jesu nuhuajinia pueyari na cartequiaari. Nojoriiri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajanijariuhuj, niaateeri cua cartenutaniyajacuahuaj?

⁶⁸ Simón Pedroori Jesu riucuaaree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasano cuajaari na naata canaa jataniniu pueyaracaanu rishijia canaa quiniuria. ⁶⁹ Canaacujaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacujaari tama cua saquiriojosano doce pueyajaaja. Saniniuujia, niquiriyatu niajanijajiniinooori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajiniinoo Jesu doce saquiriojosano pueyajiniinoo quiquiaari. Naajaa, tama na Jiyaniijiajaaja tacartariquiano quiriquiaaquiiri.

7

Tama Jesu tapueyocucajaaja Jesuucua tiuyashijia quiquiaari

¹ Na nuhuaji, Jesuuri Galilea jiyajinia rucuanajiquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujinia nojori quishacari. Naa miituuquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijia quiquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocucajaari naa Jesu sequeturee nojori macaatinuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niqiniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohujaa miijiore na cumaacatani? Naatej, taa niya

quia miiijioquiaa quia cumaacatacuaani, naa quia miiijiosee puetunu pueya niquiara-janaa Jerusalén tiacajiniajuhuaj.

⁵ Majaari quenaaja tapueyocuaca tiuuniu quijia Jesuucua. Cunora naa na seque-
tureeri. ⁶ Jesuuri saaja nojori riucuaaree:

—Juhuanajuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej. ⁷ Niarta mijiria quijiaca pueyari maja na naata juaaniu niajaniya. Janiya cutaraari nojori niquniu paniyaquishooni. Cua niqutiuniu paniyaquiquiaari, nojori cua niishitishacari nojori miishanoori sesa. ⁸ Nia quiojiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijiaari cua miiniuria taa nia sequeree janiyacuajani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

¹³ Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojoua tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya puer-
aarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuaajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaja. ¹⁸ Cante tama na niishiriojosanojuaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuujia, cante na jiyarona niishitiojosano pahuataa pueyani, pueya tojiniuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojoua.

¹⁹ ¿Niaateeri seetanujuanaa supuetana Moisés Rootasano tojitiajaca? Majaruhua. Majaari quenaaja niquiriyatu niajanijajinijinio na rootasano tojjia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riucuaaturee na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequeretoj!

²¹ Jesuuri nojori sequeree:

—Puetunu niajanijajanaari shiriiquitiuquianu samaatenu juuca cua miishacari niquiriyatu casaaniyujua cua cumaacata. ²² Supuetana Moisés cuajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaja.

Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuquia co miatejoquiaa. ²³ Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuaana pueya juaariiri na miishano jaara sesa quiyaquiri.

Jesu pohuatasacari tama nojuajinijiaaja

²⁵ Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriqianotej? ²⁶ ¿Taateni? Noocujaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariqianotej? ²⁷ Paacuaajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojuaajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuaaj, tejenote janiyani? Naa-jaa, majaari cua niniu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhuanajaj. Nojuajaari nia niishishoo. ²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiaari, juhuanajuaja na monu juuca quiyaquishacarijia. ³¹ Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua rojotooquiaari. Na nuhuaji, nojoriiri Pueyaso Secojojua tia cojuanaa pueya jiyaramiquiuciaari Pueyaso Secojojua tiajiniara, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiya. Na nuhuaji, janiyari cua Jiyaron-aacua riujiuuniutianihuani. ³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhuaaj? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii niishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pohuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiuara. Jiyano hua na rupaa paaretareeri. Naa sequereeri:

—¿Cante jiyamueyani, nojuaja cuaara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanujuaja maja na quiniu quiriquiaa mijiria, Jesu tacaquishacarijia Jiyaniijiajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatioosacari Jesuucua

⁴⁰ Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijiniori sequeree:

—¿Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaaquiaari pocua niriqiuantej!

⁴¹ Tamasacaari saniniuujia naa sequeriquiaacujua:

—¿Nojuacuajaari Cristo, Pueyaso Jiyarosano pocua!

Tamasacaari saaja nojori riucuaaree:

—¿Cristoteeri Galilea jiyajiniji supenutaniya? ¡Maja! ⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niqiuohuajiniji supenutaniya. Belén tiacajinia rasaanutaniyari, supuetana David tiacajinia.

⁴³ Naacuajitij, puetunu pueyajanaari Jesuucua juayonuutaquiaari. ⁴⁴ Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojouja tia cojuanaa pueyari Jesu tojitiariquiaa juhujaniya. Na nuhuaji, socua quiojiyarohuari na jiyaramiquiniaa pueyacu. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucuaaree:

—¿Majaari quenaaja tamonu pueyano pocuanu juhua cuno pueyanojua, seetanu rupaajanaa pohuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhuaaj? ⁴⁸ ¿Tamonu pa camarucujinijiniote nocua tiuurii, canaa Fariseocuacajinijiojuhuaaj? ¡Maja! ⁴⁹ ¿Cuno pojori Jesuucua tiuujiacani, nojoriiri Moisés Rootasano niishiyashijaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niqiuari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moisés cuajaari pa rootaquiaari maja najuhuaana pa sesacuanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanojuhuaaj? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujiunia pueyano supenu quiniutaniya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojiyarohua.

8

Jesu jiyanooshacari maaji

¹ Jesuuri saniniuujia Olivo cuhuariquiajinia quiaaree. ² Jesuuri tariquicuaji tiuquiri-ohua Pueyaso Secojojua tiajinia. Canaari nata quiriquiaajuhua. Pueyari nocua rerejoquiaari. Nojuajaari cajirii pueya na niishitiojonura juucua.

³ Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuratasaaquiaari numuetucushiyano. Nojoriiri cuno maaji nuuatere pueya tajoji. ⁴ Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. ⁵ Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijarijataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajiniote sesa miyashijiani, nojuaja cuaara na coteetaara janu.

⁸ Jesuuri jojorohuacuhua socua na naajionura jiyacua. ⁹ Cuno pojori tojishacari naa Jesu sequesantej, puetunujuanaari sanaa quiojorohua. Juhuacatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateequee cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajanijia saitia?

¹¹ Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequereeri:

—Janijari quia jiyanoa cutarani. Juhuajanijia quia quiaarohua. Majaari sesa quia miiniu socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janijari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³ Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajini pihuataa! ¡Puetunu quia pahuatasanojuanaari maja tojishano!

¹⁴ Jesuuri nojori riucuaaree:

—Tama cua cuaqueyajiniijiaaja cua pahuatasacari, cunoori maja najuhuaana pahuatasano. Cua pahuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhua. Niaari saniniuujia niishiyaquiyacujua teje cua niquiaarini, tee cua quianutaniuhua. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijiuhuaj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa miijia cutarani, cua sequesano cutaraari seetanujuanaa, niquiriyatujua cua quiaquishacari. Cua Jiyarona cua Quecuajaari cua cojqiaa cuata na juaaniuria sesa miijia. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pahuatasano jaara juhua tarajanu pahuatasano

quirijihuaj, cuno cutaraari seetanjuanaa”. ¹⁸ Naajuhuj, canaari caapiquini. Tama cua cuaqueyajaaja cua pohuatasacari, cunoori seetanjuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijihuaj.

²⁰ Jesuuri puetunu nio pohuatariquiaajanaa Pueyasora niqutiojosano cumaneeca racataja shuriucujaj, Pueyaso Secojoua tiajinia. Naajaa, majaari pueya quianu quiri-quinioj, juhuanouaja na monu juuca quiyaquishacarijia.

Jesuucua tiuyashijiacaari jiyanoyaquishaanutaniya

²¹ Jesuuri cuno Fariseocuaca sequerohuacuhuj:

—Janiyari quianutaniyani. Niaari cua pajenuunutaniya juucua. Niaari cusonu-unutaniya sesa miijiacaja, jiyanooshoo nia quishacarijia, cucua nia tiuyaquiniucua. Naaratej, majaari nia naata quianu quiniutianiya tee cua quianutaniyacuaani.

²² Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequerecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

²³ Jesuuri nojori sequeree:

—Niaari ninishiqui quiquojinijinio. Janiya cutaraari jiyocuacaanujinijinioni. Niaari saaja mijiria quijiaca. Janiya cutaraari maja niiquijinioni. ²⁴ Janiyacuajaari cunora nia sequereeni, niaari jiyanooshoojua cusonuunutaniya nia cuaracashitiniucua janiyari maja Pueyaso Niyanuni, taa cua sequequiaa nijaniyacujani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucuaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queraatia jiiitiaajaa cua sequesocoriquiano nijaniyani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanjuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanjuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. ²⁸ Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuj, majaari tama cua niishiriojosanojuaaja cua miiniu quiija. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuunias narta Judiocuaca sequeree:

—Niaa jaara seetanjuanaa cua pohuatasano tojijiaca quiri pueyaracaanu, niaari cua pueya quiniutianiya. ³² Niaa jaara naa miiritij, niaari seetanu rupaaajanaa niishijiaca quiniutianiya. Naacuajitij, niaari seetanjuanaa juhua cartesano pueya quiniutianiya, juhujaniya quijiaca nia quiniuria.

³³ Narta Judiocuacaari Jesu riucuaaree:

—Canaacuajaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia miijia na quiniu. ³⁵ Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhua, janiya jaara nia jaari-uutiare nia poonijotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijiaa quiricuara, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaa taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanajuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua niniu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaquiya. ⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojoujaari. Na sapojosacari, naa miyari sapojouja na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaaji niaari naa sapojonuujuacajuhua. ⁴⁵ Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojiyaquiya, na muerasu nia quiyaquishacari.

Jesuucristoori tariucuacaanu quijiajuhanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiri maninia sequeriquiaa quiajaniyajinijini, quiaari Samaria jiyajinijinio tahue, samaruraca pueyanotuhua!

⁴⁹ Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaani naa nia sesacasacari janiya. Tamonu cutaraari quiya, nojuajaari paniya pueya tojiniuria

janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanija, cante cua rupaa tojijiani, nojoriiri maja na shaajenu quiniutianiya.

⁵² Narta Judiocuacaari na sequere:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniuujia quiarjia sequeyacuaja: “Cante cua rupaa tojijiani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijuhuj. ¿Can-teeri quiajaniyani naa quia sequenuratej?

⁵⁴ Jesuuri nojori riucuaare:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵ Niaari seetanujuanaa na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojijiani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jiyanojua timiquiaariiri.

⁵⁷ Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanojuaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucuaare:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaaji jamaarii saaja. Pueyaso Secojoua tiajiniji tohuatamaari.

9

Jesu jecasacari cariojuaru namijia, naa rasanojuhanajaj

¹ Tamacari Jesu rucuanesacari canaata, canaari cariojuaru pueyano niquiriini, naa rasanojuhanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariojuaruni, na queya miiniuucua sesatee, tama sesa na miiniuucuaajaaja soj?

³ Jesuuri canaa riucuaare:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeeCasaare niquijiara na quiniuria. ⁴ Juuca quishacarijia, pa tucuatere miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariojuaru namijiaacuaari. ⁷ Cariojuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariojuaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquiri-ohua. ⁸ Cariojuaru na quishacarijia, nojuajaari na miajajau na masetajara cumaneeca

mashiniquijiojua quiquiaari. Puetunu pueyajanaari na niqutiujia naa na mashiniquijiosacari. Naacuaajitij, nojuaja jaara niquijiara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijaaja:

—¿Cante cuno pueyanojaarani? ¿Majate noocuaaja tarijia cumaneeca mashiniquijiojuatej?

⁹ Noojiaqueya pueyari sequeree:

—¡Taaquiririnij, nojuajacuj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuj, majaari seetanujuanaa nojuaja.

Tarijia quijia cariojuaruuri saa sequereejaa:

—Taaquiririnij, janiyacuaaquinatejaj.

¹⁰ Naaratej, pueyari na nequesotaree:

—¡Quiaacuaaja cariojuaru quijiaruhua! ¿Taa niquijiara quia quiriohuarini?

¹¹ Nojuajaari pueya riucuaaree:

—Cuno, Jesu jiyaniushano pueyanoni, nojuajaari mara coniquioree cucuara. Cua namijiaacua na rupoaruari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, jjaniyari niquijiara quiquiini!

¹² Pueyari na nequesotaree:

—¿Teeteeri quia namijia jeezana pueyanoni?

Nojori riucuaareeri:

—Johuaj. Maja cua niishiniu.

Fariseocuaca nequesoreesacari na namijia jeeacasano pueyano

¹³ Pueyari Fariseocuacaacua jiyataaree Jesu jeeacasano cariojuaru pueyano. ¹⁴ Jesu jaara mara coniquioquiaari na jeeanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaaji Fariseocuacaari tarijia cariojuaru quijia nequesotaree taa niquijiara na quiiriini. Nojuajaari nojori riucuaaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuaajitij, janiyari quiarjia niquijia quiyani.

¹⁶ Noojiaqueya cuno Fariseocuacajinjinioori saa sequereejaa:

—Cuno pueyano, nio pueyano namijia jeeacarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacat-acuaraarini?

Naa nojori juayonuutanuucuatej, nojoriiri juhua raqutiirii. ¹⁷ Nocuaaji tarijia quijia cariojuaru nequesotaturuhuarihuaj:

—Niquijia quia quishacari quiarjia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucuaaree:

—Janiyara, nojuajaari Pueyaso sequesano caminiujiunia.

¹⁸ Tii quiniaa Judiocuacaari na cuaracashitirii saaja. Nojoriiri jyaniquiaari maja naasucua seetanujuanaa cariojuaru cuno pueyano quiniu quijia. Nocuaaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariojuaru rasanohuanani? ¿Taa quiarjia niquijiara na quiriohuarini?

²⁰ Na queyari cuno nojori riucuaaree:

—Taaquiriirini, nojuacuaaquiniateja canaa niyanujuaj. Naa cariyujuaru rasaaquiaariiri. ²¹ Majaari canaa niishiniu cutara taa na quiriohua niquijjarani. Majaari canaa niishiniujuhuaj, cante na namijia jeecarucuaani. Nojuaja nia nequesotare, tari cumantumacacuaja. Nojuajanaa cuara nia pohuataara cutara.

²² Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuara tenujusaaria maja Pueyaso secojojua tiajinia na tiuquiniuria socua”. ²³ Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeecasano pueyano. Nojoricua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jeecasano pueyanoori nojori riucuaaree:

—Naajaa, jaara sesa miijia quiri, jaara maninia miijia quirijiuhuaaj, maja cua niishiniu cuno. Janiya cutaraari niishiyani, ¡janiyari tarijia niquiyashijia quiquiaarini! ¡Janiyari saniniuujia quiarijia niquijia quiya cutarani!

²⁶ Nojoriiri na nequesotarohuacuhuaaj:

—¿Taa na miiriucuaa quiajaniyajaarani, niquijia quia quiniuriani?

²⁷ Narta Judiocuaca camarucua sequeree saajaari:

—Janiyacuaja tari nia pohuatareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojijiacuaja! ¡Canaa cutaraari supuetana Moisés Rootasano tojtiajacani! ²⁹ ¡Canaa cutaraari niishiyani Pueyasojuanaari Moisés cua muetaquiaari na rootanura nojuaja! ¡Saniniuujia cuno pueyanoorijiatat, majaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucuaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! ³¹ ¡Paacuajaari niishiyani Pueyaso maja na tojiniu quijia sesa miijiacuacojoano! ¡Saaja na timitiajaca secojosano tojiya cutaraari, cante na panishano miiquiaacuajani! ³² ¡Majaari quenaaja pa tojiniu quijia tamonu pueyanojiniji, cante cariyujuaru namijia jeecajani, naa cariyujuaru rasanojuhanaj! ³³ Cuno pueyano jaara Pueyaso Jiyarosano quiyaquiri, ¿taa cua namijia na jeecarucuaacuaraarini?

³⁴ Cuno pojoriiri na juaaniutia na sequeturee:

—¡Quiaari sesa miijia rasaaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanusano pueyano quiquiaari narta Pueyaso timitiajaca pueyajiniji.

Jesu tojtiaashijiacu pueya juhua cariyujuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijjanaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequereee:

—Quiaacuaja na niquiyaruhua. Nojuajaari cunocuaja, quiata pocoojiyani.

³⁸ Jiyacaritij, pueyanoori Jesu cariquimiaji mojuquetaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequereee:

—Janiyari mijiria niquiaarini juhua cua raquiriojotanura mijiria quiniaa. Naacua-jitij, cante niishiyani nojuaja juhua cariyajuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariyajuara tari jiyatesaaree, cucua na tiyaquiniucua.

⁴⁰ Tii quiniaa Fariseocua jaara tojiqiaari naa Jesu sequesantej, nojoriiri Jesu sequereee:

—Naa quia sequesacaritij, ¿quiaateeri sequeya canaari cariyajuaru jurihuaj?

⁴¹ Jesuuri nojori riucuaaree:

—Niaa jaara tama nia cuaqueyajaaja jiyatere juhua cariyajuara cucua nia tiuuni-uria, Pueyaso maara nia jiyanoori. Quiarijiani, tama nia sequenucuajaaja, “Canaa niquijia cutarani”, niaari jiyanooshoojua nioojia nia tacatoyaquiniucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyaqui-jiani, nojuaja jaara tamocoji tiuquimia, cunoori nohuasejojua. ² Saniniuujia, cante tohuateyaco tiuquijia cutarani, cunoori borregohua camarujuanaa cutara. ³ Tohuateya cojuanaari tiotiu riataquiaa nocuaji. Borregohua camaruuri puetunu na seya sesaca-janaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainiji. ⁴ Puetunu na borregohujanaa jaara tohuareetama, na camaruuri na puetaja. Na seyari na nuhuaji sacuaaja, na camaru rupaa nojori niishishacari. ⁵ Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pohuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

Jesucristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasoocua. ⁸ Cante cua niyacarijia nijioquiaari coteenuni, nojoriiri sesa miijica quiquiaari, nohuasenujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuan, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyan, tii na quiniuria maninia cojuasano. Janiyari juuca na tohuatenutaniyan, jiyasocua cua miaquetenura carijiniacuma.

¹⁰ Nohuasejojuaari saaja tiuquijia borregohuacua na nohuasenuura, na puecoonura-juhuj. Naa na shaajaaja puetunujuanaari. Janiyari saniniuujia niquiaarini cua borregohua cua jiyatenura pueyaracaanu quijiacara, seetanujuanaa jiyanoohua shuquiri-aatia quijiacara nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari. ¹² Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniucua

na seyajanaa. Naacuaajitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niqutiosaanura.

¹⁴ Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuaaj, taa cua Que niishiya janiyacuaani, mariyata taa cua niishiya cua Quejaniuhuaaj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujinijinio. Janiyari nojori rijionutaniya niyarajuhuaaj. Nojoriiri cua tojitiariquiano. Naacuaajitij, puetunu cua borregohuajanaari jatiqui quiriquiano, niquiriyatu cojuanaracajuhuaaj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacarijaaja mosaanutaniyani, na nuhuaji cua samiitianuhuaara, pueyaracaanu quijia cua quiniuhuaara. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuaara cua cusonura. Janiyari cumaacaracajuhuaaj cua samiitianuhuaara. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijaaja Jesuucua. ²⁰ Queraatia pueyari jiyacari sequeree:

—¿Cuno pueyanoori samaruraca! ¡Maja na tojiniu, pueyanaa! ¡Najuhuaana pocuaano!

²¹ Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeezanu cariyojuaru namijijaara? ¡Maja na naata!

Judiocuaca camarucua niqiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhuaara. Jiyacariiri shuniya quiriquiaa. ²³ Jesuuri tii quiriquiaajuhuaaj. Pueyaso Secojoua tiajinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujuuuniuquiojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajanianiyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaaree:

—Janiyacuaaja tari nia sequecanuni. Niaari saaja na cuaracashitiquianu. Niaa cuara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiuyaquiquiaa cua borregohua maanujinijinio nia quiaquishacari. ²⁷ Cua borregohuari cua rupaa tojijia cutara. Janiyari nojori niishiya-jaaniuhuaaj. Nojoriiri cunora cua nuhuajiquiaa. ²⁸ Janiyari pueyaracaanu quijiaara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. ²⁹ Cua Queeri cua borregohua cua niqutioquiaari. Nojuajaari socua jyanohua cumaacaraca tamasaca cumaacaraca quijiacajiniji. Naacuaajitij, maja quenaaja tamonu naata cua borregohua jaariuutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijiorohuacuhuaaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoehua sesa! ¡Quiaacuajaari pueyano, juhua canaajuhuj!

³⁴ Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiiitaa. Pueyaso sequesanoori naa naajiotasano quiya tii:

“Janiyacujaari nia sequequiaarini, niaari pueyasohua”.

³⁵ Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuaanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaaracuajani. ³⁶ Naajuhuj, Pueyasocujaari cua saquiriojoquiaari mijiria na jiyarosocoriquiano. Naa Pueyasojuaanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaree sesani, cua sequesacari janiya Pueyaso Niyununi? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. ³⁸ Niaacuajaari cua Que cumaacata cua miishano niquiquiaa. Naa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

³⁹ Jiyacaritij, nojoriiri socua Jesu quiatunu paniriohuacuhuj. Jesuuri saaja nojoricuaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

⁴² Naacuajitij, queraatia pueyari Jesuucua tiuquiquiaari tii, tee canaa quiriquiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuuhuj.

² Lázaro rimiatu Maríani, nojuajaari noo maajicujaja Jesu niohuaca sacuanijiaquiaari na mucacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuhuaquiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cuno pueyano sequesanootej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiitiasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maniniuhuaqueetanutianiya, cua Que Pueyasojuhuj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuaajaari shusha naataja tii quia jacunu paniquianu. ¿Casaara socua tii quia quianu paniuhuariniuhuaaj?

⁹ Jesuuri canaa riucuaaree miriqui:

—Janiyara, juuca juhuanojuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefonura, paari maninia niquiya pocuajini. Majaari pa tiuriiniu. ¹⁰ Paa jaara ninishiqui rucuanefonura saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequere socua:

—Pa rupuena Lázaroori tari maquequee. Janiyari na niucujanuucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniacuajaqui. Naacuajiti paari niishiyani naatanutaniuhuacuajaqui. ¿Paatucua casaara najuhuaana nocua quiaareni?

¹³ Naa Jesu pohuatasacari canaa Lázarojinijitij, canaa sequeriquiaa juucuaari Lázaroo tari macu quiriquiaa. Canaari saniniuujia jiyaniriquiaani Jesu naasucuaari canaa pohuatariquiaa Lázaroo nareja maqueriquiaa. ¹⁴ Nocuaaji Jesuuri maatia canaa sequere:

—Lázaroo tari cusoyarucuaa. ¹⁵ Janiyari timiyani tii cua quiaquiniuucua Lázaroo quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriojosano pueya sequere:

—Pa Jiyaniijiatata pa quiaarejuhuaj, nata pa cojiritiasaanura puecoonu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷ Canaa jaara tiuquijioseequiarini, Jesuuri pohuatasaaquiaari Lázaroo tari cuatro juuca shocotejoriquiaa raaco na niasaanujiniji. ¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María ninu quiriquiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequesee:

—Jiyaniijianaa, ¡quiaa jaara niya quiquianu, cua nanu maara shaajeyaquiquianu!

²² Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequere:

—Quia nanucuaa samiitianutaniuhua.

²⁴ Martaari na riucuaare:

—Taaquiririnij, janiyacuaja niishiyani nojuajaari samiitianutaniuhua macunucua samiitiacosacariuhua jiya puequesacari.

²⁵ Jesuuri na sequere:

—Janiyacuajaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucuaare:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, nooj tariucuacaanu sequesaaquiaari mijiria niriqianotej.

²⁸ Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesantej, ritia sanequeeri. Jesuucua nimiaari tee canaa quiriqiaacuajani. ³⁰ Jesuuri juhuanajuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canacuajani, Jesuucua na nishacari. ³¹ Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojuquetaseeri. Naa na sequeereeri:

—Quiaa jaara niya quiquianu, cua nanu maara shaajeyaquiquianu.

³³ Jesu niquishacari María nujuqueyano, mariyata nata quiniaa nujuqueyanujuhuaj, Jesuuri nojori taraajetaree. ³⁴ Jesuuri pueya nequesotaree:

—¿Tee na niasaarucuaani?

Pueyari Jesu sequeeree:

—Miji, Jiyaniijianaa. Quia niquiquii. Niya niasaarucuaano.

³⁵ Jesuuri nujuquesee. ³⁶ Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanohua Lázaro panijiaquiiri.

³⁷ Noojiaqueya cuno pojorijinijinioori sequeriquiaajuhuj:

—Jesu jaara cariyujuaru namijia jeecacanucuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸ Jesuuri jiyanohua na taraajenuta raa jiyajiria catecanoquiaari, canaajuhuj. Raari puereetuuca saajiata mishiquiosano quiriqiaa. ³⁹ Jesuuri pueya sequeeree:

—¡Saajia nia ruutiniri tamocora!

Martaari Jesu sequeeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

⁴⁰ Jesuuri Marta sequeeree:

—Janiyacujaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequeereeri:

—Cua Quenaa, quia timitiaanijia. Quiaari tari cua sequesano tojiriucuaacuaja.

⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³ Naa Jesu sequenu nuhuajitij, jiyanohua na rupaa paaretareeri. Naa sequeereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaca, na niohuacaari jiuuicosano quiriqiaajaa. Na nacaari puetunu na jiquiocotajanaa mishiquiosano quiriqiaajuhuj, toquerauta morosano. Jesuuri pueya sequeeree:

—Nia saacatare, cuara rucuanera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapuate Maríacua nijioquiaari na cumanijanuracuajani.

⁴⁶ Noojiaqueya cuno Judiocuacajiniijinoori Fariseocuacaacua quiojoquiaari nojori pohuatanura Jesu miishano. ⁴⁷ Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niquiara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijiaara socua na jiyatenutaniya. Naaratej, pa jiiñanaa Romano pueyari pocua nijionutaniya Pueyaso Secojoua tia nojori niyartanura, pa pueya na puecoonurajuhuj.

⁴⁹ Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequeree:

—¡Niaaquiiri niishiyashijiaca seetanujuanaa! ⁵⁰ ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuana puetunu pa pueyajanaa puecoosaanura.

⁵¹ Caifás sequesanoori maja tama na sequesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. ⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuj, tee tiquiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqúi na quitiuniuria juhua niquiriyatu maanu.

⁵³ Naacujitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴ Nocujaji, Jesuuri maja tari na rucuanefonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricujani. Nojoriiri naa miiquiaari juhujaniya nojori queranacunura Pueyaso niquiara Pascua juuca. ⁵⁶ Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyaniijianucua, Fariseocuanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuara nojori numooteera nojori quiatenura Jesu.

12

María totasacari na shanohua jaanutaja Jesuucua (Mt 26.6-13; Mr 14.3-9)

¹ Seis juuca jaara cureeriquiaaja Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiuaricujani. ² Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatanio. ³ Jiyacaritij, Maríari Jesuucuaara pataree na shanohua jaanutaja. Cunoori “nardo” jiyaniishano nataujiniji shipinishano quiquiaari. Jiyanohua queraatia cumaneecata masesano. Puereetuuca motiiquío cajiniocua puecariquiaari cuno shanohua

jaanutaja. Maríari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. ⁴ Naa María miishacar-itij, niquiriyatu canaajiniinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanohua jaanutaja niqutioyaquishaaree queraatia cumaneecarani, casamiiuniucua pueya niqutiojosocoriqianoni? ¡Jaara masenu panishaare, maara niqutiosaare juhua niquiriyatu marijiara pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiriquiaa casamiiuniucua pueyacu. Naa sequereeri saaja cumaneecaacua jiaatiaja na quiniucua, nohuasejua na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejua, pueya niqutiojosanojiniji canaara. ⁷ Jesuuri saaja Judas sequeree:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacaritia na jeenucuatajara cua cuaqueya, pueya niaaquishacaritia janiya raajinia, janiya jaara mosaareni. ⁸ Casamiiuniucua pueyari pueyaracaanu niaata quiriquiano cutara. Saniniuujia, janiyari maja pueyaracaanu niaata quiriquianoni.

Pueyacuara secojonaa jiyaniijianucua roojotoosacari Lázaroocua

⁹ Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quiujoquiaari na niquniucua, Lázaro niquniucua juhuj, teyano Jesu samiitianiquiaaricujani. ¹⁰⁻¹¹ Jesu samiitianiniucua Lázaro, queraatia canaa Judiocuacaari Jesuucua tiuquiciaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajuhuj.

Juhua Jiyaniijajanaa Jesu tiuquishacari Jerusalén tiacajinia
(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacua Pascua juucara queranacunurani, nojoriiri niishiquiaari Jesu tariqui tiuquiniutianiyajuhuj. ¹³ Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriaajaariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacujani! ¡Nojuacuajaari Israel pueya Jiyaniijajanaa!

¹⁴ Jesuquiiri jiyacari burro niqiojua riuriatamaa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacuajani. ¹⁵ Naa sequeyari: “¡Sión tuhuananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niqiojua nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohuateriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷ Cuno pueya, Jesu samiitianishacari Lázaro niqiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. ¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. ¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niqiuia? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajiniinio taucuaca pocoojonu panishacari Jesuta

²⁰ Grecia jiyajiniinio taucuacaari Jerusalén tiacajiniara nijioquiaarijuhuaj Pueyaso niqiuara nojori queranacunuunura Pascuara. ²¹ Cuno pojoriiri canaa cojinia Felipeeca catecanoquiaari. Felipeeri Betsaida tiacajiniinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequeeseo cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuatasejuhuaj. ²³ Jesuuri naa nojori riucuaaree:

—Quiarijiani, tama janiyajaarijia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niqiiijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitaja na tojiniuria janiya mijiriani, nojuajaari pueyaracaanu shuquiriaatia rishijara jiyatesaanutaniya. ²⁶ Cante quiria poonijionu paniyani, cuaara seetanujuanaa cua tojijia quiriia. Tee cua quiniutianiyacuaani, cua tojitiajacaari tii quiniutianiyajuhuj. Cua Queeri cua tojijiaca timitianutaniya. ¡Jiyanoehua maninia nojori miiniutianiyajaarijuhuaj!

Jesu pohuatasacari nojuaja mosaanutaniya

²⁷ Quiarijiani, janiyari jiyanoehua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niqiuiaari mijiriani. ²⁸ ¡Cua Quenaa, janiya cuaara miishiiriaqui taa quia panyacuajani, pueya niishiniuria quiaari jiyanoehua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuaa mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucuaja nocua pocuaareno!

³⁰ Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. ³¹ Quiarijiani, mijiria quiniaa miishacari naquiya janiya, nojoriiri saniniuujia saniitiosocoriquiano jiyatesaaree tari. Naajuhuj, mijiria jiyaniijia Sesaacaari jataaanutaniyajuhuj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riucuaaree:

—Canaacuajaari tariucuacaanu Pueyaso Rupaajiniji niishiyani, Pueyaso Jiyaroso-coriquiano Cristoori pueyaracaanu rishiriquiano cutara. Quiajanijarijataj, ¿casaara quia sequeyariniijia, Pueyaso Jiyarosoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiyaquishacarijia. Cante ninishiqui rucuanajojuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaji jamaashiiri.

Judiocuaca tiuyaquishacari Jesuucua

³⁷ Jesuuri jyanohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸ Naacuajitij, tariucuacaanu Pueyaso sequenu panishano caminiujiunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishiriijaaniuhuj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

³⁹ Naacuajitij, majaari nojori naata tiuuniu quiquiaari Jesuucua. Isaíasri naa naajio-taquiaarijuhuaj:

⁴⁰ “Pueyasoori nojori jiyateree juhua nimishitiuria, maja nojori niquiniuria na namiji-ata. Nojori niishitiaja cushitioreejaariuhuj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijuuhuj”.

⁴¹ Supuetana Isaíasri naa caminiujuiquiaari Pueyaso niishitishano nojuajatej, Jesu na niquiniuucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuquiquiaari. Queraatia canaa jiyaniijianucuaari nocua tiuquiquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuujica nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

Pueya tojitiaaquiniuucua Jesu sequesano, nojoriiri saniitiosaariquiano

⁴⁴ Jesuuri jyanohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhuj, cante cua jiyaroquiaaricuajani! ⁴⁵ ¡Cante cua niquiriini, nojuajaari cua Jiyarona niquiriijuuhuj! ⁴⁶ Janiyari mijiria niquiaarini cua cuhuatanura nijaniya. Naacuajitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriquia najuhanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua ninu quiquiaari mijiria, pueya cua saniitionura. Janiya cutaraari niquiaarini nojoriicuaji cua tacunura. ⁴⁸ Cante cua ruuretaja saajani, cua sequesano tojiyaquiyajaariuhuj, nojuajaari tari nocuara saquiriojotana jiiitia na saniitiosaanura. Nojoriria cua sequesano cutaraari tama nojoriicuara saquiriojotariquianojuaja nio jiya puequesacari. ⁴⁹ Cua pohuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuiquiaani, taa na niishitiquiaa janiyacujani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucujaja, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuaara Jesu quiateera na paraa, na mosaanura. Cuno Judasri tamonu Simón jiyaniishano pueyano niyanu quiquiaari.

³ Jesuuri niishijia nojuaja seetanujuanaa Pueyasojiniji niqquiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴ Jiyaniijiajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵ Na nuhuaji, mohuaca shuurii tohuatashijiniaari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhuj na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

⁷ Jesuuri Pedro riucuaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸ Pedroori Jesu sequeree:

—¡Cua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuaaree:

—Janiya jaara quia niohuaca jeequejiaquirini, majaari cua pueyano quia quiniu quiniutianiya.

⁹ Simón Pedroori na sequeree:

—¡Jaara naa quiriritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajanijajanaari tari jeequejosano quiyacuaja. Saa niquiriyatujuaari jeequesoo quiya saniniujia.

¹¹ Jesuuri tari niishiquiaari cante na quiatenutaniya na paraani. Nocujaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajani-jia, taa nia jiyaniquiquiaa janiyacujani. ¹⁴ Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miriquia niarta Pueyaso muerasujuhuj. ¹⁵ Janiyari naa miiriini, cua niishitiojonura niajanija, naa nia miitioonurajuhuj taa cua miirii niajanijacuaani. ¹⁶ Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. ¹⁷ Niaa jaara cua rootasano niishiri, niaari shuquiriaatia quijiaca quiniutianiya niaa jaara na tojiijaca quiri.

¹⁸ 'Shusha cua sequesano niajaniani, cunoori maja puetunu niajanianoyuanaa. Janiyacuajaari niishiyani canapue cua saquiriojoquiaarini, taamueca pueyate niajaniani. Naacuaajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacuaajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquishano pueya tojjiani, nojuajaari cua tojjijahuaj. Cante cua tojjijara quiriini, nojuajaari cua Jiyarona tojjijara quiriijihuaj.

Jesu pohuatasacari, Judascuajaari na paraa na quiateriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canaatej, jiyanoohua na taraajenuta naa canaa sequereeri:

—Seetanujuanaa nia sequeyanijia, niquiriyatu niajanijajinijinooori cua paraa cua quiatenutaniya.

²² Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. ²³ Jiyacaritij, janiyari na shuriucuaji cajiriquiaa miaquenuujuajiniani, na panishano pueyano cua quiniuucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni.

²⁵ Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijiana, ¿canteeri naa quia miiniutianiyan?

²⁶ Jesuuri cua riucuaaree:

—Janiyari pan rau piquiojonutaniya caacajiniani. Cana cua niqutionutaniyan, nojuajaari cuno.

Jesuuri jiyacari pan rau piquiojoree. Judas Iscariote na niqutiooreeri. Nojuajaari tamonu Simón jyanishano niyanu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. ²⁹ Judasri canaa cumaneeca cojuatana quijia. Naaratej, noojiaqueya canaajinijinooori jyaniriquiaani Jesu naasucua na jiyaroriquiaa socua casaa na masenura canaa queranacunuutajara, casamiijuniucua na niqutiojonura cumaneeca soj. ³⁰ Judas jaara masequiaari Jesu niqutiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequeree:

—Quiarjia cua miishanojiniji, janiyari maniniuhuaqueetasaanutaniyan. Pueyasoori jyanohua maniniuhuaqueetasaanutaniyajuhuj, naa cua miishanojiniji.

³² Pueyaso jaara maniniuhuaqueetasaare naa maninia cua miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyan.

³³ Quiquihuaniyojuanaa, janiya rupaquijia niaata quiniutianijajaanani. Taa cua sequecanu parta Judiocuacacuaani, janiyari naa nia sequeyajaanihuaj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarjia nia niishitiriiria nio quiarinio rootasano. Nia tojiri. ¡Panitiojuaca nia quiri! Naatej, taa cua paniquiaacuaa niajaniani, naa nia panitioorejuhuj.

³⁵ Naa jaara naa panitiojuaca quiri, puetunu Pueyaso niishiyashijia pueyajanaari naacuaji niishiniutianiya, niaari cua tojjitajaca pueya.

Jesu pohuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyaniijanaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiiano.

³⁷ Pedroori na sequereee:

—Jiyaniijanaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuarani.

³⁸ Jesuuri na riucuaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasooocua

¹ Jesuuri naa canaa sequereee socua:

—Maja nia tacaaniu, pueyanaa. Nioojia nia cajitiri. Saaja Pueyasooocua nia tiuuri. Cucua nia tiuurijuhuaj. ² Cua Que tiaari puereetuuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quiijara. Jaara naa quiaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenutaniuhuanu, cua rijionuhua niajaniya, cuata nia quiniuriajuhuaj tee cua quiniutaniyacuaani. ⁴ Niaacuajaari cua quiquiojiniara neteja nuu niishiya, tee cua quianutaniyacuaani.

⁵ Tomásri Jesu sequereee:

—Jiyaniijanaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucuaaree:

—Janiyacujaari cuno nuuni, Pueyasooocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya rupueteja Pueyasoni, nojori tiushacari cucua. ⁷ Niaa jaara seetanujuanaa cua niishiquiaaricuaa, niaa maara cua Que niishirijiuhuj. Seetanujuanaa, niaari tari na niishiyacuaja. Niaari na niquiquiaa-juhuaj.

⁸ Felipeeri na sequereee:

—Jiyaniijanaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaaree:

—Felipenaa, janiyacujaruhua pueyaracaanu niaata quiquiaa juucuanu. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaari-juhuaj. ¿Casaara quia sequeya cua niquitiniuria cua Que niajanijarini? ¹⁰ ¿Majateeri quia tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua? Canaari maja rimiajatani. Nio, cua sequesano niajanijani, cunoori maja tama cua niishishanojuaaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari niajanijani, janiyari cua Que jiuujiajinia quiyani, cua Queeri saniniuujia coojiajinia quiyacujua. Niaa jaara cua sequesanoocua tiuuniu paniyaquiri, cucua nia

tiuriqui na cumaacata cua miiniucua nia niquiara. ¹² Seetanujuanaa nia sequeyanija, cante cucua tiujiani, nojuajaari puetunu cua miishanojuanaa miiniutianiya-juhuaaj. Cua tacasacariuhua cua Que shuriucua cua quiniuhua, cucua tiuujiaaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua quishacari, janiyari niaara miiniutianiyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ 'Niaa jaara seetanujuanaa cua panijiaa quiri, niaari cua rootasano tojitiajaca quiniutianiya. ¹⁶ Naajuhuaaj janiyari cua Que seconotutaniyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

¹⁵ 'Niaa jaara seetanujuanaa cua panijiaa quiri, niaari cua rootasano tojitiajaca quiniutianiya. ¹⁶ Naajuhuaaj janiyari cua Que seconotutaniyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

¹⁷ Nojuajaari Pueyaso Sohuanu, seetanu rupaa jitianajanaa. Pueyaso tojiyashijiaa pueyari maja na naata cuno Sohuanu na jitianu, nojori niquiyaquiniucua nojuaja, na niishitiuyaquiniucua nojuajuhuaaj. Niaa cutaraari na niishijiaa. Nojuajaari niaata quiyacuaaja. ¡Pueyaracaanu nioojiajinia quiri quianojaariuhuaaj!

¹⁸ 'Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhua. ¹⁹ Pueyaso tojitiaashijiaa pueyari quiari naataja cua niquiyaquiniutianiya socua. Niaa cutaraari cua niquijiaa quiniutianiya. Samiitianijiojua cua quiniucua, niaari pueyaracaanu quijiaa quiniutianiyajuhuaaj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhuaaj. Janiyari saniniuujia nioojiajinia quijiani. ²¹ Cante cua rootasano niishijiani, nojuaja jaara na tojijia quiriuhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacuaajanaa?

²³ Jesuuri na riucuaaree:
—Cante cua panijiani, cua rootasano tojijiajaariuhuaaj. Cua Queeri jiyano pueyano panijia. Naaratej, canaari nocua niniutianiyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

²⁴ Saniniuujia, cante cua paniyaquijiani, jiyano pueyari cua rootasano tojiyashijiaaajuhuaaj. Puetunu cua rootasanojuanaa, niaa na tojiqiaaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricuaajani.

²⁵ 'Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiri quiano. Nojuajaari nia niishitiojonutaniya puetunu cua niishitionu panishanojuanaa niajaniya. Naajuhuaaj, nojuajaari nia niishitiniutianihua puetunu tari cua pohuatasano niajanijanaa.

²⁷ 'Janiyari nioojia cajitiniutianiyanipuetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miiija. ¹⁴ Nioojia rupueetosacari coojiaata, janiyari puetunu nia masesanojuanaa miiniutianiya niaarani.

²⁸ Tari nia sequereecuajaniija: "Janiya quera quiohuani. Janiyari na nuhuaji tacatenutaniuhuani niaata cua quiniuria". Niaa jaara seetanujuanaa cua panijiaa quiri quianojaariuhuaaj!

²⁹ Janiyacuajaari juhuacarijia nio nia sequeyani.

Naacuaajitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuanaa.

³⁰ 'Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojtiaashijiaca jiyaniijia. Pueyaracaanu cua Que Pueyaso tojijia cua quiniucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjiani, na panijia cua quiniucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucuaajinijinio jaara muetuyashijia quiri, cua Queeri na piyotaja. Teyano cua cashacucuaajinijiniote muetujua saniniunijia, cua Queeri na nacareetaja, socua queraatia na muetunura. ³ Nia tojiniucua cua rootasano, niaari tari juhua nacareetasano quiya. ⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaaji piyotasaare, majaari na naata muetunu tari. Naajuhuaaj, majaari nia naata muetujua quiniu, niaa jaara coojia rupueyashijiaca quiri.

⁵ 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniyacuaani, naacuaajitij, niaari juhua queraatia muetujuaca quiniutianiya. Cucuaaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucuasaarohuari manijinia quejoosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojjijia quiriujuhuaaj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia muetujuaca quiniutianiya. Naacuaajitij, cua Queeri jiyanojia timitiasaanutaniya. Naacuaajitij, niishishaanutaniyajaariuhua niaari cua tojtiajaca pueyaniyojua. ⁹ Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panishanoni, pueyaracaanu cua miiniucua na panishano. Naajuhuaaj, niaa jaara cua rootasano tojjijia quiriquia, niaari pueyaracaanu cua panishano pueya quiniutianiyajuhuaaj.

¹¹ 'Janiyari naa nia sequeyani, shuquiriaatia quijiaca nia quiniuria, taa shuquiriaatia quijia cua quiyacuaani. Naacuaajitij, niaari tojetaarucujanaa shuquiriaatia quijiaca quiniutianiya. ¹² Cua tojiri. Nioori cua sequesano niaara: “¡Pueyaracaanu panitiojuaca nia quiriquia, taa cua paniya niajaniyacuaani!” ¹³ Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyanojia narta pueya panijia. ¹⁴ Niaa jaara cua sequesano miijia quiri, niaari cua rupuenaa. ¹⁵ Naacuaajitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiaritia nia sequeya cua rupuenaatani, cua niishitiniucua niajaniya puetunu cua Que sequesanojuanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia muetujua

naana quiniutianiya. Puetunu nia miishanojuanaa cua cumaacatani, cunoori pueyara-caanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niquitionutaniya seetanujuanaa coojia rupuejaca nioojia quishacari. ¹⁷ Janiyari cunora nia sequeyani: “Pueyaracaanu panitioojuaca nia quiri”.

Pueyaso niishiyashijiaca pueyari Pueyaso muerasu niqiniu paniyashijiaca

¹⁸ Pueyaso niishiyashijiaca jaara nia niqiniu paniyaquiriquia, majaari nia tacaaniu. Cuno pojoricuajaari naa cua niquitiuniu paniyaquijiacacuaa. ¹⁹ Niaa jaara Pueyaso muerasu quiaquiriquia, Pueyaso niishiyashijiaca maara nia panijia quiri quia, taa nojori paniquiaa narta Pueyaso niishiyashijiacaacuaani. Niaari Pueyaso niishiyashijiaca quiquiaarijuhuaj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiacaari nia niqiniu paniyaquiquiaa, maja tari nia quishacari juhua nojori. ²⁰ Majaari nio cua sequesano nia niyajetanu: “Seruuri maja socua tojishano na camarnujiniji”. Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuhua. Naajuhua, nojori jaara cua rootasano tojiquiaacuaa, nojoriiri nia rootasano tojijia quiniutianiyajuhua. ²¹ Nojoriiri naa naquiya miiniutianiya niajanijatej, cua pueya nia quiniuucua, nojori niishiyaquishacari cua Jiyarona.

²² Janiya jaara niyaquiquiaari nojori cua pohuatanura Pueyaso rupaani, nojori icuara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: “Cua jiyanoori. Maja cua niishiniu quiquiaari quia rootasano”. ²³ Cante cua niqiniu paniyashijiani, nojoriiri cua Que niqiniu paniyashijiajuhuaj. ²⁴ Sesa nojori miishano maara nojori icuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijoquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniyaquijia, cua Que niquitiuniu paniyaquijiacajaarijuhuaj. ²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajinijiiri tari tohua-teeree. Naa sequeyari:

“Janiyari najuhua nia niqiniu paniyaquishiyani”.

²⁶ Janiya jaara cua Que shuriucua quishuhua, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhua, pueyara-caanu cuata nia quiniuucua shushajanaa cua coteesacari pohuatanu Pueyaso rupaa.

16

¹ Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuaj cua tojitiajaca nia quiniuucua, nojoriiri jianiniutianiya nojori maninia miya Pueyasora, naa nojori miishacari. ³ Nojoriiri naa miiniutianiya niajanijatej, nojori niishiyaquiniuucua janiya, cua Quejuhuaj. ⁴ Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacua-jaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajinijinio nequesotanu janiya: “¿Tee quia quiohuarini?” ⁶ Janiya jaara nia

sequereeni janiya quianutaniuhuan, niaari saaja taraajequee. ⁷ Seetanujuanaa nia sequerianijia, socua maninia quiniutianiya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu niniu quiniutianiya niaacua, na cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujiajinia poonijionutianiya, nojori na niishitiniuria nojoriiri seetanujuanaa sesa miijiaca. Nojori niishitiniutianiyajaariuhua nojoriiri na naata sesa miyashijiacara jiyatesaanu. Naajuhuaaj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. ⁹ Seetanujuanaa, Pueyasora, nojoriiri sesa miijiaca nojori tiuyaquiniucua cucua. ¹⁰ Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. ¹¹ Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutianiya. Naacuajitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuaaj, cucua nojori tiuyaquiniucua.

¹² Janiyari queraatia jiiitiaajaa cua pohuatanura niajaniyani. Naajaa, majaari cua pohuatanu quiniutianiya quiaritia niajaniya. Juhuanujuaja maja nia naata na niishiniu. Pueraruhua. ¹³ Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaaajanaa jiiitaja. Nojuajaari maja tama na niishishanojuaja na niishitiniu quiniutianiya niajaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. ¹⁴ Niaari cua shuquiritianutianiya, nojuaja niishitiniucua niajaniya janiyajiniji. ¹⁵ Puetunu cua Que jiiitiasanojuanaani, cunoori cua casaajuhuaaj. Naaratej, janiyari nia sequereeni, Pueyaso Sohuanuuri janiyajiniji masenutianiya cua jiiitiasano niaara, na caminiuujunuria niajaniyarajuhuaaj.

¹⁶ Niaari saaja quiaritia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquirojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiaritia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu paniyajaaraniuhua na sequesacari: “Pasa naataja na nuhuaji niaari cua niquiniutianihuacuuhuaaj”, na sequesacarijuhuaj: “Cua Queecua quianutaniuhuanijia”? ¹⁸ Naajuhuaaj, ¿casaa na sequerani na sequesacari “quiaritiani”, mariyata “pasa naataja na nuhuaji”? ¡Majaari pa niishiniu casaaraqui na sequeratejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiaritia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj”. ¿Niaatejaara niojiniji nequesoreetoya tama niajaniyajaaja? ²⁰ Seetanujuanaa nia sequerianijia, niaari nujuquenutianiya. Niaari taraajeconutaniyajuhuaaj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa niajaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuaaj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiaritiani, niaari naa taraatia quiyajuhuaaj. Naajaa, niaacua tacatenutaniuhuanijia. Niaari jiyanohua shuquiriniutianiya nia niquishacari janiya.

Majaari quenaaja tamasaca pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masesanjuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanajuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyaniiija Jesuuri Sesaaca shocotana

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniuuniuria cua Que, na tojiniuria niajaniya. ²⁷ Cua Quejanaacuajaari nia panijia, nia paniniuucua janiya, nia niishiniuucujuhuaaj janiyari na jiyarosani. ²⁸ Niaacuajaari niishiya, janiyari cua Que shuriucuaaji niqiaarini pueyanora cua quiniuria mijiria. Quiarijia saniniuujia, janiyari nio jiya tiujianutaniyani, cua Queecua cua quiianuhuaa.

²⁹ Naa Jesu sequesacari canaatej, canaari na sequereeni:

—Quiarijia cutara, quiaari maatiajanaa sequeree, maja miriqui. ³⁰ Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuaajqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiuyaruhua? ³² Tari quenaacoyari naquiya cua miishaanura. Seetanujuanaa quiarijiaari. Niaari cucuaaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuaajaari mijiria jiyaniiija shocotareeni. Naacuajitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhujitij, jiyocuacaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricuajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacua saniniuujia quia jiyatere pueya timitiasano quia quiniuriani, tojetaarucujanaa maninia miijia quia quiniuucua. ² Quiaacuajaari quia cumaaca cua niqutioquiaari puetunu pueyajanaa cua jiitianura. Naacuajitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niqutioquiaari janiyacujani. ³ Nojori niishishacari saaja quiajaniyari seetanujuanaa Pueyasocuaaja, naajuhuaaj, nojori niishishacari janiyari quia jiyarosani, naacuajitij, nojoriiri pueyaracaanu quijiara quiniutianiya shuquiriaatia.

⁴ Janiyari tari tucuatere quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jiyanojua shuquiriaatia quijia quiquiaari quia shuriucua, jiyaniiijajanaa cua quishacari. Cua Quena, naa quijiara cua jiyaterohua quiarijiani, quia shuriucua cua quiniuhuaa.

⁶ Quia niquitiosano pueya janiya, quia saquiriojosano pueya quia niishiyashijia pueyajinijinioni, quiarijia cutara, nojoriiri niishiya cante quiajaniyani. Nojoriiri quia

niishiya, nojori niquniuucua cua miijosano quia cumaacata, cua pohuatasano quia-janiyajiniji nojori tojiniuucujuhuj. Nojoriiri quia pueya quijia. Quiaari saniniuujia nojori cua niqutioquiaari. Nojoriiri quiarjia quia rupaa tojitajaca cutara. ⁷ Nojoriiri niishiya puetunu cua jiiitasanojuanaani, cunoori quia niqutiosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiurii. Nojoriiri seetanujuanaa niishiya, janiyar quia shuriucujaji niqiaarini. Niishitiuyajaariuhuj, janiyar seetanujuanaa quia jiyarosaroni.

⁹ 'Janiyar cunora nojoriicua quia secojiyani, seetanujuanaa quia pueya nojori quiniuucua. Majaari cua secojonu quia niishiyashijaca pueyacuara. Saaja noo pojoriicua quia secojiyanijia, quiaa na niqutioquiaari janiyatej. ¹⁰ Naaratej, puetunu cua jiiitasano pueyajanaari quia pueyajuhuj. Mariyata puetunu quia jiiitasano pueyajanaari cua pueyajuhuj. Nojori tiuuniuucua cucua, nojoriiri jatanishano pueya quiniutianiya. Naacujitij, queraatia pueyar quia timitianutaniyajuhuj, naa nojori niqishacari cua cumaaca.

¹¹ 'Majaari puera cua tarishiniu quiniutianiya mijiria. Cua pueya cutaraari mijiria quiniutaniyajaara, janiya jaara quiaarohua quiocuan. Jiyano hua maninia cua Quena, nojori quia cojuare quia cumaacata, teyano pojori quia niqutioquiaari janiyacua-jani. Naa quia jiiiare nojori, jatiqum nojori quiniuria juhua niquriyat u jiuujiaraca, taa pa quiyacuaani. ¹² Mijiria cua quishacari nojoritia, janiyar nojori cojuajani quia cumaacata, quia rupaacua tiuujia nojori quishacari. Majaari quenaaja niquriyat u nojorijinijinio cua juurequetenu quiquiaari. Saa nojuaari juurequecanu cutara, tariucua juurequeriquiano quijiacuajatej. Naacujitij, tariucuacaanu quia rupajinia naajiotasanoori tohuatecanu.

¹³ 'Quiarjiani, janiyar quiocua quianutaniyani, tee quia quiyacuaani. Niya cua quishacarijia, janiyar nio sequeya nojori niqiarani, nojori jiiitanura cua shuquirini-ujuhuj, tojetaarucujanaa shuquiriaatia quijiaca nojori quiniuriajuhuj. ¹⁴ Janiyari nojori niishitocanu quia rupaani. Naa nojori tojishacari quia rupaatej, quia niishiyashijaca pueyar nojori niquniu paniaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyar nojori niquniu paniaquiquiaa. ¹⁵ Naa cua secojosacari quiarjia nojoriicuaratej, majaari cua sequenu quiajaniya nojori quia rijionura niqumij. Saaja quia secojiya cutaranijia, nojori quia cojuanura Sesaacaacujaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiaquiyacuaani. ¹⁷ Quia rupaa quia poonijiotere nojori jiuujiajia, tojetaarucujanaa quia tojijia nojori quiniuria. Quia rupaari seetanu rupaajanaa cutara. ¹⁸ Quiaacujajari cua jiyaroquiaari mijiria quinia pueya niqiar quia pohuatanura quia rupaa. Naajuhuj, janiyar quia pueya jiyaramiquiyani mijiria quinia pueyacuajuhuj. ¹⁹ Quia tojijia nojori quiniuria seetanujuanaa, janiyar tama quia cuaqueyajaaja jiyateya puetunu quia panishanojuanaa mijia quia quiniuriani. Naacujitij, nojori niishishacari seetanu rupaajanaa janiyajiniji, nojoriiri tojetaarucujanaa maninia mijiacara jatanishaanutaniya.

²⁰ 'Majaari saaja quia secojonu nio pojoriicua, tariucua quia tojitajacacuaani. Janiyari secojiyajuhuj na nuhuaj quia cucua tiuuriquiano pueyacuara, noo pojoriicua cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanijia puetunu cucua tiuunijanaa cuara quiiria jatiqum, juhua rpuetootesano, taa pa quiyacuaani, quia Quena. Naatej, taa quia quia quioojiajiniacuaani, quiaari saniniuujia cojiajia quiyacujia. Nojori jiuujia cuara juhua rpuetootesano quiiria poojiajiajuhuj, mijiria quinia pueya niishiniuria, quiaari quia jiyaroquiaari mijiria. ²² Janiyari nojori cumaquiya quia Sohanutani, quia niqutiosano janiyacua, juhua niquriyat u jiuujiaraca nojori

quiniuria, naatej, taa niquiriyatu jiuujiaraca pa quiyacuaani. ²³ Quiaari coojiajinia quiya. Naajuhuj, janiyari nojori jiuujiajinia quiyajaacuhuj. Naacujitij, paari nojortia juhua niquiriyatu quiniutianiyani. Naacujitij, mijiria quijiacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuj, quiaari jiyanojua cua pueya panijia, taa quia paniya janiyacuaani.

²⁴ 'Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shuriucua, nojori niquiniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniuucua janiya, jiya shipiniyaquishacarijia. ²⁵ Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosanoni. ²⁶ Janiyari nojori niishitocanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujuanaa nojori niishiniuria quiajaniya. Naacujitij, taa quia paniya janiyacuaani, nojori cuara cuno paniniu jiiitaara nojori jiuujiajiniajuhuj. Naa nojori niishishacari quiajaniyatej, janiyari nojori jiuujiajinia quiniutianiyajuhuj.

18

Na paraa quiasacari Jesu

(Mt 26.47-56; Mr 14.43-50; Lc 22.47-53)

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jiiitiquiaari canaata na rerejonura. Naacujitij, na paraa na quia-teriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojona jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia maticajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojortia quiriquiaa tii. ⁶ Jesu sequesacari, “Janiyacuaaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacujitij, tama Jesu sequesanojuaarjia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niqutiosano pueyajinijinio janiya”. ¹⁰ Jiyacaritij, Simón Pedroori tama na muerujuaja shitiaree na shuucujia shiyano. Nata, pueyacuara secojona jiyaniijia seru numoco jaatereeri, na miaquetajara na numoco. Cuno seru sesa quiquiaari Malco.

¹¹ Jesuuri Pedro sequere:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiririnij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuj, Pueyaso Secojoua tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniuucua. Cuno marijara, Caifásri pueyacuara secojonaa jiyaniijiajanaa quiriquiaa. ¹⁴ Cuno Caifáscujaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijanaa, maja najuhuaana puetunu pueyajanaa puecoosaanura”.

Pedro cotelesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacujitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateese. Jiyaniijiajanaa niishishano pueyano cua quiniuucua, janiyari tohuateyaji cojuana niyacoota pocoojoseeni, Pedro na tiuquininiuriajuhuj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiojuhuj?

Pedroori na riucuaaree:

—¡Maja janiya!

¹⁸ Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereeariuhuj. ²⁰ Jesuuri na sequeree:

—Janiyacujaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuujuaca tiacajiniaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacujani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuate cua pohuatasano tojiqianuni. Nojoricujaari quia sequenutaniya casaa cua rootaquiaa nojorini.

²² Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riucuasacari jiyaniijia Anástej, Secojonuujuaja tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucuasanote pueyacuara secojonaa jiyaniijia?

²³ Jesuuri na riucuaaree:

—Janiya jaara sesa riucuaareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquiococuaraarini?

²⁴ Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

Pedro pacutesacari seetanu Jesujiniji

(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacuaruhua quia niquirii cuno pueyanota quia quishacari olivo cuhuariquia-jiniani!

²⁷ Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoreesacari Jesu

(Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaaquiaari Romano jiyaniijia tiajinia. Cuno tiaari jiyanohua puereetuca quiriquiase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquiiioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuca quiri Pueyaso niquiara, naacujitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuarere:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequeree:

—¡Niiquiji nia jiyataarohua! ¡Tama nia nequesoreesuhuaajaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuarere:

—¡Niajaniya Romano pueyani, niaacuajaari canaa sequecanu maja canaa monura pueyano!

³² Naacujitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate setanujanaa Judiocuaca jiyaniijia?

³⁴ Jesuuri Pilato sequeree:

—¿Cunote tama quia niishishanojuajaaja naa quia nequesotanura janiyatej? ¿Tamonu soj quia pohuatacanu janiyajiniiji?

³⁵ Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuajaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

³⁶ Jesuuri na riucuarere:

—Janiyacujaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaque-toore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuarere:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niqiaarini seetanu rupaaajanaa cua niishitiniuria pueya. Cante seetanu rupaaajanaa panijiani, nojoriiri cua sequesano tojitiajaca.

³⁸ Pilatoori najuhuana na nequesotaree:

—¿Casaateeri cuno seetanu rupaaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacia.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequere:

—Nio pueyano nequesoreereecuajaniija. Nojuajaqui maja sesa na miiniu quiquianu.

³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejoajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua majacuteree Jesu, coqueeca casaata.

² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiuria, shaaruque toque cushitishaarohuari, juhua jiyaniijia toque.

³ Naa nojori miiniu nuhuaji Jesutej, nojoriiri nocua catecanoquiaari. Na sequetereeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

⁴ Pilatoori socua tohuataquiaari canaa Judiocuacaacia. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiuucuaa.

⁵ Jesu muetasacari nojoriicua, juhuacontucujiniji nacaque cushiriquiaari, shaaruque toquenio. Pilatoori Judiocuaca sequere:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niqiquiaari, na nacoonu coteetereeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuarere saaja:

—¡Maja! ¡Janiyacujaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riucuarere:

—¡Canaari Pueyaso Rootasano naajione jiiatiani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyanura!

⁸ Pilato tojishacari naa canaa Judiocuaca sequesantej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanijiani?

Jesuuri maja na riucuanu quirii. ¹⁰ Pilatoori na sequere:

—¡Cua riucuarerejaj! ¿Quiaate niishiyacuiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajanijiani! ¡Janiya jaara paniaquirijihuhuj, cua naata quia cartenujuhuj!

¹¹ Jesuuri saaja na riucuarere:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuaj. Naaratej, cante niyara cua nitiamaa quiocuani, nojuajaari socua jiyanojuaa sesa miirii quiajanijajini.

¹² Naa Pilato tojishacari Jesu sequesantej, nojuajaari socua shiriiquiquiaari. Nocuaji, Jesu cartenu saniniujiuriquiaa juucuaari. Judiocuacaari saa nacoorejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupena quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequere na tohuatenuhuara Jesu pueya niquiara. Pilatoori jiyacari cajirii pueya na nequesoresaqui cajitujinia. Pilato tii cajiriquiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”.
¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajia. Pilatoori jiyacari tii quinia Judiocuaca sequere:

—¡Nia niquiri nia jiyaniijia!

¹⁵ Pueyari saa nacoorejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequere:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequere:

—¡Jiyaniijia César cuajaari canaa jiyaniijiajanaa! ¡Maja socua tamonu jiyaniijia canaa jiitiano!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhananu”. Judiocuaca rupaajinia saniniujia, “Gólgota”.
¹⁸ Jesuuri tii teetesaaquiaari, socua caapiqui pueyano. Jesuuri cuno nojori tajinia nujuaretasaaree.
¹⁹ Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijio Jesu, Judiocuaca jiyaniijia”.
²⁰ Naajosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajiniano. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari.
²¹ Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucaaree saaja:

—Janiyacuaajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano.
²⁴ Naaratej, cuno soldadohuari seque-tooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriquiano”.

Seetanujuanaa, naa miitiquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaaj, Cleofas niquiocua Maríajuhuaaj, María Magdalenanio.

²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuara quiiria juhua quia mueya cua niti.

²⁷ Na nuhuaji, cua sequerejaariuhuaaj:

—Juannaa, cua nucua cuara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiQUIAARI puetunu nojuajiniji naajiotasanojuanaari tari tohuateeree. Naajuhuaaj, tariucuacaanu Pueyaso Rupajinia naajiotasano tohuateenu-rajuhuaaj, Jesuuri sequequiaari:

—¡Jiyamueyanijia!

²⁹ Cuniqúi, vino jerecaari patacojina mishaja cajitiariquiaa. Jiyacaritij, namasu casaari jereca vinojina shishaaree. Naajuaacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereca vino, naa sequerohuari:

—¡Tari tucuatatee puetunujuanaacuajanijia!

Naa na sequenu nuhuajitij, naniquiiri. Cusoqueeri.

Soldado jitasacari Jesu shuucuaaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajina. Cuno marijara, Pascua juucaari Sábado juucajina quiriquiaajuhuaaj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojina. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusunuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatuurejaariuhuaaj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaquirii.

³⁴ Naajaa, tamonu soldadoori Jesu shuucuaaji jitiaree na cashanata najuhuanaj. Ritia shooqueeri nanaca, mohuacanio. ³⁵ Cuno pueyano, na naajiojina naa nia pohuataani, cunocuaajaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaaritia niishiyani cua sequesanoori seetanujuanaa, nocua nia tiuuniuria. ³⁶ Jesuuri naa miishaaquiaaritij, tariucuacaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiri nojuajiniji naa naajiotasano quiyajuhuaaj:

“Cashanata na shuucuaaji na jitiatusano niqutiuniutianiari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequesee:

—Cua niqutiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹ Nicodemojuhuaaj, noo pueyano Jesuucua niquiaari

niucua nata pocoojonuratej, nojuajaari jiyacari tiuquishii Joseecua. Nojuajaari quer-
aatia shanohua jaanutaja nitiariquiaa, macuucua niojosocoriquiano. Na niiquiaari
quiquiaari cuarenta y cinco kilo. Cuno shanohua jaanutajaari quiquiaari mirra, aloeta
cojitijosano. ⁴⁰ Joseeri Nicodemota Jesu jiunio-coree toqueneecajinia. Nojori jiunio-
cosacari, nojoriiri nocua niojoriquiaa cuno shanohua jaanutaja. Canaa Judiocuacaari
naa miitiujiaca quiquiaari, na macu na niatunura raaco. ⁴¹ Tee Jesu teetsaaquiaar-
icujani, cuniqijia na shuriucua quiquiaariiri cuhuariquia. Cuno cuhuariquiajiniani,
quiarinio jiuutiasano raari quiriquiaa, macunucua niojojuara. Cuno raaconi, juhuano-
juaja maja macu niasaanu quiquiaari. ⁴² Macuuri cuno raaco niasaaquiaari, cateca na
quiniuucua. Naajuhuj, quera puequeriquiaari canaa Judiocuaca jeenucuanu juuca.
Cunoori, Pascuaacuara juuca.

20

Jesu samiitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquicuaj
quiaquiaari Jesu raajiniara. Ninishiquiri quiriquiaajaa. Na tiuquishacari, cuno
puereetuca saajia niquishiiri tariucua tamocora ruutinishano, teyanota raa
tiosaaquiaaricujani. ² Naa na niquishacari, nojuajaari neterohua Simón Pedroocua,
cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquiti-
jia na niasaaretejaj!

³ Naaratej, janiyari Pedrota netequiaari raajinarajuhuj. ⁴ Canaari mariyata netecu-
aturiquiaa coteenuni. Janiya cutaraari socua ritia netequiaari Pedrojinijini. Naacuaji-
tij, janiyari coteenu tiuquishii raajiniani. ⁵ Janiyari raaco cuuqueseeni. Janiyari saaja
Jesu jiunio-cotaja toque niquirii maanoni tee Jesu quete niasaarucuaacujani. Majaari
cua tiuquiniu quimiaa raaco. ⁶ Simón Pedroori cua nuhuaji tiuquishii. Cami tiuquimi-
aajanaa cutaraari. Nojuajaari Jesu jiunio-cotaja toque niquishii tii maanojuhuaj. ⁷ Jesu
naca jiunio-cotaja niquiriijaariuhuj tamoco maano, maninia mariquiosano. Majaari
na manu quiriquiaa Jesu cuaqueya jiunio-cotaja toqueta. ⁸ Pedro tiuquiniu nuhuaji
raaco, janiyari shusha jiyacari tiuquimiaajaaniuhuj. Cua niquishacari Jesu jiunio-
cotaja toque, janiyari niishiquini Jesuqui tari samiitiarohua. ⁹ Canaari juhuanojuaja
maja canaa niishiniu quiriquiaa tariucuaaanu Pueyaso Rupajinia naajiotasano Je-
sujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji,
canaari tiajinia quiaarohuani.

Jesu muetasacari María Magdalenaacua

(Mr 16.9-11)

¹¹ Canaa quiojosacariuhua raajiniji, María Magdalenaari tijia jateequiaari. Raa
shuriucua nujuqueriquiaari. Na nujuquenuta, raaco cuuquereeri. ¹² Raaco na
niquishacari, caapiqui Pueyaso seya niquiriiri, cohujaque toqueyaraca. Nojoriiri
macu niasaqui cajitiuriquiaa, tamonu na nacaacora, tamonu na cashacuucumara.

¹³ Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niiquiji pasaarucuaa. Majaari cua niishiniu teeriquitijia na
niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na
shuriucua nujaanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jiyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶ Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaa-jinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷ Jesuuri María sequeree:

—Maja cua quianu. Juhuanajuaja maja cua tacanu quiquiao cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasocua tacanutaniuhuanu. Nojuajaari nia Quejuhuaj. Nojuajaari cua Jiyaniijia, nia Jiyaniijia-juhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuhuaaj, Jesu sequesano caminiujiurii canaaraari.

Jesu muetasacari na saquiriojosano pueyacu
(Mt 28.16-20; Mr 16.14-18; Lc 24.36-49)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaa-tiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

²⁰ Naa canaa na sequenu nuhuajitij, canaa niqutijioree na juaashiquiaari, na shuucujaji cashana jiyanio. Canaari jiyanohua timiriini canaa niquishacari canaa Jiyaniijia.

²¹ Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuhuaaj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³ Naa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujia, nia jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiya-jaariuhuaaj.

Tomás niquishacari Jesu, saminio seetanujuanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵ Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujajijuhuaaj, janiyari nia cuaracashitiniutianiyani.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuanu. Tomásri jiyacari canaata quiriquiaa cutara. Tia tiotiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaaji quia puerarejuhuaj. ¿Casaara cucuaaji quia taacanuyajaani? Cucua quia tiuuri.

²⁸ Tomásri jiyacari Jesu sequeree:

—¡Cua Jiyaniijianaa! ¡Cua Pueyasonaa!

²⁹ Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapuate cucua tiuuniutianiya saaja nojori tojishacari janiyajiniini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohua socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoreetuneejinia naajiotasoo.

³¹ Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. ² Nio pojoriiri jiyacari mariyata quiriquiaa: Simón Pedro, Tomás (Caapueyano jyanishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaaniuhuj. Canaari Zebedeo niquiohuani. Socua caapiqui Jesu saquiriojosano pueyajinijinioori tii quiriquiaajuhuj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhuj.

Naacuajitij, canaari quiojijareeni. Canaari botejinia tacataseeni. Canaari puetunu cuno niucuaajanaa shiyaru quejootariquiaa sapitiaajara juucuani. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Canaa nequesotareeri:

—¡Sanajooriniaa! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷ Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantotej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriquiaa. ⁸ Canaari na nuhuaji jaatiariquiaa shiyaru botejiniini. Jaaquiaari namitia maja tucuaaanu na quiniu quiriquiaa, saaja cien metroruhua. ⁹ Canaa rosetasacari botejiniini, canaari na mani niquishiini. Sapitiaajaari tii majeeriquiaa, pannio. ¹⁰ Jesuuri canaa sequeree:

—Nia sapitiaajajiniji miji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajiniari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹² Jesuuri canaa sequere:

—Pueyanaa, miji. Nia miaquese.

Majaari quenaaja niquiriyatu canaajinijinio nequesotanu quiriquiaa, cantejaaranoni. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niqutiojoreejaariuhua.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocoojosacari Simón Pedrota

¹⁵ Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaare:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequere:

—Cua borregohua niquihuanijoyua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶ Jesuuri Pedro nequesotarohuacuahuaj:

—Juan niyanu Simónnaa, ¿quiaate cua panijia?

Pedroori Jesu riucuaare:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequere:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuaareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequere:

—Cua borregohuanijoyua cojuanara quia quiriqui. ¹⁸ Seetanujuanaa quia sequeyanijia, mashaja quia quishacari, tama quiajanijajarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequere:

—¡Pueyaracaanu cua tojjia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocujani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” ²¹ Quiarijiani, Pedro niquishacari janiya saniniuujia, Jesu nequesotareeri:

—Jiyaniijanaa, janiya jaara naa mosaanutaniyacuaani, ¿nojuajaarijataj, taa na mi-ishaanutaniyarini?

²² Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuaaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuaaanuji tacatemohuajaatijia, quia-janiyara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pihuataani. Cua pahuatasanoori seetanujuanaa.

²⁵ Jesuuri jiyanohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiaquiri puetunu cuno nequesoreetuneecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajiotaquiaarinijia, mariyata na niishitijosano na coteenujiniji, jaara tacanishaaquiaariuhua jiyocuacaanu na Queta na quiniuhuara.

² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquirijosano pueyacia. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminiyo quia. Nojoritia pocoojoquiaariiri taa Pueyaso jiiitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numootequiaari maja ritia nojori quianuhuara Jerusalén tiacajiniji. Nojori sequequiaariiri:

—Nia sashirijiaara cua Que cuaara niqutioorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiuuiuquiaari tari niaaracuajani. ⁵ Naa sequequiaari nijaniyacuaajanijia: “Tiuquinijiona Juanri nia tiuquinijioquiaari moojinia, Pueyaso tojijiara nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijiara nia quiniuria”. Quera niaacua tiuquiniutianiyacuajaari. Naaratej, nia sashiri.

Jesu tacasacariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijiaara jiyatesaanutaniya quiarjia Israel pueyara, maninia pa quiniuhuara tama pa jiyaniijiatajaaja, taa pa supuetanaa quiquiaaricuaani?

⁷ Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijiaara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacuaaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niqiuara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuataaanutaniyajaariuhua puetunu jiyacajiniajanaa, socua tucuacaanu jiya puequeetujinianio.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucuaaji nojuaja. ¹⁰ Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. ¹¹ Nojoriiri Jesu pueya sequere:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocuaajani, niaari naa na niquiniutianiya tacatehuanohuajuhuj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. ¹³ Nojori tiuquiiijosacari Jerusalén tiacajinia, nojoriiri nojori quijia tijinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucuaajani.

Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricuajani. Quiquiaarijiaariuhua Simón, cante tari quiquiaari Romano pueya jatanu panijiacuajani. Mariyata quiriquiaari Judas, Santiago tarajanu. ¹⁴Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariyata, Jesu tapueyocuatania.

Pueya saquiriojosacari Matías Judas niti

¹⁵Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujuanaa. Naa nojori sequereeri:

¹⁶—Cua tapueyocuatania, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacujitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niquitiosacanu cumaneeca, naa nojori na niishitiniucua Jesu quiasaanura. ¹⁷Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuj. ¹⁸Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiquianu na nacaraari. Na saracaari cocuaretasee. ¹⁹Jerusalén tiacajinia quinia jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. ²⁰Judasjinijiiri naa naajiotasaquiaarijuhua tariucuaaanu supuetana David jaaquequejoajinia. Naa sequeyari:

“Na quiquio cuara quiiria shaaco. Cuara quiiria sanaaca, camaruuju”.

Sequeyajaariuhuj:

“Tamonu pueyano cuara jiyatesaaria na poonijosano miiriquiano na niti”.

²¹’Cuarta Jesu saquiriojosano pueyanaa, niya quiyacuaja pueya, canapuetucujaja pa tarajaquiaarini pueyaracaanu pa Jiyaniijia Jesu quishacari pata. ²²Nojoriiri Juan niquiquiaarijuhuaj Jesu tiuquiniyano moojinia, Jesu tacasacariuhua jiyocuaaanunio. Canapuetucujaja puetunu nio niquiquiaarijianaani, niquiriyatu nojorijinijinio cuara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhuj.

²³Naaratej, pueyari caapiqui pueya saquiriojoquiaari. Cuniqi quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuj, Matías. ²⁴Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

²⁶Na nuhuaji, pueyari naajosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacujitij, Matíasri Jesu saquiriojosano pueyanora quiquiaarijuhuaj. Naacujitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹Pentecostés juuca jaara quiquiaari, puetunu Jesuucua tiuuniaajanaari rerejono quiquiaari tamonu tiajinia Jerusalén tiacajinia. ²¡Canashiyaquiji, paratuuri tojishaaquiaari jiyocuaaanuji, juhua paratu pocuaano jiyanojua cojuata! Jiyanojua

tojishaareeri cuno tiajinia tee Jesu pueya cajitiuriquiaacuajani. ³ Jiyacari, juhua maniiri niqushaaree pueya caco rimianuqueyano. Puetunu nojori cacojuanaa rimi-anacuriquiaari juhua mani. ⁴ Jiyacaritij, Pueyaso Sohuanuuri puetunu tiajinia quiniaa jiuujiajinijanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵ Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtiajaca quiquiaari. ⁶ Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanohua cushitiirii. Naatej, puetunu rucoonaajanaari tama na jiyajinijinio rupaacajaaja tojtiaariquiaa, cuno pojori pocooacari. Nojoriiri maja na niishiniu quiquiaari casaara naa nojori miiriini. ⁷ Nojoriiri jiyanohua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij?

⁸ ¿Taa nojori pocuaa puetunu coteenu pa rupaacajanaani? Pajaniyacuaajaari queraatia tamaatia jiyacajinijinioni, puetunu tamaatia rupaaca pocuajacajanaa.

⁹ Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. ¹⁰ Quiquiaarijiaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhuaj, canapuate Jerusalén tiacajinia pacunaa quiquiaaricuaajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. ¹¹ Creta jiyajinijinio pueyari tii quiriqiaajuhuj, Arabia jiyajinijinionio. Puetunu cuno jiyacajinijanaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? ¡Puetunu pajaniyajanaari cuno Galilea pueya tojtiaani Pueyaso cutara miishano pohuataano, tama pa coteenu rupaajiniaajaaja!

¹² Puetunu nojorijianaari jiuujiaateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaaranonjoni?

¹³ Tamasaca nojorijinijinioori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴ Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya niajaniani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵ Niaari canaa jiyaniya mashaasequenuyano. Pananucuaajaari shusha taqueejiya. Maja canaa mashaasequenuunu. ¹⁶ Niaari canaa tojtiaa tamaatia rupaaca pocuaano. Niocuajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunucaajaari na sequesano, shusha tohuateyani. Nojuajaari naa sequequiaaritij:

¹⁷ “Pueyasoori naa sequeyaquij: ‘Quera jiya puequesacari, janiyari cua Sohuanu niqutionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niqitiniutianiya mashiquiori juhua na maquenujinia. Cua niishishano

niishitiojonutaniya saaquiapue na maquenujiniajaarihuaj. ¹⁸ Cuno quishacari, janiyacua cua Sohuanu niquitiore puetunu cua tojitianaajanaani, canuu, maajipohuanio. Nojoriiri janiyajiniji pohuatanutaniya pueya niquiara. ¹⁹ Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuj, pueya na numootenura. Nanacaari niquishaanutaniya, mani, jyanohua najacanio. ²⁰ Pananuuri ninishiquireia quiniutianiya. Racaari juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyaniijiajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jyanohua shanohua quiniutianiyari na rosesacari. ²¹ Puetunu Jiyaniijia secोजना pueyajanaari jiyanooshaanutaniya Pueyaso pueya nojori quiniuria’ ”.

’Supuetana Joelri naa naajiotaquiaari Pueyaso sequesano tarijiatej. ²² Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jyanohua jiya-jeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanuyacuajaari maninia niishiya puetunu maninia na miishanojuanaa. ²³ Saniniuujia, Jesu jaara niquitiosaarucuaa niajaniya, niaari na quiarucuaa juhua sesa miijia. Na nuhuaji, niaari Pueyaso tojiyashijia pueya na moterucuaa maca niyacutesanojinia, taa Pueyaso paniquiaari tarijiacujani. Pueyasocuaajaari niishiquiaari naa mosaanutaniyari Jesu. ²⁴ Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵ Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶ Naaratej, coojiaari timirii. Cua niti taquiriocrateree cua shuquiriniutianijia. ²⁷ Naajuhuj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaja cua quishacari quia niquiara. ²⁸ Quiaari cua niishitiojoree maninia cua miiniuria, pueyaracaanu quijiaa cua quiniuria. Quiaari jyanohua cua shuquiritiniutianiya quiata cua quishacari pueyaracaanu”.

²⁹ ’Cua pueyanaa, paacuajaari niishiyani, pa supuetanaa jiyaniijia Davidri jamosaquiaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijini, jyanohua quia nuhuaji. Cuno pueyanoori Jiyaniijiaa cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

’Pueyanaa, paacuajaari niishiyani Davidri Pueyaso sequesano caminiujiunia quiquiaari. ³¹ Naacuajitij, Davidri Cristojiniji pohuatariquiaa jyanohua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. ³² Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³ Cutara na

cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niquitioree. Naaratej, niaari canaa niquirii tamaatia rupaaca pocuaano. ³⁴ Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵ ‘Cua miaquetajara quia cajishiiijaara, janiya cuaara quia paraa shocotarejaatijia’ ”.

³⁶ Cunora, puetunu niajanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanuunu pueyanaa.

³⁷ Pueya tojishacari naa Pedro pohuatasanojetej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riucuaquiaari:

—Nioojia nia tacatore sesa nia miiniujiniji. Niajanija cuaara moojinia tiuquini-jiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niquitiore na Sohuanu. ³⁹ Pueyaso sequesacari nojuaja na Sohuanu niquitionutaniya pueya, cunoori niaaranocuaaja, nia niquiohuaranonio, tucuaaanu quijiacarajuhuaaj. Pueyaso Sohuanucuaajaari puetunu pueyajanaa niquitiosaanutaniya, cana pa Jiyaniijia Pueyaso sequeya na muerasura na quiniuriacuajani.

⁴⁰ Pedroori jiyacari pueya pohuataree queraatia socua Jesujiniji na niishishano. Jiyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejooonu mani quiquiojinia.

⁴¹ Pedro pohuatasanoocua tiuuniaari tiuquinijosaaquiaari. Cuno juuca, tres mil pueya naasucuaari coteenu Jesu tojitianaa rupuenaa quiquiaari. Pueyaso pueyari naa canequiaaritij. ⁴² Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitijosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaru serotanura Jesu cusonu niishiniuria. Mariyata Pueyaso secojonuujua pueyaracaanuuri.

Panitiojuaca Jesu tojitianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriiquitiurii.

⁴⁴ Puetunu Jesucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niquitiojoquiaari nareja casamijiuniucua pueya. ⁴⁵ Tamasacaari na jiiitasano casami niquitioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niquitioquiaarijuhuaj, casamijiuniucua jiiitanura puetunu nojori panishanojuanaajuhuaaj. Tamasaca pueyari na cuhuariquia niquitioquiaari nojori jiiitanura na cumaneeca, tamasa na naacunurajuhuaaj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniaaja nojoriiri rerejojua, neecaru neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijia quiquiaari. ⁴⁷ Nojoriiri pueyaracaanu Pueyaso maninuhuaqueetariquiaa nojori shuquiriniutia. Puetunu Jesucua tiuyashijia pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

3

Sesarunocua pueyano jeeacasacari

¹ Tamonu juuca, Pedroori Juanta tacatariquiaa Pueyaso Secojojua tiajinia. Tari quiquiaariiri pananu piriuushacari. Nojoriiri jiyacari quiojonu jiiitiquiaari Pueyaso secojonura Secojojua tiajinia. ² Jiyacaritij, tamonu sesarunocua pueyanoori tii cajitiariquiaa Secojojua tia tohuateyaji. Nojuajaari naa rasanohuanaja quiquiaari. Pueyaracaanu patoojotasaaquiaariiri Pueyaso Secojojuajiniara, pueya na mashiniquiniuria cumaneeca nojori tiuquitiasacari. Na cajitiasaqui tohuateya sesa quiquiaari “Tohuateya Maniniu”. ³ Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneecaari. ⁴ Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niquiri.

⁵ Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. ⁶ Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiiitiasanota quia naacureera quiarijia. Quia sequeya Jesucristo sesajinianija: “Quia sanere. Quia rucuanerejuhuaj”.

⁷ Pedroori na juaashiquiaajiniiji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniuujiaacara quiquiijuhuj. ⁸ Sesarunocuaari juhuacatecara rucuanequiaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maninuhuaqueetariquiaajaariuhuj. ⁹ Puetunu pueyajanaari na niquiquiaari rucuaneyano, Pueyaso maninuhuaqueetaanojuhuaj. ¹⁰ Puetunu pueyajanaari na niishiquiaari nojuajaari sesarunocuaajaja, Secojojua tiajinia tohuateya Maninujinia cumaneeca mashiniquiijiojuatej. Pueyari cunora jiuujiatequiaari. Jiyanohua shiriiquitiuquiaariiri.

Pedro pohuatasacari Pueyaso rupaa pueya niquiara

¹¹ Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojojuajinia nujuaturiquiaa tamocora. Nojori nujuatusaquiiri pueya jiyaniquishano tariucuacaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. ¹² Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jeecareeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniucua Pueyaso niquiara tamasa pueyajiniiji. ¡Maja! ¹³ ¡Jesucuaajaari na jeeCAROHUA! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricujani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Nyanu niquitio-canu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Niaa maara maninia pueyanoocuaaji tacucanu saniya cutara, niaari pueyano puecojuaacua shiriiquitiurii saaja Pilato cartenura jiyano sesoriquia pueyano seque. ¹⁵ Niaari naa motecanu pueyano samiitianijiacuajatej. Naajaa, Pueyasoori na samiitianiquianuhua macujiniiji. Canaari na niquiquianuni. Naacuajitij, canaari nojuajiniiji nia pohuataani. ¹⁶ Nio sesarunocua pueyanoori Jesucuaa tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricujanoj. Jesucuaa na tiuushacari, na cuaqueya

cumaquiriiri. Na cuaqueyari seetanujuanaa jeequerohua maninia, taa nia niquiyacuajanoj. ¹⁷ Cuarta Israel pueyanaa, quiaritia niishyanijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhua. Niaari Pueyaso Jiyarosano mocanu nia niishiyaquishacari cante nojuaja quiquianuni. ¹⁸ Naacuaajitij, Pueyasoori na sequesano tohuatecanu, tarijia na niishitishano na rupaa caminiujiuniaa. Seetanujuanaa, puetunu Pueyaso sequesano caminiujiuniaa-janaari pa supuetanaa niquiara poojotaquiaari: “Pueyaso Jiyarosanooroori naquiya miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tuujusaanura. ²⁰ Naacuaajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijiaara na quiniuria. ²¹ Nojuajaari jiyocuacaanu quiniutianiya na Que shuriucua, Pueyaso cuara tucuaterejaatijia puetunu tariucuacaanu na pahuatanishanojuanaa na sequenu panishano caminiujiuniaa. ²² Moisés cuajaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pahuatana tama nia niquiohuacuajinio supuenojuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³ Canapete cuno pueyano pahuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

²⁴ Pueyanaa, puetunu Pueyaso sequesano caminiujiuniaajanaari Moisés nuhuaji na Jesujiniji pahuatanuuquiaarijuhuaj. Naacuaajitij, Samuelri Jesucristojiniji pahuataquiaari taa na niniutianiyan. Naajuhuaaj, Samuel nuhuaji, puetunu Pueyaso sequesano caminiujiuniaajanaari naa pahuatanuuquiaarijuhuaj. ²⁵ Puetunu Pueyaso sequesano Jesujinijianaani, cunoori quiaritia pajaniyara, taa Pueyaso pahuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranoljaariuhuaaj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniajanaacuajani”.

²⁶ Pueyaso jaara na tojijia Niyanu samiitianiyanu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijiara pa quiniuria. Pedroori naa pahuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pahuatasacarijia pueya niquiara, nocua nijioquiaariiri pueyacuara secोजना, Pueyaso Secojoua tia cojuanaata, Saduceocuatano. ² Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari sa-neecuatanutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequeshiyanotej, nocuaji jiyanohua juaaquiocuaariiri, na ruuretasacari Pedro sequesano. ³ Cuno juaaquiocuaari Pedro quiatuquiaari, Juanio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuquiaari Pedro pahuatasacari Jesujiniji. Quera cinco mil saaja canuuri tari Jesuucua tiuniaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatano. Nojoriiri Jerusalén tiacajinia rerejoquiaari Jesujiniji pahuatanaa nojori nequesoreenura. ⁶ Anásri tii quiriquiaajuhuaaj. Nojuajaari

pueyacuara secojonaa jiyaniijia quiquiaari. Caifásri tii quiquiaajuhuj, tamonu Juan-nio, Alejandronio, mariyata puetunu secojonaa jiyaniijia tapueyocuacano. ⁷ Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreeree:

—¿Taa nia miiriucuaa noonijia, sesarunocuatej? ¿Cana cumaacata nia jee-carohuacuaanoj? ¿Cante nia sequecanu naa nia miiniuriani?

⁸ Jiyacaritij, Pueyaso Sohuanuuri Pedro jiuujia cumaquiaari Pueyaso niishitajata na pocuanura. Naacuajitij, Pedroori naa nojori riucuaquiaari:

⁹ —Canaa camarucuaanaa, nia pohuataraera sesarunocujiniji, taa na jeequero-huacuaani. ¹⁰ Naa canaa nequesoreetaate, nia tojitiare canaa sequesano, nia niishini-uria cua pohuatasano, puetunu Israel pueyajanaa niishiniurijuhuj. Nio pueyano niya nujuajani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusujuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. ¹¹ Niajanियari juhua saitia tijaonaa Pueyasora. Nia tiasacari, niaari maniniujiajau saajia jataquiaari, nia jiyaniishacari sesarujajau naasucua. Na camaruuri saniniuuujia sequeya:

“Cuno nia jatasano saajiani, cunoori saniya cua maniniujiajau saajia”.

Niaari naa Jesu jataquiaari juhua saajia sesarujajau. Naajaa, Pueyasoori na niaquiaar-iuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³ Judiocuaca camarucuaari jiyano-hua na namijiaa riunitiquioquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari. ¹⁴ Sesarunocua jeequenohuari cuniqui nojori shuriucua nujuariquiaajaacuhuj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵ Camarucuaari Pedro, Juan tohuanijioquiaari tamocora nojori tajiniji. Jiyareta camarucuaari tama pocoojoquiaarijiaaja. ¹⁶ Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuajaari tari maninia na niishitiuya. ¹⁷ Nio nojori pa piriyojore juhuari, maja socua quiaritia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajini-ani.

¹⁸ Camarucuaari socua piiquiaariuhua Pedro, Juannio. Nojori nacasuree jiyano-huari, maja socua quenaaja nojori pohuatanura Jesujiniji pueya niquiara.

¹⁹ Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria niajanianiyani? ¿Taa nia sequeyani jiyaniijianucuaanaa? ²⁰ Maja cutaraari canaa naata tarinitianu pohuatanu canaa niquishano, canaa tojishanonio.

²¹ Camarucuaari nojori piriyojoquiaari juucuohuj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. ²² Pedro jeeCASANO-hua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³ Pedro, Juan jaara cartesaaquiaari, nojoriiri narta Pueyaso pueyacua quiojoquiaar-
 iuhua. Nojori pohuatatureeri Judiocuaca camarucua sequesano nojori, camarucua
 nacasunaa sequesanojuhuaj. ²⁴ Na tojishacari camarucua piriyojosano, puetunu no-
 jorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipinia, jyanio. Shoniniacu camini-
 aari quia shipinishanojuhuaj. Puetunu casaajanaari quia shipinishano. Quiaari
 jyanohua maninia. ²⁵ Canaa supuetanaa jiyaniijia Davidri quia seru quiquiaari.
 Naacuajitij, quia Sohuanuuri na pohuatequiaari quia sequesano Jesujiniji juhua tari-
 ucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiriojoriquiaa
 juucua. ²⁶ Jiyajinijinio jiyaniijanucuaari na juaaquiaca sanetaree. Queraatia
 tiacajinijinio camarucuaari Jiyaniijia Pueyasooacara rojotooree, na jiyarosano
 Cristoocuaranio”.

²⁷ Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio
 tiacajinia rerejocanu narta taucucata, Israel pueyatania. Quia Niyanuucuaara rojo-
 toocanuuri, tama quia Jiyarosanoocuarajaaja. ²⁸ Naa nojori miiniuucuatej, nio pueyari
 tari quia miiniu panishano miiriucuaa, taa quia sequequiaari tariucuaanucuaajani:
 “Cua Niyanu cuara mosaaria puetunu pueyacuarajanaa”. ²⁹ Canaa Pueyasonaa, quia
 tojishuriucuaraj. Nojoriiri quiarjia canaa miananojiya saniniuujia. Canacuajaari
 quia seyani. Canaa jiuujia quia cumaquiri quiarjia, canaa pohuatanura socua quia
 rupaa canaa puereyaquiniutia. ³⁰ Cusosuhua cuara naatanijiosaaria quia cumaacata.
 Canaa jiyaniquishacari quia Niyanu sesa, jiyajeneta casaa cuara miijiosaaria quia
 cumaacata pueya niquishocoriquiano. Nojuacuajaari saa maninaja.

³¹ Nojori puecasacari secojonu, nojori quishaqui tiaari canashiyaquiji jiuuquiuti-
 aquiaari. Pueyaso Sohuanuuri puetunu nojori jiuujiajania tiuquiquiaari, nojori na
 cumaquiniuhuara. Naacuajitij, pueyari saaja maninia pohuataquiaari Pueyaso rupaa
 pueya niquiara. Majaari na pueretunu quiquiaari.

Jamueyashijia Jesu tojitianaa quishacari

³² Jesuucua tiunuaari maninia juhua rupuetootesano quiquiaari puetunujuanaa.
 Nojoriiri juhua seetanujuanaa tapueyocuacataja quiquiaari. Majaari nojori sequenu
 quiquiaari: “Cua casami saaja quiria quiniutianiya”. Nojori jiiitasano casamiiri sanini-
 uujia puetunu narta Jesuucua tiunuaarajanaa quiquiaarijuhuaj. ³³ Jesu saquirio-
 josano pueyari Jesu samiitianujiniji poojotaquiaari jyanohua cumaacata. Naajuhuj,
 Pueyasoori puetunu Jesuucua tiunuaajanaa naacuriquiaa jyanohua, shuquiriaatia
 nojori quiniuria. ³⁴ Puetunu Pueyaso pueyajanaari na panishano jiiitiaquiaari puetunu-
 juanaa. Nojorijinijinio jaara cuhuariquia jiiitiaquiaari, tania, nojoriiri na niqutio-
 quiaari cumaneecara. ³⁵ Jaara cumaneeca masequiaari na casaa sami, nojoriiri nareja
 na niqutioquiaari Jesu saquiriojosano pueya. Nojoriiri saniniuujia casamiijiu Pueyaso
 pueya na serotaquiaari, nojori jiiitianura na panishanojuhuaj. ³⁶ Nojorijinijinio, ta-
 monu pueyanoori quiquiaari. Na sesaari José, Levita pueyano. Jesu jiyaramiquishano
 pueyari na sesojoquiaari Bernabé. Nioori sequeya “Cumanijiana”. Chipre jiyajinia
 na raja. ³⁷ Bernabeeri cuhuariquia jiiitiaquiaari. Na cuhuariquia niqutioquiaari
 cumaneecaraari. Jaara masequiaari cumaneeca na cuhuariquia sami, nojuajaari
 nareja na niqutioquiaari Jesu jiyaramiquishano pueya, casamiijiu narta Pueyaso
 pueya niqutiojosaanura saniniuujia.

5

Ananías, Safra sesa miishanojiniji pohuatasano

¹ Tamonu pueyanoori quiquiaari. Na sesaari Ananías quijia. Necocua sesa quiquiaari
 Safra. Nojoriiri na cuhuariquia niqutioquiaari cumaneecarajuhuj. ² Ananíasri na

cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuaraari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriquiaa Ananías niqutiosacari nareja na cumaneeca. ³ Ananías niqutiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia maseranojuanaa quia cuhuariquia samijiniji! ¡Quiaacuajaari tiji queyataree! ⁴ Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niqutiooree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuaraatia quia miishacarijij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jiyanojua shiriqutioquiaariiri. ⁶ Mashiquioriiri na jiuuicoquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedroocuaajuhuj. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiriucaa?

Na riuquareeri:

—Jaa, niojuanaacuaaquinatejaj.

⁹ Pedroori na sequeree:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutanijuhuj.

¹⁰ Jiyacaritij, maajiiri macu pojoquee Pedro shuriucuaajuhuj. Mashiquiori tiuquijosacariuhua, nojoriiri Safira niquishuhua pojianojuhuj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. ¹¹ Puetunu Pueyaso pueyajanaa, tamasaca pueyano, nojori jaara tojinuuquiaari puetunu nio miishanojinijianaa, jiyanojua pueretuquiaariiri.

Queraatia miijosacari Pueyaso cumaacata pueya niqiuara

¹² Jesu jiyaramiquishano pueyari jiyanojua cutara casaa miijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaaanu jiyaniijia Salomón canujuucojojuajinia, Pueyaso Secojoua tijinia. ¹³ Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari jiyaniijia Pueyasocua tiuquiciaari, canuu, maajipohuanio. ¹⁵ Naajuhuj, cusosuhuari patootasaaquiaari na maquetucuaajinia nuujiniara. Pueyari naa niishiriojoquiaari, Pedro jaara cusosuhua shuriuquico tajimia, cusosuhuari naataconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniaa pueyari na cusosuhua patootaquiaarijuhuaj, Jerusalén tiacajiniara. Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijosaaquiaari.

Pedro, Juan nujuatejosacari nujuatejojuajinia

¹⁷ Naaratej, pueyacuara secojonaa jiyaniijia, nata quiniaa narta Saduceocuaanio, nojoriiri juaaquioquiaari shocotasano nojori quishacari. ¹⁸ Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na

quiootuquiaari, nujuatejosaaquiaariiri Judiocuaca nujuatejojuajinia. ¹⁹ Pueyaso seru-
uri niucua jiyocuacaanuji nojoriicua rosequiaari. Nujuatejojua tohuateya riataseeri.
Na tohuatejosacari Pedro, Juannio, nojori sequereeri:

²⁰—Juhuaianiya nia quiaarohua. Pueyaso Secojojua tiajinia puetunu Jesujiniijianaa
nia pohuatate pueya niqiuara. Nia pohuatatejuhuj taa jatanishano pueya nia quiya
quiarijiani.

²¹ Nojoriiri Pueyaso seru sequesano tojiqiaari. Nojoriiri tariquicuaji quiojoquiaari
Pueyaso Secojojua tiajinia. Tii niishitiojonuuriquiaa juhuajianiya Jesujiniji pueyari.
Jiyacari, pueyacuara secojonaa jiyaniijiaari nata quiniaata saniniuujia quiojoquiaari
pueya nequesoreesaqui. Puetunu Israel pueya camarucujanaa rerejotereeri, no-
jori nequesoreenura Jesu jiyaramiquishano pueya. Puetunu nojorijianaa jaara tari
rerejoquiaari, na pueya sequequiaariiri nojori tohuatejonura Jesu jiyaramiquishano
pueya nujuatejojuajiniji, nequesoreesocoriquiano. ²² Na pueya jaara tiuquitiaquiaari
nujuatejojuajinia, majaari nujuatejosano na riuriatatanu quishii nujuatejojuajinia.
Nojoriiri tacaretacuhua na shaacanu nuhuaji. ²³ Naa pohuatanuusuhua camarucua
niqiuaraari:

—Canaa tiuquishacari nujuatejojuajinia, canaari maninia cumaatia mishiquionucua
na riuriataseeni. Tii cojuanaari maninia cojuariquiaa na tiotiu. Canaa riatasacari
tohuateya, jshaacoori quiriqiaa!

²⁴ Secojojua tia cojuanaa camarnu, mariyata pueyacuara secojonaa jiyaniijianu-
cuaari tama sequetooquiaarijiaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

²⁵ Jiyacaritij, tamonu pueyanoori camarucuaacua tiuquishii. Naa nojori sequeseri:

—¡Noo pojori, niaa na nujuatejocanu nujuatejojuajinatej, nojoriiri juhuajianiya
pueya niishitiojonuya Pueyaso Secojojua tiajinia!

²⁶ Tari nojori niishishacari tee Jesu jiyaramiquishano pueya quiriqiaani, Secojojua
tia camarnuuri na pueyata quiojoquiaari Jesu jiyaramiquishano pueya quioonura.
Jaara na quiootuquiaari, nojoriiri jacaria na jaatucunuquiaariuhua. Secojojua tia
camarnuuri pueya puereriquiaa. Nojori jaara caponeere Jesu jiyaramiquishano
pueya na juaaniutia, pueya mariqui nojori jacure saitia saniniuurijia. Nojoriiri cuno
puerequiaari. Nocuaji Jesu jiyaramiquishano pueyari jacaria jaatucunuusaaquiaari.
Majaari na caponeesaanu quiquiaari. ²⁷ Jaara tiuquitiasaaquiaariuhua, nojoriiri Israel
pueya camarucujanaa tajinia nujuatejosaaquiaari, Sanedríncuaca tajiniatuhuj. Puey-
acuara secojonaa jiyaniijiaari nojori sequequiaari:

²⁸ —¡Majaquiiri nia niishiniu tojiniu! Canaacuajaari tari nia tenujucanu juucuanu
maja socua cuno Jesujiniji nia pohuatanura pueya niqiuara. ¿Niaate nia numaa shama
tojiquianu canaa sequesano? Naa nia niishitiojosacaritij, ipuetunu Jerusalén tiacajinia
quiniaajanaari canacua tiutianutaniya Jesu mosaanu! Canaa sequetunutaniyari:
“Cuno pojoriiri Jesu motucanu”.

²⁹ Pedroori narta Jesu saquiriojosano pueyata nojori riucuaquiaari:

—Seetanujuaari, pueya cuara Pueyaso sequesano miiria coteenu, maja narta
pueya sequesano. Maja cutaraari canaa tarinitianunoj. Na nuhuaji cutara, nio
jiyajinia jiyaniijianucua sequesano cuara miishaaria. ³⁰ Pueyasoori tariucuaaanu
pa supuetanaa Jiyaniijia quiquiaarijuhuaj. Cuno Pueyasojuaacuajaari niyacute-
sanojinia nia cusojuasano samiitianiquianuhua. ³¹ Pueyasoori na tacaniquianu jiy-
ocuacaanu. Na miaquetajara na cajitiqianuuri Jiyaniijiajanaa na quiniuucua, pocuaji
Tacuna na quiniuucujuhuj. Naa miiquianuuri Israel pueya tacatonuhua noojia
Pueyasocua, Pueyaso jiyanooniuria pajaniya sesa pa miishanojiniji. ³² Naaratej,
canaari canaa tojishano pohuataani, canaa niquishanonio. Naajuhuj, Pueyaso

Sohuanuuri canaa niishitiojoquiaa maninia canaa pohuatanura pueya niquiara. Pueyasocuaajaari na tojtianaa niqutioquiaa na Sohuanu.

³³ Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. ³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niaquejoquiaariuhujuhuj. ³⁸ Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quiri, shaajenutaniyari. ³⁹ Saniniuujia, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocujia tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

⁴⁰ Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaarahua. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. ⁴¹ Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyajanaano.

6

Mashiquiopue mianuutenaara saquiriojosacari

¹ Jiyacaritij, Jesuucua tiuuniaa pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niqutioyaquiquiaa miaquesanonijia?

² Nocujia, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³ Cunora canaa tapueyocucanaa, tama nijaniyajinijinio nia saquiriojore siete maninia miijica pueya, niishijica, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue.

⁴ Canaacua saniniuujia saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

⁵ Puetunu pueyajanaari na shuquiriniutia naa riucuaquiaari:

—Taaquiririnij, naacuaaquinateja maniniajaj.

Jiyacaritij, pueyari Esteban saquiriojoquiaari. Nojuajaari jiyanoehua Pueyasocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶ Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacu. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso secojoturee nojoriicuaraari Pueyaso Sohuanu cumaquiniuria nojori, miaquesano niqutiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secojonaa pueyari Jesuucua tiuquiaarijuhuaj.

Jesu ruuretajaca quiasacari Esteban

⁸ Estebanri Pueyaso cumaacaraca quiquiaari jiyanoehua. Pueyasoori maninia na jiitiaquiaari. Naacuajitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. ⁹ Jiyacariti, tamasa Judiocuacaari Jerusalén tiacajinia quiriqiaa. Nojori maanuuri sesojosaaquiaari “Quioosanojiniji carteguesano pueya”. Quiquiaarijuhuaj Cirene tiacajinijinio pueya, Alejandria tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu nojorijianaari Estebancua rerejoquiaari nata juayonuutanura. ¹⁰ Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitiojosanota saa maninia pohuataquiaarijia nojori niquiara. ¹¹ Maja socua nojori rejeretasacari Esteban pohuatasano, nojoriiri tamasa pueya niqutioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niqutiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiririnij, canaacuaajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequesacarij, puetunu pueyajanaari juaaquioree, Judiocuaca camarucuajuhuaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja. ¹³ Socua pajesaaquiaariiri tamasa, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaariquihuarijuhuaj. ¹⁴ Canaari socua naa na sequesano tojiquiaajaa-niuhuj: “Nazaret tiacajinijinio Jesuni, nojuajaari Pueyaso Secojoua tia niyartanutaniya”. Naajuhuj, tariucuacaanu Moisés niishitiojosano pajaniya pa cartetenu-taniyaquiniaari.

¹⁵ Puetunu camarucuaajanaari na cajitiushaqui niqutiariquiaa Esteban. Nojoriiri na jiquioco niqiquiaari shacantuuca, juhua Pueyaso seru jiquioco.

7

Esteban pohuatasano

¹ Pueyacuara secojonaa jiyaniijiaari Esteban nequesotaquiaari:

—¿Seetanutejanaa taa nio pojori sequereecuajani?

² Nojuajaari na riucuaaree:

—Cua panishano pueyanaa, cua camarucuanaa, cua tojitiare. Pueyasoori jiyanoehua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia. ³ Pueyasoori jiyacari naa na sequequiaari:

“Quia tiujiaare quia jiya, quia pueyanio. Niiquiji quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴ Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. ⁵ Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacujitij, Abrahamri maja quenaaja jiya na jiitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuohuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niqiuohuaju quiquiaari. ⁶ Pueyasoori naa pacutequiaari sequenu Abrahamtej:

“Puetunu quia jinianuucujinino supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoehua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

⁷ Pueyasoori Abraham sequereejuhuj:

“Janiyari saniniujia cuno taucuaca naminiutianiya quiocujinino supueno pueyacuani. Janiyari nojori saniitionutaniya saniniunijia nojori poonijiotenuucua quiocujinino supueno pueya. Na nuhuaji, nojoriiri tiji quiojonutaniuhua niyara. Nojori tiuquiiijosacariuhua, nojoriiri cua secojonuujuaca quiniutianiya niya”.

⁸ Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano najaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuj. Pueyasoori Jacobo sesojoquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niqiuohuani, nojoriiri puetunu pa doce Israel pueyapue supuetanaajanaa.

⁹ 'Pa supuetana Jacobo niqiuohujinijinioni, tamonuuri sesojosaaquiaari José. Tapueyocuacaari José juaajiaca quiquiaari jiyanoehua, puera na que panishano José quishacari. Majaari nojori niqitiuniu paniniu quijia nojuaja. Na queeri socua jiyanoehua José panijia quiquiaari na pueranaajiniji. Tapueyocuacaari cunora casami niqutiojonaa pueya niqutioquiaari cumaneecara tarajanu José. Casami niqutiojonaaari José jiyataquiaari Egipto jiyajinia, saniniujia tii na niqutiosocoriquiano serura. Naajaa, Pueyasoori Joseeta quiriquiaa. ¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarurajanaa. Na jiyateree na tia camarnurajaariuhuj.

¹¹ 'Na nuhuaji, miaajenuuri quiquiaari puetunu Egipto jiyajiniaajanaa, Canaán jiyajiniano. Pa supuetanaa quishacari Canaán jiyajinia, nojoriiri quera titiacoquiaari

na miajajaara. Seetanujuanaa shaaqui quiquiaariiri nojori miasano. ¹² Jiyacaritij, Jacoboori caminiujiushaaquiaari: “Egipto jiyajinia quiaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojori-iri pa supuetanaacuaja. ¹³ Coteenu nojori masesano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocuacajuhuj. Naaratej, Faraónri shusha niishiquiaari tejeno pueyanote José quiquiaarini. ¹⁴ Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajiniratej. Na nuhuaji, saaquianoori tii shaajeseequiaari. Necohuari tii puequeseequiaarijuhuj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiaajinia quijia. Abrahamri cuno cuhuariquia masequiaari tariucuacaanu pueyajiniji raa na jiiitanura necocua na niajara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷ Pueyasocuajaari tariucuacaanu Abraham sequequiaari nojuajaari nio jiya na niq-uitionutaniya. Quera na niq-uitionu panishacari, Israel pueyari jiyanoehua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoehua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuara quejoosaria moojinia. Pa supuetanaari taraatia miiquioquiaari naacuatej. ²⁰ Moisésri jiyacari rasaaquiaari. Pueyasoori na maniniucuaquiaari. Na queyari na jiiitiquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹ Faraón niyatuuri na paquiaari saniniuujia. Na canashitiquiaari juhua na mueyari. ²² Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanoehua tojishano quiquiaari cutara. Puetunu na miishanojuanaari maninia quiquiaarijuhuj.

²³ Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiocuacuajaari cuno pojori, naa sesojoshiya Israel pueyatani, maja tamonu. ²⁴ Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuujia cuno Egipcio pueyanoori. ²⁵ Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquiniuuquiohuaj. Nojuajaari saaja riuriatasee tama nojori piyotaanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?” ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenarani?” ²⁸ ¿Quiaateeri cua monu panijuhuj, naatej taa quia morucuaa cuno Egipto pueyanocuaani?” ²⁹ Moisés tojishacari naa cuno pueyano sequesanootej, ritia mashiquiaari Egipto jiyajinijiiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

³⁰ Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariquia jiyajinia, pueya sesojosano Sinaí tuhuananu

shuriucua. Pueyaso seruuri tii nocua muetaquiaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiquiaari. Jaara nocua catecanoquiaari na niquiniuria maninia, saaja Jiyaniijia Pueyaso tojirii manijiniji pocuaanoori. ³² Pueyasoori naa na sequequiaaritiaj:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuaj, Jacobo Jiyaniijiano”.

Moisés jaara naa tojiquiaaritiaj, tetecareeri. Majaari mani noshiyano na niquiniu paniniu quiquiaari na puerenuta. ³³ Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuaani, niiori cua quishaqui.

³⁴ Janiyacuajaari cua pueya niquiquiaa Egipto jiyajinia quianoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaaritiaj.

³⁵ Israel pueyari tarijia Moisés juaaquiaaricuaaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuaaj?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminiajuhuaj. Naa miiquiaari pueyaracaanu cariiquia jiyajiniajaariuhuaaj. Cuarenta marijiaari nojori shocojoquiaari pueyaracaanu nojori rucuanajosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquiohuacuajiniojuaja supuenutaniyari. Niocua saa nojuaja tojiri cutara”.

³⁸ Nio Moisésri narta Israel pueyata quiquiaari cariiquia jiyajinia. Nojuajaari Pueyaso seruta pocoojoquiaari Sinaí tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹ Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari. ⁴⁰ Naacuajitiaj, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipiniorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”. ⁴¹ Naacuajitiaj, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasooacara. Nojoriiri jiyacari sacuaraatia timiquioriquiaa. ⁴² Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujuniaa naajionejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariiquia jiyajinia nia camarucuneetasacari cuarenta marijia cuara nia shocojoquiaarijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee?

¡Maja! Niaari puetunu cuno miiquiaarijianaa tama nia jiyatesano pueyasohuacuarajaaja. ⁴³ Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyasora’. Niaari Refam pataquiaarijuhuaj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimiaaji nia mojoquetaconura, nia shuquiritiasacari nojori. Nocuaaji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

⁴⁴ Estebanri socua pohuataquiaari naatej:

—Pa supuetanaari Pueyasora secojojua suhuorotu jiiquiaarijiuhuaj, cariquia jiya-jinia nojori quishacari. Nojoriiri tii racataquiaari Pueyasora niqutiosano saajianeeca. Nocua naajiotasano quiquiaariiri Pueyasora rootasano na pueyara. Pueyasoori cuno suhuorotujiniji pocuaquiaari na pueyacia. Cuno suhuorotuuri shipinishaaquiaari taa Moisés niqutishaaquiaaricuaajani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niqutiquianu quiajanियacuajani”. ⁴⁵ Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucua-cata, nojoriiri Pueyasora secojojua suhuorotu patariquiaa. Pueyasoori cuno taucua-jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari. ⁴⁶ Jacoboori pa supuetanaa jiyaniijia David supuetana quiquiaarijuhuaj. Davidri Pueyasora tojijia quiquiaarijuhuaj. Pueyasoori na shuquiritiaquiaari. Naaratej, Davidri Pueyasora Secojojua tiara tianu paniquiaari juucua. ⁴⁷ David niyanu Salomón cutaraari Pueyasora tiaquiaari. ⁴⁸ Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyasora sequesano caminiujiuniaari naa naajiotaquiaari Pueyasora sequesano nojuaja:

⁴⁹ “ ‘Jiyocuacaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajaarani?’ Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quijara? Maja. ⁵⁰ ¿Majateeri puetunu nio jiyajinia niquishanojuanaa cua juaashiquiata cua miishanocuaaja, jiyocuacaanujuhuaaj?’ ”

⁵¹ Estebanri socua nojori sequequiaari:

—¡Niaari tojitiaashijianucua! ¡Niaari Pueyasora sequesano ruuretaquiaa juhua nia supuetanaa! Nioojaari maja juhua Pueyasora pueya jiuujia. Nia numaacaari maja Pueyasora rupaa na tojiniu paniniu. Niaari pueyaracaanu tojiaquiaa Pueyasora Sohanu niishitiojosano. Niaari Pueyasora tojiyashijianucua juhua nia supuetanaajuhuaaj. ⁵² Nia niishiritioj, ¿nia supuetanaate quena niquiriyatujua Pueyasora sequesano caminiuji-uniaa miitaaquiquiaari? Nia supuetanaari puetunu Pueyasora sequesano caminiuji-uniaajanaa miiquioquiaari naquiya. ¿Quenaaja niquiriyatu nojorijinijiniote miitiasoo cureequiaari? Maja. Nojoriiri tari pucooquiaari noo pueya, canapuate maninia miijia mijiria niriqianojiniji pohuatanuquiaaricuaajani. Cuno maninia miijia jaara tiuquiquiaari, niaari sesa miijia pueya na niqutiocanu nojori mosocoriquiano. ¡Niaari naa mocanu Pueyasora Jiyarosanotej! ¡Niaari pueyaracaanu Pueyasora ruuretaquiaa! ⁵³ Naacuajitij jiyocuacaanuji Pueyasora seya pohuatasano Pueyasora rootasano niaarani, majaari cuno nia tojiniu quiquiaajuhuaaj.

Jesu ruuretajaca mosacari Esteban

⁵⁴ Pueya jaara naa tojitiuquiaari Esteban sequesantej, nojoriiri jiyanojua juaaquioree. Na juaaniutia miaquenuuree na quiaacari. ⁵⁵ Jiyanojua Pueyasora Sohanu cumaquishacari Esteban jiuujia, nojuajaari jiyocuacaanu mauquiaari. Saaja

Pueyaso shacantuuca niqiriiri. Jesu niqiriijiaariuhua na Que Pueyaso miaquetajara nujuaano. ⁵⁶ Naa na niquishacaritij, nojori sequeree juucuaari:

—¡Nia niquishurinijaja! Jiyocuacaanu niquiya riatenonijia. ¡Pueyaso Niyanu niquiyanijia na Que miaquetajara nujuaano!

⁵⁷ Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanoehua sariyocuatuuquiaari na juaaniutiaari. Na nuhuaji, Estebancua cocuatequiaariiri. ⁵⁸ Na caponeetuquiaari Jerusalén tiacajiniijiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuaa.

⁶⁰ Na nuhuaji, mojuquetareeri. Jiyanoehua nacaquiaari na nuhuajiriaari:

—¡Jiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuunaa

¹⁻² Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocua-caari juhuacatecara miitianu coteequiaari puetunu Jesuucua tiuunaaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejoquiaari puetunu Judea jiyajiniajanaa, Samaria jiyajinariano. ³ Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriatasacari, na jayoquiaari tiacojiiri, na nujuatejosocoriquiano nujuatejojuajinia, maajipohua, canuunio.

Jesujiniji pohuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pohuatanuuquiaari pueya niqiuara. ⁵ Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaariuhuj. ⁶ Puetunu pueyajanaari Felipe pohuatasano tojiniuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. ⁷ Samaruhua tohuatanijioriquiaa pueyajiniijiri. Samaruhua tohuareetasacari pueyajiniji, sariyocuaquiaari. Queraatia cumatacuruhuana cusosuhuari naatanijosaaquiaarijuhuaj, sesacujanucuanio. ⁸ Naaratej, puetunu cuno tiacajinia quiniaa pueyajanaari jiyanoehua shuquiriquiaari.

⁹ Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojujaari jiyajeneta na miiijosanota. Naa sequeja tama na cuaqueyajaarija: “Janiya cutaraari tojishano pueyanoni”. ¹⁰ Puetunu pueyajanaari na tojijia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanoehua Pueyaso cumaaca jiiitiaa”.

¹¹ Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuuquiaari. ¹² Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijiaarijuhuaj, cuno Samaria pueyari Jesuucua tiuuquiaari cutara. Canuu, maajipohuajuhuj, nojoriiri tiuquinijosaaquiaari moojinia. ¹³ Simónri Jesuucua tiuuquiaarijuhuaj. Tiuquinishaaquiaarijuhuaj. Na

tiuquinishaanu nuhuaji Felipeecua sacuaquiaariiri. Felipe shootiaquiaari tacuriitiaari Felipe miiijosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriojosano pueya jaara tojiquiaari taa Samaria pueya tiurii Pueyasoo cuani, nojoriiri cuniquiji jiyarotuquiaari Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujiajinia Pueyaso tiuquitiniuria na Sohuanujuhuj. ¹⁶ Majaari Pueyaso Sohuanu tiuquiniu quiquiaari juhuanojuaja nojori jiuujiajinia. Nojoriiri nareja moojinia tiuquinijosano quiquiaari Jesuucua nojori tiuushacari. ¹⁷ Pedro, Juan, cunora na juaashiquia niojoquiaari pueyacuara, nojoriicuara na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajinia tiuquiquiaari cutara.

¹⁸ Simónri niquiri quiaa taa Pueyaso Sohuanu tiuquiquiaari pueya jiuujiajinia Jesu saquiriojosano pueya niasacari na juaashiquia nojoriicuani. Naaratej nojuajaari Jesu saquiriojosano pueya niquitionu paniquiaari cumaneeca juucua, cuno cumaaca na jiitianurajuhuj. ¹⁹ Simónri naa sequequiaari nojori:

—Cua niquitiotureja cuno cumaaca. Janiyacuara Pueyaso Sohuanu panijiacacuara niare cua juaashiquianijia, Pueyaso Sohuanu nojori masenurajuhuj, taa nia miyacuaani.

²⁰ Pedroori na sequequiaari saaja:

—¡Quia cumaneeca cuara shaajeera quiatajuhuj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niquitioquiaa nareja na tojitiajaca pueya. ²¹ ¡Pueyaso Sohuanu cumaacaari maja quiarano! Quioojiaari jiyanojuaa sesa quia Pueyaso niquiara, nocuaji maja na cumaaca niquitiosaanu quiniutianiya quiajaniya. ²² Jiyanojuaa sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajiniatej. ²³ Niishiyacuajaniija, quiaari juhua cartesoo quiyajaa, sesa miiniuucua jiitinio quia quishacariija. Quioojiaari puera najiquitishano quiyajaa jiyanojuaa quia quiniuucujuhuj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioereeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niquiara. Pueya niquiara pohuatatureeri socua Samaria jiya tiacajinia, cuniqui quiniaa tiuuniuria Jesuucujuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etiópe pueyano

²⁶ Cuno nuhuaji, Pueyaso seruuri Felipeecua rosequiaari. Na sequeeseri:

—Quia sanere Felipeana. Pananu shuucujaria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiópia jiyajinijinio pueyanotaari. Cuno pueyanoori riyacajajaaju quiquiaari Etiópia jiya jiyaniija naacutana na quiniuucua, maaji na jiyaniija quiniuucua. Na jiyaniija sesa quiquiaari Candace. Cuno maajiiri cuno pueyano jiyatequiaari Etiópia jiya casami jiitianara, na cumaneeca cojuariquiano nera. Nio Etiópe pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipeeta naacuneetooquiaari nuujinia. ²⁸ Nucuacoji na tacate-sacariuhua na jiyajiniohuara, caballoori na jaatiariquiohua, rucanejotajarujinia cajiyano. Pueyaso rupaa serojoriquiohuari, tariucuacaanu Pueyaso sequesano caminiujunia Isaías naajionejiniji. ²⁹ Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanoquiaari, Felipeeri Etíope pueyano tojiqquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹ Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

³² Etíope pueyanoori nio serojoriquiaa tariucuaacaanu Pueyaso Rupaajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niquiyari na cajaca miatejosacari, nojuajaari naa quiquiaarijiuhuj. Majaari na sariyocuanu quiquiaari quenaaja naquiya na miishacari. ³³ Naquiya miishaaquiaari cararaatiaari. Nocua namiyaquishaquiaariiri. Mashaja na quishacarijia, nojuajaari shaajasaquiaari nio jiyajiniji. Cunora, majaari na muetunu quiquiaari. Niquiohuajuuri mosaquiaari”.

Etíope pueyanoori nio serojoriquiaa Pueyaso rupaajiniji.

³⁴ Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosanojiniani? ¿Tama nojuajiniji pohuataate? ¿Tamonujiniji soj?

³⁵ Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohuataquiaari, taa quiarjia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. ³⁶ Nojori quiasacari nucuaco, caminiaco shuriuquioco tajitariquiaari. Etíope pueyano jaara caminiaco niqiquiaari, Felipe sequereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu.

Cuno pueyanoori na riucuaaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanijia.

³⁸ Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiuushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaaji. Nojuajaari juucua tacarecuaquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojiniaara na quiniuria

¹ Sauloori jiyacari pueyaracaanu Jesuucua tiuuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyaniijiaacua quiaquiaari. ² Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojua tiaca camarucuaacuara Damasco tiacajiniani, cuno naajioneeta cua tiuquiiionura nojori rerejojuacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaniya niyara Jerusalén tiajinianani, canuu, maajipohuanio.

³ Naacujitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ishacantuucaari canashiyaquiji nunuquiaari jiyocuacaanuji!
⁴ Sauloori juhua jatasaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riucuaaree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miiti-asacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijiya.

⁶ Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequere:

—Quia sanere. Naajaa quia tiuquishii Damasco tiacajinia. Quiaari tii sequesaanu-taniya cua panishano quia miiniuria.

⁷ Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niqiniu paniquiaari. Saaja shaaquiiri quiriquiaa.

⁸ Na nuhuaji, Sauloori na pojosaquiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajiniara. ⁹ Nojuajaari tii camueenujuquiaari jiuujianaraca juuca, cariyujuaru na quishacari. Majaari na miaquenu quiquiaari pueyaracaanu cariyujuaru na quishacari. Ratuyaquiquiaarijiaariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijiaari na sequere:

—Quiaritia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nu Maniniu. Sauloori cuno tiajinia secojiya Pueyaso.

¹² Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

¹³ Ananías jaara naa tojiquiaari Jiyaniijia sequeyanotej, nojuajaari sequere:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniaari! ¹⁴ Pueyacuara secojona jiyaniijia jiyarosanaari cunohuj, quiaritia niya tiuquiriini. ¡Nojuajanaari quia secojona pueya quioonutaniya, morojonucuaca canaa na jiyatasocoriquiano Jerusalén tiacajiniara!

¹⁵ Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niqiara. Taucuaca jiyaniijianucua poojotanutaniya janiyajinijiaariuhuj, Israel pueyano. ¹⁶ Janiyacuajaari Saulo niishitiojonutaniyani taa jyanohua naquiya pueya miitianutaniya nojuajani, janiyajiniji na pohuatasacari.

¹⁷ Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacua-jani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

¹⁸ Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiuushacari. ¹⁹ Na nuhuaji, miaquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuuniaa puey-ata.

Jesujiniji Saulo pohuatasacari Damasco tiacajinia

²⁰ Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

²¹ Naa nojori tojishacari Saulo pocuaanotej, pueyari shiriiquiquiaari. Na shiriiquitiu-niutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaariuhuj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiosocoriquiano, nojori nujuatejosaanura.

²² Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. ²⁴ Tamonuuri Sauloocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuca sohuacaraca quiquiaari puetunu na shocuajanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanuji puereetuca canaasatujiniaari. Sauloori naa mashiquiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasocua tiuujaquinio naasucua jiyanotej.

²⁷ Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

²⁸ Sauloori narta Jesuucua tiuuniaa pueyata jiyojequiaari cuniquijia Jerusalén tiacajinia. Nojoritia rucanejojuuari, mariyata Jesujiniji pohuataja juhuajaniyari. ²⁹ Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰ Jesuucua

tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniqijiji jiyarosaaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³² Pedroori pueyaracaanu rucuanerajua Jesuucua tiuuniaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niqiniuucua quiaquiaari Lida tiacajiniajuhuaj. ³³ Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. ³⁴ Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jee care.

Eneasri ritia sanequiaari. ³⁵ Puetunu pueyajanaa Lida tiacajinia quiniaa, mariyata Sarón tiacajininio pueyajuhaj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

Dorcas samiitianishaanujiniji pohuatasano

³⁶ Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia mijia maaji quiquiaari. Casamijiuniucua pueya niqitiojojua nareja na jiiitasanojinijiiri. ³⁷ Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸ Jope tiacaari cateca quiya Lida tiacajiniji. Pedroori Lida tiacajinia quiriqiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaarihua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqitijioquiaari Dorcas cusupuenusano toqueya, cacojoquiyanio. Cunoori quiquiaari na cusupuenusano saminio na quishacarijia. ⁴⁰ Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juaashiquiajiniji na quiaquiaari. Na nujuatereeri. Na nuhuaji sequesquiaari Jesuucua tiuuniaa pueyari, mashiquiopuenio:

—Miji pueyanaa, ¡nia nimia!

Nojori tiuquitiasacari, saaja maaji niqutiushii nujuaanoori, tariucua saminio. ⁴² Pedro miishanoori puetunu Jope tiacajiniajanaa niishishaaquiaari. Queraatia

pueyari cunora Jesuucua tiuuquiaari. ⁴³ Pedroori na nuhuaji janiya camueenujuquiaariijaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

10

Pedro quiasacari Cornelio niqiniuucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuri sesojosaaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumaneecajiniji niqutiojojua quiquiaari nareyajuhua, casamiijiuniucua Judiocuaca niqutiojosocoriquiano. Pueyaso secojojua pueyaracaanuuri. ³ Tamonu juuca, tariucua pananu piriushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequeeseri:

—Cornelionaa.

⁴ Cornelioori saaja Pueyaso seru shootiaquiaari na shiriiquiniutia. Na nuhuaji na riucuaareeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniuucua, quia jiitiasanojiniji quia niqutiojosacari nareja casamiijiuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuj. ⁶ Nojuajaari na sesaanucua pueyano tiajinia quiya. Tia camaruuri shoque majeetejojua piiquiajinia. Cunoori na poonijosano. Na tiaari shoniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajanaya.

⁷ Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuuhua. Maninia na jiyaniijia naacujua quiquiaariijaariuhua. ⁸ Cornelio jiyarosaacariija na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹ Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacariija, Pueyasoori casaa na niqutiquiaari juhua na maquenujinia, na quishacari tia cacojiria. ¹¹ Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. ¹² Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuacaanu jaacatujuacajuhua. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano.

¹³ Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

¹⁴ Pedroori na riucuaaree:

—¡Maja cua Jiyaniijianaa! ¿Janiyatucua taa miaquere sacuaraatia cua miaquesooni? ¡Cunocuaajari tarijia quia sequesano canaa pueresocoriquiano!

¹⁵ Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, sonaqueeri tacaniasaaquiaariuhua jiyocuacaanu. ¹⁷ Pedro tacaashacari naa na niquniuucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tiajinia. ¹⁸ Nojoriiri tohuateyaji nacaquiaari:

—¿Niya quiyate Simón jiyaniushano pueyano? Na sesaari Pedrojuhuaj.

¹⁹ Pedroori juhuanajuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequeree:

—Pedronaa, jiuujanaraca pueya quia pajeya. ²⁰ Tariucuaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuan.

²¹ Pedroori Cornelio jiyarosano pueyacua rosequiaari. Nojori sequeseeri:

—Janiyacuaja nia pajesano pueyanoni. ¿Casaacua nia niyareecuarani?

²² Nojoriiri na riucuaaree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuan. Maninia miijia pueyanoori. Jiyaniijia Pueyaso tojjiajaariuhuj. Puetunu Judiocuacajanaari maninia na miiniuucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³ Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maquesejaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaariijaariuhua Jope tiacajiniiniao Jesuucua tiunuaa pueya.

²⁴ Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenatanio. Cornelioori puetunu nio pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. ²⁵ Pedro tiuquishacari, Cornelioori nocua tohuataquiaari. Carijiniacuma na naacuseeri. Pedrocuara mojuquetaquiaariiri juhua Pueyasocuara. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

²⁷ Tiaco na tiuquitiasacari, pocoojoriquiaa Pedrotaari. Pedro tiuquishacari, saaja queraatia pueya niquishiiri. ²⁸ Pedroori nojori sequeree:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupuenura taucuaca, maja quenaaja tahue tiajinia canaa tiuquiniuriajuhuaj. Saniniuujia, Pueyasoori quiarijia cua niishitorucuaa cutara maja cua soonura tamasa. Taucuacaari maja sacuaraatia quiarijia quiria. ²⁹ Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuurucuaa janiyani?

³⁰ Cornelioori na riucuaaree:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriqiaa, tee pananu tiuyanijia. Cuno pueyano toqueeri shacantuque quiriqiaa. ³¹ Cua sequereeri: “Cornelionaa, Pueyasoori quia secojosano tojjirii. Naajuhuj, niishiyari taa quia niqutiojoquiaa quia casami casamiijiuniucuan. ³² Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuaj. Nojuajaari na sesaanucua tiajinia quiya, shoniniacu caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocoojonutaniyari”. Pueyaso seruuri naa cua sequerucuaaqui Simónnaa. ³³ Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia

nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatara canaa tojishocoriquiano quiarijia, taa Pueyaso niishitiojorucuaa quia-janiya canaa quia pohuatanuracuajani.

Pedro pohuatasacari Cornelio tiajinia

³⁴ Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiajata na niquiniu pajaniya. Majaari nia jiyaniniu Pueyasoori saaja Judiocuacaacua jiaa-tiaa, Israel pueya nojori quiniuucua. Maja. Nojuajaari tamasaacua jiaatiaa-juhuaj. ³⁵ Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhuj, maninia miijia nojori quishacari. ³⁶ Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quini-uria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. ³⁷ Tiuquinijiona Juanri Pueyaso rupaa pohuataquiaari pueya tiuquini-jiosaanura. Na nuhuaji, Jesuuri cutara miishano miiniu coteequiaari Pueyaso cumaa-cata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajiniajanaano. ³⁸ Niaari niishiyajuhuj, Pueyasoori na Sohuanu niquitioquiaari Jesu, na cumaaca na jiitianura. Nojuajaari maninia mi-iquiaari pueya, tiquiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaariuhuj. Puetunu naa miijia maniniajanaari na Que Pueyaso quiniuucua nata. ³⁹ Canaari puetunu na miishanojuanaa niquiquiaarini, puetunu canaa Judiocuaca jiyajiniajanaa, Jerusalén tiacajiniajuhuaj. Janiyari see-tanujuanaa canaa niquishano pohuataani. Na nuhuaji, pueyari na teetequiaari niy-acutesanojinia. Tii na cusojuatuquiaariiri. ⁴⁰ Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacu na mueratereeri. ⁴¹ Majaari na muetanu quiquiaari puetunu pueyacuajanaa. Saaja canaacua mue-taquiaariiri, teyano Pueyaso saquiriojoquiaari coteenu tariucuacaanucuajani, Jesu-jiniji pohuatanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijiuhuj. ⁴² Jesu jaara canaa jiyaramiquiquiaari, nojuajaari canaa sequequiaari: “Naa nia pohuatara pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua neque-soreeriquianojuhuaj’ ”. ⁴³ Tariucuacaanu pueyara Pueyaso sequesano caminiujiuni-aari naa juhuacarijia sequetuquiaari Jesujinijjiuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

Pueyaso Sohuanu tiuquishacari taucuaca jiuujiajiniajuhuaj

⁴⁴ Pedro pohuatasacarijia taucuaca niquiara, Pueyaso Sohuanuuri Pedro tojitianaa taucuacaacua niquiaari, nojori jiuujiajinia na tiuquiniuria. ⁴⁵ Pueyasooocua tiu-νιαa Judiocuacani, Pedrota nijioquiaari Jope tiacajinijini, nojoriiri shiriiquiquiaari Pueyaso niquitiosacari cuno taucuaca na Sohuanu. ⁴⁶ Cuno taucuacaari nojori niquiara pocooriquiaa tamaatia rupaacajinia. Pueyaso maniniuhuaqueetaturiquiaari. ⁴⁷ Naaratej, Pedroori sequequiaari:

—Nio pueyari tari jiitiaa Pueyaso Sohuanu noojiajinia, taa pa jiitiaacuaani. Naaratej, nojori cuara tiuquinijiosaaria quiarijia. ¿Cantucua nojori tenujure maja na tiuquini-jiosaanurani?

⁴⁸ Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.

11

Taucuacajiniji Pedro pohuatasacari Jerusalén tiacajinia

¹ Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pohuatasaaquiaaritij: “Taucuacanaari Pueyaso rupaacua tiuuriucuaajuhuj”. ² Nocuaji, Pedro jaara tacatequiaariuhua Jerusalén tiacajiniohua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatejonu panijiaca quiquiaari, taucuaca quiniuria seetanujuanaa Pueyaso pueya nojoriria. ³ Nojoriiri naa juaaquiaari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuj! Quia miishanoori maja maninia taa Pueyaso rootaquiaari tariucuacaanucujani.

⁴ Pedroori suraatiaja nojori pohuataquiaari puetunujuanaa tahuajiniji. Coteenu pohuataree na niquishano juhua na maquenujiniaari. Naa sequereeri:

⁵—Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niquiriini. Jiyareta cucujanaa roshinitiasaareeri. ⁶ Cua niquishacari sonaquejinia cua niishiniuria casaate mii quiriquiaani, janiyari saa puereeta casami niquiriijiaani. Janiyari niquiriini jiyacua rucojuaca, sacocuajuhuj, jiyocuacaanu jaacuatujuacanio. Puetunujuaanaari pa miaquesocoriquiano pa pueresano casa quiriqiaa. ⁷ Janiyari jiyacari jiyocuacaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucuaareni: “¡Maja cua Jiyaniijiana! ¿Janiyatucua taa miaquere sacuraatia cua miaquesooni?” ⁹ Jiyocuacaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuacaanuuri. ¹¹ Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. ¹² Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojiniucuatej, janiyari cunora juhujaniya nojoritia quiaarucuaani. Nio seis parta Jesuucua tiuuniaa pueyari cuata quiojiyarucuaajuhuj. Canaari mariyata cuno tahua tiajinia tiuquishiini. ¹³ Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masunuucua. Na sesaari Pedrojuhuj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. ¹⁵ Saaja cua coteesacari Pueyaso rupaa pohuatanu nojori niqiara, Pueyaso Sohuanuuri nojoriicua niquianu, taa pocua coteenujuanaa na niquianucujani. ¹⁶ Janiyari jiyacari niishiquii pa Jiyaniijia sequesanonni. Naa na sequesanotej: “Juanri moojinia tiuquinijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. ¹⁷ Naacuajitij, taucuaca tiushacari pa Jiyaniijiaacua, Pueyasoori na Sohuanu niqutiorucuaa nojorijuhuj, taa na niqutiocanu pajaniyacuaani. Cante Jesucristoocua tiuyani, Pueyasoori na Sohuanu na niqutioya. ¿Janiyatucua taa Pueyaso sequereruhuarini: “Maja cuno pojori niqutionu quia Sohuanu”?

¹⁸ Jerusalén tiacajinia quiniaa Pueyaso pueya jaara tojiquiaari naa Pedro sequesanotej, nojoriiri sanaajetaquiaari. Tama nojorijiaarijia Pueyaso maniniuhuaqueetaquiaari. Naa sequetuquiaariiri:

—¡Pueyasojuhuanaja jiyanoohua maninia! Nojuajaari taucuaca panijajuhuj nojori tacatonura noojia sesa nojori miishanojiniji, jiyanooshano nojori quiniuriajuhuj, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaaricuaa, Judiocuacaari juhuacatecara Jesuucua tiuunaa miiquiaari naquiyajuhuj. Queraatia Jesuucua tiuunaa pueyari nocuaji mashiyocuatuaaari. Nojoriiri tiquiyocua nyaquejoquiaari. Noojiaqueyari na mashiyocuatuaaari tiuquiiioquiaari Fenicia jiyajinia. Tamasacaari tiuquiiioquiaari Chipre jiyajinia. Noojiaqueyari Antioquiya tiacajinia tiuquiiioquiaarijihuaj. Nojoriiri tii pahuatanuuquiaari Pueyaso rupaa Jesujiniji saa Judiocuacaraja, maja taucucara.

²⁰ Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiiioquiaari Antioquiya tiacajinia, nojoriiri Jesujiniji pahuataquiaari Griegohua niqiarajuhuj. ²¹ Jiyaniijia Jesu cumaacaari nojoritia quiquiaarijihuaj. Naacujitij, queraatia Griegohuari tariucuaaanu tama nojori niishishanojuaaja cartequiaari, Jiyaniijia Jesu tojijiaa nojori quiniuria.

²² Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuquiaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jiyanojuaa shuquiriquiaari na niqishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijiaa nia quiri.

²⁴ Bernabeeri jiyanojuaa maninia pueyano quiquiaari. Pueyaso Sohuuanuuri noojia cumaquiquiaari jiyanojuaa. Naacujitij, na pahuatasacari Jesujiniji, queraatia pueyari Jiyaniijiaacua tiuquiquiaari.

²⁵ Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. ²⁶ Nojori quishacari Pueyaso pueyata cuno tiacajinia, nojoriiri tii shocotequiaari niquiriyatu marijia. Nojoriiri queraatia Pueyaso pueya niishitiojonuuquiaari. Tii Antioquiya tiacajiniani, Jesuucua tiuunaa pueyari coteenu sesojosaaquiaari “Cristiano”. Nioori pueyano rupajinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiujiunaa pueyari tiuquiiioquiaari Antioquiya tiacajinia. ²⁸ Tamonu nojorijinijinionii, na sesa quiquiaari Ágabo. Nojuajaari Jesuucua tiuunaa pueya rerejonaa tajiniji nujuaquiaari pocuanura. Naa caminiujiuquiaari Pueyaso Sohuuanu niishitiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césartuhuj. Nojuajaari Roma tiacajiniji jiiitiaquiaari puetunu jiyacajanaa. ²⁹ Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiiitiaquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jiiitiasanojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiiitanaa niqutioquiaari saniniuujia Judea jiyajinia.

12

Jacobo nacatasaanujiniji pahuatasano, Pedro nujuatesaanujinijinio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuunaa miiquiaari naquiya. Noojiaqueya quiootequiaari na saniitiosocoriquiano nujuatejojuajiniaari. ² Naa Juan tarajanu Santiago motequiaaricuaajaari nijiniaquetucujia mueruuta. ³ Judiocuacaari shuquiriquiaari naa nojori jiyaniijia motesacari Santiagotej.

Naaratej, Herodesri Pedro quiatequiaari na soldadohuajuhuj, Judiocuaca timitiatura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoreesocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootoquiaariiri; coteenu cuatro, na nuhuaji socua cuatro. Nojoriiri naa sanitijiootoquiaaritij. ⁵ Pedroori maninia cojuasaaquiaari nujuatejojuajinia. Jiyacaritij, Jesuucua tiuuniaa pueyari saniniuujia nocuara secojonuuriquiaa jiyanoehua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarijia, quera Herodes tohuatesee tariquicuajaji Pedroni, na nequesoreesocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuatata na numatucua cajiniocua. Tamasaca soldadohuari nujuatejojuaja tohuateyaji cojuariquiaacujua. ⁷ Jiyacaritij, Pueyaso seruuri canashiyaquiji coretaquiaari jiyareta Pedro shuriucujanaa nujuatejojuaja jiniacuma. Na shacantuucaari jiyanoehua cuhuataquiaari nujuatejojuaja. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. ⁸ Pueyaso seruuri na sequereehujaj:

—¡Quia cajiniocua camarucujua quia saatiri socua! ¡Quia sapatu quia cushirijuhuj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seruuri nuhuaji sacuariquiaajaa. Jiyanoehua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniriquiaa na maquenujinia niquiya naasucua. ¹⁰ Nojoriiri coteenu shocoma na tacoji cojuanaa soldadohua. Socua na tacoji cojuanaa tajitiumiaajaariuhuj. Naa quenaacoturee nujuatejojuaja tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuaara tiaca jiuujiaaco. Na nuhuaji, na shuriucujaji shaajequeeri. ¹¹ Pedroori jiyacari shusha niishiquii. Naa sequereeri:

—¡Seetanujanaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacujijuhuj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuj. Cuno tiajinia, queraatia Pueyaso pueyari Pedrocuara tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seruuri sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. ¹⁴ Nojuajaari saaja Pedro tojishii tia camarujiyaniquiyano, na tiotiu na riatanura nocujaji. Niyacoo tojishacari seetanujanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajajajaj nooj, tohuateyaji nujuatej!

¹⁵ Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacujani.

Niyacoori nojori sequenu pacutequiaariuhua:

—¡Taaquiririnij! ¡Pedrocuaaquiniatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuacuja.

¹⁶ Nojori nacojosacari tiaco, Pedroori tohuateyaji piquijioriquiaajaa. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriiquitiuquiaari. ¹⁷ Pedroori nojori sanaajaree jiyacari na juaashiquiata. Cuniqum quiniaa pohuatareeri taa Pueyaso tohuaterohua nojuaja nujuatejojuajinijini. Pedroori naa sequequiaari nojoritij:

—Niocua naa pohuatare Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuajinia cojuanaa soldadohuari jiyanoehua shiri-iquitiuquiaari. Majaari nojori niishiniu quiquiaari taa Pedro miirii nujuatejojuajiniji nojori tajinijini. Tama nojorijaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaaquiniucua Pedro!

¹⁹ Herodes niishishacari, na shuriucua nujuatunaa soldadoehua jiyaroquiaariiri nujuatejojuajinia nojori pajenura Pedro. Nojori jaara na riuriataaquiquiaari, Herodesri nujuatejojuajinia Pedro cojuanaa soldadoehua nequesoreequiaari na juaaniutia, na niishiniuria juucua taa Pedro juurequeree nojori shuriucujini. Na nuhuaji, Herodesri jiyanoehua na juaaniutia na shuriucua nujuatunaa soldadoehua sequequiaari, nojori puecoonura narta soldadoehua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

Herodes shaajenujiniji pohuatasano

²⁰ Jiyacaritij, Herodesri jiyanoehua juaariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinijinio pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequeree:

—Quiocua quia jiyaniijia sequere, canaa nata jiyanoootionu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiiitasano pueyajiniji. Nojoriiri jiyamitia jeeatoonu paniriquiaa cuno jiyaniijiaata, maninia nojori quiniuhuara nata, Herodes niquitiojotenuhuara na jiiitasano pueya na miajajaura Sidón tiacajinijinio pueya, Tiro tiacajinijinio pueyano. ²¹ Herodes seruuri nojori sequequiaariuhua:

—Niocuaana tamonu juuca nimia, jiyaniijiaata nia pocoojonura.

Na nuhuaji, cuno pueyari na sequesano juucajinia niquiaariuhua. Jiyaniijia Herodesri nojoriicujia maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajitiujinia cajiriohuari. Tiji pocuaquiaari cuno pueyacuaari. ²² Puetunu cuniqum quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³ Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴ Pueyaso rupaari saniniuujia socua niyacasaquiaari, tiqiyocua pohuatasacari puetunu pueya niqiarajanaa. Naacuaajitij, Pueyasoocua tiuunaa pueyari socua queraatiara canequiaarijiuhuj. ²⁵ Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jitianaa, nojoriiri ritia quiojoquiaariuhua Antioquiya tiacajinihua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijiuhuj Marco.

13

Saulo Bernabeeta rucuanajonu coteesacari Jesujiniji pohuatanura tiqiyocua

¹ Antioquiya tiacajinia Jesuucua tiuunaa pueyajinijinioni, noojiaqueyari quiquiaari Pueyaso sequenu panishano Pueyaso pueyara caminiujiunaa. Quiquiaarijiariuhua Pueyaso Rupaa niishitijonaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijiariuhua Saulo. ² Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanoahuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiara nucuaco Seleucia tiacajiniara, shoniacu caminia casaqueyaji. Nojoriiri cuniquiji quiaquiaari puereetuca buquejia Chipre jiyaniishano jiyajiniara. Chipre jiyari jiya tucuaatiaja, shoniacu caminia jiuujiajia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajinaqueyajanaari. Juanri nojoritia quiriquiaajuhuj, nojori naacuriquiano. ⁶ Naa nojori rucojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuaja Pueyaso sequenu panishano caminiujiunia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohua niishijia quiquiaari. Nojuajaari Bernabé masuquiaari Saulonio, nojori pohuatanura Pueyaso rupaa nojuaja. ⁸ Cuno shimiacu sesaari Griego rupajinia sequesaaquiaari Elimas. Nojuajaari saaja cuno jiyaniijia niqiarara cuaracashitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojinu. Jiyanohua sesaari nojori pohuatasano. Quia sapojotiuyano.

⁹ Saulo sesaari Pablo quiquiaarijiuhuj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ —¡Sesaaca niyanu sequenaa! ¡Maninia miijiaaca paracaajianaa! ¿Casaara pueya quia tenujiya Pueyasoocujini? ¹¹ ¡Cua Jiyaniijiaari quiarijia quia saniitionutaniya!

¡Quiaari cariyojuarura quiniutianiya seetanujuanaa! ¡Quiaari pasaja tarishiniutianiya cariyojuaru quia quishacari!

Jiyacaritij, juhua niniquiaari na namijiajinia cajimiaa. Cariyojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. ¹² Cuno jiyaniijia jaara naa niquiquiaaritij, Pueyasocua tiuuriiri na niquiara nojori pohuatasacari shanohua Jiyaniijia Jesujiniji.

Pablo, Bernabé quishacari Antioquiya tiacajinia, Pisidia jiyajinia

¹³ Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaji. Tiji riujuuuquiaari iuhua Jerusalén tiacajinihuari. ¹⁴ Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujuu tiajinia. Na tiuquishacari, cajitiushiiri. ¹⁵ Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujiuniaa naajiotasanoori serojosaaquiaarijuhuaj. Na nuhuaji, rerejojua tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarjia niya quinia niquiara.

¹⁶ Pabloori sanequiaari. Na juaashiquiata sanaajaree pueyari. Naa nojori sequereeri: —Nia tojitiare cuarta Israel pueyanaa, nijaniyajuhuj, canapuate Pueyaso tojitiyacacuajani tamasaca pueyapuejinijinio. ¹⁷ Paari sequequiaani: “Pueyasoori pa Jiyaniijia, Israel pueya pa quiniucua”. Seetanujuanaa, paacuajaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriqiano. Na nuhuaji, jyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiquiaari cuno jiyajiniji na cumaacata. ¹⁸ Cuarenta marijaari pa supuetanaa shoconujuquiaari pueyaracaanu nojori rucoojosacari najuhuaa cariiquia jiyajinia. Pueyasoori jiyacari nojori rejeretaquiaari na tojitiaaquishacari nojuaja. ¹⁹ Na nuhuaji, Pueyaso cumaacata, siete tamaatiuucua rupaa pocujaca taucuacaari puecoosaaquiaari Canaán jiyajiniji, saniniuuja cuno jiya na niquitiosocoriquiano pa supuetanaa. ²⁰ Pa supuetanaa jaara Canaán jiya camaruhua quiquiaari tari, socua cuatrociento cincuenta marijaari nojori shoconujuquiaari saaja nequesoreenaa jiiti-asacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujiunia quiquiaarijuhuaj. ²¹ Samuel quishacari, pa supuetanaari Pueyaso secojonuuquiaari na panitiushacari jiyaniijia, nojori jiitariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiohuacuajinio supueno pueyano. Saúlri nareja cuarenta marija shocotejoquiaari pa supuetanaa jiyaniijia na quishacari. ²² Na nuhuaji, Pueyasoori Saúl soojotaquiaariuhua Saúl tojiyaquiniuucua nojuaja. Saúl niti David jiyatequiaariuhua Israel pueya jiyaniijia saniniuurijia. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³ Quiari naataja, Pueyasoori na sequesano tohuateequiaari na mueratesacari pocujaji Tacuna. Nojuajaari Jesu, David niquiohuacuajinio supuenoni. Pueyasoori na seerataquiaari Israel pueyacuaji Tacuna quiriqiano, taa na sequequiaari tariucuacaanucujani. ²⁴ Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niquiarajanaa. Tiuquinijiona Juanri nojori sequequiaari nojia nojori tacatonuhua Pueyasocua, naajuhuj, moojinia nojori tiuquinijiosaanura, Pueyaso tojijia nojori

quiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosani taa nia jiyaniquiaa najuhuana janiyacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijia-janaa cutara. Janiya maara jiyanoohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ ‘Cuarta pueyanaa, niajaniya cante Abraham niquiohuacuajinio pueyacujani, cua tojitiare, niajanijahuaj taucucanaa, canapute Pueyaso tojijiacacujani. Niaara-noori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijuhuaj Pueyaso sequesano caminiujiuniaa naajiotasano tariucuaaanu. Cunoori najuhuana nojori serojonuusano puetunu samaatenu juucajanaa. Naacuajitij, nojori jaara moquiaari Jesu, maninia tohuatequiaariiri Pueyaso sequesano caminiujiuniaa naajiotasano, taa Jesujiniji sequesaaquiaari tariucuaaanucujani. ²⁸ Jesuuri seetanujuanaa maja na miiniu quiquiaari sesa. Tama nojorijiaaritia juhua sesa miijiaara na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹ Nojori jaara tari mi-iquiaari taa nojuajiniji naajiotasano quiya tariucuaaanu Pueyaso Rupaajiniacuajani, na roshinitiuquiaari niyacutesanojinijiiri. Raaco na niatureeri. ³⁰ Naajaa, macu na quishacari, Pueyasoori saaja na samiitianiquiaariuhua. ³¹ Na samiitianu nuhuaji, Jesuuri sequeyarucua na pueyacia mueranacujuquiaari, noo pojoriicua canapute na tarajaquiaari na quiasacari Galilea jiyajiniji Jerusalén tiacajiniaracuajani. Nojoricua-jaari quiaritia nojuajiniji poojotaniuhua puetunu pueya niquiarajanaa.

³² ‘Canaari timiyani canaa pohuatasacari niajaniya, ¡Pueyaso pohuatasano pa supuetanaari tari tohuatecanu! ¡Pocujaji Tacunacuajaari tari miiquianu puetunu pa jiyanooshaanurajanaa! ³³ Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuatecanu, pa supuetanaa Israel pueyacua-jinio pa quiniuucua. Pueyasoori tari tohuatecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia: “Quiaari cua Niyanucujaja. Janiyari quiaritia quia samiitianiriini”.

³⁴ Pueyasocujajaari sequequiaari, nojuacuajaari na samiitianiniutianiuhua na mo-queyaquiniuucujaji na raaco. Nioori naajiotasano quiyajuhua tariucuaaanu Pueyaso Rupaajinia. Naa sequeyari:

“Janiyari maninia niaara miiniutianiyanitaa cua sequequiaari Davidcuajani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na mo-quenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. ³⁷ Noo Jesu saniniuujia, Pueyaso cutaraari na samiitianiquiaariuhua. Majaari na moquenu quiquiaari cutara. ³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishano-jiniji jiyanooshaanutaniya. ³⁹ Moisés Rootasanojinia, paari tariucuaaanu niishitio-josaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiaritia cutara, canapute Jesuucua tiuya saniniuujia, nojoriiri puetunu sesa na miishanojinijianaa jiyanooshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruuretare.

Pueyasoori na tojiyashijiaca saniitionutaniya taa tariucuacaanu Pueyaso sequesano caminiujiuniaa sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatate, niaari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucuacaari Judiocuacaacua pacunaa quiquiaari, Judiocuaca nojori quiniurijuhuj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadó canaa pohuatateeruhuj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocua-caari nojori nuhuajiquiaari, queraatia taucuacajinijinio Judiocuacaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujia nia quiri. Majaari nocuaji taacanunu. Nojuacujaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejoquiaari. ⁴⁵ Judiocuaca secojojua tia camarucua jaara niquiquiaari queraatia pueya na rerejojuajinia mishiyano, Pablo pohuatasano na tojitianura, nojoriiri juaaquioquiaari. Nojoriiri tama sequetooquiaar-ijiaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijiaariuhuj:

—¡Pabloori maja maninia na niishiniu Pueyaso rupaa! ¡Najuhuaana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacujajiqui, cuarta Judiocucanaa. Canaacujaari naa panitiaja niajanijatej, Pueyaso rupaa canaa coteetanura pohuatanu niajanija, Pueyaso saquiriojosano Judiocuaca nia quiniucua. Niaacujaari saa na ruuretareejaa. ¡Majaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuujia taucuacaacua quianutaniyani, Pueyaso rupaa canaa pohuatanura nojori niquiara.

⁴⁷ Canaa Jiyaniijia jaara canaa jiyaramiquiquiaari, nojuajaari naa canaa sequequiaar-itij: “Quia jiyatequiaari mijiria cuhuatariquianonijia. Quia pohuatasano janiyajini-jiiri caminiujiushaanutaniya taucuaca niquiara puetunu jiya puequeetujiniajanaa, Pueyaso jiyanooniuria nojoriijuhuj”.

⁴⁸ Cuniqui quiniaa taucuaca jaara naa tojiquiaari sequeshiyanotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriquianocua-jani, pueyaracaanu nata rishiniuriacuajani, jiyacaritij, nojoriiri Jesuucua tiuquiaari.

⁴⁹ Jiyaniijia rupaari pohuatasaaquiaari puetunu cuno jiyajiniajanaa. ⁵⁰ Judiocuacaari na juaaniutia Pueyaso panijia maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucujajariuhuj, mariyata cuno jiyajiniji nojori taanuunura Pablo, Bernabeenio.

⁵¹ Naaratej, na nuhuajiria, Pablo, Bernabeenio, nojoriiri na niohuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeecua na tiutianu quiniutianiya Pueyaso jiyanoyaquishacari nojori. Na nuhuaji, Pabloori Bernabeeta

cuno tiacajiniji quiaquiaari Iconio tiacajinia. ⁵² Jesuucua tiuuniaa pueyari saniniuujia shuquiriaatia jateequiaari Antioquiya tiacajinia, nojori jiitiasacari Pueyaso Sohuanu.

14

Pablo, Bernabé quishacari Iconio tiacajinia

¹ Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuquiaari, Judiocuaca, taucuacanio. ² Noojiaqueya Judiocuacajinijiniori maja na tojinu paniniu quiquiaari Jesujiniji pohuatasano. Cuno pojoriiri taucuaca shiniujuquiaari nojori juaaniuria Jesuucua tiuuniaa pueya. ³ Pabloori, Bernabeeta cunora socua jiyojequiaari pueyara-caanu cuniqui, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijiajiniji nojori pohuatasacari. Seetanujuanaa, Jiyaniijaari nojori naacuquiaari jyanohua cutara maninia miishano nojori miiniuria, pueya naatani-jionurajuhua. Jiyaniijaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. ⁴ Cuno tiacajinia quiniaa pueyari raquitiaquiaari. Noojiaqueyari tama narta Judiocuaca tojiquiaariijaaja. Saniniuujia, tamasaari Jesu jiyaramiquishano pueya tojijara quiquiaari. Nojoriiri naa quiquiaari cuno tiacajinia. ⁵ Naa nojori quishacaritij, Judiocuacaari taucuacata rojotooquiaari cuno tiacajinia jiyaniijanucua. Naa rojotooquiaariiri nojori sesacanura Pablo, Bernabeeno, na jacutunura saitiajuhua. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuuquiaariiri Licaonia jiyajinara. Nojoriiri Litra tiacajinia quiojoquiaari, Derbe tiacajinariano, cuno caapiqui tiaca shocua quijiaca tiacajiniajuhua. ⁷ Nojoriiri tii poojotaquiaari Jesujiniji nojori niishishano.

Litra tiacajinia pueya jacutusacari Pablo saitia

⁸ Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaquiaarijuhuanajaj. Majaari na pooniniu quijia na cajituijiniji. ⁹ Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuanaa tiuuriquiaa na pohuatasanoocua. Naa Jesuucua na tiuuniucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanee. Rucuanenu saniriiri. ¹¹ Cuno Licaonia pueya jaara niqituuquiaari naa Pablo miishanotej, nojoriiri tama na rupaajiniaajaaja sequetuuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niqishano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniaajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jyanohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohuara cuno jiyajinia. ¹³ Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuuquiaari, Pabloocua nojori puecoosocoriquiano Bernabeecuaranio, juhua nojori pueyasohuacuara. Maniniushitiajara naana shuucuaca shiyosano patootaquiaariijaariuhua. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicua juhua Pueyasocua. ¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori

tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa niajaniiy-acuaani! ¡Canaari naacua niyarucuaa niaacuatej canaa sequenura niajaniya, puetunu nio najuhuana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

¹⁹ Jiyacaritij, Antioquiya tiacajinijinio Judiocuacaari tii tiuquiiioseequiaari, Iconio tiacajinijinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pohnataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujiuutiaquiaariuhua. Tiuquiiioquiaariuhuari Litra tiacajinia, Iconio tiacajinia, Antioquiya tiacajinianio. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapnete Pueyaso shuriucua quiriqianoni, nojoriiri naquiya miiniutianiya mijiria.

²³ Nojoriiri maninia Pueyaso tojijiaa pueya saquiriojotuquiaari, nojori jiyatesocoriquiano Pueyaso pueya jiitariquiano. Naa miitiuquiaari puetunu cuno tiacajinijianaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocuara:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiitianura maninia.

Pablo tacatesacariuhua Bernabeeta Siria jiyajinia Antioquiya tiacajiniara

²⁴ Nojori riujiuuniuhuara Antioquiya tiacajiniohuara, Pisidia jiya shocotumohuari. Na nuhuaji, tiuquiiioquiaariuhua Panfilia jiyajiniaari. ²⁵ Tii Pueyaso rupaa pohnatatuquiaari Perge tiacajiniaari cuno pueya niqiara. Nojori pohnatanu nuhuaji, Atalia tiacajinia quiojoquiaariijaariuhuj. ²⁶ Cuniquiji, buquejinia jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuacaanu nojori quiojonura Pueyaso rupaa nojori pohnatanura taucuaca. Cunoori quiquiaari shushajanaa nojori coteenu panishacari rucuanenonu tamaquiicua. Naacujitij, nojori tohuateenu nuhuaji puetunu Pueyaso panishanojuanaa, jiyacari shusha tiuquiiioriquiohuari. ²⁷ Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaariijianaa. Cuniqui pohnataturee puetunu nojori niqiara-janaari, taa Pueyaso naacucanu maninia nojori pohnatasacari Jesujinijini. Pohnatanu-quiiaariijaariuhuj taa Pueyaso taraajetequiaari taucuaca jiuujiani, Jesuucua nojori

tiuuniuriajuhuaj. ²⁸ Pabloori, Bernabeeta cuniqui tarishiquiaariijaara narta Jesuucua tiuuniaata.

15

Jesuucua tiuuniasa jiitiana nacoosacari Jerusalén tiacajinia

¹ Jiyacaritij, Judea jiyajiniijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuuniasa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniasa pueya cuaara na cararaatiuuquia co miatejoteera, taa Moisés niishitiojoquiaaricuaajani! ¡Jaara miatesoo quiri, majaari Pueyaso jiyanooniu quiniutianiya jiyanotej, na pueya nojori quiniuria!

² Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanoohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquiijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniasa pueya jiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajiniijinio nijiono pueya niishitiojiya canacuajani?

³ Naacuajitij, Pabloori Bernabeeta jiyarosaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pahuatanuumaquiaari taa taucuaca cartequiaari tama sesa nojori miishanojuaajani, Pueyaso tojijiara nojori quiniuria. Jesuucua tiuuniasa pueya jaara naa tojiquiaaritij, nojoriiri jiyanoohua shuquiriquiaari.

⁴ Nojori tiuquiiijosacari Jerusalén tiacajinia, puetunu Jesuucua tiuuniasa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pahuataquiaari puetunujuanaa, naajuhuj, taa Pueyaso naacuquiaari maninia nojorini, nojori pahuatasacari taucuaca Jesujini.

⁵ Cuniqui quiriquiaajaariuhua Fariseocuaca, tariucua Jesuucua tiuujiaca. Cuno pojoriiri rerejonaa tajiniji nujuatuquiaari. Naa sequetereeri:

—Cuno taucuaca Jesuucua tiuuniasa, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojijiara quiriia, taa Moisés rootaquiaari tariucuaaanucuaajani.

⁶ Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniasa narta pueya jiitianaata. Nojoriiri maninia niishitiojonuuquiaari taa na miiniutianiyani. ⁷ Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiaari na rupaa pahuatariquiano taucuaca tojishocoriguiano, nojori tiuuniuria Pueyasocuajuhuj. ⁸ Pueyasocuajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohanu na niq-uitiosacari nojori, taa na niqutioquiaari pajaniyacuaani. ⁹ Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuuquiaari, nojuajaari nojori jiuujia jeequerejuhuaj saaja Jesuucua nojori tiushacari. ¹⁰ Naa nia tamacasacari taucuacajiniijinio parta Pueyaso pueyatej, niaari Pueyaso miishano sojotaaruhua. ¿Casaara nia tamaca Pueyaso miishanoni? Niaari quiaritia Moisés niishitiojosano tojitiniu paniya Jesuucua tiuuniasa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricuaajani. ¹¹ Paari niishiyani pa Jiyaniija Jesuuri pa jiyanoojia. Naaratej,

pa jiyanooquiaari, na pueya pa quiniuria. Mariyata naa miiquianu cuno taucuacajaariuhuaaj. Majaari seetanujuanaa maninia pa miiniu quiquiaari pa jiyanooshaanura.

¹² Naa Pedro sequesacariitij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumaacata miitiquiaari maninia taucuaca niquiarani, naajuhuaaj, taa nojori naatanijioquiaari cusosuhuaajaniuhuaaj.

¹³ Naa nojori pohuatanu nuhuaajitij, Santiagoori sequequiaarijiuhuaaj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocuajaari nojorijinijinio jiyateya seetanujuanaa na pueyara, nojori maniniuhuaqueetanura nojuaja. ¹⁵ Seetanujuanaari nio. Naajuhuaaj, tariucuacaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

¹⁶ “Janiyari David niquiohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijiajanaa quiriqiano puetunu pueyapuerajanaa, taa David quiquiaari Israel pueya jiyaniijiacuaani.

¹⁷ Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijiaara janiya’. ¹⁸ Jiyaniijiaari naa sequeyaquij. Nojuajaari tariucuacaanu pueya toquiaari nio”.

¹⁹ Naaratej pueyanaa, janiyari nia sequeyani, nareja nia niquiri cuno taucuaca, Jiyaniijia Jesuucua tiunianaani. Majaari nojori najiquitiniu Pueyasocuaji, nia tojitiniu panishacari nojori tariucuacaanu Moisés niishitiojosano. ²⁰ Nareja nojoriicuaara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasocuara na puecootusano casaa, juunu, borregonio. Cuaara quituuria saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijasanojuanaa, naajuhuaaj, maja na miaquenuunura casami nanaca. ²¹ Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiqiyocua tiacajiniajanaa.

²² Naa nojori pocoojonu nuhuaajitij, Jesu jiyaramiquishano pueya, puetunu tii quiniaa Jesuucua tiuniana pueyajanaanio, nojori jiitianaajuhuaaj, puetunu nojorijianaari mariyata niishiriojonuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijiuhuaaj. Cuno pojoriiri Jesuucua tiuniana pueya tojishano quijia cutara, cuniqui Jerusalén tiacajiniani. ²³ Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuniana jiitianaanio, Jerusalén tiacajinia niarta Jesuucua tiuniana pueyajuhuaaj. Canaari nia saruhuataani pueyanaa. Taucuaca nia quishacari, naajaa. Jesuucua tiuniana nia quishacari, niaari canaa tapueyocuacajuhuaaj, tiqiyocua Antioquiya tiacajinia quijia, Siria jiyajinia quiniaanio, Cilicia jiyajinia quiniaajuhuaaj. ²⁴ Canaari najaniyajiniji pohuataaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiqianu nojori. Cuno pojoriniaari nia taajetecanu tamaatia nojori niishitiojosacari najaniya. Naajuhuaaj, nia cushitioanuuri nojori sequesacari nia cararaatiuuquia co nia miatejonura taa Moisés niishitiojoquiaaricujani. Nojoriniaari nia shiniujuquianu nia tojtianura socua Moisés Rootasanojuhuaaj. Quiarijia maja naate pueyanaa. ²⁵ Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano.

Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶ Canaa panishano pueya Pablo, Bernabeetanio, nojoriiri tama na cuaqueya panitiaquiaarijiaaja Jesujiniji nojori pahuatasacari tiqiyocua. ²⁷ Quiarrijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricuajani. ²⁸ Canaa niishiriojosanoori maninia quiya Pueyaso Sohuanura. Canaari na shuquiritiaajuhua. Majaari canaa cushitionu paniniu niajaniya puera canaa supuetanaa niishitiojosanota najuhuanaj. ²⁹ Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuaaj, niaa jaara shu miaquenu paniri, nia miaquere maninia na nanaca caatinijasano. Naajuhuaaj, saaja nia niquiocohuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucujaja pueyanaa”.

³⁰ Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuunaa pueyanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niqutiosaaquiaari cuno naajionee puetunu nojori niquiarajanaa serojosocoriquiano. ³¹ Naajionee jaara serojosaaquiaari, puetunu Jesuucua tiuunaa taucacajanaari shuquiriquiaari jiyanoahua. Naacuajitij, nojoriiri noojia cajitiquiaariuhua tacaquioyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuunaa pueya cumanjiaquiaari jiyanoahua. Na rootatuquiaari maja nojori tarinitianura Jesuucua tiuunuu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniohua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhuaaniya nia quiaarohuaqui.

³⁴ Silasri saaja na cojiniaacuaji jatequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniohua. ³⁵ Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuaaj. Puetunu nojorijianaari Jiyaniijia Jesujiniji pahuataquiaari tamasa niquiarajuhuaaj.

Pablo pacutenu panishacariuhua quianu Pueyaso pueya na niqiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niqiniuhua, paa tii pahuatacanu Jiyaniijia rupaatej. Naa pa miiri pa niishiniuria taa parta Jesuucua tiuunaa pueya quiyani.

³⁷ Bernabeeri na riucuaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. ³⁸ Majaari Pablo paniniu quiquiaari Juan quianura nojoritia. Nocuaaji Bernabé sequequiaariiri:

—¿Paatucua casaara rupoyare pocua Marco saajaaraniuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pahuatasacari pa tarajacanu maniniatucuaa? Naacuajaa.

³⁹ Saa nojorijiaari socua juayonuutaquiaari Juan Marcoocua. Nocuaaji Bernabeeri jiyacari Pablocuaaji rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. ⁴⁰ Pabloori saniniuuja Silas saquiriojoquiaari na tarajariquiano. Nojori quiaaquishacarijia, Jesuucua tiuunaa pueyari nocuara Pueyaso

secojotuquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹ Nojori quiasacari Jesuucua tiuunia pueya shiniujiuniucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiaari Jesuucua tiuunia pueyari.

16

Timoteo cojishacari Pablo, Silasnio

¹ Pabloori Silasta tiuquijioquiaari Derbe tiacajinia, Listra tiacajinianio. Tii riuriatatuquiaari Timoteo jiyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuuniajuhuaj. Timoteo queeri tahue quiquiaari cutara. ² Listra tiacajinia Jesuucua tiuunia pueyari Timoteo maniniucuatujua. Naa sequetujuaari nojori: “Timoteori jiyano hua maninia pueyano”. Iconio tiacajinijinio Jesuucua tiuunia pueyari naa sequetujuajuhua. ³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miate tequiaariiri, cuno jiyajinia quinia Judiocuaca soojotanuucuaaji nojuaja. Puetunu pueyajanaari na niishijia, na queeri seetanujuanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuunia taucua niquiquiaari puetunu tiacajiniajanaa. Nojori niquiara caminiujiuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuunia pueya jitianaa sequesanojuhuaj. ⁵ Naa Pablo caminiujiushacaritij, puetunu Jesuucua tiuunia pueyajanaari socua noojia cumaquiaari jiyano hua. Tamasacaari socua Jesuucua tiuquiaarijuhuaj. Jesuucua tiuunia pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumano. ⁷ Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhua, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiutiacojua. ⁹ Pabloori cuno niucua juhua na maquenujini niquiquiaari Macedonia jiyajinijinio pueyano nocua nujuaano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰ Naa Pablo niquiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequij! Pueyasocuaajaari pa panitia Jesujiniji pa pohuatanura cuno pueya niquiarajuhua.

Pablo quishacari Filipino tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucaatiajaacua tiuquishiini. Canaari cuniquiji sanequiaari tariquiniuhua, tiuquishiiri Neápolis tiacajinia. ¹² Canaari cuniquiji quiamaa Filipino tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. ¹³ Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jitiquiaari Pueyaso secojonura. Canaari

tii narejashiquijia cajitiuquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niqiuara pohuataree Jesujinijini. ¹⁴ Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqutiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri. ¹⁵ Na nuhuaji, Lidiaari puetunu na tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacua-jitij, canaari na tiajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonuujuajiniara, canaari samaruraca niyacoo niqiuquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijianijini pohuatanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijini quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiri.

¹⁹ Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucuaajiniaraari. Tiaca jiyaniijianucuaari tii quijia pueyaracaanu, nojori jitianura pueya. ²⁰ Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijioosee.

²¹ Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

²² Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojorijiniji. Na nuhuaji, tamasaari seeratsaaree nojori na mojoonura macata.

²³ Jiyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojua tia camarnu seeratsaareeri maninia na cojuatenura nojori nujuatejojuajinia. ²⁴ Naacuajitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqui nujuatejosaaquiaariiri tii na cojuasaanura maninia, na mashiyocuatuucuaaji. Nojori cashacuaari suruhuatuneece quejasano tajiniocoma saatijosaaquiaarijuhuaj.

²⁵ Cuno niucua shiaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na jaaquequejosanota. Cuniqui nujuatejosano pueyari nojori tojtariquiaa. ²⁶ Jiyacaritij, rijiaari canashiyaquiji jiuuquiutiaquiaari jiyanohua cuno nujuatejojua tia. Puetunu na tiotihuajanaari riataquequiaari. Puetunu

pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojua camarnuuri ritia niucuaquiaari. Saaja niquirii puetunu tohuateya riateguenojuanaari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyanihacari puetunu nujuatejosano pueyajanaa naasucuaari tari mashiyocuatere. ²⁸ Pablo jaara na niqiquiaari, nocua nacareeri:

—¡Maja najuhuana naa miiniutij! ¡Canaacuaajaari puetunujuanaa niya quiyani!

²⁹ Nujuatejojua camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaji mojuquetaseeri. ³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinjia, Pueyaso jiyanooshano cua quiniuriajuhuaj?

³¹ Nojoriiri na riucaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³ Jiyacaritij, nujuatejojua camarnuuri cuno niucuaaja Pabloocua jiyanoocuaiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquini-jiosaaquiaari moojinia Jesucua nojori tiushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jiyanoohua shuquiriaatia quiriquiaa puetunu na tiajinia quiniaatajanaa, Pueyasocua tiuniana nojori quishacari.

³⁵ Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnucua, na sequenura nojuaja cuara Pablo, Silas tohuanijioora tari.

³⁶ Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarjia nianianiya. ¡Juhuajaniya nia quiaarohuaqui!

³⁷ Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuj? Canaa mojuoturiquiaacuaa puetunu pueya niquiarajanaari. Majaari coteenu canaa nequesoreesaanu quiriucuaa. Canaari jiyanojuua nujatejosaarucuaani. ¿Taa na miituniu paniya quiarjia canaarini, jiyasohuaja tohuatejonu paniniu? ¿Jiyasohuaja mojuoturiquiaacuaa canaatucuaa? ¡Nojorijianaa cuara niiria quiarjia, niiquiji nojori tohuatejonura canaa!

³⁸ Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocua jiyaniijianucuaari pueretuquiaari nojori niishishacari Pablo, Silas Romano pueya quiquiaarijuhuaj.

³⁹ Naaratej, cuno jiyaniijianucuaari ritia quiaquiaari nujatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuara quiojoora quenaaja nojori tiacajiniji. ⁴⁰ Naacujitij, Pablo, Silas jaara tohuareetaquiaari nujatejojuajiniji, Lidia tiajinia quiojoquiaariiri. Tii rootatuquiaari socua Jesucua tiuniana pueyari, socua Pueyasocua nojori tiuniuria. Na nuhuaji, tiji quiojoquiaariuhuari.

17

Tesalónica pueya juaashacari Pueyaso pueya

¹ Pablo rucuanesacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. ² Taate

Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pahuataquiaari Pueyaso rupaari. ³ Pabloori nojori niishitiojoquiaari taa tariucuacaanu Pueyaso sequesano caminiujiuniaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhuj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pahuataani, nojuajaari Pueyaso Jiyarosano pocua.

⁴ Jiyacaritij, noojiaqueya Judiocuacaari Jesuucua tiuquiaari. Queraatia taucuaaari Jesuucua tiuquiaarijuhuaj, canapuate tari Moisés niishitiojosano tojijiaa quiquiaaricuajani. Queraatia cuno tiacajinia quiniaa pueya tojishano maajipohuari Jesuucua tiuquiaarijuhuaj. ⁵ Pueyasocua tiuyashijiaa Judiocuacatej, nojoriiri juaaquoquiaari juhua shocotasano nojori quiniucua. Nocuaji, nojoriiri sesa miijiaa taajecori masuunujuquiaari. Nooj, nareja rucojuaca tiacaacacotej. Cuno pojoriiri masuusaquiaari nojori na cojiniuria, tamasa nojori nasojonura. Na nuhuaji, puetunu cuno pojorijianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niqutiosocoriquiano. ⁶ Nojori jaara na riuriataaquiquiaari, noojiaqueya Jesuucua tiuuniaa pueyari Jasón ta cojiritiasaaquiaari quioonu. Cuno tiacajinia jiyaniijiaacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquiioreejaariuhua naa na miiniurajuhuj! ⁷ ¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojitiaashijiaa! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

⁸ Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquoquiaari. ⁹ Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajinijinio. Naa sequeturee nojoriiri:

—¡Pablo jaara niiquiji quiaaquiri, majaari canaa niqutionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata cartequesaaquiaariuhua.

Berea tiacajinia Pablo quishacari Silasta

¹⁰ Cuno niucujaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquiiijosacari, cuniqui quiniaa Judiocuaca rerejojua tiajinia quiojoquiaariiri. ¹¹ Cuniqui quiijia Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacujitij, Pablo jaara Jesujiniji pahuataquiaari nojori niquiara, nojoriiri maninia tojitaquiaari na pahuatasano. Na nuhuaji, puetunu juucajanaa, tama nojorijiaarijia tariucuacaanu Pueyaso Rupaajinia naajiotasano pajenuuquiaari, nojori niishiniuria seetanujuanaa quiriquiaate Pablo niishitiojosano. ¹² Naacujitij, queraatia Judiocuacaari Jesuucua tiuquiaari, queraatia taucuaacano, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pahuataseecuhuj, nojoriiri nocua quiojoquiaari nojori taanuunura nojuaja cuniquiijiuhuaj. Na tiuquiiijosacari Berea tiacajinia, cuniqui pueya nasojoseeri, Pablo na juaatiuniuria. ¹⁴ Nocuaji, Jesuucua tiuuniaa pueyari cuniquiji ritia mashiquiquiaari Pablo shoniacu caminiajiniara. Silasri Timoteota Berea

tiacajinia jateequiaari saaja. ¹⁵ Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na ru-cuanejosacari pueya na sashishacari, Pabloori niqiquiaari tama cuno pueya shipinijiosanojuaaja na pueyasohuara. Nojori shipinijiosanoori puetunu cuno tiacajiniajanaa quiriquiaa. Pabloori cunora jiyanojua tacaquiaari. ¹⁷ Pabloori Jesujiniji Judiocuaca poojotaquiaari nojori rerejonuujua tiajina, noo pojori taucuacajuhua, canapueete Pueyaso tojtiajaca quiquiaaricujani. Naajuhua, Pabloori cuno tiaca jiuujiajina pueya cajitiucara curotasanojina pahuataquiaari Jesujiniji cuniqui quiniaa niqiuara. ¹⁸ Tamasaca niishijiaacari Pablo pahuatasacari Jesujiniji tojtiajaca. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureo-hua”, Epicuro jiyaniishano niishijia niishitiojosano tojtiajaca nojori quiniucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jiyaniishano niishijia niishitiojosano nojori tojiniucua. Pablo pahuatasacari nojori niqiuara, nojoriiri maja na niishituniu quiquiaari casaa na pahuatariquiaani. Nocuaijama nojoriijaarijia sequetooquiaari:

—¿Casaariquitijia cuno paateca pahuataa pajaniyatejaj? Najuhuaana pocuaa pueyara-caanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhuanaruhua.

Nojoriiri naa sequeriquiaa Pablo pahuatanuucua Pueyaso rupaa Jesujiniji, mariyata taa cusunuuno samiitiaconutaniuhua. ¹⁹ Na nuhuaji, nojoriiri Pablo jiyataquiaari tuhuananujiniji, tee nojori jiitiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pahuataqueeruhua. Canaari quia pahuatasanojiniji socua maninia niishiniu paniani. ²⁰ Quiaari jiyajeneta sequeriquiaa canaa niqiuara quia pahuatasacari. Quiaarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhua, nojoriiri maja socua tamonu casaa na miitiuniu quijia. Saaja quiarinio sequesanojiniji niishituniu panijiaacari.

²² Jiyacaritij, Pabloori Areópagojiniji nujuaquiaari na pahuatanura na tojtianu panijiaa niqiuara. Naa coteereeri:

—Atenas tiacajinia quiniaa pueyanaa, janiyari quiaarijia niishiyani, niaaqui pueyasohuacua jiaatiajaca jiyanojua. ²³ Janiyari naa nia sequeyani pueyanaa, cua niqiniucua queraatia nia shipinijiosano pueyasohua, cua rucanejosacari nia tiacajinia. Naajuhua, janiyari saajiajiniji nia shipinishano juhua juhuacutura niqiriucuaajuhua. Nocua naajoori sequeya, “Niishishoo Pueyasora”. Cuno Pueyaso niaa na tojtiaquiaa na niishiyaquiniutiani, nojuajaari nio Pueyasocuaaja janiya nia pahuataani.

²⁴ Cuno Pueyasoori nio jiya shipiniquiaaricuaaja, puetunu pa niquishanojuanaanio. Nojuajaari jiyocuacaanu camarnujuhua. Nojuajaari puetunu tiqiyocuajanaa Quijia. Majaari pueya tiajosano secojojua tiajina na quiniu. ²⁵ ¿Taa nia jiyaniyani pueyanaa, cutara Pueyasojuaante pa jiitiasano casamijiniji panijajuhua? Maja. Nojuacuajaari puetunu pa jiitiasanojuanaa shipiniquiaari puera. Pa rishiniuria, na Sohuanujiniji pa niqitioquiaarijiaariuhua, pa rijiosocoriquiano paratunio.

²⁶ Pueyasoori niqiriyaatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarijia sequequiaari

tee pueya quiniutianiyani. Sequequiaarijiaariuhuj taacari tii pa quiniutianiyani.
²⁷ Pueyasoori naa panitiaquiaaricuaaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyani pa riuritanura nojuaja? Pueyasocuaajaari maja na quiniu tucuacaanu pajaniyajiniji.
²⁸ Pueyasoori pa samiitianiya. Pa cumaquiaaajaariuhua pa poonijionura. Pa rishitiquiaaajaariuhuj. Naatej, taa nia pahuatajaca sequequiaaricujani: “Paari Pueyaso muerasuni”.
²⁹ Paa jaara seetanujuanaa Pueyaso muerasu quirini, majaari socua pa jiyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajiajiniji shipinishanonio. Pueyaso cutaraari maja na niquishaanu juhua tama pa niishirijosanojuaja. Majaari na niquishaanu taa pueya shipinijioquiaacuajani, nojori jiyanishacari Pueyaso naasucuaari naa niquishanotej.
³⁰ Pueyasocuaajaari pueya miiniu sesa rejeretariquiaa pueyaracaanu. Sanini-uujia, nojuajaari quiaritia puetunu tiqiyocua quijiaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojitianura.
³¹ Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquirijosano pueyano jiiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocuaajaari na saquirijosano pueyano.

³² Nojori jaara tojiquiaari Pablo pahuatasacari taa macunucua samiitiaconutaniuhuni, cuno niishijiaacari na saroojotaquiaari na rerequetenuta. Tamasacaari sanini-uujia Pablo sequequiaari:

—Canaacua tamacari quia tojiriirianiuhuj.

³³ Na nuhuaji, Pabloori cuno pueya tajiniji quiacuhua. ³⁴ Noojiaqueya cuno pueyajinijinoori Jesuucua tiuquiaari, Pablo pahuatasano nojori tojitasacari. Nojorijinijinoori quiquiaari Dionisio jiyanishano pueyano. Nojuajaari Areópago niishijia pueya maanujinijinio quiquiaari. Jesuucua tiuquiaarijiaariuhua tamonu maaji. Dámaris na sesa. Socua tamasaca pueyari Jesuucua tiuquiaarijuhuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia. ² Cuniqiriuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaanquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuatata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocoojonura. ³ Aquilaari necocuatata suhuoronuutaja toqueya cusupuenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuanerjojua. Tii nojori pahuataquiaari Jesujinijiiri, taucua niquiaranio, noo pojori canapuate Judiocuacaa jiyatesaaquiaaricujani, tariucuaacaanu Moisés niishitijosano nojori tojishacari.

⁵ Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pahuatanura Judiocuaca niquiara. Nojori sequequiaariiri:

—¡Jesucuaajaari nia sashishano, Pueyaso Jiyarosano seetanujuanaa pocua!

⁶ Judiocuaca jaara tojiqquiaari naa Pablo sequesantej, na tojitiaaquirii saajaari nojori cuaracashitiniutia Pablo sequesano. Saaja juaaquioreeri. Sesa pocooreejaariuhuj. Naaratej, Pabloori nojori niqiuara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiuutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiaritia taucuacaacua quiaa cutaranijia, nojori cua pohuatanura Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriqiuase. ⁸ Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiciaari. Naajuhuj, queraatia Corinto pueyari Jesuucua tiuquiciaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. ¹⁰ Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

¹¹ Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqiu na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriqiuasejuhuj. Jiyacari, Judiocuacaari tii Pabloocuara roojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritia-nura tamaatia canaa supuetana Moisés Rootasanojiniji!

¹⁴ Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanoocuara nia tonujusacari tojiri cutarani.

¹⁵ Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jeecatoorejaaja!

¹⁶ Na nuhuaji, cuno camarnuuri nojori juaarii. Na shuriucuaaji na jiyaramiquiriohuari. ¹⁷ Naa Galión miishacari nojoritij, narta taucuacaari cuniqiuja quiatuquiaari Sóstenes, Judiocuaca rerejojua tia cojuana. Na piquituri camarnu Galión niqiuara cuniqiujaari. Majaari Galión tenujunu quirii nojori. Nareja na niquiriquiaari.

Pablo riuujiushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri

¹⁸ Pabloori cuniqiu queraatia camueenujuquiaarijiaara Corinto tiacajinia. Tari na riuujiushacariuhua cuniqiuji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucuataaquiri.

Cunora, naa quiarijia riuujiutirii na nacaari. ¹⁹ Nojori tiuquiiijosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqúi rerejono Judiocuaca pohuatasee Jesujiniiri. ²⁰ Nojoriiri Pablo nenecojoquiaari juucua cuniqúi na camueenujunurajaara nojoritia. Majaari Pablo paniniu quiquiaari. ²¹ Cuniqúi quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaraniuhuj.

Cuniqúiji tacaquiaariuhua buquejiniaari. Éfeso tiacajiniiji quiaarohuari. ²² Pablo tiuquishacariuhua Cesareya tiacajiniohua, cuniqúiji quiamaa Jerusalén tiacajiniaari, puetunu Jesuucua tiuuniaa na saruhuatanurajanaa. Na nuhuaji, quiaarohua Antioquiya tiacajiniaari. ²³ Cuniqúi tarishiquiaari pasajaari. Na nuhuaji, socua quiaquiaariuhua cuniqúijiiri puetunu jiyacajiniarajanaa. Quiariquiaari na niquiniuhua Jesuucua tiuuniaa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaajiniiji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajiniijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaariiaariuhuj. ²⁵ Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niquiaraari. Maninia niishitiojojua Jesujiniiji na pohuatasacariiaariuhuj. Seetanujuanaa sequeja Jesujiniiji puetunujuaanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniiji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujica cumaquiquiaari jiyanoehua, nojori na niishitiojosacari. ²⁸ Apoloori nojori niquiara niishitiojoquiaari tariucuacaanu Pueyaso Rupaajiniiji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacujitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuujia Antioquiya tiacajiniiji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniaari. Tii riuriataquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso rupaacua nia tiushacari?

Pablo riucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

³ Pabloori nojori sequequiaari:

—¿Casaara nia tiuquinijosaacanucuararini?

Nojoriiri na riucuaquiaari:

—Canaari tiuquinijosaaquiaarini taa Tiuquinijiona Juan niishitiojoquiaaricujani.

⁴ Pabloori nojori riucuaaree:

—Taaquiriirini. Tiuquinijiona Juancuaaquiniateja pueya tiuquinijioquiaarijiaj, nojori jaara noojia tacatoquiaari sesa na miitiushanojiniji. Nojori sequequiaarijiaariuhuj: “Cua nuhuaji Niriqianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pahuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuanaa. ⁶ Naacuajitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacuajitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pahuatanuquiaariiri. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pahuataja Pueyaso rupaa pueya niquiaraari. Naajuhuj, nojori niishitiojojuaari taa Pueyaso jitianutaniya pueyaracaanu Jesuucua tiuuniaa pueyani. Pueyari na tojtiaquiaari maninia, na puereyaquiniutia na niishitiojosacari. ⁹ Noojiaqueya cuno pueyajiniinioori saaja ruuretaquiaari Pueyaso rupaa. Na rerequetequiaari saajaari. Sacuaraatia pocoquiaari Jesu rupaaajiniji pueya niquiaraari, Jesuucua nojori tiuuniu paniyaquishacari. Nocujaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujuua tiajiniaara. Tirano jiyaniishano pueyanoori cuno serojonuujuua tia camaru quiquiaari. Pabloori cuniqui puetunu juucajanaa niishitiojojua Pueyaso rupaa Jesuucua tiuuniaa pueya. ¹⁰ Caapiqui marijiaari socua Pablo shocojoquiaari tii na poojotasacari Pueyaso rupaa Tirano serojonuujuua tiajinia. Naacuajitij, puetunu Asia jiyajinia quiniaa pueyajanaari Pueyaso rupaaajiniji caminiujiushaaquiaari, Judiocuaca, taucuacajuhuj. ¹¹ Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. ¹² Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhuacua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruhuari tohareetaquiaarijuhuaj, samaruhua jiiitaja pueyacuaji.

¹³ Tamasaca Judiocuacajiniinioori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajiniajanaa rucojojuaca quiquiaari. Jiyacari-tij, nojoriiri juhua Pablo miiniu paniquiarijuhuaj. Juucua naa sequetuquiaari samaruhuari:

—Pablo pahuatasano Jesu sesajinia nia sequeyanijia: “¡Nio pueyanojiniji nia tohuareetare!”

¹⁴ Naa miijiaaari siete canuu quijia. Nojoriiri Esceva jiyaniishano pueyano niquiohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuj. ¹⁵ Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanjia. Janiyari Pablo niishiyajaniuhuj. ¿Canteerini niajanijani-jia, naa nia sequenura janiyatej?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhua-sunucua, jiyareta naatiquishanojuhuaj. ¹⁷ Puetunu Éfeso tiacajinia quiniaa Judiocuacajanaa, mariyata tii quiniaa taucucacano, nojori jaara niishiquiaari naa miishano-jinijitij, jiyanohua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—¡Jesuqui seetanujanaa Jiyaniijiajanaa cutara!

¹⁸ Naajuhuj, queraatia Jesuucua tiuuniaa pueyari nijioquiaari, tarijia sesa na miitiushano pohanatunura puetunu pueya niquiarajanaa. ¹⁹ Naajuhuj, queraatia pueyari juhua shimiacuri miijiojuaca quiquiaari. Nojoriiri na nequesoreetuneeca mueratejotaquiaari. Cuno nequesoreetuneecajiniaari serojosano quijia taate pueyano cumueca shimiadura quiniuni. Na camaruhuari jiyacari puetunu cuno nequesoreetuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneecajanaa catijiasaaquiaarini, cunoori cincuenta mil platajiniji shipinijosano cumaneecata masano quiquiaari. ²⁰ Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajinia.

²¹ Na nuhuaji, Pabloori cuniquiji naquerejoquiaari Macedonia jiyajiniarajuhuj, Acaya jiyajiniaranio. Cuniquiji riujuuuniu paniriquiohua Jerusalén tiacajiniohuaraari. Sequequiaarijiaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacunaa jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaarijiaara.

Éfeso pueya cushitiishacari na juaaquionuta najuhuanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. ²⁴ Naa quiquiaariiri. Demetrio jiyaniushano pueyanocuajaari juhuacatecara narta pueya nasojoquiaari. Cuno pueyano, Demetroni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyaniushano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niquitiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojorijuhuj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiiitiaani pa niquitiojosacari pa cumaneecara pa shipinijosano. ²⁶ Quiarjia cuno Pablo jiyaniushano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojitiaajuhuj. ²⁷ Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajinia, tii

nojori secojonura, naa cuno Pablo niishitiojonuucua pueyaracaanu pueyatej. ¡Naacua-jitij, puetunu pa Asia jiyajinijinio pueya, mariyata puetunu jiyacajinijinio pueyapuejanaan pa pueyaso Artemisa rerequetejacara jatanutaniya! ¡Puetunu pueyapuejanaan naa niyajetanutaniya socua pa pueyaso Artemisatej!

²⁸ Cuniqúi quiniaa pueya jaara tojiqúiaari naa Demetrio sequesantej, nojoriiri jiyanojua juaaquioquíaari. Naa nacoquíaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuno tiacajiniajanaa pueyari cushitiiquíaari. Nojoriiri jiyacari quíooturee caapiquí Pablo cojiniaa pueya, Macedonia jiyajinijinio pueya. Nojoriiri quiqúiaari Gayo, Aristarconio. Na jayoturee Éfeso tiacajinijinio pueya rerejojua tiájiniaraari. ³⁰ Pabloori cuno pueya nacoosaquí tiájinia tiuquiniu paníqúiaari juucuajuhuaaj. Quera na pocuasee cuno pueya tajiniani. Jesuucua tiuuniaa pueyari saa na cosequíaarijia na tiuquiyaquiniuucúaji. ³¹ Asia jiya camarucuaari na seya jiyaroquíaari Pabloocúajuhuaaj. Camarucuaari coteenu naa sequequíaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaquí, mariquí mosaareeri.

Cuno camarucua na seya jiyaroquíaari nocuani, nojoriiri Pablo rupuenaa quiija. ³² Cuno nasojosano rerejono pueyari saaja cushitiiquíaari na juaaquionuta. Jiyanojua nacooreeri. Tamasacaari saniniuujia tamaatia nacooriguíaajuhuaaj. Jiyacaritij, tama cuno nojorijinijinio pueyari maja na niishiniu quiqúiaari casaajiniji na nacooriguíaani. Secaja nojorijinijinioori na niishiquíaari cutara. ³³ Jiyacaritij, Judiocuacaari Alejandro jyanishano pueyano caponeequíaari pueya nacoyano tajoji na nujuatesocoriguiano. Cuniqúijinijinio pueyajaari tii toqúiaari Alejandro casaara pueya nacoyani. Alejandroori Judio pueyano quiqúiaarijiuhuaaj. Naaratej, Judiocuacaacuaji tacunu paniriquíaa juucuaari. Alejandro jaara nujuaquíaari pocuajajiniji, na juaashiquía shiitioquíaariiri pueya sanaajetanura. ³⁴ Saniniuujia, cuno pueya jaara niishiquíaari Alejandroori Judio pueyano, puetunu pueyajaanari socua jiyacatequíaari nacoonura. Nojoriiri caapiquí hora shocoteree pueyaracaanu naa na nacoosacari najuhuanaj. Naa sequeturiquíaa na nacoosacariiri:

—¡Pa timitiasano Artemisa cuara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriguíaari. ³⁵ Cuno tiaca camarucuaara naajiona pueyano jaara na naata quiriquíaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajaanari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishituyajaariuhuaaj paacuajaari cuno casa juhua pa pueyaso Artemisa niquishano cojuaquíaani, jiya cajiniocuaji tinio pa riuriasanoni. ³⁶ ¡Canteeri nio niishiyaquiyanijia! Shaaquí. Cunora tariucuaja. ¡Nia sanaajetarohua! Majaari najuhuaana sesa nia miitiuniu, maninia nia niishiriojiyaquishacari. ³⁷ Nio canuu niaa niyara na jayoreeni, nojoriiri maja na nohuasenu quirii casa pa pueyaso secojojua tiájini. Majaari na sesacatunu quiqúiaa pa pueyasojuhuaaj. ³⁸ Demetrio jaara nata poonijionaata cuno pueyacuara tonujunu paniri, ¿casaara na quíaaquíya pa nequesoreenaa niquiara tonujunuraarini? ¿Casaara pa jíitíaa nequesoreenaa pa tiacajiniaarini? ¿Najuhuanaj? Pa nequesoreenaa pa paraa tacujua pocuaji. ³⁹ Níaa jaara tamonu casaacua juaaquiojreja, pocua tamonu juuca na rerejotariquiani pa jiyaniijianucuata pa jeecanura puetunu nia sequesanojuanaa. ⁴⁰ Pueyanaa, ¿majate nia puerenu, Roma tiacajinia quiija pa jiyaniijiajanaa jaara pocuara tosaare pa nacojonujiniji? Paa jaara sequesaa nocua quíojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹ Tiaca camarucua naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

20

Pablo rucuanajosacariuhua Macedonia jiyajinia, Grecia jiyajinianio

¹ Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuuniaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria canuuquiaari puetunu nojorijianaari. Na nuhuaji, Macedonia jiyajinia quiaareeri. ² Nojuajaari puetunu cuno jiyajinia rucuanequiaarijanaa. Jesuucua tiuuniaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. ³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴ Nucuaco na quiasacariuhua, na tarajaquiaariiri Sópater jiyaniishano pueyano Berea tiacajinijinio, Pirro niyanu. Na tarajaquiaariijaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijaariuhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. ⁵ Puetunu nio canaa tapueyocuacajanaari canaa puetaquiaari. Canacuaji tiuquiiioseequiaari coteenu Troas tiacajiniaari. Cuniqui sashitiuquiaari canaari. ⁶ Jiyacariiri queranacunuusacari quiquiaari, poretajaaju shipinijosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitijosacari Troas tiacajinia

⁷ Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuuniaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pahuatasacari, shiyaqueyari tari quiquiaari. ⁸ Cuno tiajinia canaa tii quiriquiaani, canaari jiyocuacaanu tercero na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pahuatariquiaa pueya niquiara. ⁹ Jiyacaritij, tamonu mashajaari tia shuucuaji tacuhajiniji cajiriquiaa. Na sesaari Eutico quijia. Pablo pahuatasacari pueyaracaanu, socua maquequiaari na cajishaquiiri. Jiyanoehua na maquesacari, jiyocua tiquii socuaari. Cusoseejanaari. ¹⁰ Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriiquitiuniu. Saminiocuaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pahuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹² Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacujitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocomaa Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. ¹⁶ Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaarihua Jerusalén tiacajiniaari. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuuniaa jiiitanaa pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiiitanaa. ¹⁸ Nojori jaara canaacua tiuquiiijioquiaari, Pabloori nojori sequeeree:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹ Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijiaara cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejuani. Janiyari pueyaracaanu naquiya miishanoni, cuarta Judiocuaca para-caashacari janiya. ²⁰ Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miijia nia quiniuriajuhuaj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojuani, tama nia tiacajiniaqueyajaajanio. ²¹ Janiyari Judiocuaca sequejani taucucanio, nojori tacatonuhuaa noojia Pueyasoocua, sesa nojori miishanojiniji, pa Jiyaniijiaacua nojori tiuuniuria cutara. ²² Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. ²⁴ Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatenu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooniu paniya pueyani.

²⁵ Janiyari seetanujuanaa nia sequeyani pueyanaa. Puetunu nijaniyajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutaniya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. ²⁷ Janiyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyajuhuj. Pueyaso Sohuanucujiaari nia jiyatequiaari Jesuucua tiuuniaa pueya jiiitanaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹ Janiyari seetanujuanaa niishiyani, janiya jaara niiquiji quiaqueeni, tamasaari cua nuhuaji nijionutaniya. Jesuucua tiuuniaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuuniaa pueya tajinia. Taa marucatuque sare tiuquiya borregohua tajiniacuaani, puetunu na soosejanaari, cuno pojoriiri naa

miiniutianiya Pueyaso muerasutej. ³⁰ Naajuhuj, tama niajanijajiniujuaarijia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuuniasa pueyari, pueya tojiniuria nojori saniniuujia. ³¹ Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijuhuj, jiuujianaraca marijiaari tari cua shocojoree pueyaracaanu cua niishitiojosacari niajanija. Majaari cua tarinitianu quijia rootanu niajanija, juuca, niucuanio. Janiyari naajaa cua namijiaacatenuta niishitiojua puetunu niajanijajanaani. Majaari naa cua miishano nia niyajetanu pueyanaa.

³² 'Nia tiujianutaniya tarinijia. Janiyacuajaari pa Jiyaniijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucua, na saquiriojosano pueyata nia quiniuria. ³³ Niaata cua quishacari, majaari tama quiriijaaja cua paniniu quijia cumaneeca, toquenio. ³⁴ Niaari naa quiyano cua niqijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuj. ³⁵ Janiyari nia niishitiojojuani, naa poonijosanotej casamijiuniucua pa naacunura pa jiiitiasanota. Majaari pa Jiyaniijia Jesu sequesano nia niyajetanujuhuj. Naa sequequiaariiri: "Maninia pueyano jaara na jiiitiasanojiniji niqitioire nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniji".

³⁶ Naa nojori na sequenu nuhuajitij, Pabloori mojuquetaree. Puetunu nojoritijajanaa secojoreeri. ³⁷ Puetunu pueyajanaari nujuquettee. Pablo cacanuuturi. Na nujuunetteejaariuhuj. ³⁸ Pueyari jiyanohua taraajeriquiaa Pablo sequenuucua nojori, maja tari socua na niqitiniuni quiniutianiya nojuaja. Nojoriiri caminiajiniaara rosetaquiarijuhuaj, Pablo na niqitiniuria buquejinia na tacasacari.

21

Pablo quiasacari Jerusalén tiacajiniara

¹ Éfeso tiacajiniji canaa ruparetasacari, canaari shoniacu caminia jiuujiaaco quiaareeni. Canaari Cos tiacajinia tiuquishiini. Cuniqijia canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ² Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. ³ Canaa jaaretasacari, canaari canaa muenecara niqimiohua Chipre jiya tucuaatijani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii. ⁴ Jesuucua tiuuniasa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqii nojoritiani. Pueyaso Sohuuanuuri cuniqijinio Jesuucua tiuuniasa pueya niishitioquiaari taa Pablo miishaanutaniyani. Nocuai nojoriiri Pablo sequetuquiaari maja na quianura Jerusalén tiacajinia. ⁵ Naajaa, siete juuca jaara tari shocojouquiaari cuniqii canaa quishacari, canaari tiji quiaquiaarini. Jiyacaritij, puetunu Jesuucua tiuuniasa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiari tiacajiniji tacatajajinijiriani, Pueyaso canaa seconura jaaquiajinia. Puetunu canaajanaari mojuquetacoquiaarini shoniacu caminia casaqueyaji. ⁶ Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqii tacatasee puetunujuanaani. Canaari tii quijiaa Jesuucua tiuuniasa

pueya saruhuataseeni. Canaari nojoritia quishii niquiriyatu juucani. ⁸ Tariqui sanini-uujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamacata jiyatesaaquiaari mashiquiopue mianuuteriquiano. ⁹ Felipeeri necojori jiitiaja, saa caqueetacaneeja, niyacoojori. Cuno niyacoojoriiri Pueyaso Sohuanu jiitiajaca. Naacuajitij, Pueyaso Sohuanu niishitiojosano nojori jiuujiajinia Pueyasojiniji pohuatanuujuaari. ¹⁰ Canaa camueenujusacari cuniqui, jiyacari tiuquishiiquiaariiri Judea jiyajinijinio pueyano. Nojuajaari Pueyaso sequenu panishano caminiujiunia quijiajuhuaj. Ágabo jiyaniishano pueyano. ¹¹ Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajaarijia, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucua niqitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quiniaa Jesuucua tiuuniaa pueya tojishacaritij, canaajuahuaj, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereajaari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacuajani.

¹⁵ Naa canaa sequenu nuhuaji nojuaja juucuatej, canaari canaa jiiitasano casaa jeenucuareeni. Canaari Jerusalén tiacajinia quiaarejaaniuhua. ¹⁶ Canaata quiojoquiaariiri Cesareya tiacajiniji Jesuucua tiuuniaa pueyajuhua. Canaata quiariquiaajaariuhua Mnasón jiyaniishano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocoojosacari Santiagota

¹⁷ Canaa tiuquiiijosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquiiijosacari. ¹⁸ Pabloori tariqui canaata quiaquiaari Santiago niqiniuucua. Tii quiriquiaajaariuhua puetunujuanaa Jesuucua tiuuniaa jiiitanaa pueya. ¹⁹ Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanijosacari tucuaaanu taucua quijia jiyacajinia. ²⁰ Pueya jaara naa tojiquiaari Pablo pohuatasantej, puetunu tii quiniaajanaari Pueyaso maniniuhuaqueetaquiaari nojori shuquiritasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niqiquiaacuajani, jiyanohua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojitiajacajuhua, nocua nojori jiaatianuta jiyanohua. ²¹ Nio Jerusalén tiacajinia quiniaa Jesuucua tiuuniaa pueyari quiocuaji tojiqianujuhua. Quiaanaari tamonu jiyacajinia quijia parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhua maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiriojiyani,

naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴ Nojori quia jiyataare Pueyaso Secojojua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuj, quiocua nojoriria cumaneeca niqutiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiqianu pueya sequesano quiajanijajiniji. Niishitiuniutianiyajaariuhuj, quiaaqui tariucuacaanu Moisés niishitiojosano miyajaa. ²⁵ Majaari Jesuucua tiunio taucuacaacua quia tacaaniu. Canacuajaari tari nojori nacasuquiaari canaa naajioneeginiani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijiuhuj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijiuhuj maja na miaquenuunura shu na nanacataja, naajuhuj, maja na numuetucunura na camishoo maaji. Puetunu pa supuetanaa rootasanojinijianaani, saa niojuaari taucuaca tojishocoriqiano rootasano.

Na cojiniaata Pablo quioosacari Pueyaso Secojojua tiajinia

²⁶ Pablori narta Pueyaso pueya sequesano tojiqiaari jaarajaaja. Naaratej, nojuaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuaajani. Naa na miiniu nuhuajitij, Pueyaso Secojojua tiajinia tiuquitiaquiaariiri pueyacuara secojonaacua. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niqutiosocoriqianoni.

²⁷ Quera nojori tucuatasaari puetunu cuno semaana juucajanaa, Asia jiyajinijinio narta Judiocuacaari Pablo niqiquiaari Pueyaso Secojojua tiajinia. Nojoriiri puetunu pueyajanaa nasojoquiaari ritia. Jiyacari Pablo quiatureeri. ²⁸ Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseeja! Niiori noo pueyanocuaaja tiquiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojojua tiaacuaraajuhuj. Naajuhuj, tariucuacaanu Moisés Rootasano sesacatequiaa pueyaariuhuj. ¡Quiarijiani, pa Secojojua tiajinia sacuaraatia tiuqunitiaree taucuacaari!

²⁹ Cuno Judiocuacaari naa sequetuquiaari Pablotej, Trófimo jyanishano pueyanota nojori niqiniuucua nojuaja tarijia na rucanejosacari cuno tiacajiniaaja. Trófimoori Jesuucua tiunua tahue quijia, Éfeso tiacajinijinio pueyano. Naaratej, cuno Judiocuacaari jyaniquiaari Pablo naasucuaari cuno tahue tiuquinirii Pueyaso Secojojua tiajinia.

³⁰ Puetunu Jerusalén tiacajinia quiniaa pueyajanaari juaaquoquiaari. Pabloocua netecuatuquiaariiri. Na quiatureeri. Pueyaso Secojojua tiacoji na jaatiuquiaari carijiniacumaari. Pueyaso Secojojua tia tohuateyari ritia tionujusaaquiaari na nuhuaji.

³¹ Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaca na juaaniutia nacoya!” Cuno comandanteni, nojuajaari soldadohua capitáncuaca jyanijia. ³² Jiyacaritij, comandanteeri na soldadohua rerejotequiaari ritia, na capitáncuacanio. Tee pueya nacoorigiaani, nocua netecuatuquiaariiri. Judiocuaca jaara niqiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. ³³ Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacoorigiaa. Niiori tamaatia nacoorigiaacujua. Tamasacaari socua tamaatia nacoorigiaajanaajataj. Comandanteeri cunora maja

na niishiniu quiquiaari casaa Pablo miiriijaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quiija tiajinia nia jaatucuyarohua!

³⁵ Soldadohua tacatasacari tari nojori quiija tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicuaaji Pablo shiitioquiaari jiyocuacaanu. ³⁶ Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijiaaja

³⁷ Quera soldadohua tiuquinishacari Pablo nojori quiija tiaco, Pabloori soldadohua comandante sequeree:

—Quenaaja niquiriyatu rupaa sequereera cuno pueya.

Comandanteeri na riucuaaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajininio pueyanoni. ³⁸ ¿Majateeri noo quiajanिया quiqianucuaaja, cariiquia jiyajinia jiyatacanu cuatro mil puecojuaca pueyatej?

³⁹ Pabloori saaja na sequeree:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajininio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquiija cua tarishitiricuarajaj. Cuno pueya sequenu paniya niquiriyatu rupaa quenaajanijia.

⁴⁰ Comandanteeri socua na sequeree:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuaara pocuaree tama nojori Hebreo rupaaajiniaari. Naa nojori sequereeri:

22

¹ —Cua tapueyocuaacanaa, cua jiyaniijianucuaanaa, nia tojitiare cua sequesano nia-janiya tama cua tacusacarijiaaja cucuaji.

² Cuno pueya jaara tojiquiaari Pablo pocuasacari nojoriicuaara Hebreo rupaaajinia, pueyari maninia sanaajetaquiaarijianaa. Pabloori nojori sequeree:

³ —Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quiija. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniuucua jiaatiaquiaani, taa quiarijia nia miiniu paniyanijia.

⁴ Janiyari tarijia Jesuucua tiuuniaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵ Pueyacuara secojonaa camarnuuri cua miijosano niishiyajuhuj, puetunu pa jiyaniijianucuaajanaanio. Nojoricuaajaari cua niquitioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

Pablo pohuatasacari Jesuucua na tiuuniujiniji

⁶ Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiija jiyanohua shacantuuca juhua miacanaari cua nunuquiaari. ⁷ Janiyari juhua jatasaareeni. Jiyacaritij, janiyari rupaa tojirii cua sequeyanoni: “Saulo, Saulonaa, ¿casaara quia miitiaa puera janiyani?” ⁸ Janiyari na nequesotareeni: “¿Cantequia Jiyaniijianaa?” Cua sequereeri: “Janiyacuaajaari Jesuni,

Nazaret tiacajinijinio pueyano. Cunocujaaari quiaa na miitiaani”. ⁹ Cua cojiniaa pueyari cuno shacantuuca na niquishacari shiriiquitiuquiaari. Majaari na tojitiuniu quiquiaari cutara jiyocuacaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹ Cuno shacantuuca cua nunuquiaari jiyocuacaanujini, cua namijia sesoquiaariiri. Janiyari cariyajuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niquiniuucua niquiaari. Jaara tiuquiquiaari cucua, cua sequeeseeri: “Cua tarajanu Saulonaa, maninia niquijia quia quiriohua”. Jiyacaritij, cua namijiaari ritia jeequequee. Janiyari maninia niquiquii Ananíasni. ¹⁴ Cua sequerejaariuhua: “Pa supuetanaa Jiyaniijia Pueyasocujaaari quia saquiriojoquiaari tariucuacaanujiniji, na niishitionura quiajaniya na panishano quia miiniuria. Quia saquiriojoquiaarijaariuhua quia niquiniuria taquiya pocuajinio sesa miyashijia cutara, tama na camaru rupajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. ¹⁵ Quiaari puetunu pueyapue niqiarajanaa pohuatanutaniya nojuajiniji quia niquishano, quia tojishanonio”.

¹⁶ Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuacaacuan

¹⁷ Janiya jaara riujuuquiaariuhua Jerusalén tiacajiniohuani, janiyari Pueyaso Secojonuujuu tiajinia secojoriquiaani. ¹⁸ Cua secojosacari, janiyari Jesu niquiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji”. ¹⁹ Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijijianaa cua nujuatejosocoriquiano nojori. Janiyari nojori mojuajujuhuaj. ²⁰ Naajuahuaj, quia rupaa pohuata Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhua, nojori mosacari Esteban. Janiyari jaara-jaaja sequequiaarini: ‘Cuara mosaaria’”. ²¹ Naa cua sequesacaritij, Jiyaniijiaari saaja cua sequereeni: “¡Niiquiji quia quiaarejaj! Janiyacuajaari tucuacaanu quia jiyaronutaniya taucuacaacuan”.

Comandante jittiasacari Pablo

²² Pueyari sanaa tojitiariquiaa Pablo pohuatasacari. Saniniuujuu, Pablo jaara jiyaniquiquiaari taucuaca, pueyari jiyacari coteequiaari nacoonu, taucuaca soojeaca nojori quiniuucua:

—¡Cuara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriguiaa.

²³ Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyajuajaariuhua. ²⁴ Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequesantej, ritia netequiaariiri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiriirinij.

²⁸ Comandanteeri na sequerohuacuhuj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuucua.

²⁹ Cuno pojori, Pablo majacunura seeratasaaquiaari juucuani, naa nojori tojitiasacaritij, Pablo shuriucuaaji ritia shiriquitiaquiaariiri. Comandante niishishacari Pablo seetanujanaa Romano quiquiaari, puererejaariuhuj, Pablo na morojotenuucua.

Tama nocuaji Pablo tacusacarijiaaja Judiocuaca jiyaniijianucua niquiara

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pabloni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujanaa rerejotequiaariijaariuhuj. Nojoricuajaari Sanedrín maanu. Jiyacari Pablo numatucujiniji rupareetaquiaari cumayocua saatijiotasanoori. Puetunu nojorijanaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

23

¹ Pabloori juhuacatecara pohuatano coteequiaari camarucua niquiara. Nojori sequereeri:

—Cua tapueyocuacanaa, janiyari pueyaracaanu juhuajaniya quiquiaani, Pueyaso tojjia cua quishacari pueyaracaanu.

² Naa Pablo sequesacaritij, pueyacuara secojonaa jiyaniijiajanaari juaarii. Ananías na sesa. Nojuajaari Pablo jiyaniquiaari najuhuana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupajinia nia piri naa pocuaaniquitij!

Pablo shuriucua nujuanaari jaarajaaja na piquii. ³ Majaari Pablo niishiniu quiquiaari casaate Ananías quiquiaarini. Naacujitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijanaa! Nia jyanishacari janiyari Moisés Rootasano tojiyashijiani, niari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riucuaaree:

—Cua tapueyocuacanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucua”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijinijinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jiyanoohua na rupaa paaretaquiaari naa na sequenura nojori:

—¡Cua tapueyocuacanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujacani. Naacujitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

⁷ Pablo jaara naa sequequiaaritia, Fariseocuacaari Saduceocuacata juhuacatecara juayonuutaquiaari tama nojorijiaaja. Naacujitij, nojoriiri caapiqui maapuera raquiti-iquiaari. ⁸ Saduceocuacaari jiyaniya maja macunucua samiitiaconu quiniutianiuhua. Nojoriiri sequeyajuhaaj: “Maja Pueyaso seya quiniu”. Pueyapuenaari sohuanuujujuhuaj. Fariseocuaca cutaraari nojori cuaracashitishanoocua tiuya. ⁹ Naacujitij, puetunu pueyajanaari nacooriguiaa na juayonuutasacari. Jiyacaritia, tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujire Pueyaso panishano na miishacarini?

¹⁰ Pueyari socua jiyacatequiaari nacoonu. Comandanteeri puerequiaari, na jiyani- ishacari Pablo naasucua socua sureesaanutaniyaquij. Naa jiyaniquiaariiri, puer- ajanaa pueya juaaquiocacari. Nocuaji, comandanteeri ritia na soldadohua jiyaramiquiquiaari, na tiajinia nojori tiuquininiuhua Pablo pueya tajiniji. Naa mi- itiuquiaariiri.

¹¹ Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiaca- jinia quiniaajuhaaj, Césarjanaa niquirarajuhaaj.

Judiocuaca roojotoosacari Pablo na motunura juucua

¹² Tariqui saniniuujia, noojiaqueya Judiocuacajinijinioori Pabloocua roojotooquiaari na monura. Nojoriiri naa sequetuquiaaritia:

—Paa jaara Pablo moyaquirini, pocua miaqueyaquirini, pocua ratuyaquirijiani- uhuaj.

¹³ Nojoriiri cuarenta canuu quiquiaari, naa sequetuquiaarini. ¹⁴ Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuu- cuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablo- jaatijia. ¹⁵ Niajaniya, pueyacuara secojonaa jiyaniijianucuaanaa, puetunu Sanedrín maanujuanaanio, nia sequere comandante cuara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacaritia nuu cajiniocua na moreni.

¹⁶ Tamonu pueyanoori Pablo raaquia caminiujuquiaari naa cuno pojori sequesano camarucuatej. Pablo raaquiaari nocuaji ritia soldadohua quijia tiajinia quiaquiaari na cama Pablo na pohuatanura. ¹⁷ Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante nu- mootenu pania.

¹⁸ Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

¹⁹ Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

²⁰ Caya samijiaari na sequeree:

—Noojiaqueya Judiocuacajinijiniori Pabloocuara rojotoorucuaa. Quiaari saponu sequesaanutaniya tariqui quia jiyatanura Pablo, puetunu Sanedrín maanujuanaa niquiara nequesoreesocoriquiano. ²¹ Quiaa jaara sequesaa, majaari nojori tojinu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiyajuhua, cuara moture Pablojaatijia.

²² Comandanteeri caya samijia sequequiaari:

—Maniniacuaja. Majaari tamasaca pohuatanu quia sequesano janiya. Tariucuaja. Quia quiaarohua.

Soldadohua jiyatasacari Pablo camarnu Félix

²³ Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucuaja. Mariyata cuara quiojora setenta soldadohua caballohua nijinia cajitiujiacajuhua, socua dosciento soldadohua saa cashiriacajanio. ²⁴ Comandanteeri na capitáncuaca sequequiaarijuhuaj, nojori niojotanura cajitiucua tamasaca caballohua nijinia Pablo cajijara. Nojori sequequiaarijuhuaj:

—Niocua maninia cojuare Pablo, cuara tiuquiiria camarnu Félix nequesoreesocoriquiano.

²⁵ Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotano pueyanojiniji quia pohuatareeraj. Na sesa Pablo. Narta Judiocuacaari na motunu paniquiano. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaji nia quiare ritia cuno pueyano, mariqui na motureeri’. ²⁸ Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. ²⁹ Nojoriqiiiri na nacootacanu Pablo tojiyaquiniucua tariucuacaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquiano, pueyaracaanu na nujuatesaanura. ³⁰ Janiyari sequesaaaru-cuaajuhua, noojiaqueya Judiocuacajinijinionaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhua, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

³¹ Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinia tiuquiiioseeri. ³² Na niohuacata quiojonaa soldadohuari Antípatris tiacajiniji tariquiicuaaji riujuutiaquiaariuhua Jerusalén tiacajiniahua. Caballohua nijinia cajitiuniaa soldadohua cutaraari Pablo

jiyataquiaari. ³³ Pablo jiyatanaa jaara tiuquiiijoseequiaari Cesareya tiacajinia, nojoriiri comandante naajionee niqutiosesee camarnu Félix. Pablo na niqutiotureejaariuhuj.

³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaaquiaarini?

Pabloori na riucuaaree:

—Cilicia jiyajinia rasanonijia.

³⁵ Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiijiore.

Jiyacaritij, camarnuuri na soldadohua sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

24

Tama Pablo tacusacari nocuajijiaaja camarnu Félix niquiara

¹ Pabloori cinco juuca camueequiaari tari Cesareya tiacajinia. Jiyacari tiuquiiijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jyanishano pueyanojuhuaj. Jyanohua pocuanu niishijia. Puetunu nio pojorijianaari camarnu Félix^{cua} tiuquitiaquiaari Pabloocuara na saquiriojotanura. ² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jiitiaa. Canaari naacua juhuajaniya quiyani, maninia canaa quia jiitiasacari. ³ Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajiniajanaa. ⁴ Maja puera cua tarishitiniu paniniu quiajaniya. Quenaaja rupaquijia canaa quia tojiricuara. ⁵ Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocucajuhuj. Naa sesa na niishitiojonuucua pueyatej, tamasaacari maja tari na rupuenu paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuaajaari cuno pojori jiyaniijia. ⁶ Juucua Pueyaso juaatiniu paniquianujaariuhuj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricuaajani. ⁷ Comandante Lisiasri canaa na jaariutiarucuaa saajani. ⁸ Canaa sequerucuaajaariuhuj: “Cante nio pueyanoocuara saquiriojotanu paniyani, cuaara quiaara camarnu Félix^{cua}”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuj, canaari cunora nocuara quia saquiriojotaani.

⁹ Cuniqum quiniaa Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquiniatejaj, taa Tértulo sequeyacuajani.

¹⁰ Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹ Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹² Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja

Pueyaso Secojoua tiajinia. Majaari quenaaja nojori riuritanu quiquianu janiya canaa Secojoua tiajinia juayonuutaano pueyata. Majaari quenaaja naa cua miiniu quiquiaari puetunu tiacajiniajanaa cua rucuanijosacari. ¹³ Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miiijani. ¹⁴ Nojori sequesacari janiyanaari Pueyaso tojjia tamaatia nojorijinijini, cua tojiniuucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiushacari puetunu Moisés naajiotasanoocujanaa, naajuhuj, cua tiushacari puetunu canaa supuetanaa caminiujiushano Pueyasojiniji naajionuutasanoocujanaano. ¹⁵ Janiyari juhua cucuara saquiriojotanaa pueya tiuya Pueyasooocujuhuj, taa Pueyaso samiitianijionutaniuhua macunucua; maninia miijiaca, sesa miijiacano. ¹⁶ Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niqiuara, pueya niqiuarano. Naacujitij, janiya jaara samiitiarohuani, majaari cua macuhujenu quiniutianiya.

¹⁷ Queraatia marijia cua shocotejonu nuhuaji cua rucuanijosacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiunuaa niqutiososano cumaneeca tiuquitiarohuacuaanijia. Janiyari na tiuquitiarohuani na jatanuhua Jerusalén tiacajinia, Jesuucua tiunuaa casamiijiuniucua niqutiosocoriquiano, mariyata cua jiiitasanojiniji cua niqutionuhua Pueyasora. ¹⁸ Naa cua miiniu nuhuaji Pueyaso Secojoua tiajiniatej, Asia jiyajinijinio Judiocuacari cua naacutucanu tohuataano juucua Pueyaso Secojoua tiajiniji. Janiyari juucua tohuatariquihuani cua cuaqueya cua jeequenu nuhuaji, taa canaa supuetanaa niishitiosaaquiaaricujani. Cuno juuca, majaari queraatia pueya quiniu quiriquiaa Pueyaso Secojouuajinia. Majaari quenaaja pueyata cua juayonuutano quiriquiaajuhuj. ¹⁹ ¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. ²⁰ Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoresacari janiya tii quituquianu jiyacarijuhuaj. Nojori cuara sequeera, ¿cuno camarucuate cua sequecanu janiya sesa miiquianuni? ²¹ ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoresacari janiyani.

²² Camarnu Félix jaara naa tojiqiaari Pablo sequesantej, nojuajaari pueya sequequiaari:

—Comandante Lisias cuara tiuquiiriajaara, janiyacu Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocuara saquiriojotanaa pueya tarinitiaquiaarijaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocuaicano, nojori jaara Pablocuara nimiaquia, majaari nocuaji na tenujununoj. Nojori cuara na niqutiotuura na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquicuata na tojinu paniyani. Cuara canaa niqiuara pohuataara taate Jesuucua tiushanojuarani.

²⁵ Naacujitij, Pabloori Félix pohuataquiaari nojori niqiuara taate pa naata maninia miijiara pa quiniuni. Pohuataquiaarijuhuaj taate pa naata tama pa cuaqueyajaaja pa cojuanu maniniani, sesa pa miyaquiniucuaaji. Naajuhuj, Pabloori na numootequiaari Pueyasoori sesa miijiaca saniitionutaniya.

Camarnu Félix jaara naa tojiqiaaritij, jiyano hua shiriiquiquiaariiri. Pablo sequereeri:

—¡Tariucuaaja! Quia quiaarohuacuarajaara. Janiya jaara jeya quiriqiani, janiyacua quia sequereeraniuhuaaj.

²⁶ Camarnu Félixri naa sequeyarucua na soldado hua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. ²⁷ Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuujia camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

25

Pablo pohuatasacari Festo niqiuara Jesujiniji

¹ Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajini-aari. ² Jerusalén tiacajinia na quishacari, pueyacuara secojonaa jiyaniijianucuaari tii Judiocuacajinijinio socua tojishano camarucuata Pabloocuara saquiriojotaquiaari camarnu Festo. ³ Nojoriiri camarnu Festo sequequiaari cuaara na soldado hua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴ Camarnu Festoori saaja nojori riucuaquiaari:

—Nujuatesano quiya Cesareya tiacajiniacuaruhua. ¿Maatucua casaara niyara rishaareni? Janiyacuajaari nocua tacatenutaniuhuaani.

⁵ Camarnuuri nojori sequequiaarijuhuaj:

—Niajaniyajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuara saquiriojotanu cua niqiuara tii, cua niishiniuria maninia, Pablote seetanujanaa sesa miiquianujuaara.

⁶ Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniuhuari. Na tiuquiniu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreesocoriquiano. ⁷ Judiocuacaari tari tiuquiiioquiaari Jerusalén tiacajinijijiuhuaj, Pabloocuara na saquiriojotanuunura. Pablo jaara nujuatesaaquiaari camarnu taceji, cuno pojoriiri jaarajaaja catecanoquiaari Pabloocua. Nojoriiri jiyano hua sesa nocuara saquiriojotanuquiaari najuhuana queraatia casaa. ⁸ Jiyacaritij, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiqiaaajaaniuhuaaj. Majaari sesa cua miiniu quiquianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹ Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰ Pabloori na riucuaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiya-juhuaj, majaari sesa cua miiniu quiquianu Judiocuaca. ¹¹ Janiya jaara sesa miirii seetanujanaani, cuaara cua motuuraqui. Cucuara cuno pojori saquiriojotasano jaara

coriaa quiri, majaari quenaaja tamonu pueyano naata niqutionu janiya cua mosaa-nura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹² Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

Jiyaniijia Herodes Agripa niquiara Pablo pahuatasacari Jesujiniji

¹³ Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuanura nojuaja. Agripaari tiuquiquiaari na rimiatu Bereniceta. ¹⁴ Nojori camueenujusacari camarnu Festo tiajinia, Festoori socua jiyaniijia Agripa pahuataquiaari Pablojiniji. Na sequequiaariiri:

—Tamonu pueyanori niya quiya, Félix tiujiasano nujuatesano. ¹⁵ Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucua. Nojoriiri cua sequetucanu Pablo cua motenura.

¹⁶ Janiyari saaja nojori riucuacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijoma niya nocuara saquiriojotanu-unurajaatijia. Monu panishano cuaara riuhuaneera tamajaaja quenaaja nocuaji, jaara seetanujuanaa quiaquiri nocuara saquiriojotasano”. ¹⁷ Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitiujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. ¹⁸ Cuno pojori Pablocuara saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano. ¹⁹ Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyaniishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyaniishanonaari samiitiaquiaariuhua. Saminionaari quiari quiyajaa. ²⁰ Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹ Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocujaatijia.

²² Jiyaniijia Agripaari camarnu Festo sequequiaari:

—Janiyari cuno pueyano tojiniu panijaaacuahuaj.

Festoori na riucuquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niquiaariuhua Bereniceta. Nojoriiri tiuquiti-aquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajinijinio camarucua-jaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. ²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquiriojotanu-uquiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaria camarnunaa”. ²⁵ Janiyacuajaari tari niishiyani, nio pueyanoori maja sesa na miiniu quiquianu. Naacuajitij, janiyari niishiriojiyani, ¿pueyanotucua casaara najuhua

mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniani. ²⁶ Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreeso-coriqianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua casaara nio pueyano cua jiyaroree nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo riuhanesacari jiyaniijia Agripa

¹ Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

²—Timiyaniijia jiyaniijia Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miijosanojuanaa niishijiajuhuaj, puetunu canaa nacojotasanojuanaano. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacarijiani

⁴ Puetunu Judiocuacajanaari niishiyajuhuaaj taa quijia cua quiquiaari cua naatujajiniiji nojoritia cua quishacari cua jiyajiniani, Jerusalén tiacajiniano. ⁵ Cuno Judiocuaca quia nequesotasureeraj. Nojori cuaara quia pohuataara jaara paniri pohuatanu. Cua mashajajiniiji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojitiaja cutara, socua tamasaca cuarta Judiocuacajiniiji. ⁶ Nojorijaari cucuara saquiriojotacanu cua tiushacari Pueyasooocua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuacaanu canaa supuetanaacuajani. ⁷ Quiarijiani, canaa supuetana Israel doce niquiohuacuajinio caneno pueyari naa seetanujuanaa Pueyaso sequesano niquiniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojitiasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. ⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹ Janiyari tarijia sequequiaari tamajaajani sesa cua niishiriojosacari Jesujiniiji: “Nazaret tiacajinijinio pueyanooocua tiuuniaa pueya paracaariirijaj”. ¹⁰ Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiaarijuhuaj, janiyari jaarajaaja sequequiaarini: “Maniniacuaja, cuaara puecoosaaia”. ¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miitiaquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanohua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriqiano nojoritij, janiyari nojori pajequiaari tucuacaanu tamonu jiyaca tiacajiniani.

Pablo pohuatasacari taa Jesuucua tiuujiaara na quiquiaarini

¹² Naacuajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuunaa pueya cua miitiasocoriquiano. ¹³ Nucuo cua quiasacari jiyaniijia Agripanaa, janiyari jiyocuacaanuji nunusaaquiaarini, cuata quiojonaajuhuaaj. Cuno shacantuucaari socua jiyanohua shacantuuca quiquiaari pananujiniji. Panacariiri jiyacari quiriquiaa. ¹⁴ Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: “¿Saulo, Saulonaa! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. ¹⁵ Janiyari na sequereeni: “¿Cantequia Jiyaniijianaa?” Cua riucuaareeri: “Janiyacuaajaari Jesuni, quiaa na miitiaquiaani. ¹⁶ Quia sanerohua. Janiyacuajaari quiocua muetareeni puetunu cua panishanojuanaa miijiaara cua jiyatenura quiajaniya, quiarijia janiyajiniji quia niquishano quia pohuatanurajuhuaaj. Naajuhuaaj, na nuhuaji janiyari quiocua muetanutaniuhuaani janiyajiniji quia niquishanorano pohuatana quia quiniuria. ¹⁷ Cua jiyarosacari quiajaniya, janiyari quiarta Judiocuacaacuaji quia cojuanutaniyacujani, tamonu jiyacajinijinio taucuacaacuajinio, tiquiyocua quia rucuanesacari janiyajiniji quia poojotasacari. ¹⁸ Nojoriicua quia jiyaroyanjia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasanutaniya cucua nojori tiushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiushacari cucuatej, Pueyasoori puetunu sesa nojori miishanojuanaa jiyanoonutianiya. Pueyasoori puetunu na saquiriojosano pueyatajanaa nojori rupuetootentianiya, puetunu Pueyaso jiiatasanojinijianaa nojori jiiitanurajuhuaaj”.

Pablo pohuatasano Jesu tojiijara na jatanujiniji

¹⁹ Naacuajitij jiyaniijia Agripanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajinijanaano. Maja saaja cuarta Judiocuaca cua pohuatanu quiquiaari Jesujiniji, janiyari taucuaca pohuataquiaarijuhuaj. Nojori nacasuquiaarinijia cuara sesa nojori miishano carteera, Pueyasocua nojori tacatonuhuaa nojori jiuujia. Janiyari nojori sequequiaarijuhuaj, cuara saaja maninia miijiaa quiiria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujua tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuaaja cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujiunaa naajionuutaquiaaricujani, naajuhuaaj, taa Moisés naajiotasano quia tariucuaaanu Pueyaso Rupaajiniacujani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitarohua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhuaajuhuaaj; Judiocuaca, taucuacanio”.

Pablo tiutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquui seseree puera quia niishiniuucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuaracashiniu. ²⁶ Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaaja Jesujiniji, Jesuucua tiuuniaa pueya miishanojinijijuhuj. Puetunu canaa miishanojuanaari maja jiyasohujaja na miishaanu quiquiaa. ²⁷ Jiyaniijia Agripaanaa, ¿quiaate tariucuacaanu Pueyaso sequesano caminiujiuniaa naajionuutanoocua tiuyajuhuj? Quiaacuajaari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniurajuhuj. Maja naatej, taa cumayocuata moronucua cua nujuatashuyanijia.

³⁰ Jiyacaritij, jiyaniijia Agripaari sanequee, camarnu Festojuhuj, Berenicenio, puetunu cuniqui nojoritia cajitiuniaa pueyano. ³¹ Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuhuj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niquitionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. ² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuara tacaara na rupuenaa pueyacua, nojori na saruhuatanura Sidón tiacajinia, naajuhuj, na rupuenaa niquitionura puetunu Pablo panishanojuanaanio. ⁴ Canaa jaara jaaretaquiaari Sidón tiacajinijini, canaari canaa muenecara niquimiam Chipre jiya tucuaatiajani. Paratuuri buque nacaacoji piyarojoriquiaa saaja. ⁵ Canaari Sidón tiacajiniji niuutiaquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

⁶ Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. ⁷ Canaari camueenujuquiaarini, puera jacaria canaa jaaretanuucua.

Naa canaa tarishiniuucuatej, canaari socua tiuquishiiquiaari Gnido tiaca taquijiri-ani. Paratuuri saa canaa patariquiaajaa. Naacujitij, canaari Salmón jiya tucuaatia-janiyojua shuriucuaratamaani. Canaari Creta jiya tucuaatiaja camarucutamaajaani-uhuj. ⁸ Naa puera canaa tarishiniuucua canaa jaaretasacari Creta jiya shuriuquiumi-atej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

⁹ Canaari puera tarishiiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniniacu caminiajiniiaari puereeta quijia tari buqueta jaaretanura. Pabloori juucua sequequiaari:

¹⁰ —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniu-tianiya. Paa naasucuaari cusonuunutanijajuhuj. ¿Casaatejaj pa toyani?

¹¹ Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujanaa tojiquiaariiri, buque capitánmio. ¹² Cuno tacatajajiniji canaa tii tiuutiariquiaani, majaari maninia quiquiaari shuniya canaa tajitiniuria tii. Nocujaj, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacujaj.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacujaj.

Shoniniacu caminiajinia paratu piyarojosacari jiyanojua nojori

¹³ Jiyacaritij, paratuuri jacaria piyarojonu coteequiaari pananu shuucujaj, canaa muenecarajiniji. Naaratej, nojoriiri sequetuquiaari:

—¡Pa naatacuajajaj quiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyanojua piyarojo-quiaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujajiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocujaj, canaari buque tarinitiaquiaarini paratu cuaara na capotaara tamajaaja. ¹⁶ Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojuaa poonijioquiaari cuniquini, canaa tacanini-uhuaa buque cacojiria cuno boteniyojua. ¹⁷ Bote tacanishaanu nuhuajaj, canaari buque cuaqueya morojoquiaarini na cumaquiniuria na jiaqueyaquiniuucujaj. Pueyari na puerenuta sequetuquiaari:

—¡Paratuuri pa capotanutaniya jaaquijajiniara! ¡Paari tii riitianutanianiyani!

Cuno canaa pueresano jaaquiani, na sesa quiquiaari Sirte. Nocujaj, nojoriiri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaque-quiaari, paratuuri saaja jiyanojua piyarojoriquiaajaa. Naaratej, nojoriiri buque pasano casami quejoonu coteequiaari moojinia. ¹⁹ Canaa camueenujusacari jiuujia-naraca juuca naquiya canaa miishacari, canaari buque casamijanaa quejooquiaari socuani, buque namuenura quenaaja. ²⁰ Tari canaa shocojoquiaariiri queraatia juuca. Majaari quenaaja canaa niquniu quiquiaari pananu, riyanio. Paratu piyarojosacari canaacua, mohuacaari socua jiyanojua cajiniuucuaquiaari canaacua. Nocujaj, canaari niishiriojoriquiaani canaari quiarijia cusonuunutanianiyani.

²¹ Majaari tojetaarucujajanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiquianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. ²² Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa

buque cutaraari juhua rapitiasaanutaniya puetunujuanaa. ²³ Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjiani. Janiyacuajaari na pueyanoni. ²⁴ Pueyaso seruuri cua sequeree: “Majaari puerenu Pablonaa. Quiaacuajaari jiyaniijiajanaa Augustoocua tiuquiniutianiya Roma tiacajinia. Quiaari na tacoji nujuanutaniya quia pocuanura. Naajuhuj, Pueyasoori quia secojosano tojjiriucuaa. Naaratej, puetunu quiata quiniaajanaari quiata rishiniutianiyajuhuj”.

²⁵ Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. ²⁶ Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adria-jinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua cate-canoyani. ²⁸ Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tacoji shanacutuquiaariuhua, saaja veintisiete metro queroni quiriquiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocujaji, buque pajamaji sohuaneyocuta morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. ³⁰ Jiyacaritij, buquejinia poonijionaa pueyari juucua cuno niucujaja jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaja roshinitiuriquiaa jiyocuacaanu tacanishano boteeri, tii na mashiyocuatunura. ³¹ Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuuriquiano.

³² Soldadohuari ritia jiyocuacaanu tunusano bote neyocua jiyatajotaquiaari. Moojinia na tinitiuriiri. Paratuuri na piyarojoquiaari tamoco nojorijiniji.

³³ Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia mi-aquenu quiquiaajuhuj. ³⁴ Quiarijia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu nijaniyajinijinio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji mi-aquerohuari. ³⁶ Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuj. ³⁷ Cuno buquejinia, puetunu canaajanaari quiquiaarini doscientos setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajinia

³⁹ Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiquiaari puereetuca surocohua. Jaaquiaari puetunu na shocujanaa quiriquiaa. Naacuajitij, nojoriiri sequetuquiaari:

—Buque pa saniri shiitianiinu cuno surocohuama.

⁴⁰ Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niquini-jiotetajaa roshinitiaquiaarijiuhuj, buque tacutajara. Buque nacaacuaji teeja toque tacanitiatureejaariuhuj. Buqueeri canujutaaree jaaquiajinia, paratu piyarojosano. ⁴¹ Buqueeri saacariji jaaquiajinia riitaseequiaari, caminia cajiniuucasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucasacari jiyanohua nocua. ⁴² Soldadohuari nojori jiyatasano quioosano pueya pueconu paniquiaari cuniquijia, nojori jiyanishacari cuacanutaniya naasucua, mashiyocuatumaari. ⁴³ Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushicuaari. ⁴⁴ Cuaashijianucua saniniuujia cuaara buque jiniacumaji suruhuatuneeacaacua jacamatuura na cuatajara. Tamasaca cuaara buque neecaacua jacamatuurajuhuj.

Naa miitiquiaariiri. Puetunu pueyajanaari jaaquiajinia rupaatiushiiquiaari.

28

Pablo quishacari Malta jiya tucuaatiajinia

¹ Puereeta canaa cuaconu nuhuaji shoniniacu caminiajinia, canaari namitia puetunujuanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia taucuacaari maninia canaacua jiyanooquiaari. Shiniquiaari quiriquiaa. Maruuri niriqiaajuhuj. Naa canaa shiniquiosacaritij, taucuacaari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

³ Pabloori naanacucua reratejoriqiaajuhuj. Manijinia na quejooriquiaari. Jiyacaritij, soconuquiiiri maniicuaaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niquitiquiaaritij, tama nojorijiaarijia sequetooquiaari:

—¡Nio pueyano naasucuaari pueyano mojua! Cocuaatia miirii juucua shoniniacu caminiajinia na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

⁵ Pabloori saaja manijinia majiriataree soconu. Majaari quenaaja na sajiyashi noonu quirii. ⁶ Puetunu pueyajanaari na sashiriquiaa, taacari na poreenutaniyani. Na sashituriqiaajaariuhuj na jiyanitiushacari canashiyaquiji cusonutaniya naasucua. Naa pueyaracaanu na sashitiushacari juucuatej, nojoriiri socua tamaatia niishiriojonuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

⁷ Cuniqui canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. ⁸ Cuno camarnu queeri jiyacari cusosu matariquiaa. Jiyanohua naseecaari quiriquiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secjoree nocuaraari. Na secojosacari, nocua niaquiaari na juaashiquiaari. Pueyanoori naatarohua. ⁹ Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiuhuj. Pabloori puetunujuanaa na naatanijioquiaari. ¹⁰ Naa

Pablo miiniuucuatej, cuno pueyari na jiitiasano casamijiniji canaa niqutiojoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqutiojotuchiaari narejajuhuj.

Pablo tiuquishacari Roma tiacajinia

¹¹ Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nujuatariquiaajuhuj. Shuniyacuaaji tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. ¹² Canaari Siracusa tiaca tacatajajiniiji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. ¹³ Cuniquiji canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. ¹⁴ Puteoli tiacajinia Jesuucua tiuuniaa pueyari canaa masuuchiaari na tiajinia. Canaa sequetuchiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. ¹⁵ Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuchiaari Foro de Apio tiacajinia. Tamasacaari saniniuujia canaa naacuchiaari Tres Tabernas jiyanihano tiacajinia. Pablo jaara narta Jesuucua tiuuniaa niquiquiaari, noojia cumaquiquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutioquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijaca narta Judiocuaca camarucuajanaa masuuchiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niqutiojukanu Romano pueyari, cua morosaanura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacari saaja juaaquioree. Janiyari jiyamitia sequecanuni, cuaara cua jiyarotuura jiyaniijajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuaara, cuarta Judiocuaca nojori quiniucua. ²⁰ Janiyari cunora nia niquiniu paniriquiaani, cua pohuatanura niajaniya taa puetunujuanaa parta Israel pueya niishiyacuajani, niajaniyajuhuj; macunucuaari samiitianijiosaanutanihua. Janiyari cunora cumayocuata moronucua niya quiyani.

²¹ Judiocuaca camarucuaari Pablo riucuchiaari:

—Maja quenaaja canaa masetanu quiquianu Judea jiyajiniji naajionee, canaa pohuataaanura quiajanijajiniji. Cuniqiijinio parta Judiocuacaari niya tiuquiijiocanujuhuaaj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. ²² Canaari saaja niishiyani, puetunu tiquiyocujanaa sesacasaquiaaquini-aari Jesujiniji pohuatasano. Quiaa mariqui cunojiniji canaa pohuatatare, canaa niishini-uria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiuquiaariiri. Pabloori nojori niqiiara pohuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujanaa Pueyaso Jiyarosano quiquiaari. Nojori sequequiaariijaariuhuaaj taa Pueyaso jiiitaa na jiyanooshano pueyani. Naajuhuaaj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio.

²⁴ Noojiaqueya nojorijinijinioori Pablo sequesano tojiquiaari cutara. Tamasacaari saaja na cuaracashitiquiaari saniniuujia. ²⁵ Nojorijinijinio jaara Pablo niishitiojosano tojiquiaari cutara, tamasaari nojoritia juayonuutunu coteequiaari. Naa na juayonuutasacaritij, tohuareetaquiaariiri na quiojonuhuaa. Pabloori jiyacari nojori sequequiaari:

—Pueyaso Sohuanuquiiiri seetanujanaa tariucuacaanu Pueyaso sequenu panishano caminiujiunia Isaiás pohuataniquiaari parta Israel pueya niqiiara, jaara na sequequiaari:

²⁶ “Quia quiaare cuno pueyacia. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianiyajuhuaaj. Majaari quenaaja nia niishiniu quiniutianiya’. ²⁷ Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosano-juhuaaj, na niqiiitaaquiniucuaaji, maja na numaata na tojitianura, noojiata na niishitiuyaquiniurianio. Naa jiyatecanu nojorinjia, maja na niishitiuniuria janiya, mariqui cucua tacateturohuari, nojori cua naarajonura”.

²⁸ Pueyanaa, nia niishiri. Niaa jaara ruuretatare cua pohuatasano Jesujiniji, taucua-caari saniniuujia pohuataaanutaniyacujua, taa Pueyaso jiyanooniu paniya pueyani, maninia na jiiitianura nojori. Taucuacaari na tojitianutaniya cutara.

²⁹ Pablo jaara naa sequequiaari nojoritij, Judiocuacaari quiojiyarohua. Tama nojori-jaariija juayonuutaarohua na quiojosacariuhua.

³⁰ Caapiqui marijiaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niqiiari na niquiniuria, nojuajaari maninia na masequiaari na quijia tiajinia. ³¹ Majaari jiyasohuaaja na pohuatanu quijia taa Pueyaso jiiitaa na jiyanooshano pueyani. Jiyaniijia Jesujiniji niishitiojojuajaariuhuaaj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuaajaari tariucuacaanu na sequenu panishano caminiujiuniaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniujia pueyaracaanu Pueyaso Nyanujuhuanajaj. Paa cutaraari quiari naataja niishitishaaquiaarini, nojuajaari seetanujanaa Pueyaso Nyanu. Paari quiaritia na niishiya seetanujanaa cutarani, Pueyaso Sohuanu samiitianiniucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jiitianurajuhujaj. Nojuajaari pa Jiyaniijia Jesucristo.

⁵ Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria. ⁶ Niajaniyajuhujaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhujaj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maniniaja nojori quiniuracuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiiria niajaniya, maninia na tojijia nia quiniuria. Naajuhujaj, nojori cuara nioojiaca cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujia pa Jiyaniijia Jesucristoocua. Naa Jesucristo miiniuucua niajaniyatej, janiyari cua Pueyaso sequequiaani: “iPaacarasho! Quiaari jiyanohua maninia”. ⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. ¹⁰ Naa cua secojosacari nojuajatej, janiyari na sequequiaani cuara cua tiuquitiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia niquiniuucua jiaatiaani, cua cumaquiniuria socua niajaniya na Sohuanu cumaacata, socua jiyanohua Pueyasocua tiuujia nia quiniuria. ¹² Majaari cua cumaquiniu paniniu saa niajaniyaja. Janiyari paniyani nia cumaquiniuria janiyajuhujaj. Naacujitij, mariyata pa tiuushacari Jesucristoocua, paari mariyata cumaquitiojonutaniyani.

¹³ Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaca tiuuniuria Jesuucuaajuhujaj. Tamonu jiyacajinia taucuacaari tari Jesucristoocua tiuujia quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajinijuhujaj. ¹⁴ Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani.

Majaari na tojiyashijia cua quiniu paniniu. Naaratej, janiya cuaara pohuataara na rupaa puereetuca tiacajinia pueya niquiara, mariyata tiqiyocua quijiaca pueya niquiarajuhuj. Janiya cuaara na rupaa pohuataara niishijiaca pueya, niishiyashijiaca pueyano. ¹⁵ Janiyari cunora quianu paniya Roma tiacajiniani, cua pohuatanura Jesucristojiniji niajaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquniu Jesucristojiniji cua pohuatanura. Jesucristo rupaacuajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesucua tiuuniaa pueyapuejanaanari Pueyaso pueyara jatanishaanutaniya, taa Judiocuaca jatanishaaquiiaa Pueyaso pueyaracaani. ¹⁷ Jesucristo pohuatasanojiniji paari niishiyani, Pueyasoori pa jiyanooquiiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiiaani. Cunora, naa naajiotasano quiyacuajaari tariucuacaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasoocua na tiuushacari”.

Pueyasora, puetunu pueyajanaari sesa miijiaca

¹⁸ Pueyasoori jiyocuacaanu na tojiyashijiaca pueya saniitioquiiaa. Naa nojori na saniitiosacaritij, Pueyasoori nojori numootequiiaa, nojuajaari puetunu na tojiyashijiaca pueyajanaa saniitionutaniya jiyanojua na juaaniutia. Naa saniitiosaanutaniyajaariuhuj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiiaa saaja. ¹⁹ Nojori jaara Pueyaso niishiniuucua jiaatariquia, nojori maara na niishirij. Pueyasocuajaari tari nojori niishitiquiaari taamuecate nojuajani. Nojoricuajaari tari maninia nojuajiniji niishiya. ²⁰ Majaari pa naata Pueyaso niquiniu pa namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuj, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajaniyajiniji”. ²¹ Nojoricuajaari Pueyaso niishijia najuhuanaj. Na niishijiaca nojori quishacari, nojoriiri saaja na rerequeteja. Nojoriiri na tojitiaaquiiaajuhuj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojoriijaarijia jiyanojua cushitiquiiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiiaa. ²² Nojori jyanishacari nojori cutaraari seetanujuanaa niishijiaca, naacuajitij nojoriiri socua niishiyashijiacara quiquiiaa. ²³ Nojoriiri Pueyaso shuquiritiaaquiiaa tama nojori shipinishano casaajaaja nojori shuquiritianura. Pa shipininia Pueyaso cutaraari jiyanojua cumaacaraca, pueyaracaanu quijiajuhuanaj. Nojoriiri Pueyaso niti shuquiritiaquiiaa tama nojori shipinijosanojuaja. Cuno, nojori shipinijosano Pueyaso niti na shuquiritiasocoriquianoni, cunoori quiquiiaa juhua shaajeja pueya niquishano, juhua jacuatujuaca niquishanojuhuj, juhua nacujiniaaco canujuucuatujuaca niquishanojuhuj, juhua roshiyocuatujuaca niquishanonio.

²⁴ Naaratej, Pueyasoori nojori tarinitiaquiiaa sacuraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiiaa sesa miiniuria. Naacuajitij, pueyari tama na cuaqueyajaaja miiquiiaa sesa, cararaatia nojori miitiosacari narta pueyanota. ²⁵ Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiiaa, sapojonuunu nojori tojinuria saniniujia. Naaratej, pueyari Pueyaso shipinijosano casami shuquiritiaquiiaa,

saniya na Shipinia niti. Nojuajaari pa Pueyasojuanaa cutara. Nojuaja cuara shuquiritiasaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaajuhuaaj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhuaaj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jyanohua cararaatia mitiooquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

²⁸ Nojori niishiniu paniyaquiniucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa miiniu niishijaca. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatiajaca. Sesa miiquiaari na panishano nojori jiitianura. Nojoriiri tamasa pueya jiitiasano casamiicua jiaatiajaca. Nojoriiri pueya puecojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijaca. Rimiaacaturijiaariuhuaaj. ³⁰ Nojoriiri sacuaraatia sequejojua narta pueya. Nojoriiri Pueyaso niquiniu paniyashijaca. Nojoriiri tamasa soojeaca. Nojoriiri tama na cuaqueyajaaja jiyatequiaa juhua socua maninia pueyara tamasaajiniji. Nojoriiri najuhuaana sequeja: “Janiya maninia miijiani”. Nojoriiri jyanohua niishijaca, niishishoo sesa casaa na miiniuria. Nojoriiri na queya tojiyashijaca. ³¹ Nojoriiri seetanujuanaa mosanucua Pueyaso na tojitiaquiniucua. Nojoriiri saaja tama na rupajaaja jataja. Majaari na sequesano na miiniu. Nojoriiri narta pueya paniyashijaca. Majaari nojori niishiniu jyanooniu. Majaari nojori niishiniu taraajenu narta pueyacu. ³² Nojoricuajaari tariucuacaanu naa Pueyaso sequesano niishiya: “Cante naa sesa miijiacani, cuara puecoosaria”. Naajaa, nojoriiri saaja sesa miiquiaa juhuaajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuaaj tamasa jaara sesa miiri juhua nojori.

2

Pueyasoori sesa miijiaca saniitionutaniya sesa nojori miiniuucua

¹ Naacuajitij pueyanaa, niaa jaara tamonuucua tonujujua quiriquia, majaari nia jyaniniu niaari sesa miyashijaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miiniu niishijaca nia quishacarijuhuaj. ² Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miijiosano. ³ Quiajaniya saniniuujia, quiarta pueyacuara tonujuanaa, majaari quenaaja quia jyaniniu quiaa sanitioyaquishaanutaniya. Quiaari saniitiosaanutaniyajuhuaaj. Quiaacuajaari juhua nojori, sesa miijiajuhuaj. ⁴ ¿Majateeri quia niishiniu, Pueyasocuajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuaaj. ¿Quiaateeri jyaniquiaa Pueyasoori naa maninia quia miiquiaa, maninia quia quiniuucua na niquiara? ¡Maja! ⁵ Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujuanaa maninia saniitiojua. ⁶ Pueyasoori puetunu pueyajanaa miiniutaniya

taa nojori miishano quiquiaari mijiriacuajani. ⁷ Naacuajitij, Pueyasoori maninia miijiaca jiyatenutaniya pueyaracaanu rishijiacara. Nojoriiri pueyaracaanu maninia miijiaca quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj. ⁸ Saniniuujia, Pueyasoori na tojiyashijiaca saniitionutaniya jiyano hua na juaaniutia. Naa saniitiosaanutaniyajaariuhua noo pojori, canapuate saaja sesa miiniu panijiaca quiquiaarini. ⁹ Puetunu sesa miijiaca pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. ¹⁰ Saniniuujia, Pueyasoori puetunu maninia miijiaca pueyapuejanaa miiniutianiya maninia, taa maninia miijiaca Judiocuaca miishaanutaniyacuaani. Pueyaso timitiasano pueya nojori quiniuucua, nojoriiri jiyano hua shuquiriaatia quijiaca quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹² Naacuajitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa miijiaca quiri, nojoriiri saniitiosocoriquiano. Naajuhuaaj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojitiaaquiniuucua. ¹³ Majaari nia jyaniniu niaari jyanoo shaanutaniya sesa nia miishanojiniji nareja najuhua nia tojishacari Moisés Rootasano. Niaari jyanoyaquishaanutaniya maja seetanujuanaa na tojiijiaca nia quiniuucua. Noo pojori cutaraari jyanoo shaanutaniya, canapuate seetanujuanaa na tojiijiacacuajani. ¹⁴ Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacuajitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuaaj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojitiaaquiniuucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹ Quiaari sequequiaajuhuaaj: “Janiyacuaajaari seetanu rupaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. ²⁰ Janiyari niishiyashijiaca niishitiojojuani, naatujoorinio, maninia cua niishishacari seetanu rupaajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinjicuaraarini? ²³ Quiaari sequequiaajuhuaaj:

“Moisés Rootasanoori jiyanoohua maninia. Na ajaa, quiaari Pueyaso rerequetequiaa quia tojiyaquishacari Moisés Rootasano. ²⁴ Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasocuara rimiaaquequiaa sacuaraatia, Pueyaso tojiyashijiaca nia quiniuucua nojori niqiuara”.

²⁵ Cuarta Judiocuacanaa, Pueyasocuajaari pa supuetanaa rootaquiaari pa cararaatiuuquia co cuaara miatesano quiiria, na saquiriojosano pueya pa quiniuucua. Naacuaajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojijiaca quiri. Saniniuujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niqiuara. Nia cararaatiuuquia coori najuhuana miatesano quiya. ²⁶ Saniniuujia, taucuaca jaara maninia miijiaca quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojori juhua miatesano quiya, na muerasu nojori quiniuria. ²⁷ Naacuaajitij, na cararaatiuuquia co miatesoo tahue jaara maninia miijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniuucua Moisés Rootasano. Naacuaajitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocuajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari niajanijatej, niaa naasucuaari sequeya: “Taucuaca jaara naa maninia miishaanutaniya nojori quiaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuararini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocuajaari Judiocuacaacia tiuuquiaari nojori jitianura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhua? ¡Maja! ⁴ Puetunu pueyajanaa jaara sapojonuujuaa quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quia tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhuaaj, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu”.

⁵ Pa supuetanaa tiuyaquiniuucua seetanu Pueyaso rupaacuajanaa, naacuaajitij, mijiria quiniaa pueyari niishiya, Pueyasoori socua jiyanoohua maninia pueyajiniji. Sesa pa miiniuujiniji, paari niishiyani Pueyaso cutaraari jiyanoohua maninia. Naacuaajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Juaj! Juhua niishiyashijia pocuareenijia. ⁶ ¡Seetanujuanaa, Pueyasoori sesa miyashijia! Nojuaja jaara sesa miijia quiriquiajuhuaj, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaaiana jiiitaja. Naaratej, ¿Pueyasotucua casaara cua saniitoren?” ⁸ Teyano pueyanote naa sequejani, nojuaja naasucuaari naa sequejajuhua: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quirijitij cuarta Judiocuacanaa, ¿paateeri socua maninia miijiaca taucuacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijiaca; Judiocuaca, taucucanio. ¹⁰ Tariucuacaanu Pueyaso Rupaaajiniacuajaari naa naajiotasano quiya:

“Majaari quenaaja niquiriyatu maninia miijiaca quiniu. Shaaqui tojetaarucuajanaa.

¹¹ Majaari quenaaja maninia niishiriojousa pueyano quiniu. Majaari quenaaja Pueyasocua jiaatiaja pueyano quiniujuhua. ¹² Puetunu pueyajanaari Pueyasocua tashuquiorucuaa. Puetunu nojorijianaari seserucuaa. ¿Cante maninia miijiacani? Shaaqui. Shaaqui tojetaarucuajanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiiitaa na rupaama, rimiaacaturu nojori quiniuucua. ¹⁴ Nojori jaara pocuare, saaja tamasa sesacaquiaari, puera juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesojua, narta pueya taraajetajuhua. ¹⁷ Majaari nojori niishiniu jiyanooni. ¹⁸ Nojoriiri juhujaniya miiquiaa sesa saaja. Majaari na pueretunu Pueyaso”.

¹⁹ Paacuajaari niishiyani, puetunu Pueyaso Rupaaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucucanio. ²⁰ Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijiara pa jatanishaanuni. Moisés Rootasanojinia, tariucuacaanu Pueyaso sequenu panishano caminiuunaa naajionuutasanojiniaari naa sequeyajuhua. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaa quiri. ²² Quiarijiani, Pueyasoori pa jiyanooquiaa cutara, saaja Neyanu Jesucristocua pa tiuushacari. Judiocuaca, taucuacajuhua, Pueyasoori puetunujanaa jiyanooquiaa Neyanuucua nojori tiuushacari. Majaari rimiajata na jiyanooni. ²³ Puetunu pueyajanaari sesa miijiaca; Judiocuaca, taucucanio. Naacuajitij, nojoriiri juhua tucuacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴ Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacuajitij, Pueyasoori pa jiyatequiaari juhua sesa miyashijara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej,

nojuajaari na Que Pueyaso jiyanootiquiaa pueya. Naajuhuj, Pueyaso saniitioy-aquishacari tariucuacaanu nocua tiuujia pueya Jesu cusoyaquishacarijia, majaari najuhuana puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojoriicuara mosocoriquiano, sesa nojori miiijosano tuujusaanura seetanujuanaa. Naaratej, nojuajaari pueyaracaanu sesa nojori miiijosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujuanaa maninia miiija. Nojuajaari maja najuhuana na jiyanooni pajaniya. ¡Neyanu motequiaari pocuaraari!

²⁷ ¿Teyano niajanijiniote tojetaarucujanaa saaja maninia miiijiani? Shaaqui. Naacuajitij, maninia miyashijia pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojitiajaca quiriqia maniniani, paa maara tama pa cuaqueyajaaja shuquiritiajaca quiriqia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuaja pa shuquiritasocoriquiano. ²⁸ Naacuajiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocua-jaari puetunu mijiria quinia pueyapuejanaa Jiyano. ³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacaa, socua tamonu Pueyaso taucuacaa. Naaratej, puetunu pueyapuejanaari jiyanooshaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio. ³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa miyashijia

¹ Naaratej cuarta Judiocuacanaa, ¿taa nia sequeya pa supuetana Abrahamjinijini? ² ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasocua tiuquiaari. Naaratej, Pueyasoori na jiyatequiaari juhua sesa miyashijia”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutiosaare, cuno cumaneecaari maja nareja niqutiosano. Cunoori seetanujuanaa na poonijosanojiniji. ⁵ Saniniuujia, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijia saaja nocua na tiuuniucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiara, maninia miyashijia pa quishacarijia. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanooya sesa na miiijosanojinijicujani, Pueyaso jaara tuujure sesa nojori miiijosanojuhuaj.

⁸ Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaar-icuaa Abrahamtej, ¿Pueyasote saaja Judiocuaca jiyanooniu panijia, noo pojori canapuate na cararaatiuuquia co miatesano jiitiaani, taa nojori supuetana Abrahamcuaani? ¿Taa nia sequeyani? ¿Taucuacaarijataj? ¿Nojoriti jiyanooshiyajuhuaaj? ¡Taaquiririnij!
¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuajaari na jiyanooquiaari miatesoojua na quishacari. ¹¹ Na tiuuniu nuhuaji Pueyasooocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasooocua na tiuushacari, Pueyasoori na jiyatequiaari juhua sesa miyashijia, miatesoojua na quishacari. Naacuajitij, miatesoo taucua tiuushacari Jesucristooocua, taa Abraham tiuquiaaricuaani, Pueyasoori nojori jiyateya juhua sesa miyashijia nojori quiniuriajuhuaj, mariyata juhua Abraham niquiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjuhuaaj. ¹² Naajuhuaaj, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristooocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niquiohua nojori quiniuriajuhuaj.

Pueyaso sequesano Abrahamni, cunoori Jesucristooocua tiuujiacarajuhuaaj

¹³ Pueyasocuajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaaanu quiquiaari Moisés Rootasano tojjijia na quiniuucua. Jiyacaritij, Moisés Rootasanoori maja na quiniu quiquiaari juhuanujuaja. ¹⁴ Pueyaso sequesano Abraham jaara saaja Moisés Rootasano tojjijiacara quiriquia, na sequesano maara najuhuana quiri Pueyasooocua tiuujia pueyara. Naajuhuaaj, pueya maara najuhuana Pueyasooocua tiuujia quiriquiajuhuaj. Seetanujuanaa Pueyaso sequesano Abrahamni, cunoori puetunu Pueyasooocua tiuujiacarajanaa. ¹⁵ Cunoori maja saaja Moisés Rootasano tojjijiacara. Pueyasocuajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojtiaaquiniuucua cuno rootasano. Saniniuujia, Moisés Rootasano jaara quiaquiriquia, pueya maara sequeyaquishaare: “Niaari sesa miijia”.

¹⁶ Pueyasoori tariucuaaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyaso sequesanoori maja saaja Moisés Rootasano tojjijiacara. Cuno sequesanoori puetunu pueyapuerajanaa, canapuate Pueyasooocua tiuujia quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujia pa quishacari taa Abraham tiuquiaari Pueyasooocuaani, paari Abraham niquiohuani. Naaratej, Pueyasora, Abrahamri pa que. ¹⁷ Pueyasocuajaari naa sequequiaari Abrahamtej nojuajaari queraatia niquiohuaraca quiriquiano. Naacuajitij, Pueyaso sequesanoori naa naajiotasano quiya: “Abrahamnaa, janiyari quiarijia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuquiaari. Nojuajaari niishiquiaari Pueyasoori macunucua samiitianijia. Niishiquiaarijuhuaj, Pueyasoori cumaacaraca na panishano na shipininiuria shaaquijiniji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquiaari. Naacuajitij, nojuajaari seetanujuanaa queraatia tamaatia rupaaca pocujaca

pueyapue que, taa Pueyaso sequequiaari nojuacuajani. Pueyasoori naa na sequequiaari:

“Quia niqiuohuari tojetaarucujanaa queraatia quiriquiano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuaaj, naajaa, majaari na tarinitianu quiquiaari Pueyaso sequesanoocua tiuuniu. ²⁰ Saaja Pueyaso sequesanoocua na tiuushacari, nojuajaari maja noojia na niqiiiotenu quiquiaari. Majaari Pueyaso sequesanojiniji na taacanuunu quiquiaarijuhuaaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaque-etaquiaari Pueyaso: “Paacarasho cua Pueyasonaa. Niishiyani quiaari canaa mуетenutaniya taa quia sequecanu janiyacujani. ²¹ Quiaacuajaari cumaacaraca quia miniuria puetunu quia sequesanojuanaa”. ²² Naa Abraham tiuuniuucua Pueyasooocuatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. ²⁴ Cunoori pajaniyara sequesanojuhuaaj. Cunora, Pueyasoori pa jiyateya juhua sesa miyashijiarajuhuaaj, nocua pa tiuushacari, pa niishishacarijuhuaaj nojuacuajaari pa Jiyaniijia Jesucristo samiitiani quiaariuhua macujiniji. ²⁵ Pueyasocujajaari mijiria na jiyaroquiaari sesa pa miishanoocuaara mosocoriquiano. Nojuajaari na samiitiani quiaariuhua, Jesu jaatianura nocua pajaniya, juhua tariucua sesa miyashijiaa.

5

Jesuucua tiuunaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niqiiarani. Jesucristoori na Que pa jiyanooti quiaari, pocuara na cusosacari. ² Jesucristoocua tiuujiaa pa quishacari, Pueyasoori pa timiti-aquiaa. Pa cumaqui quiaariuhuaaj maninia necohua pa quiniuria. Paari shuquiriya-jaacuhuaaj, pa niishishacari paari jatanishaanutaniyani, shacantuuca quiijiaa pa quiniuria juhua nojuajuhuaaj. ³ Majaari saa cunojua. Paari shuquiriquiaajuhuaaj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhuajaniya sashijiaa quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacaritij, majaari sapojosano pa quiniu quiniutianiya. Pueyasocujajaari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jiiitianura poojiajinia.

⁶ Pueyaso tojiyashijiaa pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷ Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: “Janiya cuara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano jaara jiyanoohua na panijia quiri, nojuaja maara sequere: “Janiya cuara na niti mosaaria juhuari”. ⁸ Saniniuuja, sesa miijiaa pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanoohua pa panijia. ⁹ Quiarijia, paari sesa miyashijiaa quiya Pueyaso niqiiarani, Jesucristo cusonuucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaa pueya, Cristoori pocuaji tacunutaniya cutara, tariucua na jatanishano pueya pa quiniuucua. ¹⁰ Na paraa pa

quishacarijia, Pueyasocuajaari pa jiyanooquiaari, Neyanu cusonuucua pocuara. Quiar-
ijia, nata jeecatoono pa quishacari, Neyanuuri saminio quiya pueyaracaanu pocuaji na
tacunura. ¹¹ Majaari saaja cunora shuquiriaatia pa quiniu. Paari shuquiriyajuhua, pa
Jiyaniiija Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusonuquiaani? Jhuacatecara pa supuetana Adán miiniuucua
sesa, naaratej puetunu pueyajanaari sesa miijiacajuhua. Pueyasocuajaari tari se-
quequiaari: “Cante sesa miijiani, cuara shaajeera”. Seetanujuanaa naari. Puetunu
pajaniyanaari shaajeriquianoni, sesa miijia pa quiniuucua. ¹³ Moisés Rootasano
quiyaquishacarijia, pueyari tari sesa miiniu niishijia quiquiaari. Jiyacaritij, pueya
miishacari sesa, majaari nojoriicuara saquiriojotasaanu quiija sesa nojori miishacari.
¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari
Pueyaso sequesano taa Adán tojiyaquiquiaari Pueyaso sequesano cuani. Naajaa,
puetunu nojorijianaari cusonuquiaarijuhua sesa miijia nojori quiniuucua, sesa
miijia Adáncuajinio nojori supuenucua. Quiarijia saniniuujia, nia pohuatareera Adán
miishanojiniji, Jesucristo miishanojinijio.

¹⁵ Adán miishanoori jiyanohua tamaatia Jesu miishanojiniji. Coteenu shipinishano
pueyano miiniuucua sesa, puetunu pueyajanaari shaajenu niishiya. Saniniuujia,
Jesucristo miiniuucua maninia, Pueyasoori queraatia pueya jiyatequiaa pueyaracaanu
rishijia nojori quiniuria cutara. ¹⁶ Pueyaso miishano maninia pajaniyarani, cunoori
sesa Adán miishano shocotaa jiyanohua cutara. Naa niquiriyatu sesa casaa Adán miini-
uucuatej, puetunu pueyajanaari saniitiosocoriguiano. Saniniuujia, maninia Jesucristo
miiniuucua pajaniyarani, Pueyasoori pa jiyanooquiaa puetunu sesa pa miishanojini-
jijianaa. ¹⁷ Niquiriyatu pueyano miiniuucua sesa, puetunu pueyajanaari cusonu-
juacara quiquiaari. Saniniuujia, niquiriyatu pueyano miiniuucua maninia pajaniyara,
cunora, Pueyasoori pa jiyateya juhua sesa miyashijia pa quiniuria. Cunoori, Jesu-
cristoocua pa tiuushacari. Majaari saaja cuno, naajuhua, paari shuquiriaatia quiija
jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa
jiyatequiaari sesa miijiacara, saniitiosano nojori quiniuria. Naajuhua, Jesucristo
miiniuucua maninia, puetunu pueyajanaari na naata jiyanooshaanu, nojori sani-
itioyaquishaanuucua, pueyaracaanu quiijia nojori quiniuria. ¹⁹ Adán tojiyaquini-
uucua Pueyaso sequesano, puetunu pueyajanaari sesa miijiacara jiyatesaaquiari-
juhua. Saniniuujia, Jesucristo tojiniucua Pueyaso sequesano, puetunu nocua tiuujia-
acajanaari juhua sesa miyashijianucua jiyatesaaquiuhua.

²⁰ Moisés Rootasano jaara niishishaaquiaari, pueyari socua sesa miijiacara jiyacate-
quiaari. Naa socua sesa miijiacara pa quishacaritij, naajuhua, Pueyasoori socua jiyacate-
quiaari pocua taraajenujuhua. ²¹ Sesa miiniu tarinitianu niishiyashijia pa quiniu-
ucua, puetunu pueyajanaari cusonuuriquiano quiquiaari. Saniniuujia, Pueyaso taraa-
jenuucua pocua, nojuajaari Neyanu Jesucristo motequiaari pa niti, pa jiyanooshaanura.
Naacuajitij, nojuajaari juhua pa samiitianiioquiaariuhua, pueyaracaanu rishijia pa
quiniuria pa Jiyaniiija Jesucristota.

6

Pablo niishitiojosano moojinia tiuquinijonujiniji

¹ Pueyaso jaara naa pa jiyanooquiaa pocua na taraajesacari, ¿taa nia sequeyani
pueyanaa? ¿Paate socua pueyaracaanu sesa miijia quiniutianiya, pueyaracaanu
Pueyaso jiyanooniuria pajaniya, pueya niishiniuria, Pueyasocuajaqui jiyanohua
maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu!

Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacua-jaari tari cusonuquiaari Jesutani. ³ ¿Niaateeri cuno niishiyaquiyajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhuj. Naa juhua macu pa quishacaritij, paari samiitianijosanohuani, taa Jesucristo samiitianishaaquiaariuhua macujiniji jiyanoehua Pueyaso cumaacatacuaani. Naa samiitianijosanohua pa quishacaritij, maninia miijiaca pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhuj, paa cutaraari tari samiitianijosanohua juhua nojuajani, maninia quijiaca pa quiniuria. ⁶ Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. ⁷ Naacuajitij, sesoriquia poojia seque jaara tari jatanishano quiya, majaari tari sesa miijiaca pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiri-quiano saminioni. ⁹ Cristocuajaari samiitiaquiaariuhua. Paari niishiyajuhuj, majaari socua na pacutenu quiniutianiuhua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰ Majaari socua Jesucristo pacutenu quiniutianiuhua cusonu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuj, niaacuajaari Jesucristota samiitiaconohua, Pueyaso tojijiaca nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuaaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiitiacoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniurija. ¹⁴ Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojtiajaca cutara, maja tari Moisés Rootasano tojijiaca.

Pueyaso tojiyashijiaca pueyani, nojoriiri Sesaaca pueya

¹⁵ Cua sequesacari niajaniya, pajaniya maja tari Moisés Rootasano tojijiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! ¹⁶ Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojijia quiniutianiyani. Naajuhuj, niaa jaara sesa miijiaca quiriuhua, niaari Sesaaca tojijiaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojijiacara quiri, niaari sesa miyashijiaca quiniutianiya. ¹⁷ Tarijia, niaari Sesaaca tojijiaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaaricujani. ¹⁸ Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojijiacara jatanishano, saaja maninia miijiaca nia quiniuria. ¹⁹ Janiyari naa

pohuataa serujiniji niajaniania, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacujitij, niaari jiyanojuaa sesa miijiacara jiyacatequiaari. Naajuhuj, quiarjia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojetaarucujanaa maninia miijiacara quiniutianiya Pueyasora.

²⁰ Niaa jaara sesa miijiacara quiquiaarijia Sesaaca tojijiacara nia quishacarijia, niaari juhuajaniya Pueyaso tojiyashijiacara quiquiaari. ²¹ ¿Sesaacate maninia nia miiquiaari sesa nia miiniuucua nera? ¡Maja! Niaa cutaraari saaja caririquiquiaa sacuaraatia casaa nia miiniuucua tarijia. Niaari quiarjia niishiyajuhuj, cante sesa miijiacara quiquiaani, nojoriiri shaajasaariquiano. ²² Naa sesa miyashijiacara nia quishacari quiarjia saniniuujia, niaari Pueyaso tojiijiacara jiyatesaaquiaari, saaja na panishano nia miiniuria cutara. Naa Pueyaso tojijiacara nia quishacaritij, nojuajaari nia jiyatenutaniya seetanujuanaa maninia miijiacara nia quiniuria. Naacujitij, niaari pueyaracaanu shuquiriaatia rishijiacara quiniutianiyajuhuj. ²³ Saniniuujia, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuujia, saaja Jesucristoocua tiuujiacara pa quishacari, Pueyasoori saa cunoraja pa jiyatequiaa pueyaracaanu rishijiacara pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacujajaari Moisés Rootasano niishijiacara. Niaari niishiyajuhuj, paa jaara shaajequeeni, paari jiyacari Moisés Rootasano cartequete shushani. ² Naajuhuj, paacujajaari rootasaaquiaarini, maaji jaara camishano quiri, cuaara tamonu cayata quiyaquiiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhuj pueyanaa. Jesucristo cusonuucua pa niti, niaari juhua cusonuucuaarijuhuaj, maja Moisés Rootasano tojijiacara nia quiniuria socua. Naacujitij, niaari tamonu tojijiacara quiya cutara. Nojuajaari pa Jiyaniijia Jesucristo, nooj, macujiniji samiitiaquiaarihuatej. Naacujitij, quiarjia pa Jiyaniijia Jesucristo tojijiacara pa quishacari, paari maninia miijiacara Pueyasorani. ⁵ Tarijia, Pueyaso tojiyashijiacara pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacujitij, tama sesa pa miishacarijaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶ Tarijia, paari juhua quioosano pueya Moisés Rootasano tojitishaaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojiniu cartequiaarini. Moisés Rootasano pa tojiyaquishacari quiarjia, naacujiti pa naata Pueyasojuanaa tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiajaca quiquiaari maniniani, pa puerenuta paa mariqui saniitiosaareeri pa tojiyaquiniuucua niquiriyatu queraatia na rootasanojiniji.

Poojiaari saa sesa miiniu niishijiaja

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyano hua maniniacuaajaari Moisés Rootasano. Moisés Rootasanojiniji, paacuaajaari niishiyani paari sesa miijiacani. Moisés Rootasano jaara quiyaquiriquia, janiya maara niishiyaquiquiaarini, cua jiaatiasacari tamasa ca jiitiasano casamiicua, cunoori sesa Pueyasora. ⁸ Saniniuujia, Moisés Rootasanojiniji cua niishishacari maja tamasa casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacar-ijia, coojiaari juhua janiya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaa-janaa na miiniu paniniuria. ⁹ Moisés Rootasano cua niishiyaquishacarijia, janiyari juhua janiya quijia quiquiaarini. Saniniuujia, Moisés Rootasano cua niishishacari, janiyari jiyano hua taraajequiaarini, cua niishishacari janiyari jiyano hua sesa miijia Pueyaso niquiarani. ¹⁰ Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. ¹¹ Naacuajitij, janiyari jiyano hua jiyajenequiaarini, cua jyanishacari cua naatacuaja Moisés Rootasano tojiniu maninia, Pueyaso jyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jyanoy-aquiniutianiya.

¹² Seetanujuanaa nia sequeyanijia pueyanaa, Moisés Rootasanoori jiyano hua maninia. Tojetaarucuaajanaa maninia rootasano. Cunoori seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyano hua sesa Pueyasora. Naacuajitij, paari Moisés Rootasanojiniji niishijiani, paari puetunujuanaa jatasocoriquiano quijia juucuaani, seetanujuanaa sesa miijia pa quiniucua.

¹⁴ Paacuaajaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanocuaajaari pa tojishocoriquiano puetunu poojiata-janaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaaja. Cuno sesa cua miishanoori coojiajiniji supueno tamajaaja. ¹⁸ Quiarijia niishiya cutaranijia, coojiaari tojetaarucuaajanaa sesa miiniu niishijia. Naacuajitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacuajitij, cua miishanoori maja maninia, taa cua miiniu paniquiaa juucuaacuajani. Cua miishanoori saaja cua miiniu paniyaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaaja.

²¹ Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniucua jiaatiaquiaa juucuanijia. ²³ Janiyari niishiyajanihuaj, coojiaari juhua cua niishitiaja paraca quiya. Naacuajitij, cua niishiriojosacari, “Maninia miiniutianianijia”, coojiaari

saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuaarini? ¡Tojetaarucuajanaa tاراatia quijianijia! Pueyara-caanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? ²⁵ ¡Pueyaso shuquiritiaanijia cua niishishacari, nojuacuajaari cua Jiyanijia Jesucristota cua jataniniutianiya tojetaarucuajanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyan

¹ Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacuajitij, paari tojetaarucuajanaa jiyanooshano quiyani. ² Puetunu pueyajanaari cusonuuriquiano quijia, sesa miijiaca nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujuanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiitiasacari juhua pa cuaqueyajuhaaj, Pueyasoori juhua sesa miijia na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiitiasacari quiarjia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojjia pa quishacari, majaari tari pa quiniu sesa miijiaca, taa pa quiquiaari tarijacuajani.

⁵ Canapuate tama na panishanojuaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuujia, canapuate Pueyaso Sohuanu tojjia cu-tarani, nojoriiri saaja Pueyaso shuqiritiniuria jiaatiaquiaa. ⁶ Tama na cuaqueyajaaja shuqiritiniuria jiaatijacaari saaja shaajecoriquiano cutara. Saniniuujia, Pueyaso shuqiritiniuria jiaatijacaari pueyaracaanu rishiriquiano cutara. Nojoriiri juhua-janiya shuqiriaatia quijiacajuhuaaj. ⁷ Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuanaa majaari na naata Pueyaso tojjia na quiniujuhuaaj. ⁸ Naacuajitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniu.

⁹ Niajaniya cutaraari maja nia quiniu juhua cuno pojorijia, tama na cuaqueyajaaja shuqiritiniuria jiaatijacani. Naa cutaraari Pueyaso shuqiritijia, Pueyaso Sohuanu cumaquishacari niajaniya, nojuaja jaara seetanujuanaa nioojiajania quiya. Cante Pueyaso Sohuanu jiitiaaquiyani, nojuajaari maja Pueyaso pueyano. ¹⁰ Cristo quishacari poojiajania, pa sohuanuuri tari jatanishano quiya maninia miijiaca pa quini-uria, pueyaracaanu rishijia pa quiniuriajuhuaaj. Pa cuaqueya cutaraari shaajaso-coriquiano, sesa miijiaca pa quiniuucua. ¹¹ Naajaa, Pueyaso Sohuanu jaara poojiajania quiya, nojuajaari pa cuaqueya samiitianijionutaniuhua, taa na samiitianiquiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuqir-itiniuria pa jiaatianu tari, taa pa miiquiaari tarijacuajani. ¹³ Cante naa miijiaca quiyajaani, nojoriiri shaajasaariquiano. Saniniuujia, niaa jaara Pueyaso Sohuanu

cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

¹⁴ Canapuate Pueyaso Sohuanu tojitiajacani, nojoriiri Pueyaso niquiohua cutara.

¹⁵ Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuajitij, cuno pa jiitiasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari sanitiosaanutaniyani, Moisés Rootasano pa tojiyaquiniucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiitiasanojuanaari pa jiitiasano quiniutianiyajuhuaaj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujiaa pa quiniucua. Paa jaara naquiya miishaare nocuara mijiriani, paari jiyanojua maninia quijiacara jiyatesaanutaniyani juhua nojuajuhuaaj.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanojua maninia miishaanutaniyani, pueyaracaanu shuquiriaatia pa quiniuria. ¹⁹ Quiarijiani, puetunu Pueyaso shipinishano casaajanaari pa niquiniucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucuajanaa maninia jeenucuasano na muerasu pa quiniuria. ²⁰ Coteenujanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaaj. Majaari na sesenu quiquiaari tama na panishacarijaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhuaaj. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeezanujuhuaaj. Naacuajitij, puetunu Pueyaso shipinijosano casaajanaari maninara quiniutianihua, maja na sesenura socua. ²² Quiarijiani, puetunu Pueyaso shipinijosanojuanaari jiyanojua noojia niojiya taraatia na quishacari. Quia-tojiyari juhua maaji noyano, cuara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhaaj, na panishacari tojetaarucuajanaa jatanishano quijiaca pa quiniuria. Paacuajaari tari jiitiaa Pueyaso Sohuanu poojiajiniani, pa niishiniuria, paari seetanujanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. ²⁴ Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniucua jiaatiaaquirini. Paa jaara tari jiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhujaniya rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanojua na secojosacari pocuara, jiyasohua quiatojiya poojiajiniaari. ²⁷ Poojia niishijia Pueyasoni, nojuajaari niishiyacuaja casa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanijia cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuaaj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocuacaraca na quiniuria. ³⁰ Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiushacari, Pueyasoori nojori jiyatequiaa juhua sesa miyashijiacara. Jiyanoshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanojua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarjia niqutioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuaacuajaari pa jiyatequiaari juhua sesa miyashijiac pa quiniuria. ³⁴ Jesucristocuaajaari tari cusoquiaari pa niti. ¿Cantucua saniniuujia quiarjia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitiaquiaariuhua. Quiarjia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari jiyanojua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasaca jaara naquiya miya pajaniyani. Naajuhuaaj, paa jaara quera titiacoya pa miaajenutani, majaari nia jiyaniniu Cristo pa paniyaquiya, naajuhuaaj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuaaj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacuajaari taraatia miishocoriquianoni, naatej, taa tariucuacaanu Pueyaso Rupaajinia naajio-tasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniuucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷ Paari naa miishaquiaaaniuhuaaj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jeeanura pajaniya, juhua nojuaja pa quiniuria socua. ³⁸ Seetanujuanaa niishiyanjia, Pueyaso panishacari jiyanojua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiojuani, macu soj, naajaa, pa panijia Pueyasocuajaari pata quiyajaa. Naajuhuaaj, Pueyaso seya, samaruhuanio, puetunu cunojuanaari maja na naata pa rupatanu Pueyasocuaaji. Naajuhuaaj, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pajaniyani, cunoori maja na puequenu quiniutianiya quiarjia, tamacarinio. ³⁹ Naajaariuhuaaj, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacuajitij, pa Jiyanijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniji.

9

Pueyasojuanaari pueya saquiriojojua na pueyara

¹⁻³ Naa Pueyaso pueyano cua quishacaritij, janiyari jiyanoehua cuarta Israel pueyacuara taraajequiaani, nojori tiuyaquiniucua pa Jiyaniijia Jesucristoocua. Janiyari pueyara-caanu nojoriicua taraajequiaa jiyanoehua, maja cua naata quishacari cuarta Israel pueya tiuutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajanijatej, janiyari coojiajinia niishiyani, seetanujuanaari cua sequesano. Pueyaso Sohuanuuri cua niishitijuhuaaj majaari cua sapojonu. ⁴ Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niquitiquiaari shacantuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuaaj, Pueyasoori Moisés niquitiquiaari caapiqui saajianecua na naajiosano, saniniuujia Moisés niishitijonura tiji nojori. Pueyasoori nojori niishitiquiaarijihuaj taa nojori miiniutianiya, tariucua jiyanooshano nojori rerejonura na niquiara. Pueyasoori nojori sequequiaarijihuaj, nojuajaari puetujuanaa na sequesano Abraham tohuateenutianiya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijianaa jiiitiana na quiniuriajihuaj. Nojuajaari Pueyasojuhuanajaj, juhua na Quejhuaj. ¡Nojuaja cuara pueyaracaanu maniniuhuaqueetasano quiiria! ¡Cuara naa quiiria pueyaracaanutej!

⁶ Quiarijiani, queraatia parta Israel pueyajiniijinio pueyari maja Pueyaso muerasu. Naa cua sequesacari niajanijatej, majaari nia jiyaniiniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaja. Jaara naa quiritij, ¿casaara puetunu Israel pueyajanaa maseyaquiniutianiya Pueyaso sequesano nojoririaarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. ⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocuajaari naa sequequiaari Abraham:

“Cua sequesano quiajanijari saaja quia niyanu Isaaccuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuquiaari Pueyaso sequesanoocuaani. Pueyasora, nojori cutaraari Abrahamcuajinio supueno pueya.

⁹ Abrahamri Pueyaso sequesanoocua tiuquiaari, Pueyaso jaara naa na sequequiaari: “Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuritanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajiniijiniojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaarijiaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia,

juhuanojuaja nojori niishyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojjiarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajiniijiiri:

“Jacoboori cua panishano quiniutianiya. Esauuri saniniuujia cua soosano quiniutianiy-acujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacujani, tama na miiniu panishanojuaja na tohuateenura. Naacujitij, Pueyaso jaara saquiriojore pueya, nojuajaari maja na niishiriojonu nojori miishanojiniiji; maninia, sesa soj.

¹⁴ Naa Pueyaso miishacari tama na panishanojuajaatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocujajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacujani. Naajuhuj, janiyari pueyanocua taraajenutaniyani, teyano pueyanocua cua taraajenu paniyacujani”.

¹⁶ Naacujitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocujajaari tama saquiriojoquiaajaaja cana na jiyanooni paniyani. ¹⁷ Naajuhuj, tariucuacaanu Pueyaso sequesano Egipto jiyani-ijaraari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniija quia quiniuriani, cua cumaacata cua miijosano cua niqitiniuria quiajaniya. Naacujitij, puetunu jiyacajinia quiniaa pueyapuejanaari niishiniutianiya, janiyari Pueyasojuaanaa cutarani”.

¹⁸ Naacujitij, paari niishiyani, Pueyasoori taraajeja teyanocua na taraajenu paniyani. Naajariuhuj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracujani.

¹⁹ Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacujani, ¿maatucua casaara sesa pa miiniu-ucua pa saniitioreni? ¿Canteeri na naata Pueyaso tarinitiniu na miiniu panishanojini-jini?” ²⁰ Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacujajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”” ²¹ Paniyojojuacuajaari na naata paniniu maraujiniiji na panishano casaa, shanohua pataconiyojua, mashaca quiquiora manijinia cajitiariquiano conatunio.

²² Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanojuaa re-jeretaquiaa sesa miijiaca, cante tari saniitiosocoriquiano quiyacujani. ²³ Pueyasoori naa tarishiyajaara na saniitionura na tojitiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriquianocujani.

²⁴ Paacujajaari cuno jiyanooshano pueyani, canapue tari Pueyaso saquiriojoquiaar-icujani Judioacuajinijinio, taucuacuajinijinio. ²⁵ Naa naajiotasano quiyacujajaari Pueyaso sequesano supuetana Oseas naajioneejinia:

“Cante cua pueya quiyaquiquiaarini, janiyari nojori sequenutaniyani: ‘Niaari cua quiquiohuaniyojua’. Naajuhuj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhuj:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’”.

²⁷ Saniniuujia, supuetana Isaíasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. ²⁸ Pueyasoori mijiriara na sequesano tohuateenu-taniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhuaj:

“Pa Jiyaniijia Pueyaso jaara Israel pueya niquiohua jiyanoyaquiquiaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

Judiocuacaari Pueyaso rupaacua tiuyashijiaca saaja

³⁰ Naa cua pohuatasacari niajaniya tariucuaacanu Pueyaso Rupaajinijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. ³¹ Israel pueyari saniniuujia jiyanoohua Moisés Rootasano tojijia juucua, nojori jiyanishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. ³² ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiuyaquiniucua nocua. Nojoriiri jiyaniquiaari tama nojorijiaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuniu quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequesano cuajaari naa naajiotasaaquiaari tariucuaacanu, Jesucristo niyacarijia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesano juanaa na muerasurano masenutaniya”.

10

¹ Cuarta Pueyaso muerasunaa, janiyari jiyanoohua Pueyaso secojoquiaani parta Israel pueyacuara, Jesucristoocua nojori tiuniuria, Pueyaso pueya nojori quiniuriajuhuaj. Janiyari jiyanoohua nojoriicua tacayani. ² Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijiaca juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequiaa, majana Pueyaso naata pueya jiyanooni saaja nojori tiuushacari nocua. Naaratej, nojoriiri jiyanoohua saniniuujiquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojiniu tohuateequiaari cutara. Naacuajitij, Pueyasoori puetunu nocua tiuniaajanaa jiyatequiaa juhua sesa miyashijiacara. ⁵ Moisés cuajaari naajioquiaari taa na rootasano tojijia miiniutianiyani, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijia jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojiajania nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuaaj, majaari naa nia niishiriojonu: “¿Cante na naata macunucua quiqiojina quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej!

⁸ Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiiitaa. Niaari na niishiyajuhuaaj. Nioojiajania quiyacuajaari”. Cuno rupaa canaa na pahuataquiaa nijaniyani, cunocuajaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niqiuara pahuatare: “Jesucristoori seetanujuanaa Jiyaniijiajanaa cutara”, noojiajania na niishishacarijuhuaaj Pueyasoori Jesu samiiian-iqiuariuhua macujiniji. ¹⁰ Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuaaj, pa rupaata pa pahuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuaaj: “Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijaari maja rimiajata na jiyanooni nocua tiuujia pueya. Nojuajaari jyanohua capora. Jiyaniijiajanaa cutaraari.

¹³ Tariucuacaanu Pueyaso Rupaajiniaari naa naajiotasano quiyajuhuaaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

¹⁴ Jaara naa quiritij, ¿pueyatucua taa Jiyaniijia secojonuureni, nojori jaara nocua tiyaaquiyajaa? Naajuhuaaj, ¿pueyatucua taa nocua tiuurini, nojori jaara nojuajiniji pahuataaquishoo quiyajaa? ¿Nojoritucua taa nojuajiniji niishijia quirini, tamasa jaara quenaaja nojori pahuataaquiri? ¹⁵ ¿Pueyaso Rupaa pahuatanaatucua taa cuno pojoricua quiaareni, nojori jaara jiyaramiquiyaquishaare? ¿Pueyaso rupaa pahuatanaate jiyaramiquiyaquishaaquiaari? ¡Maja! Jiyaramiquishaaquiaaricuaaja. Naaratej, naa naajiotasano quiyari tariucuacaanu Pueyaso Rupaajinia:

“Jyanohua timitiasano pueya cutaraari, noo pojori canapuate tamasaacua quiajani, nojori na pahuatanura Pueyaso rupaa”.

¹⁶ Naajaa, majaari puetunu pueyajanaa tojinu quiquiaa, Pueyaso Rupaa jaara nojori niqiuara pahuatasaare. Naacuajitij, supuetana Isaíasri naa sequequiaari na taraa-jenuta:

“Jiyaniijianaa, majaari pueya tojinu paniniu canaa pahuatasano quiajanijajiniji”.

¹⁷ Naacuajitij pueyanaa, paa jaara Jesucristo rupaa pahuatasaareni, paari pa numaata na tojiyani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niqiuara pahuataaquishaaquiaari? Maja. Nojori niqiuaracuajaari pahuatasaaquiaari. Naa naajiotasano quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pahuatasaaquiaari. Na rupaari tojishaaquiaari puetunu tiqiyocujanaa, jiya puequetujinia”.

¹⁹ Jaara naa pahuatasaaquiaaritij, ¿Israel pueyateeri Pueyaso rupaa niishiyaaquiquiaari nojori tojishacari? Maja. Nojoricuajaari na niishijiaca quiquiaari. Nojoriiri saaja

na ruuretajaca quiquiaari. Supuetana Moisés cuajaari naa naajiotaquiaari Pueyaso sequesano Israel pueyara, tariucua na tojiyashijiaca nojori quishacari:

“Maninia cua miishacari tiquiyocua quijiaca taucuaca nia niti, janiyari nia juuatiutianiyani. Niaari jiyanoohua juaaniutianiya cua jiyanooshacari mosanucua taucuaca”.

²⁰ Na nuhuaji, supuetana Isaíasri naa maatia sequequiaari Pueyaso niishitiosano nojuaja:

“Cucua jiaatiaashijiaca taucuaca cutaraari cua riuriataquiaa, cua tojijiaca nojori quiniuria cutara. Naajuhuj, janiyari cua pajeyashijiaca taucuacaacua muestaquiaani”.

²¹ Saniniuujia, Isaíasri naa Pueyaso sequesano Israel pueyajiniji naajiotaquiaari:

“Janiyari puetunu juucajanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijiaca pueya nojori quishacari”.

11

Israel pueyajiniji curenoori Pueyaso saquiriojosano

¹ Israel pueya jaara naa Pueyaso tojiyashijiaca quiya, ¿Pueyasote seetanujuanaa nojori tarinitiacanu, na tojiyashijiaca nojori quiniuucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jinianu Jacobo niyanu Benjamín cuajinío supuenoni. ² Naacuajitij, janiyari niishiyani, Pueyasoori maja na cartenu quiqianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyacuiya? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

³ “¡Cua Jiyaniijianaa, cuarta Israel pueyari puetunu quia sequesano caminiujiuniaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuacutucujanaa niyarequetarucuaa, tee quia tojitiajaca pueya catijiaquiaa na seya quiocuaracuajani. ¡Nojoriiri quiarjia cua pajenuyajuhuj, na motunura janiya!”

⁴ Pueyasoori naa Elías riucuaquiaari saaja:

“Janiyari siete mil pueya jiiatiajaani. Nojoriiri cua tojitiajaca. Nojoriiri maja na mojuquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuaani”.

⁵ Quiarjiaari naajuhuj, Pueyasoori secaja na saquiriojosano Israel pueyajinijinio jiiitiaa, jiyanootio na quiniuucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaca quiriqia, nojori maara paniyaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniujujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujanaa niishiyashijiaca nojori quiniuria. ⁸ Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarjiani”.

⁹ Supuetana David sequesanoori nojoriinijini naa naajiotasano quiyajuhuj:

“Pueyasonaa, Israel pueyari puetunu nojori panishanojuanaa jiitiaa, maninia quia miishacari nojori. Saniniuujia, nojori tojiyaquiniucua quiajaniya, nojori shuquiritiasano casaa cuaara quiiiria juhua norijia tama nojoririjaaja, nojori saniitiosaanura. ¹⁰ Nojori jiuujia cuaara jataara juhua cariyojuarujuriria, maja nojori niishiniuria seetanu Pueyaso rupaajanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanooshacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijianaa, tojiyashijiaca nojori quiniucua? Maja. Pueyaso tojiyashijiaca nojori quiniucua, taucuacaari saniniuujia Pueyaso muerasura quiquiaa, nojori tiushacari Jesucristoocua. Cunoori Israel pueya jiaatiani quiaa taucuacaacua, Pueyaso muerasu nojori quiniuriajuhuj. ¹² Quiarijia, puetunu jiyacajiniajanaa taucuacaari shuquiriaatia quia, Pueyaso muerasu nojori quishacari Israel pueya tiuyaquiniucua Jesucristoocua. Saniniuujia, Israel pueya jaara Pueyaso muerasura quiri ohua Jesucristoocua nojori tiushacari, jiyacaritij, socua jiyano hua maninia quiniutianiyari puetunu pueyapuerajanaa, puetunu jiyacajiniajanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu panianijia. Janiyari seetanujuanaa jiyaramiquishaa quiaari Jesucristo rupaa cua pahuatana nura taucuaca niquiarani. Naaratej, janiyari puetunu cua cumaacatajanaa pahuatania Jesucristojiniji taucuaca niquiarani, nojori quiniuria Pueyaso muerasujuhuj. ¹⁴ Janiyari seetanujuanaa naa mii quiaani cuarta Israel pueya jiaatiana niaacua, nojori tiuniuria Jesucristoocujuhuj, noojia queya nojorijinijinio Pueyaso jiyatenura na pueyara. ¹⁵ Pueyasoori juhua taanu quiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanoo quiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyano hua maninia quiniutianiyari puetunu pueyapuerajanaa. Israel pueya tiushacari Jesucristoocua, nojori iiri juhua macujiniji samiitiaconutaniuhua. ¹⁶ Seetanujuanaa maninia nia niishiniuria nio miriqui cua pahuatasoni, maatia nia pahuatateeraj. Nia tojiri. Coteenujuanaa pa jiuuicotasano neecaru jaara maninia quiri Pueyasora pa niquitiosocoriquiano, tari quiaari puetunujuanaa maniniajuhua Pueyasora. Naajuhuj, naana nujuaca jaara maninia quiri puetunujuanaa, na cashacucuaari maniniuquiucujuhuj. Nio miriqui cua pahuatasoni nia niishitiya cutara Israel pueyajiniji. Naacuajitij, Pueyaso jaara Abraham jiyanoo quiaaricuaa nocua na tiushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuj, nojori jaara tiuuri quia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jianuucujinijinio supueno Israel pueyari juhua na cashacucua. Cuno na cashacucujinijinio jaara Jesucristoocua tiyaquiquiaari, Pueyasoori na piyota quiaari. Niajaniya saniniuujia taucuacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiushacari, Pueyasoori nia rupota quiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritanu. Majaari nia jiyani niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Nia nujuaca cutaraari nia rishitiya.

¹⁹ Níaa naasucuaari sequeya: “Taaquiririni. Cuno olivo cashacucuaajaari canaacuaji piyotasaquiaari, saniniuujia canaa rupotasaanura nocua nojori niti”. ²⁰ Taaquiririni, seetanujuanaacuaaquiniateja nia sequesanojuaj. Saniniuujia nia niishiri, nojori-iri Pueyaso panishano naanajiniji piyotasaquiaari, nojori tiyuaquiniuucua Jesucristoocua. Níaaari saniniuujia cuno naanaacua rupotasano quiya, saaja Jesucristoocua nia tiuuniuucua. Naacuajitij, maja tama nia cuaqueyajaaja nia shuquiritianu nia jiyanihacari níaaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, níaa mariqui piyotasaarohuari, níaa jaara Pueyaso tojiyashijiacara quiriohua. ²¹ Pueyaso jaara jiyanoyaquiquiaari na saquiriojosano pueyacuaa, nojori tiyuaquiniuucua nocua, ¿maatucua casaara jiyanoori níajaniyanijia? Níaacuaajaari taucucua. Níaacuaajaari maja na saquiriojosano Israel pueyacujinío. ²² Naacuajiti pueyanaa, nia niishiri. Pueyasoori jiyanoohua maninia. Naajuhuj, nojuajaari saniitionu niishijia cutara. Naaratej, nojuajaari na tojitiaashijiaaca Israel pueya jiyanoyaquiquiaari. Saniniuujia, nojuajaari jiyanoohua maninia miiquiaa níajaniya na jiyanooshano pueya nia quishacari, níaa jaara pueyaracaanu nocua tiuujiaa quiriquia. Níajaniya taucucanaa, níaa jaara nocua tiyashijiacara quiriohua, níaaari nocuaji rupotasaanutaniuhua. ²³ Saniniuujia, Israel pueya jaara Jesucristoocua tiuujiaa quiriohua, Pueyasoori nojori rupotanutaniuhua na panishano olivo naanaacua. Pueyasoori jiyanoohua cumaacaracacuaaja na rupotanuhuara na panishano naanaacua. ²⁴ Níajaniya taucucanaa, níaaari maja seetanujuanaa Pueyaso saquiriojosano Israel pueya. Níaaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanuhuara tama neyonaacuaajaaja, nojori jaara Jesucristoocua tiuujiaa quiriohua.

Pueyaso jatanishacari puetunu Israel pueyajanaa na pueyara

²⁵ Taucucujinijinío cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quiaríjia cutara nia niishiri Pueyaso niishitishano janiya, maja nia jiyaniuria Pueyasoori nia paníya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaa quiya. Nojoriiri naa quiniutianiya, puetunu Pueyaso saquiriojosano taucucujinijinío pueyajanaa cuara Jesucristoocua tiurijiaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhuj, taa tariucuaaanu Pueyaso Rupaajinia naajiotasaquiaaricujani. Naa sequeyari:

“Sión tiacajinia supenutaniyari pueyacujia Tacuriquiano. Nojuajaari puetunu sesa casaajanaa jaariutianutaniya Jacobo niquiohuacujinío supeno pueya jiuujiajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

²⁸ Quiaríjia Israel pueya tiyuaquishacari Jesucristo rupaacua saniniuujia, nojori-iri juhua Pueyaso paraa, Pueyaso jiyanooniuria níajaniya saniniuujia, taucucanaa. Naajaa, Pueyasoori cuno Israel pueya paníyajaaja, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niquitiosano. Na saquiriojosano pueya jiyanoojiaari. Majaari nojori na ruuretanu. Pueyasocuaajaari Israel pueya saquiriojoquiaari na pueya nojori quiniuria, maninia na miiniuria nojori. ³⁰ Maniniushiquiari, níajaniya taucucanaa, níaaari Pueyaso tojiyashijiaa quijia. Israel pueya tojiyaquiniuucua Pueyaso quiaríjia saniniuujia, Pueyasoori níaacua taraajequiaa. ³¹ Nojoriiri Pueyaso tojiyashijiaa quiya quiaríjia, Pueyaso taraajenura nojoricua taa na taraajeya níaacucuaani. ³² Naacuajitij, Pueyasora, puetunu pueyajanaari na tojiyashijiaa quiya, Israel pueya, taucucanio. Naacuajitij, Pueyasoori na naata

jiyanooni nojorijuhuaaj, nojori tiuushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! ³⁵ ¿Pueyasoteeri na panishano jiitiaaquiquiaari tamonu niqutionura nojuaja na panishano, na nuhuaji na niqutionuhua? ¡Maja!”.

³⁶ Seetanujuanaa puetunu casaajanaacuajaari Pueyaso shipinishano. Na camaruri na rishitiquiaa na cumaacata. Puetunu cunajuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niqiuojuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojijiaca nia quishacari. ² Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohuanu tojijiaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanoohua maninia.

³ Jiyanoojia Pueyaso quiniucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarijia. Naa jaara Pueyaso cumaaca masequiaari nocua nia tiuushacari, nojuajaari puetunu nijaniyajanaa jiyatequiaari tamaatia poonijosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quiijiaca nia quiniuria tamasacajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuriacuajani. ⁴ Pa cuaqueyajiniacuma, paari queraatia tamaatia casaa jiitiaani. Puetunu cunajuanaari tamaatia miiniu niishijia, maninia pa quiniuria. ⁵ Paari naajuhuaaj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijosano miiniu niishiyacuaani, naajuhuaaj, Pueyasoori puetunu na muerasujanaa na cumaaca niqutioquiaa, tamaatia miiniu niishijia pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niquiara pohuataara na taacanuyaquiniutia. ⁷ Naajuhuaaj, cante Pueyaso cumaaca jiitiaa pueya na naacunurani, nojuaja cuaara maninia naacuura pueya. Naajuhuaaj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸ Cante Pueyaso cumaaca jiitiaa pueya na shiniujiunuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jiitiasanojiniji nareja niqutiojojuaca casamiijiuniucua pueyani, nojuaja cuaara juhujaniya niqutiojora nareja, nojori na paniniutia. Naajuhuaaj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na

tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranoj.

Pueyaso tojjiaca nia quiri, taa Pablo rootaacuajani

⁹ Seetanujuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanoehua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijini. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoehua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiiitaaquiri, nareja nia niqutiore nojori nia jiiitasanojiniji. Naacuajitij, nojori jaara rucoonaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuara, Pueyaso taraajenura nojoriicua.

¹⁵ Cante shuquiriaatia quiyacuaani, nojoritia nia shuquiririjuhuaaj. Saniniuujia, cante nujuqueyacuaani, nojoritia nia nujuquerejuhuaaj.

¹⁶ Jiyanoetiojuaca nia quiri quia, jatiqum nia quiniuria maninia. Majaari tama nia cuaqueyajaaja nia jiyatenu juhua socua maninia quiijaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuaaj. Majaari tama nia cuaqueyajaaja nia jiyatenu juhua socua niishijica pueya nia quiniuria tamasacajiniji.

¹⁷ Niaa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiiria maninia puetunu pueya niquirajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhuaajaniya nia rejeretare saaja. Pueyasocuaajaari niaacua naminiutianiya nojori. Pueyaso sequesano cuajaari naa naajiotasano quiya na rupaa-jinia:

“Quiria nia tarinitiare puetunu sesa nojori miishanojuanaa niajanijia. Janiyacuajaari nojori naminiutianiya niaacuani”.

Cua tojiri. Pueyasojuanaacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaa-jinia naajiotasaaquiaaricuaajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaaj, quia raatorenoj. Quiaa jaara naa na miiritij, tama nojuajaarijia jiyanoehua caririquiniutianiya noojiajinia”.

²¹ Naacuajitij, niaa jaara sesa miishaariquia, majaari nia juaaniu, niaa mariqui sesa miijijara quirijiaariuhuaaj. Saaja maninia nia miiriquia nia paraca. Naacuajitij, niaari Sesaaca shocotanutianiya.

13

Pa jiya jiyaniijianucua tojjiaca pa quirij

¹ Pueyanaa, mijiria nia jiyaniijianucua tojitiajaca nia quiri. Nojoricuaajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. ² Naacuajitij, cante

mijiria jiyaniijianucua tojiyashijiani, nojuajaari jiyaniijiara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. ³ Paa jaara maninia miijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaca. Sesa miijiaca cuaara na puereera cutara, sesa miijiaca nojori quiniuucua. Saaja maninia miijiaca nia quiri. Naacuajitij, nia jiyaniijianucuaari maninia poojotanutaniya niajanijajiniji. ⁴ Nojoricuajaari Pueyasora poonijionaa, maninia nojori jiiitianura niajanijia. Saniniuuja, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa miijiaca nojori saniitionura. ⁵ Naacuajitij, nia jiyaniijianucua tojiijaca nia quiri maja nia saniitiosaanura, naajuhuj, maja Pueyaso tojiyashijia nia quiniuria. ⁶ Naajuhuj, nia cumaneecajiniji nia niquitiore nia jiyaniijianucua, taa nojori sequequiaa nia niquitionuracuajani. Nojoricuajaari Pueyasora poonijioquiaa pueyaracaanu, maninia nojori jiiitianura niajanijia. Naaratej, nojoriiri cumaneeca masequiaa niajanijajiniji.

⁷ Naaratej, puetunu nojorijianaa nia niquitiore, taa nojori sequequiaa nia niquitionuracuajani. Naacuajitij, niaa jaara sequesaa nia cumaneecajiniji nia niquitionura nia jiya jiyaniijiara, nareja nia niquitiore. Naajuhuj, cumaneeca jaara jiya jiyaniijiara masenu cojiritiasaa, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojiijaca nia quiri, nojori quiniuucua Pueyaso jiyatesano nia jiyaniijianucua.

⁸ Pueyanaa, majaari najuhuaana casami nia poonu, niaa jaara cumaneecaaju quiri. Saniniuuja pueyanaa, maja cutaraari niarta pueya paniniu nia puecanu. Pueyaraacaanu nojori panijia nia quiri cutara. Naacuajitij, cante narta pueya panijiani, nojuajaari Moisés Rootasano tojiijia cutara. ⁹ Supuetana Moisés cuajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasa jiiitasano casamiicua jiaatiaja nia quiniu”.

Socua queraatia na rootasanoori quiya. Niocujaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojiijia quirini, paari tari puetunu na rootasanojuanaa tojiijia quiyani. ¹⁰ Cante seetanujanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiri quiani, paari puetunu Moisés Rootasano tojiijia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarjia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuaara niucuaara, pa Jiyaniijiara na poonijionura.

¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujanaa pa cartere. Majaari juhua ninishiqui quiijaca pa quiniu socua. Taa pueya cushiquiaa na toque tariquicuaji na poonijionuracuani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuj. ¹³ Seetanujanaa juhua Pueyaso pueya nia quiri. Majaari juhua ninishiqui quiijaca pueya nia quiniu. Niaacujaari cuhuashiqui quiijaca. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jiiitini. Majaari juayonuujutajaca nia quiniujiuhuj. Naajuhuj, majaari tamonu pueyano jiiitasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴ Naacuajiti

pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jiitianura, na cumaacanio. Naa nia miishacaritij, niaari juhua soldado-hua miaquetoojotaja toque cushiyojua, maja Sesaaca miitiniuria sesa niajaniya.

14

Maja quiarta Pueyaso pueyacuara nia rimiaaquenu sacuaraatia

¹ Pueyaso pueyajiniinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji. ² Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuanu, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³ Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaaquiiria puetunu casaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuj. ⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuaajaari cumaacaraca, na muerasu na jiyatenura maninia quijiaca nojori quiniuria.

⁵ Cua tojiri pueyanaa, noojiaqueya Pueyaso muerasujiniinioori niquiriyatu juuca semaanajiniiji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu niajaniyajanaa cuaara taacanuyaquiiria tama nia miishanojinijiaaja, maja nia macuhujetenura nioojia. ⁶ Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritiyajuhuj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiitiasanoni. ⁹ Jesucristocuaajaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuj. Naacuajitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijia pa jiitiasacari, ¿paatucua casaara parta Pueyaso muerasu soojeaca quirini, nojori miaqueyaquiniucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹ Tariucuaaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹² Naacuajitij, paari niishiyani, puetunu pajaniyajanaari Pueyaso riuhuanenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyanishano sesa casaa. Nojori jaara saniri miiniu nia miishanocuaa, naacuajitij, niari tari sesa miitirii nojori Pueyaso niquiara. ¹⁴ Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiara nojuaja jaara na miaquere, nojuaja cuara miaqueyaquiirianoj. Jaara na pueresano saniri miaquenu, nojuajaari tama noojiaaja macuhujanutaniya.

¹⁵ Naacuajitij, paa jaara parta Pueyaso pueyano macuhuajetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocujaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? ¹⁶ Naacuajitij, majaari nia shanacunu Pueyaso tojiyashijiaca pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquiniuucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiaca pa quiniuria, jatiqui pa quiniuria juhuajaniya. Pa panitiaajaariuhua shuquiriaatia quiijia pa quiniuria. Paacuajaari na Sohuanu jitiaani, naa maninia pa quiniuria. ¹⁸ Paa jaara naa quiijia quiri quiiani Cristora pa poonijosacari, Pueyasoori pa shuqiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyanojua nia saniniujiuri taate nia naata maninia rupuetosano quiniu puetunu niarta Pueyaso pueyatajanaani. Naacuajiti nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. ²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereeca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhuj, pa cartere puetunu parta Pueyaso pueya jiyanishano sesa miiniu casaa-janaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quiijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhuajetenura na miiniu nuhuaji. ²³ Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacujani. Paa jaara casaa miaquere seetanujuanaa pa tiuyaquiniutia Pueyasocuanii, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojiaari macuhuajenutaniya.

15

Parta Pueyaso pueya pa shuqiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanajuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojijiacacuaani, pajaniya cuaara nojori rejeretaara juhuananiya. Paa jaara socua Pueyaso Rupaa niishijiacacuaani, nojori pa cumaquiri. Majaari pa niishiriojonu tama pa cuaqueyajaaja pa shuqiritiniuria tamajaaja. ² Puetunu pajaniyanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojijia na quiniuriajuhuaj. ³ Paacuajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuqiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacuajitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quenaa, cuno pojori, canapujete quia sesacajacani, nojoriiri cua sesacaajuhuj, cua miiniuucua quia panishano”.

⁴ Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaariuhuj. Naacuajitij, paari juhuajaniya sashiya pa Jiyaniijiani. ⁵ Pueyasocuajaari pa cumaquina, maninia rejeretajaca pa quiniuria, cumanijasano pa quiniuriajuhuaj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jiyanoootiojuaca nia quiriquia, taa Jesucristo jiyanooquiaa pajaniyacuaani, maninia rupuetoosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucuacata Pueyaso maniniuhuaqueetaano jatiqui. ⁸ Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucuacara quiquiaarijuhuaj, nojori maniniuhuaqueetanura Pueyaso, na jiyanooniucua nojoriujuhuaj. Tariucuacaanu Pueyaso Rupaajinia supuetana David naajiotasanoori naa quiyajuhuj:

“Maninia quia miiniuucua janiya Pueyasonaa, janiyari quiajaniyajiniji poojotanutaniya maniniani taucuaca jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucuacanaa, Pueyaso saquiriojosano pueya nia cojiri, mariyata jatiqui nia shuqiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maniniuhuaqueetare, puetunu niajaniyanaa, tamaatia rupaaca pocujaca taucuacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

¹² Supuetana Isaías naajiotasanojinijiuhuaj, paari niishiyani Pueyasoori taucuaca jitianu panijia pueyaracaanu, maja saaja Judiocuaca. Naaratej, Isaíasri naa naajiotasanooriaari:

“Supuetana Isaí niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucuacajanaari nocua tiuujiaa quiniutianiya”.

¹³ Pueyasocuaajaari poojiajina poonijiojua, juhuajaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jiyanojua. Naajuhuj, nojuaja cuara nia jiitiaara juhuajaniya, canapuee nocua tiuujiaacuajani. Naacuajitij, mijiria nia sashishacari, niari shuquiriaatia rejeretajaca quiniutianiya Pueyaso Sohanu cumaquishacari nijaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴ Cua panishano Pueyaso niquiohuanaa, naa cua naajiojina cua nacasusacari jiyanojua nijaniyatej, majaari nia jiyaniinu janiyari niaacuaji taacanuyajaani. Maja. Janyacuajaari niaacua tiuyani niaacuajaari seetanujuanaa maninia quijiaa. Niacuajaari Pueyaso rupaa niishijiaajuhuj. Naacuajitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niquiara. ¹⁵ Naajaa, quiarijia janiyari niaacuara naajiyani cua niishitiniuhua niajaniya tarijia nia niishishano. Cua jiyanojia, nio cua naajiojina jiyanojua cua nacasunuucua nijaniya. Naa nia rootanijia Pueyaso jiyatenuucua janiya Neyanu Jesucristo jiyaramiquishano, taucuaca cua pohuatanura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacuajitij, Pueyaso Sohanu poonijionuucua nojori jiuujiajina, nojoriiri Pueyaso shuquiritasano muerasu quiniutianiyaajuhuj.

¹⁷ Pueyasora cua poonijosacari, janiyari jiyanojua timitiaa Jesucristoni, cua niquishacari taa taucuaca tiuquiaa na rupaacuani. ¹⁸ Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiuquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohanu cumaacata cua miiniucua nojori niquiara. ¹⁹ Nojori niquishacari Pueyaso Sohanu cumaacata cua miijosano, nojoriiri niishiquiaa cua pohuatasanoori seetanu rupaaajanaa. Janyari pocuaji Tacuna Jesucristojiniji tari pohuataquiaari puetunu tiqiyocuajanaani, Jerusalén tiacajiniji, puetunu Iliria jiyajiniarajanaano. ²⁰ Naa cua pohuatasacari pa Jiyano Jesucristojiniji puetunu cuno jiyacajiniajatej, janiyari pueyaracaanu pohuataquiaari cuniquini, tee Jesucristojiniji tojiyaquishaquiaari juhuanojuajacuajani. Majaari cua pohuatanu paniniu quiquiaari tee tamasa pohuataquiaari tari Jesucristojinijini. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuacaanu Pueyaso Rupaaajina naajiotasano tohuateeriquiaani. Naa sequeya Jesucristojinijiiri: “Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajina cua pohuatasacari Jesucristojiniji, majaari jeya cua quiniu quiriquiaa nia niquiniucua cua quianura. ²³ Quiarijia cutara, janiyari Jesucristojiniji pohuatanu tucuarucuaa tarini, tee Jesucristo rupaa tojiyaquishaquiaari juhuanojuajacuajani. Janyari Espania jiyajinia pohuatanu paniya Jesucristojinijijuhuj. Queraatia marijiaari tari cua shocojocanu pueyaracaanu cua naquerejosacari niaacua cua quianura. ²⁴ Naacuajitij, Espania jiyajiniara cua quiasacari, janyacu nia tiacajinia jateemani. Janyaa jaara pasaja camueenujusee niaata shuquiriaatiani, na nuhuaji, janyari paniniutianiyan nia naacunura janiya, cua quianura Espania jiyajiniara. ²⁵ Janyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niquitionuhua cumaneecani, niya quiniaa parta Pueyaso

pueya niqutiojosano nojoriria. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanoehua maninia miya. Nojoriiri tama niishiriojonuucanujuaaja nareja na cumaneeca niqutiojonura Jerusalén tiacajinia quiniaa casamijiuniucua Pueyaso pueyara. Cunora, nojoriiri quiaritia na rerateya cuata na jiyarosocoriquiano. ²⁷ Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuataaanura taucuaca niqiuara. Naaratej, taucuaca cuara saniniuujia quiaritia naacuura casamijiuniucua Judiocuaca, nojori jiiiasano cumaneecata. ²⁸ Naacuajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria niajaniya. ²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiiitanuucujuhujaj, mariyata Pueyaso Sohanu panitiootesacari pajaniya, janiyari jiyanoehua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhujaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. ³² Naajuhujaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuan. ³³ Pa jiyanoojia Pueyaso cuara maninia jiiitaaara puetunu niajanijajanaa. Cuara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojijia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijia nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiiitarenaj, taa nia jiiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujuajaariuhujaj.

³ Quiria nia sarhuatatare Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanoehua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajinijiojuanaari nojori timitiaajuhujaj, naa nojori miiniucua. ⁵ Quiria nia sarhuatatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia sarhuatatarejuhua cua rupuena Epéneto. Nojuajaari coteenujuanaa Jesucristoocua tiuquiaari Asia jiyajinia. ⁶ María nia sarhuatatare quiri-ajuhujaj. Nojuajaari jiyanoehua poonijioquiaari niaara. ⁷ Quiria nia sarhuatatarejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhujaj. Andrónico, Junias, nojoriiri socua coteenu janiyajiniji tiuquiaari Jesucristoocua.

⁸ Nia saruhuatarejuhua Ampliato. Nojuajaari cua panishano pueyano, Jesucristoocua na tiuuniucua. ⁹ Naajuhuaaj, quiria nia saruhuatare Urbano. Nojuajaari pa Jiyaniijia Cristora poonijionajuhuaaj. Cua rupuena Estaquis nia saruhuatarejuhuaaj. ¹⁰ Apeles nia saruhuatare quiriajuhuaaj. Nojuajaari puetunu casaajanaa rejeretaja cutara, Jesucristoocua tiuujia na quiniucua. Aristóbulo tiajinia quiniaa pueya nia saruhuatare quiriajuhuaaj. ¹¹ Naajuhuaaj, quiria nia saruhuatare Herodión, parta Judio pueyano. Naajuhuaaj, Narciso tiajinia quiniaa pueya nia saruhuatare quiria, noo pojori pa Jiyaniijiaacua tiuujia pueyatej. ¹² Trifena nia saruhuatare quiria, Trifosajuhuaaj. Cuno maajipohuari pa Jiyaniijiaara poonijionuujuaca. Naajuhuaaj, pa panishano maaji Pérsida nia saruhuatare quiria. Nojuajaari jiyanoehua poonijiojua pa Jiyaniijiaara. ¹³ Rufo nia saruhuatarejuhuaaj. Nojuajaari maninia tojjia pa Jiyaniijia. Na nucua nia saruhuatarejuhuaaj. Nojuajaari juhua cua nucua quiquiaari quiria. ¹⁴ Nio pojori quiria nia saruhuatarejuhuaaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuaaj, nio pojori nia saruhuatare quiria, Filólogo, necocua Julianio, Nereo, na rimiatunio, Olimpasjuhuaaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhuatare seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua saruhuatanura niajaniya.

¹⁷ Cuarta Pueyaso pueyanaa, nia numooteyanijia, jiyanoehua nia cojuare tama nia cuaqueyajaaja najuhuaana tamaatia niishitiojonuujuaca pueyacuaaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacujitij, Pueyaso pueyari juaatiooquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaaajanaa cutarani. Naa sesa niishitiojonuujuacaacuaaji nia rupatere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuaana shanohua nojori pohuatasanota, nojoriiri niishiyashijia pueya sapojoquiaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara. Naaratej, janiyari jiyanoehua nia timitiaani. Naajuhuaaj, janiyari paniyani niishijia nia quiniuria, saaja seetanu rupaaajanaa tojjia nia quiniuria, maninia miijiaca nia quiniuriajuhuaaj. Saniniuujia, sesa niishitiojosano niishiyashijia nia quitiriquiani, maja sesa miijiaca nia quiniuria. ²⁰ Naacujitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutianiya jiyocuara, Pueyaso tojjia nia quiniucua. Pa Jiyaniijia Jesu cuara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuatanura niajaniya. Cuarta Judiocuaca Lucio, Jasón, Sosípater, nojoriiri nia saruhuataajuhuaaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaaniuhuaaj Cristoocua tiujia cua quishacarijuhuaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhuaaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquiiijosacari nio tiacajinia. Parta Pueyaso pueyano Erastoori nia saruhuataajuhuaaj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuaaj.

²⁴ Pa Jiyaniijia Jesucristo cuara cumaquiiria puetunu niajaniyajanaa.

Pablo maniniuhuaqueetasacari Pueyaso, quera na tucuatatasacari na naajio

²⁵ ¡Pueyanaa, jiyano hua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajanuyacuajani, cua pohuatasacari Jesucristojiniji. Pueyasajuanaacuajaari tarijia cua niishitiquiaari Neyanu Jesucristojiniji cua pohuata-nura. Jiya shipiniyaquishaacarijiyojua, Pueyasoori jiyasohua tamajaaja na niishishano jiitiaja Neyanu Jesucristojiniji. ²⁶ Saniniuujia, quiari naataja, paari niishi quiaarini, Jesucristocujaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiar-ijia seetanujuanaa na niishiya cutarani. Pueyaracaanu Quijia Pueyasocujaari naa paniquiaari quiarijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiocuaca, taucuacanio.

²⁷ Pa Pueyasoori jiyano hua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pabloni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitiojonura niajaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujuaana Pueyaso muerasu, puetunu jiyacajinia pueyatajanaa, canapuete Jesucristoocua tiuujiacacuajani. Jesucristocuaajaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuaara cumaquiiria niajaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuaajaari jyanohua maninia miiquiaari niajaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiquiaarijianaa niajaniya na cumaacata, nia poojotanura puetunu na rupaaajanaa, puetunu na rupaaajanaa nia niishiniuriajuhuaj. ⁶ Maninia nia tojitasacari Cristojiniji pohuatasano, niaari maninia miishaaquiaari taa canaa sequequiaari niajanियacuajani. ⁷ Naacuajitij, niaari tari masequiaari puetunu Pueyaso niquitionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. ⁸ Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocuaajaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca niquitiooquiaari

¹⁰ Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niquitioonu. Maja tamasaca niajaniya. Maninia nia niishiriojore, maja tamaatia. Nia jiuujiaatioorejuhuaj. ¹¹ Naa nia sequeyanijia cuarta Jesuucua tiuuniaanaa, Cloe niquiohua pohuatanuucua janiya niajanियajiniji. Nojoriiri cua sequerucuaa niaana juayonuujutaquiaa. ¹² Naa pohuatasaarucuaa niajanियajinijinia: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuujia sequequiaacujua: “Canaari Apolo pueyani”. Tamasacanaari sequequiaajaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raquitijiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! ¹⁴ Janiyaquiiri namitia nia tiuquinijiaquiaari moojiniani. Naacuajitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶ Quera niyajetaanijia.

Janiyari Estéfanás tiuquinijioquiaarijiuhua necohuatajani. Majaruhua socua pueya cua tiuquinijionu quiquiaari.

¹⁷ Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuaara tiuutiuuria cutara Jesucristoocua, na miiniuucua maninia pocuara. Pueyasoori pa jiyanooquiaa saaja Jesucristo cusonuucua niyacutesanojinia pocuara.

Cristoori Pueyaso cumaaca jítiaa, Pueyaso niishitiajajuhuaaj

¹⁸ Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacuaaja na tojitianaara, Pueyaso muerasura na jataniniuria pajaniya. ¹⁹ Pueyaso sequesanoocuaajaari naa naajiotasaaquiaaritij:

“Janiyari niishijiaa niishishano cushitionutaniyani. Mijiria pueya niishishano jiyatenutaniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijiajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jiyanoootiniuria pajaniya? Maja. ¿Niishitiojona rootasanoote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuaana quiya Pueyasora. ²¹ Pueyari maja na naata Pueyaso niishiniu quiquiaari tama nojori niishitiajataaja. Pueyasoori tama sequequiaarijiaaja na niishitiajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”.

Pueyari saniniuujia jiyaniya Jesucristo rupaari nareja sequesanojuhuanajaj, tojishoo.

²²⁻²³ Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquniu paniquiaa coteenu saaja. Cunora, nojoriiri canaa tojitiaaquiquiaa canaa pohuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhuaaj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatiajaca.

Nojoriiri jiyaniya Jesucristoori najuhuaana cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyajuhuaaj Pueyaso Jiyarosocoriquianoori ritia Judiocuaca jiyaniijiaara quiniutianiya cutara. Majaari na niishitiniu quiija Cristo cuaara coteenu miishaaria naquiya, jiyanooshano nojori quiniuria sesa nojori miiijosanojiniji. Griego pueyari canaa pohuatasano tojiyaquiquiaajuhuaaj. Nojoriiri jiyaniya Pueyasoori niishiyashijia quiquiaari Neyanu na motenura.

²⁴ Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jiyanoohua niishijia cutara!

²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuajiti Pueyasoori pa jiyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhuaaj, Pueyasoori cumuecaaju quiquiaari Cristo cusosacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaaja! Pueyasoori jiyanoohua socua cumueca pajaniyajiniji.

²⁶ Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niqiarani, Pueyaso sequesacari nijaniya na muerasu nia

quiniuria. Saaja secaja niajanijajiniinööri niishijiaca quiriquiaa. Saaja secaja niajanijajiniinööri tojishano pueya quiriquiaajuhua. Saaja secaja niajanijajiniinööri jiyaniijianucua niquiohuacuajinio supueno quiriquiaa. ²⁷ Mijiria quinia pueyara, Pueyasoori socua niishiyashijiaca pueya saquiriojoquiaari, na muerasu nojori quiniuria. Naacuajitij, mijiria niishijiacaari tamajaaja caririquiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijihuaj, na muerasu nojori quiniuria, mijiria tojishano pueya caririquiniuria nojori jaara saquiriojiyaquishaare. ²⁸ Pueyasoori soosano pueya saquiriojoquiaarijihuaj, tojishoo pueyano. Pueyasoori naa saquiriojoquiaari najuhua quijiaca. Canapuate tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya. ²⁹ Naacuajitij, majaari quenaaja jiyanohua pocuaja cureenu quiniutianiya Pueyaso niquiara. Tojetaarucujanaa shaaquiiri pocuajaca quiniutianiya. ³⁰ Pueyasojuaanaacuajaari nia rupuetequiaari Jesucristo. Naacuajitij, niaari Pueyaso niishitiaja jiiitaa. Nia rupuesacari Jesucristo, niaari maninia miijia quiya Pueyasora. Pueyasoori nia jataniya saa na tojijiacaraja nia quiniuria, juhua Neyanu nia quiniuriajhuaj. Niajanijari puetunu jecasaanutaniyajanaa. Paari naa miishiyani Jesucristo pa rupuesacari. ³¹ Seetanujuaanaari nio sequesano tariucuacaanu Pueyaso Rupaajiniji: “Cante shuquiriaatia quiniu paniyani, nojuaja cuara shuquiritiaara pa Jiyaniijia”.

2

Jesucristo mosaanujiniji pohuatasano

¹ Cuarta Jesucristo tiuunaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajanijani. Majaari jiyajeneta cua pohuatanu quiquiaari niishijiaca niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janijari jacaria pohuataquiaari Pueyaso rupaa niajanijani. ² Janijari tari tama sequequiaarijiaanjia: “Janijari saaja Jesucristojiniji pohuatanu paniya Corinto pueya niquiarani, naajuhua, taa na cusoquiaari pocuara niyacutesanojiniani”. ³ Cua pohuatasacari Jesucristo rupaa nia niquiara, janiyari sasaca quiriquiaa cua puerenutani. Janijari tetecariquiaani. ⁴ Majaari cua paniniu quiquiaari cua tiutiniuria niajanijani Jesucristoocua tama cua niishitajataaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari nioojiacajinia poonijioquiaari Pueyaso cumaacata cutara. ⁵ Naacuajitij, niaari Jesucristoocua tiuquiquiaari Pueyaso cumaaca miishacari maninia nioojiajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucujaari pa niishitiya Pueyaso

⁶ Naajaa, canapuate Pueyasooocua tiuujia seetanujuaanaa cutarani, nojoriiri niishiya canaa pohuatasano Jesucristojinijiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiacaari shaajeconutaniya. Nojori niishishanoori najuhua quiniutianiya. ⁷ Caaa pohuatasano cutaraari Pueyaso niishishano tarijia, jiya shipinishaacarijiyojua. Pueyasoori jiyacari niishiriojoquiaari jiyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸ Mijiria jiyaniijianucuaari nio niishiyaquiquiaari. Nojori jaara na niishiquiaari tarijia, nojori maara pa Jiyaniijia moyaquiquiaari niyacutesanojinia. ¡Na Shipinina motuquiaarijiaari, pueyaracaanu shacantuuca quijia! ⁹ Naa naajiotasano quiyacuajaari tariucuacaanu Pueyaso Rupaajinia:

“Pueyasoori jiyasohuaja casaa jeenucuasano jiitiaa na panijiaca pueyara. Cunoori maja pueya niquishano quenaaja. Majaari cunojiniji nojori tojishano quenaajajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. ¹⁰ Pueyasocuaajaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya. ¹¹ ¿Cante pueyano niishiriojosano noojiajinia niishiyani? ¿Majate saa na camaru sohuanujua niishiniu? Taaquiriirinij. Naajuhuj, saaja Pueyaso Sohuanuuri Pueyaso niishiriojosano noojiajinia niishiya. ¹² Naaratej, Pueyasoori na Sohuanu niqutioquiaari pajaniya, pa niishiniuria Pueyaso niishishano. Naacuajitij, majaari pa jitianu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niqutiosano pajaniyara-janaa niishiniu. ¡Jiyanohua capora Pueyaso! ¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jitianaa niishitiojonu seetanu Pueyaso rupaaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiitiaani, nojuajaari na naata puetunu niishishanojuanaa saniniuujuniu. Saniniuujia, tamasaca pueyari maja na naata Pueyaso Sohuanu jitianaa miishano niishiniu nocuara na rimiaaquenura. ¹⁶ Tariucuacaanu Pueyaso Rupaaajinia naa naajiotasaaquiaarijuhuaj:

“¿Cante pa Jiyanijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesucristo tiunuaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuujua quiquiaajaa. Niaari juhua Cristo conaaja quiquiaajaa, maja Pueyaso tojijiaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaca pueya nia quishacarijia. ² Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari nia naata na tojiniu quiquiaari. Juhuanujuajaari maja nia naata na tojiniu quiarijiani. ³ Niaari juhua Pueyaso Sohuanuujua quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuujua quiyajaa pueyaracaanu, juhua Pueyaso niishiyashijiaca pueya. ⁴ Niaana sequequiaa: “Canaari Pablo pueyani”. Tamasaanaari sequequiaajuhuj: “Canaari Apolo pueyani”. Naacuajitij, puetunu niajaniyajanaari saaja juhua Pueyaso niishiyashijiaca pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari Jesucristo panishano miiquiaarini taa na sequequiaari canaa miiniuriacuajani. ⁶ Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria niajaniya, naatej, taa pueyano na natau shiijioya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiniu na rupaa, seetanujuaana na muerasu pa quiniuria. ⁸ Naacuajitij, paari niishiyani, cante natojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocua jaari canaa niqutionutaniya na jiitiasano, nera canaa poonijionuucua. Cante socua poonijioreeni, Pueyasoori socua na jiitiasanojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhua, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pohuatanu coteequiaari maninia niajaniyani, Pueyaso muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitijosano niajaniyani, cunoori juhua morijiu nujuatejosano quiquiaari. Cua nuhuaji, tamasaacari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitiojonura niajaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiaari niajaniyani. Saa na rupaacuaja nia tiuushacari, niocua maninia quiri, juhua maninia morijiuacuaacua tiasano tia, maja na matanura. ¹²⁻¹³ Cante socua Jesucristo rupaa niishitiojiya niajaniyani, cuno cuaara niishitiojora jiyanohua maninia. Cuaara niyajetaaquiiria cutara, nojuajaari na niishitijosanojiniji nequesoreesaanutaniya Jesucristo muetasacariuhua pocua, pa miishano na saniniuuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitijosanoori juhua pueyano tiasano. Pueya jaara tiare orota, platatanio, shanohua saitiano, maniiri maja na naata na catijianu. Cante saniniuujia tiaree macacatani, tucurutajuhua, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuaana maninia? ¹⁴ Tamonu jaara maninia miijia quiquiaari Pueyaso cumaacata, na miishanoori maja najuhua quiniutianiya Pueyasora. Pueyasoori cuno pueyano niqutionutaniya na jiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuujia tiaquiaari cateja casaatani, na tiasanoori catenutaniya. Puetunu na jiitiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuaanaari juhua na tia quiya. Pueyaso quiquio cuaara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiaca niquiara. Cuno pueyano cuara jataara cuno na niishishano juhua niishiyashijia na quiniuria narta pueya niquiara. Na nuhuaji, cuara maseera Pueyaso niishitiaja, seetanu niishijia na quiniurijanaa. ¹⁹ Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquiitianiniutianiya, tama nojori niishi-tiushanoocuaajaaja nojori tiushacari najuhuanaj”.

²⁰ Naa naajiotasanoori quiyajuhuaaj:

“Pueyasocuaajaari mijiria niishijiaca niishiriojosano niishiya. Naa sequeyari: ‘Najuhua-naari cuno pojori niishiriojonuusano’ ”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasa pueya jiyaramiquiquiaa nia cumaquiniuria-juhuaj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaaja nia jiaatianu.

²² Pueyasoori canaa jiyaramiquiquiaari canaa cumaquiniuria nijaniya. Naacujitij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhuaaj. Pueyaso shipinishanocuaajaari niaara. Naajuhuaaj, mijiria nia quishacari, cunoori niaara quiya, socua maninia quijiara nia quiniuhuaa. Taa nia miishiya quiarijiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuaaj. Pueyasoori nia shaajeteya na shuriucua nia quianura. Naacujitij, puetunu casaajanaari niaara quiya. ²³ Nijaniyari Cristora quiya saniniuujia. Cristoori saniniuujia Pueyasora quiyacujua.

4

Jesucristo jiyaramiquishano poonijiosano

¹ Naaratej pueyanaa, nijaniya cuara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jitiaani, cuno cuara quiiria seetanujuanaa Pueyaso miiniu panishano panijia, na rupaa na pohuatanura puetunu maninijanaa. ³ Nijaniya, tamasa pueyajuhuaaj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaaj. Maja cua niishiniu. ⁴ Janiya jaara sesa miiriquiaa cua Jiyaniijia cua poonijosacarini, majaari cua niishiniu. Majaari coojia macuhua-jenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaja na naata sequenu taa cua quiquiaarini. ⁵ Naaratej, maja nia rimiaaquenu tamonuucuaa, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhuaaj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miiija quiriquiaa mijiria na quishacarini.

⁶ Cua tojitiare cuarta Jesucua tiunuaanaa. Janiyari nareja nia pohuatariquiaa Apolojinijini, janiyajinijijiuhaaj, maninia nia niishiniuria casaa cua niishitiojiya nijaniyani. Naacujitij, nia niishitiojoriquiaanijia saa Pueyaso rupaa nia tojitianura suraatiaja. Majaari socua tamonu niishitiojosano nia tojiniu. Naajuhuaaj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiriaaj, na shuquiritiniucua janiya”.

Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa. ⁷ ¿Niajanियariuhuaaj? ¿Taa nia sequeya tama nia cuaqueyajinijiaajani? ¿Niaateeri socua maninia pueya tamasacajiniji, socua niishijiacajuhuaaj? Majaruhua. Naajaa, niaa jaara seetanujuanaa socua niishijiacacari quiri tamonujiniji, ¿taa jiyanoehua niishijiacara nia quiquianuni? ¿Tamajaajate? ¡Maja tamajaaja! Niaacuajaari Pueyaso niishitiaja jiiitiaa. Naaratej, maja nia jiyaniinu niaa socua maninia pueya tamasaca pueyajiniji, tama nia niishishanota-jaaja.

⁸ Naa jiyoteeri jiyaniya niaa tari cutara niishijiacara quirii. Naa jiyoteeri jiyaniya-juhuaaj, niaa tari jiiitiaa puetunu Pueyaso niqutionu panishanojuanaa niajaniya. Naa-juhuaaj, niaa jiyoteeri jiyaniya Pueyasoori nia jiyateree jiyaniijianucua nia quiniuria. Naa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucuajuhuaaj, shuquiriaatia pa quini-uria mariyata. ⁹ Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuaana quijiacara, saa puecooso-coriqianojua. Canaa naasucuaari naa quiya mijiriani, puetunu pueyajanaa shootia-nura canaa, Pueyaso seya shootianura canaajuhuaaj. ¹⁰ Canaa tojitiasacari Cristo, canaa naasucuaari niishiyashijiacacari quiya tamasacarani. Naajanियari saniniuuja ni-ishijiacacari quiya tamasacacari, Jesucristo nia rupuesacari. Canaa naasucuaari Pueyaso muerasu sasaca quiya saajani. Naaari saniniuuja Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuuja saaja rerequetesano quiyani, pueya soosanojuhuaaj. ¹¹ Canaari pueyaracaanu miaaje-quiaajaani. Canaari jiyamuequiaajaaniuhuaaj. Canaa cushishano toqueniyojuaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucoojonuucua pueyaracaanu. ¹² Canaari samareequiaani pueyaracaanu canaa poonijiosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuaajaniya saajani. Majaari canaa naminiu quiquiaa saniniuuja nojori. ¹³ Pueya jaara tamasaca niquiarara rimiaaquequiaa canaajiniji, canaari nojoritia jecatoonu saniquiaa juucuani. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴ Naa cua naajiosacari niaacuaratej, majaari cua cararonu paniniu niajaniya. Janiyari saaja nia niishitiojonu paninya cutarani. Janiyari nia rootaa juhua cua muerasuniyojuani. ¹⁵ Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Naa tojitiasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaaj, juhua janiya nia quiniuriajuhuaaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutani-yari nia niishiniuhua maninia cua niishitiojosano niajaniya tarijia. Nojuajaari nia pohuatanutaniyajuhuaaj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaaj.

¹⁸ Noojiaqueya niajanियajinijioori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriqui nojori jiyaniishacari maja naasucuaari cua tacatenu quiniutianihua, cua niquiniuhua niajaniya socua. ¹⁹ Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiacacari pueya

saniniujiuniutianiyani, cua niishiniuria casaate nojorini, maja naa sacuaraatia nojori quiniuriatej. ¿Cumaacaracate nojori, saaja pocuajaca soj? ²⁰ ¿Canteeri seetanujuanaa Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuanu jiitiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesucristo tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

5

Na que niquiocuata quijajiniji pohuatasano

¹ Niajanijajiniji pohuatasaarucuaa taraatianijia. Tamonu niajanijajinijionaaari jiyanoohua sesa miya. ¡Na que niquiocuata quiyaquinaari! ¡Pueyanaa, cuno miishanoori socua jiyanoohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiitiaaruhua? ¡Niaa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaniya nia rerejosacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiuriini. ⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijiaara na quiniuhua. Naacuajitij, pa Jiyaniijia Jesucristo muetasacariuhua pocua, nojua-jaari samiitianishaanutaniuhua juhua puetunu Pueyaso muerasutajanaa.

⁶ Cuarta Jesucristo tiuuniaanaa, ¿taate nia naata shuquiriaatia quiniu tamajaajani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaaca paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashoju miniquiootasanojuanaari. Naajuhuaaj, sesa miijia jaara sequeyaquishaare na miishano, sesa na miishanoori socua paaquenutaniya.

⁷ Tarijia, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijarajanaa. Nojoriiri naa rootasaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuaaj quiarijiani, nia taanure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuaaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucuaajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura niajaniya, maja nia cojiniuria sesoriquia pueya, cuno pojori canapuate na camishoo maaji numuetucuaaani. ¹⁰ Naa cua sequesacari niajanijatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara

nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijiaca quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuuquiaa. Nojoriiri tama na panishanoocuaajaaja jiaatiaquiaa puera, maja Pueyasooocua. ¹¹ Cua tojitiare casaa cua sequecanu tari niajaniania. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucujuquiaa. Naajuhuaaj, majaari nia cojiniu nooj cante casamiriacara quiniuucua jiaatiaquiaani. Majaari nia cojiniu nooj cante tama na panishanoocuaajaaja jiaatiaquiaajaaniuhuaaj, maja Pueyasooocua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³ Naa cua sequesacari niajaniatej, majaari cua sequenu quiriquiaa tamasa pueyajiniji, canapuetucuaaja maja Pueyaso muerasuni. ¿Paate nojori nequesoreenaani? Maja. Pueyasooocuaajaari nojori saniniujiuniutianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatate cuno sesa miijia nia tajiniji, noo cante sacuaraatia na que niquiuocuata quiyacuajani.

6

Sesa miijia cuaara nequesoreesaaria narta Pueyaso muerasu niquiara

¹ ¿Seetanutejanaa naa niajanijajiniji pueya pohuatasanojuhuaaj? Niarta Jesuucua tiuunia jaara sesa miiri niajaniana, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jeeca-toyaquiquiaani? ² ¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocuaaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³ ¿Majate nia niishiniujiuhuaaj, paari Pueyaso seya nequesoreeriquianojuhuaaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴ Naa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiitianaa. ⁵ Naa nia sequeyanijia cua cararonura quenaaja niajaniana, cua niishiriojotenura niajanianijuhuaaj. ¿Seetanujuanaa tojetaarucuaajanaa shaaquiti niishijia niajanijajinijinio, cante na naata nia tonujutoosacari nequesoreenu niajaniana maniniani? ¡Quiya jiyotucuaajaari! ⁶ Niajanianaari tama niarta Jesuucua tiuuniaacuarajaaja tonujutoojoquiaa Pueyaso niishiyashijiaca nequesoreena niquiara. Naa nia miishacaritij, ¡niaari sesa miiquiaa pueyanaa!

⁷ Niaari jiyanohua jiyajeneya nia juayonuujutasacari. Naa jaara sesa miishaare, niaa cuaara jiyanoootioora saniniuujia, nia casami jaara nohuasesaarejuhuaaj. ⁸ Niajanijarijataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Naa nia niishacari tama niarta Jesuucua tiuuniaajaaja nohuasejoquiaa, sesa miijiaca nia quiniuucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo

pojori canapuate na camishoo maajipohua numuetucujuquiaani, naajuhuj, noo pojori, canapuate tama na panishanoocujajaaja jiaatiaquiaani, maja Pueyasoo. Quejoosaanutaniyajaariuhua noo pojori, canapuate narta pueyano niqiuocua numuetucujuani, naajuhuj, canapuate maajishuriutia quijia juhua maajitiani. Nohuasenuujuacaari quejoosaanutaniyajuhuj, noo pojorijuhuj canapuate pueyaracaanu socua casami paniquiaa tama nerajaajani. Mashaasequenuujuacaari puetunu quejoosaanutaniyajuhuj, tamasaca sesacajacanio, tamasacaacura rimiaaquejajuhuj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajanijiniioori jiyano sesa miijiaa pueya quiquiaari tarijia. Na nuhuaji, sesa nia miishanoori jeequesaaquiaari Jesucristoo. Pueyaso Sohuanuuri nioojiajinia tiuquiquiaari, Pueyaso na tojitiniuria niajanijia. Naacujitij, nia rupuesacari Jesucristo, Pueyasoori nia jiyanoocujajaaja. Nia sequereeri: “Niaari saa maninijia quiya cua niqiuara”.

Pa cuaqueya cuara quiriia saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiiitishano casaa pa tarinitianu. ¹³ Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujaji saniniuurijia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyjetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhuj, pa Jiyaniijiaari pa cuaqueyara quiyacujaa, na cumaquiniuria pajaniya, maninia pa quiniuria pueyaracaanu. ¹⁴ Naajuhuj, taa Pueyaso samiitiani quiaaricuaa pa Jiyaniijia Jesu na cuaqueyatani, nojuajaari macujinijia naa pa samiitianiutianiuhua na cumaacatajuhuj.

¹⁵ ¿Niaateeri niishiyaquiyajuhuj, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanoocujajaaja! ¹⁶ Pueyasocujajaajaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiqui? ¹⁷ Naajuhuj, paa jaara Jesucristo rupuereni, pa sohuanuuri rupuetoree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoocujajaaja na quiya na miiniutia nia masereeri Neyanu na motesacari pocuara! Naacujitij, Pueyasoori quiarijia pa camarnu quiya. Naaratej, quiarijia maja pa quiniu tama

pa cuaqueya camarujuaaja. Naaratej, pa shuqiritiri pa Pueyaso pa cuaqueyata, pa sohuanutajuhuj. Nojuacuajaari pa cuaqueya camaru, pa sohuanu camarujuhuj.

7

Pablo rootasano pa caminiuria, camiyojua pa quiniuria soj

¹ Quiarijiani pueyanaa, cucuara nia naajiosanojinia nia nequesotasano riucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiirijuhuj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujiuhuj. Necocuaari neyaca cuaqueya camaru cutara. ⁵ Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijonu na panishacari na numuetucusaanura. Saniniuujia, jiyanoohua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya niajaniyani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa Jiyaniiija Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanootoora, na rupuetoonuhua. Jaara maja na naata jiyanootoonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniiija Jesucristo sequesanoori mariyata niaarajuhuj. Naa sequeyari: "Maja nia cartenu nia niquiocua".

¹² Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu panijaa, majaari na cartenu. ¹³ Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesucristo tiuuniaata caminio quiya. Nojoriiri setanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca jiyanooria necocua quiniucua niarta Pueyaso pueyano. Nareja nia niquirinioj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesucristo tiuyashijia na quishacari. Naa Pueyaso pueyano neyaca quishacari, necocua cuaara nareja niquishaariajuhuaj, na rerejosacari niaata. Naajuhuj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanojuaaja. ¹⁵⁻¹⁶ Pueyaso muerasunaa, canuu, maajipohuanio, Pueyaso

tojiyashijia jaara nia cartenu paniri, nia tarinitiare. Pueyaso tojiyashijia cartesacari nijaniya, niaari juhua camishoo quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijaa na cartenura quiajaniya. Naatej, Pueyasoori paniquiaa juhujaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari nijaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocuaajaari Pueyaso panishano quiquiaari niaara. ¹⁸ Naacuajitij, cante tarijia na cararaatiuuquia co miatesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiuushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. ¹⁹ Cante Judio pueyano na quiniuria miatesaquiiaarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitijosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. ²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiriquia cartesano pueyano nia camarnujiniji, maniniacuajaari. ²² Cante poonitijiotasusano pueyano quiquiaari Pueyaso sequesacari nijaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijia. Naajuhuj, cante camarnuuju quijia quiquiaari Pueyaso sequeyaquishacarija na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³ Pueyasoori jiyano hua naquiya miiquiaari na cusojuasacari Neyanuniyojua, na masenura nijaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu nijaniya.

²⁵ Quiarijia nia sequereera cua niishirijosano, taa camishoo pueya miiniutianiyani. Niiori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuuquiaa na sequenu panishano cua caminiujiuniuria nijaniya, na Sohuanu cumaquishacari janiya. ²⁶ Naacuajitij, naa nia sequeyanijia: niaacuajaari niishiya, quiarijiani, jiyano hua puereeta quishacari. Nocuaji nijaniya cuaara quiiria taa nia quiyacuajani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸ Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniucua quiarijiani.

²⁹ Cuarta Pueyaso muerasunaa, nijaniya cuaara niishiiria nio jiyari puequenu-taniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarija, jiyano hua pa tojitiare pa Jiyani-

ijia. Naacuaajitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanooocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. ³¹ Canapuate niishijiacani, queraatia casami na masejonura mijiriani, nojori cuaara niishiiria maja casami panijiaa nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³² Janiyari paniyani mijiria casaacua tacayashijia nia quiniuria. Pueyaso nia tojitiare juhujaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. ³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴ Naacuaajitij, noojia niquijioteyari. Naajuhuj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuaajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojitianura maninia. Naa jaara cua niishitiosano tojiri, nia naata pa Jiyaniijia tojiniu maninia. Naacuaajitij, niaari nioojia niquijioteyaquiniutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷ Cante saniniuujia maja noojia niquijioteyaquiya na niishiriojosacari neyatuucuni, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸ Naacuaajitij, cante neyatu camitiriini, maninia miyari. Cante neyatu camitiyaquiyaaniuhuj, nojuajaari socua maninia miya. Naacuaajitij, cuno neyatuuri na naata Pueyaso panishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacuajani. Jaara caminiu paniri, cuaara camiiria Pueyasooocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasooocuarajanaa?

¹ Cuarta Jesuucua tiuuniaa pueyanaa, janiya quiarjia nia niishitiojonutaniyani teyano pa miaquesanojinijiti puereshiyani. Pueyaso niishiyashijiaacari na miaquesocoriquiano seya puecoonu niishijia shipinishano casaacuara juhua Pueyasooocua. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuj, cuno seru jaara taucuaca jyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuaajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa

niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanooqua. Cante narta pueya paniquiaani, cunoori narta pueyacua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacujitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. ³ Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴ Juhuanajuajaari maja cua riucuanu nia niishiniu panishano: “¿Maniniatenaari cuno shu pa miaquenu, seru jaara pueya jiyanishano pueyasooquera mosano quiri?” ¿Casaatejaara cuno nojori jiyanishano pueyasoni? Paacujajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jiyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵ Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijirianio. Nojoriiri na jiyatequiaa nojori cojuanara, nojori cumaquiriquianojuhuaj. ⁶ Naajaa, paari niishiyani saa niquiriyatu Pueyasoojuaari quiya. Nojuacuajaari pa Que Pueyaso, pa shipinina. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhuj. Cunoori pa Jiyaniija Jesucristo. Na Queeri na shipiniquiaari puetunu na shipinishanojuanaa. Pajaniyajuhuj, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jiyaniyajaa taucuaa shipinijosano casaari seetanujuanaa cumaacaraca quijiaa juhua Pueyasojuhuj. Nojoriiri na juhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacujitij, nojori jaara shu miaquere teyanote mosaaree nojori jiyanishano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacujitij, nojoriiri noojia macuhajetequiaa. ⁸ Pueyanaa, paacujajaari niishiyani, casaa pa miaquequiaani, naajaa. Pa miaquesanoori maja na naata Pueyaso jiyanoootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhuj, cante na miaquequiaani, majaari socua sesa pueyanora na quiniujuhuaj. ⁹⁻¹¹ Niaacujajaari jiyanohua tiuquiaa Pueyasooqua. Naacujitij, niaa naasucuaari na naata juhujaniya tiuquiniu cuno shu miaquenura nojori jiyanishano pueyaso quiquiojinia. Niaacujajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacujitij, nia naata nocuara mosano seru miaquenu juhujaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “¡Jaj! ¡Nojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacujitij, na sanishacarihua cuno shu miaquenu, tamajaaja noojia macuhujanutaniyari. Naacujitij, niaari niarta Pueyaso pueyano sesoya, na niquiara nia miaquesacari cuno shu. Na niquiniucua nijaniya cuno shu miaquenuyano, nojuajaari cunora na miaquerejuhuaj. Saniniuujia, nojuajaari juhuanajuaja maja jiyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota. Nocujaj janiyari nia sequeyani, maja socua nia miaquenu cuno shu, cuno

shu miaqueyaquijia mariqui na pueresano shu miaquerohuariuhua, na rupuesacari niajaniya. ¹² Nia miaquesacari, niaari na pueresano shu na miaqueteya. Naacuajitij, noojiaari macuhuajenutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, naa nia sesosacari tama na pueyanojuaaja. ¹³ ¿Taa nia sequeyani pueyanaa? ¿Maninate shu pa miaquenu, seya jaara taucuaca jiyaniishano pueyasooacara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniniacuaani.

9

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhua, cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhua. Seetanujuanaa cua namijiata Jesucristo niquiquiaarinijia. Nojuajaari cua jiyatequiaari na jiyaramiquishano cua quiniuria. Naajuhua, cua pahuatasacari Jesucristojiniji nia niquiara, niaari na muerasura quiquiaari cua pahuatasanoocua nia tiushacari. Naacuajitij niishishiyari janiyari Jesucristo jiyaramiquishanojaaniuhua. ² Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo tiuquiciaari nia tojishacari cua pahuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniujiuhua, taa cuarta Jesu jiyaramiquishano pueya miiquiaacuaani.

³ Tamonu jaara cua nequesoreere taa cua miiquiaani, janiyari saaja naa na riu-cuaquiaani: ⁴ “Pueyasoori sequequiaari, na jiyaramiquishano pueya cuara niquitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niquitiojonura canaa panishano. Naajaa, majaari canaa masenu quiquiaa canaa panishano niajaniyajiniji, janiya, Bernabeenio. ⁵ Naajuhua, canaa jaara niquiocuaraca quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuaani. Pa Jiyaniijia Jesu tapueyocuacaari naa miiquiaajuhua. Pedrojuanaari necocuata rucuanajoquiaajuhua, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijiuhua: “Cua jiyaramiquishano pueya cuara niquitiosaaria cumaneeca, na panishano nojori masetajara”. ¿Ni-aateeri jiyaniya cuno sequesano maja quiria, maja Bernabeerajuhua? ¿Cunocuajaari naa sequesaaquiaari canaarajuhua! Naaratej, canaa jaara naa paniriquiani, canaa maara canaa panishano masere niajaniyajinijini, canaa niishitiojonuucua niajaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

⁷ ¿Soldoteeri tamonu poonijosano jitiata, na miaquesano na masetajara? ¿Maja! Soldadohua jiyaniijaari na niquitiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¿Maja! Na nuhuaji na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¿Taaquiririnij! Na ratuyacuaaquinatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano niajaniyajiniji. Naajaa, majaari canaa mashiniquijionu quiquiaa quenaaja canaa panishano niajaniyajiniji. Canaari nareja poonijioquiaa tama canaa juaashiquiatajanijia, Jesucristo rupaa canaa pahuatasacari niajaniya.

⁸ Nio cua pohuatasano niajaniyani, majaari tama canaa niishiriojosanojuaaja. Nio niishitiojosanoori tariucuacaanu Pueyaso Rupaa naajiosanojinia quiyajuhuaaj, taa cua sequeriquiaacuajani. ⁹ Supuetana Moisés caminiujiushano Pueyasojinijiiri naa naajio-tasaaquiaaritiij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja!
¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiriiriniij. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuaaj? Jaa. Niishiyacuajaari na mianutaniyari. ¹¹ Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuara niqutiojosaaria saniniuujia canaa panishano. Naajaa, majaari canaa paniniu canaa panishano nia niqutionura canaa. ¹² Tamasaca pueya niishitiojosacari niajaniya, niaa cutaraari nojori niqutiojoquiaa nojori panishano. Canaari saniya coteenujanaa pohuataquiaari Jesucristo rupaa niajaniyani. ¿Majateeri coteenu canaa niqutiojaanu canaa panishanojuhuaaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiiitaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiiitaaquishacari canaa panishano. Canaari naa miiquiaaritiij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijiosacari canaa panishano niajaniyajiniji.

¹³ Niaacuajaari niishiyajuhuaaj, Jerusalén tiacajinia Pueyaso Secojoua tiajinia, cuarta Judiocuaca miaquesocoriquianoori puecoosaaquiaa Pueyasocuara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuaaj, shu camaruuri secojojuajinia poonijionaa niqutioquiaa nojori miaquesocoriquianojuhuaaj? Naacuajitij, Pueyaso secojojuu tiajinia poonijionaari miaquesanoraca quiquiaajuhuaaj. ¹⁴ Pa Jiyaniijia Jesucristoori na rupaa pohuataanaa naa sequequiaarijuhuaaj: “Cua rupaa pohuataanaa cuara niqutiojosaaria na panishano pueyaracaanu”. ¹⁵ Naacuajitij, cua naata puetunu cua panishanojanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quia Pueyaso niquiarani.

¹⁶ Cua tojitianaa jaara niqutioire janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniuriajaaja. ¹⁷ Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajaniyara”. Janiya jaara naa na sequequiaarini, cua Jiyaniijia maara cua niqutioire cua poonijosanojiniji nera, na shuquiriasacari janiya. Saniniuujia, tama na panishacarijaaja cua Jiyaniijiajanaacuajaari cua jiyaroquiaari na

rupaa cua pohuatanura. Cunora, majaari cua naata na tarijionu. Janiyacuajaari na seruni. ¹⁸Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijioquiaanijia tama cua juaashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuaajaari sequequiaari na rupaa pohuataanaa cuaara niqutiosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuquiritiniuria socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niqutionu quiquiaa janiya na jiitiasanojiniji cua niishitiojonuu-cua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojitianaara. ²⁰ Jesucristo rupaa cua pohuatasacari cuarta Judiocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquliarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojitiaajaani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji. ²¹ Naajuhuaaj, cua quishacari tamasa pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiuaajuhuaaj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquliarani. Naajaa, Pueyaso rootasano tojiquiaa pueyaracaanu cutaranijia. Naajuhuaaj, puetunu Jesucristo niishitiojosanojuanaa tojiquiaanijia. ²² Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhuaaj nojoritia cua quishacari. Nojori jiyaniushacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojitiasacari janiya, juhua nojori cua quishacari. ²³ Janiyari puetunu naa miiquiaajaanani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

²⁴ Niaacuajaari niishiya taa pueya tacuarishiyajoquiaacuajani. Pueya netecuatucari, puetunu pueyajaanari jiyanoohua netecuatujua jaarajaaja. Cante narta netecuatunaa shocotajani, shanoohua casaa niqutioshiyari. Ritiuquia pueyanoori jiyanoohua shuquiriaatia quijia na shocotanutiniji na masesacari casaa. Naajuhuaaj pueyanaa, jiyanoohua nia poonijiore Pueyasora mijiria, shuquiriaatia nia masenura nia poonijosanojiniji na jiitiasanojiniji jiyocuacaanu. ²⁵ Naajuhuaaj, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanoohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶ Pueya netecuatusacari, netecuatunaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niquijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. ²⁷ Janiyari jiyanhua saniniujuquiaa maja cua miiniuria tama cua cuaqueya miiniu panishanojuaajani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaaja tojiyaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaquiaaricuaani nojori rucuanijosacari pueyaracaanu cariquia jiyajinia. Majaari nia niyjetanu niaa mariqui Pueyaso tojiyashijara quiriohuajuhuj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuj. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na qutiuniu quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucuanijosacari. ⁴ Naajuhuj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohujaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaquiaari. Naaratej nojori cusojuanuuriquiaari cuno cariquia jiyajinia nojori camarucuneejasacari pueyaracaanu, cuaara puequequiaariijaatijia puetunu cuno tojiyashijiacajanaa.

⁶ Naa miishaquiaariti cua supuetanaa Judiocuaca, sesa casaacua nojori jiaatianuucua. Nojorijinijiiri puetunu naajiotasaaquiaariijianaa pajaniyara, pa niishiniuria maja sesa casaacua pa jiaatianurajuhuj. ⁷ Shushajanaa nojori coteesacari rucuanenu cariquia jiyaco, noojiaqueya nojorijinijinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaajaaja sequequiaari: “Niiori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajitiurii queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinijinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacoji.

Pueyasoori nocuaji naa sequequiaari: “¡Cuaara puecoosaaria cuno sesa miijiaca!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taatujuritiani.

⁹ Na nuhuaji, noojiaqueya nojorijinijinioori Pueyasota juaaquiouquiaari, tamonu mi-quesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajinijinioori Moisésta juayonuutaquiaari. Moiséscuajaari nojori jitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusonuquiaari jiyacari. Naaratej pueyanaa, majaari pa juaatianu pa jiyaniijianucua.

¹¹ Puetunu pa supuetanaajiniji naajiotasanojuanaari tariucuacaanu naajio-tasaaquiaari, pa numootesaanura quiarijiani, quera pa Jiyaniijia muetasacariuhua.

¹² Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata saniniujiushaaquiaajuhuj, taa puetunu parta Pueyaso pueyajanaa saniniujiushaaquiaacuani. Naajaa, nia naata Pueyasocua tiuuniu maja puera nia saniniujiushaanura. Pueyasocujaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuani taraatia nia miiniucuaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

Maja pa kojiniu tamasaca, na miaquenuusacari na jyanitiushano na pueyasocudara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jyan-itiushano pueyaso quiquiojinia, na tojtianaa nia kojiniuria, nojori shuquiritiasacari juaashiquiata shipinishano casaa Pueyaso niti. Maja nojori kojiniu, niaa mariqui sanitiosaareeri. ¹⁵ Niaacuajaari niishijiaca. Naaratej, nia niishiriojore cua sequesanoocua.

¹⁶ Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muera-sunaa, puetunu pajaniyajanaari pa Jiyaniijia rupuesano quiquiaani, na nanaca shoonu-ucua puetunu pocuarajanaa. Naajuhuj, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacaritij, puetunu pajaniyajanaari jatiqui pa Jiyaniijia cojiquiaani, na cuaqueya cusonuucua pocuara. ¹⁷ Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniya-janaari rupuetoono quiya pa Jiyaniijiatani, juhua niquiriyatu cuaqueyaja.

¹⁸ Nia niishiriojoriquia taa Israel pueya miiquiaacuani. Nojori miaquesacari Pueya-soocudara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jyanooniuria nojori. Naacuajitij, nojoriiri na naata Pueyaso rupueno, nojori secojonura nojuaja. ¹⁹ Jaara naa quiriritij, ¿taateerini, pueya jaara shipinijosano casaacudara mosano shu miaquere? ¿Casaate pueya jyanishano pueya-soocudara mosano shuni? Nareja shucuajaari. ¿Cumaacaraca quiijate cuno, pueya shipinishano casaa juhua Pueyasorani? ¡Maja! ²⁰ Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecoquiaa samaruhuacudara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenura samaruhua! Nocuaji, maja Pueyaso niishiyashijiaca nia kojiniu cuno shu nia miaquenura. ²¹ Majaari pa naata pa Jiyaniijiatata rupuetoonu, samaruhuata pa

rupuetoosacarijuhuaj. ¿Pueyasote samarhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhuj? ¿Cojitishiyatee? ¡Maja pueyanaa! ²² ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajini-jini? ¿Majateeri nia puerenu pa Jiyaniijia saniitionu?

Taa pa miiniutianiyani

²³ Tari sequereecuajaniijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniuriajuhuaj. ²⁵⁻²⁶ Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niqutiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhujaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhujetereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhujaniya nia miaquere nareja. Puetunujuanaari pa Jiyaniijia shipinishanocuaaja. ²⁸ Saniniuujia, nia cojinia jaara numootere niajaniya: “Nio shuuri mosaaree shipinishano casaacuara juhua Pueyasooacara”, majaari nia miaquenunoj, niaa jaara naa sequesaa. Maja nia miaquenunoj, nia cojinia mariqui na miaquerejaariuhuj na cojishacari niajaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niqiuara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰ Paa jaara Pueyaso sequereni ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³² Puetunu nia miishanojuanaa cuara quiiria maninia Judiocuaa niqiuara, taucuaca niqiarajuhuj, parta Pueyaso pueya niqiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyantiushano sacuaraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niqiarajanaani, nojori cuara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niqiuara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriqiuani Pueyaso pueya rerejosacari

² Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhuaaj, maninia nia tojitiasacari puetunu cua niishitiojosanojuanaa Pueyasojiniji. ³ Janiyari paniya cutarani socua nio nia niishiniuria: Cristocua-jaari caya camarnu. Cayari saniniuuja necocua camarnu, taa pa Que Pueyaso pa Jiyaniijia Cristo camarnu quiyacuaani. ⁴⁻⁵ Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuaaj, jiyacaritij, canuu cuaara jocuara na nacaque na pocuasacari. Saniniuuja, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuaaj, na naca mishiquiosano. Cararaatiajaariuhuaaj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujua-naacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiriirinij. Cararaatia quiyajaariuhuaaj, na secojosacari Pueyaso, na caminiujiushacari Pueyaso sequenu panishano pueya niquiarajuhuaaj, mishiquiosoo na naca quishacari. ⁷ Maajiiri neyaca shuquiritiya na tojjia na quishacari. Naacuajitij, neyacaari narta pueya shuquiritiasano quiyajuhuaaj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniuriajuhuaaj. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyaso-juhuaaj.

⁸ Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocujiniji shipinishaaquiaari. ⁹ Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. ¹⁰ Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuaaj. ¹¹ Naajaa, puetunu pajaniyajanaari mariyata Pueyaso muerasuni, Jesucristocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuaaj, cayari maja na naata supueno tamajaaja maajijiu. ¹² Seetanujuanaari, maajiiri coteenu shipinishaaquiaari caya cuaqueyajiniji. Na nuhuaji, puetunu canujuanaari saniniuuja supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutojonura.

¹³ ¿Taa nia sequeyani pueyanaa? ¿Maninateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴ Naajuhuaaj, quera puetunu pueyajanaari sequeja, cararaatia niquishanoori caya jaara tucamuejaru quiya juhua maaji. ¹⁵ ¿Maajiirijiataj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria, na naca mishiquioriquiano na muecacata. ¹⁶ Tamonu jaara nacoonu panijajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuaaj, puetunu Pueyaso pueya maapuejanaari tamaquiicua naa miiquiaa taa Pablo pohuataree pajaniyacujani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuujuajinia, pa Jiyaniijia cusonu nojori niishishacari

¹⁷ Cuarta Jesuucua tiuuniaanaa, nio, janiya niaacuara na naajiyani, nioori maja cua shuquiritianura niajaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janiyari naa pohuatasaarucuaa niajaniyajiniini: “Corinto pueyari sesa na niishiriojonuta nojori jiuujiajia raquirijitiaquiaa nojori rerejosacari”. ¿Seetanutejanaa nio pohuatasano niajaniyajiniini? Naa naasucuj. ¿Casaate cua toyani? ¹⁹⁻²⁰ Seetanu naasucujanaa niaari nioojiajia naa niyaquejoquiaaqui. Paacuajaari tari niishiquiaarini noojiaqueya pueyari Pueyaso pueya maapueecuaji rupanutaninya. Naa niishishanote canapuate maja Pueyaso muerasuni. Cante seetanujuanaa Pueyasocua tiuujiani, majaari na rupanenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niyaquejono nia quiniuria. Naa jaara naa niyaquejoriquiatej, majaari pa Jiyaniijia cusonu nia niishiniu quiquiaa seetanujuanaa. ²¹ Niajaniyanaari tama nia patasanojuaaja coteetaquiaa miaquenu. Naaanaari nia miaquesano serotaaquiquiaa. Naacuajitij, casamiijiuniucua-naari miaajecoquiaacujua. ¡Saniniuujia casamiriacanaari juhuaajaniya mashaasequenu-uquiaacujua! ²² ¡Jiyanohua cararaatiaari naa nia miishanotej! Naa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamiijiuniucuatej, niaacuajaari nojori cararoquiaa, casamiijiuniucua nojori quiniucua. ¿Taa nia sequeyani pueyanaa? ¿Janiyate nia maninihuaqueetaani? ¡Maja! Jiyanohua tacayanijia. Majaari cunora cua shuquiritianu niajaniya.

Pa Jiyaniijia rootasano na cusonu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucuaaja, Judasri pa Jiyaniijia quiateriquiano quiriquiaa taucua mosocoriquiano. Cua tojitiarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quena”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶ Naa nia miaquesacaritij, nia ratusacarijiuhuj, pueyari niishiniutianiya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniijia cuara tiuquiriohuajaatijia.

Nia niishiri taate pa naata miaquenu pa Jiyaniijia cusonu pa niishiniuriani

²⁷ Naaratej, niaa jaara sesa miiri, Pueyaso nia secojore ritia na jiyanoonihuara niajaniya, nia miaquenuhuara pa Jiyaniijia cusonu nia niishiniuria. Naa jaara pa Jiyaniijia pan miaquere jiyanooshoo nia quishacarijia, niaa jaara na cusonu mashacaturate jiyanooshoo nia quishacarijiuhuj, ¡niaari na cusonu rerequeteya! Naaari juhua sequeyaruhua, pa Jiyaniijia najuhuana cusoquiaari. Naa nia miishacaritij, niaa cutaraari saniitosaanutaniya.

²⁸ Naaratej, tama nioojiajiniaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoyaquishacarijia nijaniya. Naa nia miiniu nuhujitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturuhua pa Jiyaniijia raatonuquejiniji cutara. ²⁹ Cante juhuajaniya miaquereeni, cante juhuajaniya raturee najuhuanani, jiyanooshoo na quishacarijia, cuno pueyanoori Pueyaso saniitotenutaniya tama na cuaqueyajaaja. ³⁰ Naacuajitij, jiyanooshoo nia quishacarijia nia miaquesacari, queraatia nijaniyajininioori cunora cusosuhua quiya. Noojiaqueya nijaniyajininio cutaraari tari cusunuucanujuhua, Pueyaso saniitiosacari nojori. ³¹ Nocuaji tama nia cuaqueyajaaja nia jee care suraatia, pa Jiyaniijia mariqui saniniuujia nia saniitioreeri. ³² Pa Jiyaniijia jaara pa saniniujiuri, canapuate sesa quiyani, Pueyasoori na saniitioquiaa na muerasu nojori quiniuucua, maninia nojori quiniuhua juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojiyashijiaca.

³³ Naaratej cuarta Jesuucua tiunianaana, niaa jaara pa Jiyaniijia pan sanu paniriquia na cusunu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuara miaqueera coteenu tama na tijiniaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasujanaa

¹ Cuarta Pueyaso muerasuna, niaacuajaari tari niishiya Pueyasoori na Sohuanu niqutioquiaa puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojininijia. ² Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiar-ijianaa, pueya shipinishanoocua nia tiuniuucua najuhuanaj. Sesaacaari naa nia tojitiquiaari najuhua pueya shipinishano, nia jiyaniishano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojininiji? Naa nia saniniujiuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhua, saaja Pueyaso Sohuanu cumaquishacari pueyano na naata sequenu: “Jesucujaari Jiyaniijiajanaa”. Naacuajitij, maja nia tojinu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijosanoori Pueyasora quiya. Naajaa, puetunu pajaniyajanaari niquiriyatujua Jiyaniijiaara poonijioquiaani. ⁶ Puetunu pajaniyajanaari tamaatia miiquiaa pa poonijosanoni. Saniniuujia, Pueyasojanaari na panishano miiquiaa puetunu pueya jiuujiajiniajanaa. ⁷ Pueyasoori puetunu na muerasujanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujanaa. ⁸ Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasocua na tiuniuria jiyanohua, na shiniujiuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano

jiyajeneta miishano miitijajuhuaaj Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niquiara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhuaj, pueya tojiniuria maninia tama nojori rupaajiniajaaja. ¹¹ Naacuajitij, Pueyaso Sohuanujua-naari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na paniyajaaniuhuaaj.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyanohua maninia shipinishano jiyanohua Pueyaso niishitijata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuaaj. Naacuajitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyanijiaara pa poonijionura jatiqui. ¹³ Pueyasoori pa rupuetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupuetootesano quiya niquiriyatu Sohuanutani. Naacuajitij, paari juhua niquiriyatu cuaqueya quiyani: Judiocuaca, taucuacanio, poonitijiosano pueyajuhuaaj, camarnuuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuaaj, majaari pa soonu tamaatia poonijiosano pa jiitiasacari Pueyasora. ¹⁶ Naajuhuaaj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari nianucuajani. Naajuhuaaj, Pueyasoori puetunu na muerasujanaa cumaquiquiaa mariyata, tamaatia poonijiosano pa jiitianura taa na paniyacuajani. ¹⁹ Pa cuaqueya jaara quiriquia saa namijiaja puetunujanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuaana quijiaca. Maja nia naata niqiniu”, ¿majate pa juaashiquia pa panishanojuhuaj? Taaquiririni. Naajuhuaaj, pa naca jaara pa niohuaca sequere: “Niohuacanaa, niaari najuhuaana quijiaca. Maja cua paniniu niya nijajaniya”, ¿majate pa niohuaca pa panishanojuhuaj pa rucuanejotajara? Taaquiririni. Pueyanaa, naa pa quiri jatiquijihua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niqiarani, cunoori

socua pa panishano. Maja pa naata rishiniu cunooju. ²³ Naajuhuaaj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. ²⁴ Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacuajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuaaj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuaaj, parta Pueyaso muerasu jaara taraatia miishaare, naa nojori pa taraajetarejuhuaaj. Naajuhuaaj, parta Pueyaso muerasu jaara maninia miishaare, nojoritia pa timirijuhuaaj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiara-juhuaaj. Naajuhuaaj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasaari jiyatesaaquiaari cusosuhua naatanijionaa nojori quiniurijuhuaaj, Pueyaso Sohuanu cumaquishacari nojori. Tamasaari jiyatesaaquiaarijuhuaaj Pueyaso muerasu naacunaara nojori quiniuria. Tamasaari jiyatesaaquiaarijuhuaaj Pueyaso muerasu jiitianaa nojori quiniuria. Tamasaari pohuatesaaquiaari tamaatia rupaacajuhuaaj. Naacuajitij, queraatia tamaatia poonijosanoori quiya. ²⁹ ¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanaa tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojonaa? Maja. ¿Puetunu Pueyaso muerasujanaateeri jiyajeneta miishano miijiaca? Maja. ³⁰ ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujanaateeri na naata na pacunu tama nojori rupaajiniaajaaja? Maja. ³¹ Naaratej, nijaniya cuara jiaatiaara socua maninia poonijosano nia jiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaana, quiarjiani nia niishitiojoreera casaate socua panishanoni, Pueyaso shuquiritianura pajaniya.

13

Panijiaca pa quirij

¹ Pueyaso Sohuanu jaara cua pohuatare queraatia cua niishishoo rupaaca, Pueyaso seya rupaajuhuaaj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani. ² Naajuhuaaj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuaana quijia quirini. Naajuhuaaj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuaana quijia

quiri Pueyasorani. Naajuhuaaj, janiya jaara Pueyaso cumaacaraca quirini, tuhuanuhua cua jatanura tamocora Pueyasocua cua tiuuniucua jiyano huani, naajaa. Cua paniyaquishacari pueya, janiya maara najuhuaana quijia quiriquia Pueyasorani. ³Naajuhuaaj, janiya jaara puetunu cua casamijiana nareja niquitiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuaaj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuaaj, janiya jaara mosaare Pueyaso rupaa cua pohuatanuucuan, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jii-tiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuaaj, cante pueya panijiani, majaari pueya rerequeteja na quiniu. ⁵Cante pueya panijiani, majaari pueya na cararojonu. Cante pueya panijiani, majaari saaja nera niishiriojojua tamajaaja. Cante pueya panijiani, majaari ritia juaajia. Majaari na niishiniu naminiujuhuaj, tamonu jaara sesa na miiri. ⁶Cante pueya panijiani, nojuajaari pueyacua taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. ⁷Cante pueya panijiani, juhuajaniya pueyaracaanu rejeretaari, tamasa miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuaaj, majaari na tarinitianu maninia miiniu pueyaracaanu. Pueya panijiaari naa puetunu rejeretajajanaa, taraatia na miishacari.

⁸Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijia pa quiri. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujiuniuria, pa niishishoo rupaaca pa pocuanurajuhuaaj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹Mijiria pa quishacari, paari saaja shiitianiyojua Pueyaso niishishano jii-tiaani. Pa niishishano Pueyasojiniji pa pohuatasani, cunoori saaja shiitianiyojua Pueyaso niishishanojiniji. ¹⁰Naacuaajitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyanani.

¹¹Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitiaja jii-tiaquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyaje-taquiaarini. Naajuhuaaj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiyanani. ¹²Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niquitiujinia. Pueyaso shuriucua pa quishacari, paari maatia niishiniutianiyanani. Quiarijiani, saa shiitianiyojuajaari pa niishishano. Na nuhuaji, Pueyasota pa quishacari, paari puetunu maninia-janaa niishiniutianiyanani, naatej, taa Pueyaso niishiya puetunu pajaniyajanaacuaani. ¹³Quiarijiani, paari Pueyaso rupaacua tiuuniu niishiyani. Naajuhuaaj, paari juhua-janiya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacuaaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijiniojuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jiyanoehua pueya panijiaca nia quiniuria, Pueyaso panijiacajuhuaaj. Naajuhuaaj, nia jiaatiare Pueyaso Sohuanu cumaaca nia jiitianura maninia nia miiniuria. Panishano cutaraari Pueyaso Sohuanu niishitiaja nia jiitianura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohu-atasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niquiara najuhuanaj. Majaari pueya niishiniu casaa na sequeyani. ³ Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiaajaariuhuaaj. ⁴ Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. ⁵ Puetunu niajanijajanaa jaara niishishoo rupaaca pocuanu niishijiaa quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajanijajanaa jaara Pueyaso sequenu panishano caminiujiuniaa quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaanari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuaaj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee niajanijajanaa nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajinijajanaa Pueyaso niishitiojosano janiyani. Maninijajariuhuaaj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhuaaj. Naaratej, paari shuquiriaatia tojitiaa naajua jonenesacarini, jaaquequejotaja taquiniosacarijuhuaaj. Saniniuujia, pueyano jaara naajua jonenejonu saniniuujia na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenu paniya juucuanu. ⁸ Naajuhuaaj, trompeta jaara sesa jonenesaare, ¿soldadohuate na naata niishiniu casaa na miiniutianiya? Maja. ⁹ Mariyata naajaariuhuaaj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocateya najuhuaana nojori niquiara. ¹⁰ Niaacuajaari niishiya queraatia rupaacaari mijiria quiya. Puetunu maninijajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuaanari tahue quiya quiriujuhuaaj. ¹² Cuarta Jesuucua tiunianaa, niaacuajaari Pueyaso Sohuanuucua jiaatiaquiaa, na cumaaca nia jiitianura. Maniniacuaja. Naajaa, niajanijajanaa cuaara jiaatiaara Pueyaso Sohuanu cumaquiniuria niajanijajanaa, puetunu tamaatia poonijiosanojuanaa nia miiniurijuhuaaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari niajanijajanaa.

¹³ Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojoora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajinijuhuaaj. ¹⁴ Pa secosacari Pueyaso pa niishishoo rupaajinia, Pueyaso Sohuanuuri pa sohuanu secoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu

cuaara secojora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuhuj, pa sohuanu cuaara jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secojosano. ¹⁷ Niaa naasucuaari jiyanohua maninia secojiya Pueyaso. Naajaa, saaja najuhuaana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quiyanijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajanijajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuaana quiriquiaj. Rupaquijia pohuatasano tama pueya rupaajiniajaajani, cunoori jiyanohua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuaana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu panijajaa, sesa niishiriojiyashijiac nia quiri, taa naatujoori quiyacuaani. Saniniuujia, majaari seetanujuanaa naatujoori niajanijia. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. ²¹ Tariucuaaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquiriojosano Israel pueyacuaani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyaniyia, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuatasariquiaa”.

²² Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiac tojitiniu saniniuujiquiaa na rupaa juucua. Paari saniniuujia tari na rupaa tojitiajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojitiniuria pajaniya nojuaja. Pueyaso sequenu panishano caminiuujishano cutaraari pajaniyara. Cunocuaajaari tama pa rupaajiniajaaja. Cunoori maja Pueyasocua tiuyashijiacara. ²³ Naaratej, Pueyaso pueya maapue rerejosacari, saaja secaja niajanijajinijinio cuaara pocuaara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiac quishacari nia rerejojuajinia, nojori mariqui jiyaniiri: “¡Nio pueyaqui puetunu paatecoorijuhuaanajaj!” ²⁴ Saniniuujia, puetunu niajanijajanaa jaara Pueyaso sequenu panishano caminiuujia tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miiija na quiniuucua. Tama nojuajaarijia niishiniutianiya: “¡Janijiaqui sesa miiija Pueyaso niquiarani!” ²⁵ Nia pohuatasano Pueyasojinijiri puetunu sesa na miishanojuanaa na niishitiniutianiya noojiajia. Nocuaaji, nojuajaari Pueyaso tojijiaara quiniutianiya. Sequenutaniyari: “¡Pueyasoqui seetanujuanaa nia tajinia niya quiya!”

Puetunu nia miirijiana maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyanii cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojitianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu

naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaa-jinia, maninia nia tojiniuria. Naa nia miiri maninia. Niquiriyatujua cuaara pocuara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Niaa jaara niishishoo rupaajinia pocuanu paniri, cuaara pocuara saa querajaa pueyaja, maja socua. Cuaara pocuara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

²⁹ Naajuhuj, niaa jaara Pueyaso Sohuanu niishitiojosano nioojiajinia pohuatanu paniri, cuaara pocuara saa querajaa pueyaja, maja socua. Na nuhuaji, Pueyaso Sohuanu cumaaca jiitianaa cuaara saniniujiuuria nia pohuatasano, nia niishiniuria, cunote seetanujuanaa Pueyaso Sohuanu niishitiojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuaara sanaajeera, na tarajana pocuanura. ³¹ Naacuajitij, puetunu Pueyaso niishitiojosano jiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujuanaari maninia niishitiojosano quiniutianiya, maninia cumaquishanojuhuj, maninia nia miiniuria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacaricuaa. Nia naata cutaraari sashiniu nia pocuanura. ³³ Pa Pueyaso cutaraari maninia miiijajanaa. Maja cushitiojojua. Naarate pueyanaa, maja tamasaca pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴ Maajipohua cuaara sanaa tojtiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojijiaa quiiria, taa pa niishitiojosaaquiiaari Moisés Rootasanojinijicuaajani. ³⁵ Maajipohua jaara niishiniu paniya socua pohuataana niishitiosanojiniji, nojori cuaara nequesotohuara neyaca tama na tiajiniaajaaja, na que maaraja. Cararaatia cutaraari maaji jaara nequesoreetare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiiaari niajanijajiniji. Naajuhuj, majaari Pueyaso rupaa pohuataanaa jiyaramiquiniu quishaaquiiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojtiaquiaa maninia cutara. ³⁷ Niajanijajinijinio, noojiaqueya pueyari Pueyaso Sohuanu cumaaca jiitiaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajanijaniya? ³⁸ Cante nio niishiniu paniyaquiyani, cuno jiyoteeri maja Pueyaso Sohuanu cumaacaraca quiija. Cuno pueyano cuaara tojiyaquishaaria saniniuujia.

³⁹ Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiitianura, pueya niquiara nia pohuatanura Pueyaso Sohuanu niishitishano niajanijaniya. Naajuhuj, majaari nia tenujunu noo pojori, canapuate niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuanaa. Naacuajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

Cristo samiitasacariuhua

¹ Cuarta Jesucristo tiuuniaanaa, Jesucristo rupaa nia niishiriohua, tarijia cua pohuatasano niajaninya, nia jiyanooshaanurani. Niaari nocua tiuquuaari maninia. Niaari quiarijia maninia na tojtiaajaa. ² Naacuajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiaari niajaninyacua-jani. Niaacuajaari Pueyaso pueyara jatanishano quiya niaa jaara maja najuhuana na rupaa tojiyaquiquiaari. ³ Janiyari niaara caminiujuquiaari Jesucristo rupaani, taa cua tojiquiaaricuaani. Nio cutara rupaa nia coteetaquiaari pohuatanunjia: Cristoori pocuara cusoquiaari niyacutesanojinia, sesa pa miiniuucua. Tariucuaaanu Pueyaso sequenu panishano caminiujiuniaari naa naajiotaquiaari, taa Cristo miishaanutaniya naquiyani. Seetanujuanaa naa miishaaquiaariiri. ⁴ Jesucristo cusonu nuhuaji, raaco niasaaquiaariiri. Jiuujianaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuaaanu Pueyaso Rupajaanaa, taa nojuajiniji naajiotasaaquiaaricuaajani. ⁵ Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacu muetaquiaarijiaariuhuj. ⁶ Na nuhuaji, muetaquiaarijihuaj na tojtianaa rerejosaquiri. Socua quiniento pueyari na niqutiaquiaari jiyacari. Queraatia jiyacari na niquniaajinijinio pueyari saminio quiyajaa. Noojiaqueyari tari shaajecocanu. ⁷ Na nuhuaji, pa Jiyaniijiaari Santiagocua muetaquiaarijihuaj. Na nuhuaji, muetanu pacutequiaariuhua na doce jiyaramiquishocoriquiano pueyacuari.

⁸ Puetunu cuno pojori nuhuaji, Jesucristoori socua cucua muetaquiaarijihuaj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. ⁹ ¿Casaaraquitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijia na qutiuniu quiquiaari. ¹⁰ ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarijiacuaajani. Naa quiyanijia Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanoosacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuajaa na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

¹¹ Naacuajitij, naa sequeriquiaa niajanianijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhuj, mariyata taa cuarta Jesucristo jiyaramiquishano pueya pohuataquiaacuani. Majaari rimiajata canaa pohuatasano. Niaari cuno rupaacua tiuquuaari maninia.

Pueyaso muerasu macunucua samiitasacariuhua

¹² Cuarta Jesucristo tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya niajanijinijinio sequequiaani: “Macunucua maja na samiitiaconu quiniutianihua”? ¹³ Macunucua jaara samitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhuj. ¿Cristoteeri macu quiyajaa? ¡Maja! ¹⁴ Cristo jaara macu quiriquiaja, canaa maara najuhuana pohuataa na rupaani. Naajuhuaj, niaa maara najuhuana Jesucristoocua tiuya, na pueya nia quiniu paniniuria juucua. ¹⁵ Canaacuaajaari pohuatanuquiaani Pueyasoori Jesucristo samiitianiquiaariuhua. Macunucua jaara samitianiyaquishaanutaniya taa nia jiyaniquiaacuajani, canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuaana quiri, maja jiyoteeri Pueyaso samiitiani quiquiaariuhua Jesu. Saniniujia,

¡niaari jiyajeneya cutara! ¡Pueyasocuajaari seetanujuanaa Jesu samiitiani quiaariuhua!
¹⁶ Macunucua jaara samiitianiya quishaanutaniya taa nia sequequiaacuajani, Cristo maara samiitia quiaariuhua juhuaj. ¹⁷ Cristo jaara samiitia quiaari, niaa jiyoteeri Cristoocua tiuya najuhanaj, Pueyaso na jiyanootiniuria juucua niajaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhua. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹ Pajaniyajuhua, canapute saminio quiyajaani, paa maara jiyanoohua taraatia quiyani, pueyaracaanu najuhua na quiya pa miishacari mijiria. Jaara naa quiriritij, pa Jiyaniijia Jesucristo jaara macu quiriquiaja, paa maara najuhua na poonijioriquia pa shuquiritiniuria nojuaja juucuan.

²⁰ ¡Namiitia naa quiyaquiyari! ¡Cristoori seetanujuanaa samiitiani sha quiaariuhua! ¡Canaari na niqutiaquiarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiya. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuniaajanaari samiitiani shaanutaniuhua juhuaj. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenaajanaari shaajecoquiaajuhua. Adán nuhuaji, parta pueyano Jesucristoori saniniuujia Pueyaso tojiija quiquiaari cutara. Naacuajitij, nojuajaari samiitia quiaariuhua. Naaratej, puetunu nocua tiuniaajanaari samiitiani shaanutaniuhua, pueyaracaanu saminio pa quiniuhua pa Jiyaniijia. ²³ Pa Jiyaniijia Jesucristoori coteenu samiitia quiaariuhua. Cristo nuhuaji, puetunu nocua tiuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuatenuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jataaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajariuhua. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiiitasano quiriohua, Jesucristoori na Que na niqutionutaniuhua, na Que jiiitanuhua puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanoohua na cumaacata. Naacuajitij, nojuajaari na naata puetunu casaajanaa na tojitaniniu. Nojuajaari Jiyaniijiajanaa. Saa na Que Pueyasojuuari socua Jiyaniijiajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata. ²⁸ Na tucatasacari, pa Jiyaniijia Jesucristoori na Que sequenutaniya: “Cua Quena, tari tucataree quia panishanonijia. Puetunu quia paraajanaa quejoore tarinijia. Majaari socua sesa na miiniu quiniutianiya. Saa quiajanijajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiiitanura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitiani shaanu quiniutianiuhua, ¿casaara pueya tiuquinijosaa quiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquinijosaa quiaa Jesucristoocua pa tiuushacarini, paari miriqui miyani taa pa Jiyani-

ijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuani. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacua-jani, ¿casaara pueya tiuquinijosaaquiaa shusha shaajeno macu niticuaaarini?

³⁰ Paa jaara samiitianiyaquishaanutaniyani taa nia sequequiaacuajani, canaaquiiiri najuhuana tama canaa cuaqueyajaaja panitiaquiaani, pueyaracaanu canaa poonijiosacari pa Jiyaniijiaara. ³¹ Seetanujuanaa nia sequeyanijia, janiyari jiyano-hua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuani.

³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuaani, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuj. Naajaa, pa shaajesacari, pocua puetunu shaajequuej-janaani”. Naa sesa miiquioquiaari noo pojori, canapuate jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuanaatej: “Maninia miijiaari sesa miijiaara jatanishaaree na cojiniuucua sesa miijiaaca”. Naaratej, majaari nia cojiniu sesoriquia pueya, niaa mariqui seserejaariuhuj.

³⁴ Niishiriojuara nia quiri. Sesa nia miiniu nia cartere. Noojiaqueya nijaniyajinijini-oori Pueyaso niishiyashijiaca quiyajaa. Naa nia sequereenijia pueyanaa, quenaaja nia caririquiniuria.

Taamueca pa quiniutianiuhuani pa samiitiasacariuhua

³⁵ Tamonu nijaniyajinijinio naasucuaari niishiriojia: “¿Taa macunucua samiitianijiosaanutaniuhuaajaarani? ¿Taamuecate na cuaqueya quiniutianiyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquiniatejaj. Saa na co moquesacarijia na naata moritianu. ³⁷ Naajuhuj, niaa jaara saaco natate, tamaatia jajaujuhuj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyano-hua tamaatia niquishiyari. ³⁸ Pueyasoori na maashitiya puetunu na jaamasucuatanaa, taa na paniyacuajani. Pueyasoori puetunu jajaujanaa moritianijia tamaatia niquishano na quiniuria. Naa quiniutianiyaajaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. ¿Pa cuaqueyari jiyano-hua maninia quiniutianiuhua!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhuj. Sapitiaaja cuaqueyari tamaatia quiyajuhuj, moojinia na quiniuria. ⁴⁰ Jiyocuaaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹ Naajuhuj, pananuuri jiyano-hua shacantuuca quijia. Raca shacantuucaari tamaatia niquishano pananu shacantuucajiniji. Riya shacantuucaari socua tamaatia niquishano. Naajuhuj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhuj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jyanohua shanohua niquishano na quiniuria. Cumaacaaju jamosanoori samiitianishaanutaniuhua jyanohua cumaacaraca na quiniuria. ⁴⁴ Pa cuaqueya jamosanoori saaja jiyacua rucuanejaca quiquiaari. Paari samiitianishaanutaniuhua tamaatia cuaqueyata, jiyocuacaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanefonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririnij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na samiitianiquiaariiri. Moisés Naajioneejiniaari naa naajiotasaaquiaariti:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jyanohua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijajanaa na Sohuanuta. ⁴⁶ Coteenujanaa pa supuetanani, majaari na shipinishaanu quiquiaari jiyocuacaanu quijarano. Cunora, coteenu pa cuaqueyari saaja mijiria quijara. Na nuhuaji, pa cuaqueyari jiyocuacaanu quijara jatanishaanutaniya mariyata juhua Jesucristo cuaqueyara. ⁴⁷ Adánri saaja mijiria quiriquiano quiquiaari. Marajiniji shipinishaquiaariiri. Jesucristoori saniniuujia jiyocuacaanujinio. ⁴⁸ Puetunu Adáncuajinio supuenojuanaari saaja mijiria quijiaca. Naaratej, puetunu pajaniyajanaari saaja cusonuujacani, juhua pa supuetana Adánjuhuj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiaritia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata Pueyaso rupuenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupuenu. ⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jiitianura, juhua Jesucristo cuaqueyajuhuj. ⁵² Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhuj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jiitianurajuhuj, shaajeyashijiaca pa quiniuria. ⁵³ Cusonuujuua cuaqueya cuara jatanishaaria, rishijia cuaqueya pa jiitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuaaanu sequesanoori tari tohuateeree. Naa naajiotasaaquiaari tariucuaaanu Pueyaso Rupaajinatej:

“¡Jejee! ¡Pa Jiyaniijiaari na muerasu mashiquirii macunucua quiquiojiniji!

⁵⁵ Cusojuananaa, ¡quiaaqui tari shocotasaaree! ¡Quiaari shocotasaaree! Sesaacanaa, quia cusojutajaari juhua mohuacara quiqiii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusonuquiaa sesa miijiaca pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷ Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniuucujaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusonu, quia Niyanu cusonuucua canaacuara, pueyara-caanu canaa quiniuria quia shuriucua. ¡Jiyanhua paacarasho!” Paari naa manini-uhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiojosano nijaniya. Saa Pueyaso rupaja nia tojitiare, maja tamaatia niishitiojosano. Pa Jiyani-ijia nia poonijiore socua jiyanhua, na panishano nia miiniuria saaja. Pa Jiyaniijia nia poonijosanoori maja najuhua na quiniu.

16

Casamijiuniucua Pueyaso pueyara cumaneeca reratesacari

¹ Quiarijiani, nia riucuaereera taa nia miiniutianiyani, cumaneeca nia reratenura casamijiuniucua. Cuno cumaneecani, paari na jiyaronutaniya parta Pueyaso muera-sura Jerusalén tiacajiniani. Niaa cuara maninia miiria, mariyata taa cua rootacanu-cuja Pueyaso pueya maapue Galacia jiyajiniani. ² Naa nia miiritij. Puetunu domingo juucajanaa, puetunu pueyajanaa cuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niqutiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacua. ³ Niocua maninia pueya saquiri-ojore, nia niqutiojosano cumaneeca nojori patanura Jerusalén tiacajinia. Naacua-jitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesucristo tiuuniaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. ⁶⁻⁷ Janiyari maja ritia cua tajiniu paniniu ni-ajaniya. Niaata camueenujunu paniya pueyaracaanunijia, pa Jiyaniijia jaara naa panijuhuj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacuajani. ⁸⁻⁹ Janiyari niya Éfeso tiacajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojtianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanhua socua Jesucristo rupaa pohuatanu panijajaa Éfeso pueya niquiarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaqiri Pueyaso rupaa na pohu-atanura na puereyaquiniutia. Timoteocujaari pa Jiyaniijia poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacure saniniuujia, cucua na tiuquiniuhua shuquiriaatia, maninia nia miiniucua nera. Janiyari niya na sashiya parta Pueyaso muerasutani. ¹² Janiyari Apolota pocoojoriquiaani. Janiyacuajaari na nenecojoriquiaa juucuaani, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesucua tiuuniaanaa, niishiriojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. ¹⁴ Puetunu nia miishanojuanaa cuaara quiiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyara-caanu nojori paniniutia. ¹⁶ Naarate nia sequenu paniyanijia, niajaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasucujani.

¹⁷ Jiyanojua shuquiririucuaanijia Estéfanas tiuquishacari niajanijini Fortumatota, Acaicotajuhua. Nojoriiri cua shuquiririucuaa nia niti, cua jiaatiasacari cua niquini-uria niajaniya juucua. ¹⁸ Nojoriiri coojia cajitiriucuaa puera cua niishiriojiyaquini-ucuaaji niaacua. Nojori naasucuaari nioojia cajitiquianujuhua, nojori pohuatasacari niajaniya janiyajiniji. Niajaniya cuaara shuquiritiaara nojori, naa nojori miishacari maninatej.

¹⁹ Pueyaso muerasu maapue niya Asia jiyajiniaari cua sequerucuaa, cua saruhuata-nura niajaniya. Aquila, Priscilano, nojoriiri jiyanojua nia saruhuataajuhua, narta Jiyaniijia muerasu nia quiniucuaajuhua. Pueyaso pueya maanuuri nia saruhuataa-juhua, noj, teyanote Aquila tiajinia rerejoquiaacujani. ²⁰ Puetunu parta Pueyaso muerasujuanaari niya nia saruhuataajuhua. Nia sarhuatatoosacari, nia saruhuata-toore seetanujuanaa Pueyaso paniniutia.

²¹ Quiarijiani, tama cua juaashiquiataaja saaja nioniyojua naajioreeraj, cua saruhu-atanura niajaniya. Naacuajitij, niocua niishiri nio naajioneeri seetanujuanaa janiya-jiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitioso-coriquiano.

¡Jiyaniijianaa, quia nimiohua!

²³ Pa Jiyaniijia Jesu cuaara cumaquiiria niajaniya na Sohuanuta. ²⁴ Janiyari puetunu niajanijanaa paniyani Jesucristo paniniutia. Tariucuaaja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio ni-aacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojitiajaca pueyacuarajanaanio. ² Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. ⁴ Nojuajaari pueyaracaanu pa cumanijaquiaa naquiya pa miishacari. Naacuajiti pa naata cumanijianu tamasacajuhuj, naquiya nojori miishacari, taa Pueyaso cumanijaquiaa pajaniyacuaani. ⁵ Seetanujuanaa, Cristo rupuejaca pa quishacari, paari naquiya miishaaquiaa-juhuaj, taa naquiya na miishaaquiaaricuaani. Naajaa, nojuajaari pa cumanijaquiaa shuquiriaatia pa quiniuria. ⁶ Naacuajitij, canaa jaara naquiya miishaaquiaa Cristojiniji canaa pohuatanuucuaani, Pueyasoori canaa cumaquiquiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuhuj. Naajuhuj, Pueyaso jaara canaa cumanijiarecuaa, naacuajitij, canaa naata nia cumanijianujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. ⁷ Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucujuhuj, taa canaa miiquiaa naquiyacuaani. Naacuajitij, Pueyasoori nia cumanijianutaniyajuhuj, taa na cumanijaquiaa canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaacquianuni, jyanohua naquiya canaa miishacari Asia jiyajinia. Canaari puera jyanohua taraatia miiquianuni. Jiyacari, majaari tari canaa jiitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. ⁹ Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samiitianijiojua. ¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secojorejuhuaj. ¹¹ Naacuajitij, Pueyaso miishacari maninia canaa, queraatia pueya secojonuucua canaacuarajuhuj, queraatia pueyari Pueyaso sequenutaniya, “paacarasho”.

Pablo pohuatasano casaara na quiaaquiquiaari Corinto pueyacuani

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca niquiaranio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jiyatenuucua canaa nia panijica canaa quiniuria. Canaari naa maninia

quiquiaari niaatani, saaja Pueyaso cumaquishacari canaa, maja tama canaa niishitiajataaja. ¹³ Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajiniajanaa majaari canaa naajionu quiquiaa jiyajeneta casaa, nia cushitiiniuria. Puetunujuanaacuajaari maatia niishishaatia quiquiaa nia serojosocoriquiano. ¹⁴ Niaacuajaari tari secaja niishiya taa canaa paniya jiyanoehua niajanianu. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuaaj, niajanianu canaa timitiasano quiniutianiyajuhuaaj.

¹⁵⁻¹⁶ Cua jiyaniishacari niaa naasucuaari seetanujuanaa cua panijiaca, taa cua paniquiaa niajanianuacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niqiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuaaj, cua tacatesacariuhua cunocojihua. Janiyari niishiriojoriquiaani nia naata naasucua cua naacunu cua panishanotajuhuaaj, Judea jiyajinia cua quianuhuaara. ¹⁷ ¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari niajanianu. ¹⁸ ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹ Naajuhuaaj, Neyanu Jesucristoori jataashijia. Silvano, Timoteo, janiyajuhuaaj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaaanaa cutara. ²⁰ Jesucristocuajaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequesano, Pueysonaa”. ²¹ Jesucristo rupuejaca pa quishacari, Pueyasocuajaari pa cumaquiquiaa, socua maninia na tojijiaca canaa quiniuria, niajanianu. Pueyasoori pa niqitioquiaari na Sohuanu, seetanujuanaa na muerasu pa quiniuria. ²² Pueyaso Sohuanu pa jiiitiasacari poojiajinia, naacuajitij, paari tari Pueyaso sesa jiiitaa juhua naajiotasano poojiajiniani, saa neraja pa quiniuria. Na Sohuanu pa jiiitiasacari poojiajinia, paari niishiyani, paari puetunu na sequesanojuanaa maseriquianoni.

²³ Niaari cua jiyaniquianu janiyari najuhuaana coojia niqijiotejani, niaacua cua quiaaquiniuucua taa cua sequecanu coteenu niajanianuacuaani. Pueyasocuajaari niishiya, majaari cua quianu quiquianu niaacua Corinto tiacajinia, maja cua tacaatiniuria niajanianu, janiya jaara nia nacasusee jiyanoehuaani. ²⁴ Canaari maja nia jiyaniijiani canaa shiniuuniuria puera niajanianu, Jesuucua nia tiuuniuria. Niaacuajaari tari maninia Jesuucua tiuujia. Canaari saaja niarta Pueyaso pueyani, canaa cumaquiniuria niajanianu, socua pa Jiyaniijia tojijiaca nia quiniuria, seetanujuanaa shuquiriaatia quijiaca nia quiniuria.

2

¹ Janiyari tama sequecanujuanijia, maja juhuari niaacua cua quianu quiniutianiya, maja cua taraajetenura niajanianu. ² Janiya jaara nia taraajetere cua nacasusacari niajanianu, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³ Naaratej, janiyari niaacuara naajiocanuni, cua nacasunura

juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanoohua nia taraajetereni, jecatoojua nia quishacari. Saniniuujia, niaa jaara juhuacarijia jecare puetunu sesa nia miishanojuanaa, naacujitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqiu. ⁴ Janiya jaara niaacuara naajiocanu coteenu cua naajioneeni, janiyari jiyacari jiyanoohua tacaariquiaa niaacuani. Coojiaari jiyanoohua taraajeriquiaa. Janiyari jiyacari nujuqueriquiaajaa-niuhuj. Majaari cua naajionu quiquianu cuno naajionees cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jiyanoohua niajaniyani.

Cuno sesa miijia cuaara jiyanooshaaria jaara tari pishirii sesa na miiniuujiniji

⁵ Cuno sesa miijiaari maja na taraajetenu quiquianu saa janiyaja. Quera puetunu niajaniyajanaa naasucuaari taraajecanu cuno pueyano miiniuucua sesa. Seetanujua-naa, majaari puetunu niajaniyajanaa taraajenu quiquianu. Janiya jaara sequereni: “Puetunu niajaniyajanaari taraajecanu”, janiya maara puera na maateyani. ⁶ Puetunu niajaniyajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniuujiniji. Tariucujaja. Majaari socua na saniitionu. ⁷ Quiarijiani nojuaja nia jiyanooriohua. Nia cumanijiarohua, nojuaja mariqui puera tacaariiri jiyanoohua na taraajesacari. ⁸ Nocujaji janiyari jiyanoohua nia rootaani, maninia nia miiriohua cuno pueyano, na niishiniuria niaaqui na paniyajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojitiyajaca. ¹⁰ Cua tojitiare, cana nia jiyanooriicuaani, janiyari na jiyanooyajuhuj. Naacujitij, pueyano jaara sesa miiriquia, janiyari Cristo niqiuara na jiyanooquiaajuhuj, jatiqiu nia quiniuhua. ¹¹ Naaratej, niarta Pueyaso pueya nia jiyanooriquia, Sesaaca mariqui pocua riutiocoreeri, juaajiara na jiyatenura pajaniya, pa jiyanoootioyaquiniuucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanooy-ashijia quiriqiuani.

Pablo tacaashacari Troas tiacajinia na quishacari

¹² Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanoohua tojtianu paniriquiaa Jesujiniji cua pohuatanura juucua. Jiyacaritij, seetanujuanaa nojori niqiuara pohuatasatia quiriquiaari. Pa Jiyaniijia Jesuuri juhua tiotiu riatacanu cucujaji juucua, cua pohuatanura nojuajiniji tii. ¹³ Janiyari saaja nojori tiujiacanuhuanu puera cua tacaashacari, cua riuriataaquiniuucua pa tarajanu Tito. Janiyari juucua paniriquiaani cua pohuatasaanura niajaniyajiniji. Janiyari cunora tacaariquiaa jiyanoohuani. Naaratej, janiyari Macedonia jiyajinia quiaarohuani, Tito cua pajenuhuara tii.

Pa Jiyaniijia Cristoori pa paraa pa shocotaniijia

¹⁴ Janiyari jiyanoohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacujitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiqiyocujajanaa. ¹⁵ Pueyasora, canaari juhua shanohua jaanutajani, Cristo quishacari canaa jiuujajinia. Nojuajiniji canaa pohuatanuusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyarano. ¹⁶ Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara

jiyatesaanutaniya. ¿Canapueeteeri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuari? ¹⁷ ¿Noo pojoritii, najuhuaana Pueyaso rupaa pohuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niquiarani, Cristo rupuesano canaa quishacari.

3

Quiarinio rupaa Jesucristojiniji

¹ Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu niajaniya, canaacua nia tiuuniuria cutara? Tamasaca cutaraari naa miiquiaa. Ni-aacuaajaari canaa niishijaca cutara. Puetunu tiqiyocuajanaa quijiaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. ² ¿Naajioneetucua casaara panishaareni? Puetunu pueyajanaari na naata niishiniucuaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua niajaniani. ³ Cristocuaajaari nioojiajinia naajiotaquiaari na rupaa, nojuajiniji canaa pohuatanuucua nia niquiarara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaari-iri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajaari niishiya niaari seetanujuanaa Pueyaso pueya, nojuajiniji canaa pohuatanuucua niajaniya.

⁴ Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuaajaari naa canaa niishitiquiaa maninia. ⁵ Majaari canaa niishiriojonu canaa miijosanoori tama canaa cumaacata canaa miishanojuaaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuatanana canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. ⁷ Naajaa, cuno rootasano saajianeecaacua quejasanoni, cunoori jiyanohua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucuaari nocua pacuriquiaa. Naacuajitij, na rosesacariuhua Israel pueyacu, na jiquiocoori puera shacantuuca quiquiaarijia. Naaratej, narta Israel pueyari maja na naata na jiquioco niqiniu quiquiaari. Na nuhuaji, cuno shacantuucuaari jacaria maquesaquiaariuhua. ⁸ Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiacua quiquiaari. Saniniuujia, quiarijiaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatanana na

quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanoohua maninia rupaa canaa pohuatanura Moisés pohuatasanojiniji. ¹¹ Moisés shacantuuca maquesaquiaariuhuanani, cunoori maja na jataniniu quiquiaari Israel pueya. Quiaritia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

¹² Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miiquiaaricuaani. Nojuajaari quenaaruke toqueta na jiquioco mishiquioquiaari narta Israel pueya niquiyaquiniuria na shacantuuca maquesaano. ¹⁴ Israel pueya jiuujiacaari juhua toqueta mishiquiosano quiquiaarijiuhuj. Cumajiuujiaaca nojori quiniucua, majaari Israel pueya niishiniu quijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiaritiaari naajuhuj. Moisés naajioneeca jaara serojosaariquia Israel pueya niquiara, nojori niishitiajaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijaacua tiuuri, cuno toqueeri juhua na niishitiajajiniji jaariutiasaaciaa, maninia na niishiniuria Pueyaso Rupaa. ¹⁷ Pa Jiyaniijaari Pueyaso Sohuanujuhanajaj. Pa Jiyaniija Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. ¹⁸ Naacujitij, puetunu pajaniyajanaari juhua niquitiu nenecuaquiaani, pa Jiyaniija shacantuuca pacusacari pocua. Cunoori pa sohuanu rupetoosacari nata. Naacujitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijosacari poojiajinia.

4

¹ Naa pa Jiyaniija poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniucua canaa, nojuajaari canaa jiyatequiaari na rupaa pohuataanaa canaa quiniuria. ² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. ⁴ Pueyaso rupaacua tiuyashijiaca nojori quishacari, nojori jiyaniija Sesaacaari nojori jiuujia jiyatequiaa juhua cariyoyuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quijia cutara, juhua na Que Pueyasojuhuj. ⁵ Canaa pohuatasacari Pueyaso rupaa niajaniya, majaari tama canaajinijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijaajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniija Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaraa coretaara ninishiquiji”.

Quiariijaari naajuhuaaj, nojuajaari poojia cuhuataquiaajuhuaaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniuucua.

Paari maninia quijiaca quiniutianiyani saaja Pueyaso rupaacua pa tiuushacari

⁷ Cuno cumaaca canaa na jiiitiaani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua maraujiniiji panishano pataco. Naacua-jiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸ Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiiitiasacari. Jiyanoohua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaquiaaaniuhuaaj. Naajaa, majaari Pueyaso cartenu quiquiaa canaa. Naajuhuaaj, canaari juhua quiaquesano jiy-ocudara jaqueroosaaquiaaaniuhuaaj. Naajaa, majaari canaa cusojuasaanu quiquiaani. ¹⁰ Puetunu tiquiyocujanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niquitiosano cumaaca poonijosacari canaa rishiyashijiaca cuaqueyajinia, pueyari niishiquiaa, Jesuuri seetanujuanaa saminio. ¹¹ Mijiria canaa quishacariija, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminio na jiiitiasacari canaa, Jesu cumaa-caari niquishaaquiaa rishiyashijia canaa cuaqueyajinia. ¹² Canaari juhua piriuquiuni-uuquiaani, canaa pohuatanuucua Pueyaso rupaa nia niquiara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

¹³ Tariucuaaanu Pueyaso Rupaajinia, supuetana David naajiotasanoori naa se-queya:

“Pueyasooocua cua tiuuniuucua, janiyari pocuareeni”.

Canaari naajuhuaaj. Pueyasooocua canaa tiuuniuucua, canaari na rupaa pohu-ataquiaani. ¹⁴ Canaa jaara puecoosaariquia na rupaa canaa pohuatanuucuaani, naajaa. Canaacuajaari niishiyani, pa Jiyaniijia Jesu Samiitianiniacuajaari canaa samiitiani-jionutaniuhuaajuhuaaj, Neyanu Jesu rupuesano canaa quiniuucua. Pueyasoori canaa rijionutaniya puetunu niajanijatajanaa, pueyaracaanu na shuriucua pa quiniuria. ¹⁵ Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucuaani, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua niajanijacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanoohua shuquiritiasaanu-taniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaque-yari saaquianoshiya. Naajaa, canaa jiuujiaari saniniuujia puetunu juucujanaa socua mashajashiyacujua. ¹⁷ Janiyara, puetunu naquiya canaa miishacarijianaa mijiria, cunoori secaja, rupaquijiajuhuaaj. Cuno naquiya miiniu canaa rejeretanuucua, ¡Pueya-soori cunora jiyanoohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiacaa canaa quiniuria. ¹⁸ Naaratej, majaari canaa jiaatianu quiquiaa canaa jiiitianura mijiria canaa niquishano casaa. Canaa cutaraari Pueyaso jiiitiasano niquishoo casaacua jiaatiaquiaani. Mijiria niquis-hano casaari saaja shaajeja casaa. Pueyaso jiiitiasano pa niquishoo casaa saniniunijia, cuno cutaraari shaajeyashijia.

5

¹ Mijiria pa quishacariija, nio pa cuaqueyari saaja juhua suhuorotu quiya pa sohua-nura, nareja juhua rucoonaa pa quishacari mijiria. Mijiria pa jiiitiasano pa shoque

jaara cusoquee, paacuaajaari niishiyani, paari tari jiitiaa tamonu cuaqueya jiyocua-caanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohanu quiqiora. Cunoori maja pueyano shipinishano. ² Mijiria canaa quishacarijia nio canaa sohanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohanu pacusaanura jiyocuacaanu. Tii quiyacuajaari canaa sohanuucujaji tiasano quiquio. ³ Canaari cuno quiarinio cuaqueya cushiyonutianiya juhua toqueni, maja juhuasu canaa sohanu quiniuria. ⁴ Nio cuaqueyajiniaja canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhua-sunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacuajitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasajuanaacuaajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohanu, pa niishiniuria nojuajaari seetanujuanaa naa pa miiniutianiya.

⁶ Naa canaa niishishacaritij, majaari canaa tacaaniu quiquiaa. Canaacuaajaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacuajitij, paari tucuacaanu quiyajaani pueyaracaanu pa quijiarano quiqiojiniji. ⁷ Cunora, mijiria canaa quishacarijia, majaari canaa quiniu tama canaa niishitijatajaaja. Canaa cutaraari canaa Jiyaniijiaacua canaa tiuuniutia quiquiaani. ⁸ Naacuajitij, canaari shuquiriaatia quiya mijiriani, nocua canaa tiushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹ Naacuajitij, canaa jaara nio cuaqueyajinia quiyajaa mijiriani, naajuhua canaa jaara na cartequeni, canaari saaja pa Jiyaniijia shuqiritiniuucua jiaatiaani. ¹⁰ Puetunu pajaniyajanaacuaajaari Jesucristo tacoji na nequesoreesaqui nujuatejosaariquianoni. Cuniqiu, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

Pueyasoori pueya jiyanooni panijia cutara

¹¹ Naaratej, canaa niishishacari jiyanoohua puereeta quiniutianiyari pa Jiyaniijia saniitiosacari na tojitiaashijiaca, canaari cunora saniniuuiuquiaa pueya tojitiniuria Pueyaso Rupaani. Pueyasocuaajaari niishiya canaari seetanujuanaa nera poonijion-aani. ¡Seetanujuanaa naa nia niishitiriquiajaaniuhua! ¹² Majaari nia jiyaniiniu canaari tama canaajiniijiaaja nia pohuatanu coteerohuanuhua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canacuajaji, cuno pojori canapuate sapuenu juhua maninia quiijiaa niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. ¹³ Noojiaqueya niajanijiniinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriqiani, canaari naa quiya niaarani, maninia canaa niishitiojonura niajaniya. ¹⁴ Cristo paniniuucua canaa, cuno na paniniuuri canaa shiniuuiuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canacuajaari niishiyani, nojuajaari puetunu pueyacuarajanaa cusoquiaari. Naa na cusuucua puetunu pueya nitijianaatej, Pueyasora, puetunu pueyajanaari tari cusuucuaaria Cristota. Naacuajitij, Pueyasoori na naata jiyanooni puetunu Neyanuucua tiuniaajanaa. ¹⁵ Cristocuaajaari puetunu pueyacuarajanaa

cusoquiaari, na samiitianishano pueya quiniuria saa neraja. Pocuara cusoquiaari-iri. Nojuajaari pocuara samiitiaquiaariuhajuhuaaj. Naaratej, paa cuaara miiria saa na panishanojua. Majaari socua pa miiniu tama pa panishanojuaaja. ¹⁶ Tarijia, canaari saaja canaa panishano pueyacua taraajejani. Quiarjia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyanjiani nojuaja naasucuaari nareja pueyano, juhua pajaniyajuhuaaj. Quiarjia cutara, majaari naa canaa niishiriojonu nojuajiniji. ¹⁷ Naajuhuaaj, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatanocuaaja. Saniniuujia, puetunujuanaari quiarinio quiya.

¹⁸ Puetunu cunोजनाari Pueyaso miishano. Nojuajaari Neyanu Cristo cusojuaquiaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurajuhuaaj. ¹⁹ Naacuajitij, Pueyasoori mijiria quiniaa jiyanooquiaa saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaari canaa jiyatequiaari na rupaa pohuatanaa canaa quiniuria, pueya canaa tiutiniuria Neyanu Jesucristoocua, jiyanooshano nojori quiniurajuhuaaj. ²⁰ Naacuajitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiu-jiushacari Jesucristo rupaatej, Pueyasोजनाari nia masuya na muerasu nia quiniuria, Neyanuucua nia tiushacari. Naacuajitij, canaari Cristo niti nia secojiyani, itama nia cuaqueyajaaja nia jyanootiri Pueyaso! ²¹ Pa Jiyaniijiarano Jesucristoni, nojuajaari tojetaarucujanaa sesa miyashijajuhuanaj. Naajaa, na Que Pueyasoori nocua tiuti- aquiaari puetunu sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiushacari, Pueyasoori pa jiyatequiaa juhua sesa miyashijia pa quini-uria.

6

¹ Naa Pueyasora poonijionaa canaa quiniuucuatej, canaari jyanohua nia secojiyani cuarta Pueyaso muerasunaa, saa Pueyasoraja nia quiri, nia jyanoojia na quiniuucua. Maninia na muerasu nia quiri. ² Tariucuaaanu na sequesano cuajaari naa naajio- tasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacaricuaa, janiyari quia naacucanujuhuaaj”.

Cua panishano pueyanaa, quiarjiaari Pueyaso jiyanooshacari pueya. Nojuajaari quiarjia pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojuaquiaani, maja canaa miini-uria sesa tamasaca niqiara. Canaari naa maninia miiquiaani, nojori mariqui Je- sucristoocua tiyaquiriiri, nojori mariqui Pueyasora canaa poonijosano sesacare- jaariuhuaaj. ⁴ Canaa cutaraari saaja maninia miiquiaa pueya niqiarani, puetunu pueya niishiniurajanaa canaari seetanujanaa Pueyasora poonijionaani. Naaratej, canaari juhujaniya rejeretaquiaa naquiya canaa miiniuni, canaa panishano canaa jiitiaaquishacarijuhuaaj. Naajuhuaaj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. ⁵ Naajuhuaaj, canaari juhua- janiya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaaaniuhuaaj. Nasojosano pueya jaara miitianu paniquiaa canaani, canaari na rejeretaquiaajuhuaaj, pueya tiuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jyanohua poonijioquiaa nerani. Canaari sequeyarucua sutequiaani. Canaari miaajequiaajuhuaaj. ⁶ Naajuhuaaj, pueyari na naata niishiniu canaari seetanujanaa Pueyaso seyani, sesa miyashijiaa canaa quiniuucua, maninia canaa niishiniuucua Pueyaso rupaajuhuaaj. Niishishaa- tiacuajaari, canaari Pueyaso seyani, jacaria pocuajaca canaa quishacari juaajiaa

pueyata, naajuhuj, maninia canaa miishacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. ⁷ Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiyatequiaa canaacuajini. ⁸ Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuj, noojiaqueya pueyari maninia pohuatanuquiaa tamasaca niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonujuacatani. Tamasacaari saniniuujia maninia tojitiaquiaa canaa, seetanu rupaajanaa canaa pohuatasacari. ⁹ Noojiaqueya pueyari canaa niquiquiaa juhua najuhua quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaquiaani. Naajaa, canaari saminio quiyajaani. Canaari jiyanoohua miitiasaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucujuhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiitiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanoohua niajaniya. Niajaniya sajaraj, majaari nia paniniu canaa, taa canaa paniya niajanuyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanuunu! Seetanujuanaa canaa nia paniri, taa canaa paniquiaa niajanuyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijiatu na quishacari? Maja. Cua riucureto pueyanaa. ¿Cuhuashiqui quijiateeri na naata juhujaniya jatiqui quiniu ninishiqui quijiatu? Maja na naata. ¹⁵ Seetanujuanaa pueyanaa, Cristoori maja Sesaaca rupuena. Naajuhuj, Pueyasocua tiuujia pueyanoori maja na naata maninia rupuetoonu Pueyasocua tiuyashijia pueyanota. ¹⁶ Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanojuajaari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijiajanaa quiniutianiyani. Nojoriiri cua pueya quiniutianiyacujua”.

¹⁷ Cunora, pa Jiyaniijiaari na pueya sequeya:

“¡Cua tojitiaashijiaca pueya tajiniji nia pacure! Nia shiriquiri tamocora nojoriicujia. Majaari sesa casaa nia saniniu paniniu. Niaa jaara cua tojijiaca quiri, janiyari nia jiyatenutaniya quirianoni. ¹⁸ Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

7

¹ Naacuajiti canaa panishano pueyanaa, paacuaajaari naa seetanujuanaa pa Jiyaniijia sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuusho-josano pa quiniuria sesa pa miishanota. Pueyaso puerejaca pa quiriquia, tojetaarucua-janaa sesa miyashijiaca pa quiniuria, saa neraja pa quiniuriajuhuaj.

Corinto pueya tacatosacari nojori jiuujia, maninia nojori quiniuhuara

² Pueyanaa, ¿taa nia miiquianuni? ¡Canaa panijiaca nia quiriohua! Majaari canaa miiniu quiquianu sesa niajaniya. Majaari quenaaja niquiriyatu niajanijajiniinio canaa sesonu quiquianu canaa niishitiojosanota. Majaari canaa sapojonu quiija niajaniya.

³ Naa cua sequesacari niajanijatej, majaari cua sequenu cua cararonura niajaniya. Janiyacuajaari tari nia sequereeni, canaari jiyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua niajanijani, seetanujuanaa Pueyaso muerasu nia quiniuria. Naacuajitij, niaa jaara shaa-jerejuhuaj, paari pueyaracaanu jatiqui quijiaca quiniutianiya Pueyasotani. ⁴ Janiyari seetanujuanaa naa nia sequeyani cua panishacari niajaniya. Quiarijiani, janiyari jiyanohua nia timitiaani, maninia cua tojiniuucua niajanijajiniji. Canaari seetanujuanaa naquiya miiquiaani. Naajaa, maninia canaa tojiniuushacari niajanijajiniji, cunoori cua cumanijiacanu. Cunora, janiyari jiyanohua nia shuquiritiaani.

⁵ Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasocua tiuyashijiacaari canaa juaariquiaa. Canaa jiuujiaari niaacua tacaariquiaa saniniuujia. ⁶ Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocuaajaari tacaajiaca cumanijiana! ⁷ Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu niajanijajiniji jiyanohua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jiyanohua nia taraajetenuucua janiya. Niaanaari cucua tacaya jiyanohua, cua rootasano tojijiaca nia quiniuria quiarijia cutara. Naa cua tojishacari niaacuajitij, janiyari jiyanohua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua niajanijatej. Quiarijia cutaraari maja cua taraajenu. Cua naajioneecuajaari saaja rupaquijia nia taraajocanu. ⁹ Quiarijiani, ¡shuquiriaatia quiyanijia! Majaari nia jyaniniu janiyari shuquiriaatia quiyani naa cua taraajonuucua niajanijatej. Shuquiriaatia quiya cutaranijia, cua niishishacari, naa cua taraajonuucua niajanijatej, niaari nioojia tacatorhuacuaa Pueyasocua, Pueyaso tojitiajaca nia quiniuhuara. Naacuajitij, janiyari quiarijia niishiyani, majaquiiri cua sesonu quiquianu niajaniya, naa cua taraajonuucua niajanijatej. Pueyasocuaajaquiiri maninia poonijioriquiaa nioojiacajinia, naa nia taraajesacaritij. ¹⁰ Pueyasajuanaa jaara pa taraajetere, cunoori maninia, poojia pa tacatonuhuara nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. ¹¹ Nia taraajesacari cua nacasusacari niajanijaniya cua naajioneejiniani, cunoori seetanujuanaa Pueyaso taraajetesano quiquianu niajaniya. Naa nia taraajenuucuatej, nia niquishuriirijaj, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miiija. Niaari na naaqui puerecanujuhuaj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano niajaniya. Naacuajitij, niaari ritia cuno sesa miiija taanuucanu nia tajiniji, maja socua nia rupuesano na quiniuria. Naa

nia miiniuucua puetunu maniniajanaatej, janiyari quiarjia niishiyani, majaquiiri nia maniniucuanu quiquianu naa sacuaraatia cuno pueyano miishanotej. ¹² Pueyanaa, niaari maninia canaa tojjiaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niqiara: niaacuajaari seetanujuanaa canaa panijaca quiyajaa, nia tojishacari canaa. ¹³ Naaratej, canaari canaa jiuujia cajitiquianuni, canaa tojishacari Tito pohuatasano niajanijini.

Majaari saaja Tito pohuatasano cumanijianu quiquianu canaa. Canaari Tito timi-tiicanujuhuj, canaa niquishacari nojuajaari shuquiriaatia tiuquiriohua canaacua. Puetunu niajanijanaari na naacucanu, noojia na cajitiniuhuara, najuhuana na taca-niuucua niaacuajuhuj. ¹⁴ Tito quiaaquishacari niaacuara, janiyacuaajaari juhuacarijia na pohuatacanu niajanijinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu niajanijini. Puetunu cua pohuatasanojuanaa Tito niajanijini seetanujuanaa quiquianu Titora. Naajuhuj, puetunu cua pohuatasano niajanijanaari pueyara-caanu seetanu rupaajanaa quijia. ¹⁵ Quiarjia Tito niishiriojosacari niajanija, nojuajaari socua jyanohua nia panijia quiya, nia tojiniuucua maninia nojuaja. Niaacuajaari tetecatucanu nia puerenuta na tiuquishacari niaacuara. Majaari nia rerequetenu quiquianu nojuaja. ¹⁶ Janiyajuhuj, jyanohua shuquiriaatia quiyanijia, cua niishacari quiarjia cutara cua naata niaacuara tiuuni seetanujuanaa.

8

Capora pa quiriqiaj

¹ Quiarjiani pueyanaa, canaari nia pohuatanu paniyani, taa Pueyaso cumaquiya jyanohua na muerasu maapue niya Macedonia jiyajiniani. ² Nojoriiri jyanohua taraatia miiquioquiaa. Naajaa, nojoriiri saaja jyanohua shuquiriaatia quiya. Naajuhuj, casamijuniucua nojori quishacari, naajaa, nojoriiri caporatujuri. Nojoriiri na cumaneecajiniji nareja niqutiojoquiaa queraatia, Judea jiyajinia casamijuniucua Pueyaso pueyara. Nojori niqutiojosanoori juhua casamiriaca pueya niqutiojosano. ³ Seetanujuanaa narta Pueyaso pueyacuara nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jiiatasano cumaneecajanaa niqutiojonucanu. Naacuajitij, janiyari jyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano niajanija. Janiyacuajaari nojori miishano niqutiniani. ⁴ Niya Macedonia jiyajinia quiniaa parta Pueyaso pueyani, nojoriiri niajanijini tojiquianu. Niaanaari cumaneeca reratenu paniriquiaacuara, nia jiyaroscoriguiano Judea jiyajinia quiniaa casamijuniucua parta Pueyaso pueyara. Naaratej, nojoriiri jyanohua canaa nenecojocanu canaa masenura nojori niqutiojonu panishano cumaneecajuhuj, parta Pueyaso muerasura. ⁵ Seetanujuanaa Pueyaso tojjiaca nojori quiniuucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijara, taa Pueyaso panija pa miiniuriacuajani. Naajuhuj, nojoriiri tama na cuaqueyajaaja jiyatecanu canaa tojjiaca nojori quiniurajuhuj. Cunora, canaari nojoriicuaji jiuujiatecanuni. ⁶ Naa capora niqutiojonaa nojori quiniuucuatej, canaari Tito sequerucuaani, niaacuara na quienuhuara quiarjia. Nojuacuajaari tarijia naacucanu niajanija, nia reratenura nia niqutiojonu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuara, nia tucatanura reratenu puetunu nia niqutiojonu panishano cumaneecajanaa. ⁷ Nijaniya,

Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasocua tiuujiaa jiyanoehua. Naajuhuaaj, niaari jiyanoehua maninia Pueyaso rupaa niishitiojonuujuaa. Niaari Pueyaso niishitiaja jiiitiaajuhuaaj. Niaari mariyata shitimia poonijionuujuaa, tamasa nia naacunura. Naajuhuaaj, niaari canaa panijiaa jiyanoehua. Naatej, taa maninia miijiacatucua niajaniani, capora nia quirijihuaaj, nia cumaneeca nia niqutiojonura nareja parta Pueyaso pueyara.

⁸ Majaari juhua nia jiyaniijia cua sequenu niajaniani, nia cumaneeca cua niqutiojotenura niajaniani. Janiyari nareja nia pohuatariquiaa capora Macedonia pueyajini-jini, tama nia niishiniuriajaaja, niaate seetanujuanaa canaa panijiacajuhuaaj, taa Macedonia jiyajiniinio pueya paniya canaacuaani. ⁹ Niaacuajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu maninia casaajanaa jiiitiaja quiquiaari. Naajaa, nojuajaari juhua casamiijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jiyanoehua shuquiriaatia quijiaa na jiyatenura pajaniya, juhua jiyanoehua queraatia casamiriaca pueya pa quiniuria. Naa jaara seetanujuanaa panijiaa quiriquia, naa nia miirijihuaaj, taa pa Jiyaniijia miiquiaaricuaani.

¹⁰ Janiyari niishiriojoriquiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniuriajuhuaaj. Cua tojiri. Niaacuajaari niishiya, noo marijara pa shococantej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarijiaaja niarta Pueyaso pueyacu. ¹¹ Niaari shitimia juhuacatecara nia cumaneeca niqutiojonu coteecanucua. Naaratej, quiarijia nia sequeyanijia, niaa cuara naa shitimia niqutiojonu tucataara puetunu nia niqutionu panishano cumaneecajanaa. Naa jiiitasano cumaneecajiniji nia niqutiojore, taa cumaneeca nia niqutionu paniyacuajani. ¹² Naa tojiri. Paa jaara seetanujuanaa nareja niqutionu paniriquia pa cumaneecajinijini, Pueyasoori pa niqutiosano shuquiritiaja, paa jaara juhua capora niqutiojore pa jiiitasanojinijini. Maja cutaraari Pueyaso paniniu pa niqutionura, pa jaara na jiiitiaaquiyani.

¹³ Majaari Pueyaso paniniu cutara puera nia niqutiojonura nia cumaneeca, tamasa quiniuria casamiriaca, saniniuujia nia jiiitiaaquiniuria nia panishano. ¹⁴ Maninia cutaraari puetunu Pueyaso muerasujuanaa jiiitanura na panishano. Naaratej, quiarijiani, niaa cuara niqutiojore nia jiiitasanojiniji, nojori jiiitanura na panishanojuhuaaj. Tamacari saniniuujia, nojoriiri saniniuujia nia jiiitiaaquishoo casa nia niqutionutaniyacujua, niaa jaara na jiiitiaquiri. Naacuajitij, puetunu Pueyaso muerasujuanaari na panishano jiiitanutaniya mariyata, maja rimiajata. ¹⁵ Naajuhuaaj, tariucuaanu Pueyaso Rupajiniani, jiyocuaanu Pueyaso tinishano Israel pueya miaquesocoriquiano panjiniiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuaaj, cante secaja reratequiaarini, majaari nojoriria na pueetanu quiquiaari”. Naaratej, Pueyasocua tiuujiaa nia quiri. Naa jiiitasanojiniji nia niqutiojore nareja, nia jamueyaquiniutia.

Pablo pohuatasano Titojiniji, Tito cojiniaajinijinio

¹⁶ Titoori jiyanoehua niaacua jiaatiaja, taa cua jiaatiaa niaacuacuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” ¹⁷ Naacuajitij, janiya jaara Tito sequerucuaani nia niquniucua na quianura, nojuajaari cua timitiriucuaa. Tama nojuajaarijia nia niquniucua jiaatiaa. Naacuajitij, nojuajaari quiarijia quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritasano pueyano, maninia na pohuatanucua pa Jiyaniijia Jesucristojiniji. ¹⁹ Macedonia jiyajinia quiniaa

Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuj. ²⁰ Maniniacuajaari parta Pueyaso pueya maapue saquiriojosano pueyano quianura canaata. Naacuaajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenuaniyani. ²¹ Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

²² Quiarijiani, niaacua canaa jiyarosocoriquiano pueyata, canaari niiquijinio tamonu parta Pueyaso pueyano jiyaronutaniyani. Pueyaracaanu na poonijosacari pa Jiyaniijia, janiyajanaari na niquiquianuni. Nojuajaari seetanujanaa pueya panijia, Pueyaso panijia na quiniuucua. Quiarijia cutara, seetanujanaa niaacua na tiuushacari, janiyari niishiyani, nojuajaari jiyanojua maninia Pueyaso pueyano. ²³ Tamonu jaara nia nequesotare cante Titoni, niocua na riuquare: “Nojuacuajaari Pablota poonijona, na cumaquiniuria pajaniya”. Naajuhuj, Tito cojiniaari niiquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maniniuhuaqueetasano, maninia na tojtiajaca nojori quiniuucua. ²⁴ Naaratej, nio pojori jaara niaacua tiuquijiosee, niocua puetunujanaa maninia miiri nojoriria, nia paniniutia nojori. Naacuaajitij, puetunu Pueyaso muerasu maapuejanaari niishiniutianiya niaaqui seetanujanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajanijiani.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruhua najuhua niaacuara naajiyani, cua sequenura niajaniya, nia cumaneecata nia naacunura Judea jiyajinia quiniaa parta Pueyaso pueya. ² Janiyacuajaari niishiyani, niaari tarijia na naacunu paniquianucua. Cua shuquiritiasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa niajanijianijini. Janiyacuajaari nojori pohuataquiaani, niajaniya Acaya jiyajinia quiniaa pueyani, niaari nia cumaneeca niqutionu paniquianu noo marijia pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutionu panijajuhuj, naa nojori cua pohuatanuucua niajanijianijitij. ³ Janiyari niaacua tiuya seetanujanaani, niaacuajaari canacuaji tariucua reratesano jitianutaniya nia cumaneeca, taa cua pohuataquiaa niya niajanijianijicuaajani. Naajaa, janiyari nio parta Pueyaso pueya jiyaronutaniya niaacuani, seetanujanaa juhuacarijia nia reratenura nia niqutiojosocoriquiano cumaneeca. Majaari cua paniniu cutara cua pohuatasano niajanijianijijicuaracashitishaanura. ⁴ Macedonia jiyajianijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiyani. Niaari caririquiniutianijuhuj. ⁵ Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiiria canacuaji. Naacuaajitij, nia niqutiojosano cumaneecaari seetanujanaa nareja nia niqutionu panishano quiniutianiya, maja canaa niqutiojotesano niajaniya.

⁶ Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniyajaariuhuj. Saniniuujia, cante queraatia natajani, queraatia senoonutaniyajaariuhuj”. Naajuhuj, paa jaara capora quiriqiani, Pueyasoori

saniniuujia socua queraatia pa niqutionutaniya pa niqutiosanojiniji. ⁷ Naaratej, puetunu niajanijajanaa cuaara niqutioora taa nioojiajinia nia niishiriojoree nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutano. Naajuhuj, majaari nia niqutionu nia cumaneeca saaja tamasaca shiniujiushacari niajaninya. Pueyaso cutaraari shuquiriaatia niqutiojuaca timitiaja. ⁸ Pueyasocuaajaari cumaacaraca na niqutionura niajaninya puetunu nia panishanojuanaa nia jiitiasocoriquiano pueyaracaanu. Naacujitij, niaari pueyaracaanu socua queraatia jiitiajaca quiniutianiya, tamasaca nia niqutiojonurajuhuj, nojori jaara jiitiaquiriquia nojori panishano. ⁹ Naa jaara naa capora quiriquiatej, niaari nio tariucuacaanu Pueyaso Rupaa naajiotasano tohuateenutaniya. Naa sequeyari: “Maninia pueyanoori juhua capora nareja niqutiojojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

¹⁰ Pueyano natasacari casaa jajau na cuhuariquiajinia, Pueyasoori na canijiaquiaa. Naacujitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhuj, juhua capora nia niqutiojosacari nia jiitiasanojiniji, niaari juhua nia cuhuariquiajinia nataa. Naacujitij, Pueyasoori nia jiyatenutaniya socua queraatia jiitiajaca nia quiniuria, pueyaracaanu maninia nia miiniuria tamasacarajuhuj. ¹¹ Naa capora nia quiniuucua nia casaatatej, Pueyasoori juhua capora nia niqutiojonutaniya puetunu na jiitiasanojinijianaa, queraatia nia jiitianura, tamasaca nia niqutiojonura pueyaracaanu. Naacujitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojoriiri Pueyaso sequenutaniya, “paacarasho”. ¹² Naacujitij, nojori jaara masere nojoririano nia jiyarosano cumaneeca, majaari saaja nojori jiitianu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. ¹³ Nojori jiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoohua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuaanaa Jesucristo Rupaa tojitiajacajuhuj, naajaa, taucuaca nia quishacari nojoriria. Nojoriiri Pueyaso maniniuhuaqueetanutaniyajuhuj jiyanoohua capora nia quiniuucua nojoriria, tamasacaranio. ¹⁴ Nojoriiri Pueyaso secojonutaniya niaacuarajuhuj, jiyanoohua nojori paniniutia niajaninya, Pueyaso jiyatenuucua niajaninya nojori panijia nia quiniuria. ¹⁵ Naajuhuj, janiyari jiyanoohua Pueyaso sequeyani, “paacarasho”, jiyanoohua maninia na miiniuucua niajaninya, Neyanu Jesucristo jataniniuucua nioojia.

10

Pablo cuaara tojishaaria, Jesucristo jiyatenuucua nojuaja na rupaa pohuatanara

¹ Janiyacuajaari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhuj. Janiyari naa quiniu panijajuhuj. Naaratej, janiyari quiaritia nia nenecojiyani, cua tojitiare quenaaja. Tamasacanaari cua pocuquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucuacaanu cua quishacari, janiyanaari jiyanoohua nia nacasuquiaa cua naajioneeginiani, juhua nia pueresano jiyaniijia. ² ¿Seetanutejanaa, janiyate naani? Janiya jaara naa quiya niaarani, naajaa. Quiaritia tucuacaanu cua quishacari, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanohuani, sacuaratia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaratia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara.

³ Seetanujuanaacuaaquiniatejaj, canaari nareja pueyani. Naajaa, majaari canaa mi-
aquejonu quiquiaa canaa paraa, taa pueya miaquetojoquiaacuaani. ⁴ Mijiria quiniaa
pueyari miaquetojoquiaa cutara tama nojori shipinishano casaatajaaja. Canaa
miaquetojotaja saniniuujia, cunoori Pueyaso cumaacajanaa cutara. Naacuajitij,
canaa naata Sesaaca niishishano shocotanu. ⁵ Pueyaso cumaacata, canaari mijiria
niishijiaca niishishano shocotaquiaani. Cuno niishishanoori Pueyasojiniji niishishano
jataniquiaa juucua, maja pueya niishiniuria Pueyaso. Naajaa, Pueyaso cumaacata,
canaari puetunujuanaa najuhuana pueya niishiriojosano jataniquiaani, Cristo tojiji-
aca nojori quiniuriajuhuaj. ⁶ Canaacuajaari Pueyaso jeenucuasano pueyani, canaa
nacasunura puetunu tojiyashijiacaajanaa. Naacuajitij, niaa jaara puetunu Pueyasojiniji
canaa niishitiojosanojuanaa tojitiajacara quiriohua, na nuhuaji cutara canaa naata
puetunu cureeno tojiyashijiacaajanaa saniitonu.

⁷ Niaari tama cushitiquiaajaacujua nia tiushacari cuno sapojonuujuaa pahu-
atasanocua. Nojoriiri sapuenu juhua Jesucristo jiyaramiquishano niquishiya na-
juhuanaj. Maninia nia niishiriojore pueyanaa, nijaniya cante sapojosaacanucujani.
Niaa jaara niishiri niaari seetanujuanaa Cristo saquiriojosano pueya, naacuajitij, ni-
ajaniya cuara niishiiria canaari Cristo saquiriojosano pueyajaniuhuj. ⁸ Niaa jaara
jiyaniya janiyari juhua pueya shocotaja nia sequeyani: “Canaari nia jiitianaani”,
naajaa, majaari cua caririquiniu naa cua sequesacari nijaniyatej. Pa Jiyanijia
Cristojuanaacuaajaari canaa jiyatequiaari nia jiitianaa canaa quiniuria. Canaari naa
jiyatesaaquiaarini, canaa cumaquiniuria nijaniya na rupaata, seetanujuanaa Cristo
pueya nia quiniuria. Majaari canaa jiitianu najuhuana na cumaaca, canaa sesonura
nijaniya. ⁹ Naa cua naajiosacari niaacuaratej, majaari nia jiyaniyu janiyari nia
piriyojiyani nia puerenura janiya. ¹⁰ Tamasaca nijaniyajinijinio pueyanaari cua se-
quequiaajuhuj: “Pabloori puera jiyanohua pa nacasuquiaa na naajioneeginia. Naajaa,
pa tajinia na quishacari, nojuajaari juhua tojishoo pueyano niquishano quiquiaa.
Naajuhuj, na pahuatasacari pa niquiara, na pahuatananoori maja shanohua tojis-
hano”. ¹¹ ¿Seetanutejanaa? Cante naa pocuaquiaani, nojuaja cuara niishiiria quiarijia,
taa canaa naajiocanu niaacuaracujua tucuaaanu canaa quishacarijiani, canaari naa
miiniutianiyani niaacua canaa tiuquishacari.

¹² Cuniqini niaata quiyajaariuhua tamasa pueya, canapuate nia sequequiaacujani,
nojoriniaari socua maninia Pueyaso rupaa pahuatanaa tamasacajiniji, canaajinijiji-
uhuj. ¿Nojoriiri seetanujuanaa socua maninia Pueyaso rupaa pahuatanaa canaajiniji?
Johuj. Naajaa. Majaari canaa tacaaniu quiquiaa juhua nojori canaa quiniuria. Cuno
pojoriiri tama na cuaqueya timitiacoquiaajaacujua, nojori soosacari narta Pueyaso
rupaa pahuatanaa. Nojoriiri naa quijiacatej, nojori jiyanihacari nojori cutaraari socua
tojishano pueya tamasacajiniji. Naa nojori miishacarijij, nojori cutaraari seetan-
juanaa mosanucua. ¹³ Canaa cutara, majaari tamasa poonijosano canaa jiyatenu
quiquiaa juhua canaa poonijosano Pueyasora. Canaa cutaraari saaja canaa miishano
shuquiritiaquiaani, tee Pueyaso jiyaroquiaari canaacujani. Nojuacuajaari canaa
jiyaramiquiquiaari niaacua Corinto tiacajinia, nia niquiara canaa pahuatanura na
rupaa. Naacuajitij, niaari na muerasura quiquiaari. ¹⁴ Majaari najuhuana canaa
timitianu nijaniya, Pueyaso muerasu nia quiniuucua. Niacuajaari Pueyaso muera-
sura quiquiaari canaa pahuatanuucua nia niquiara seetanu rupaajanaa Jesucristojiniji.
Canaa cutaraari seetanujuanaa Pueyaso rupaa pahuatanu coteetanaa nia niquiarani.
¹⁵ Majaari canaa shuquiritianu najuhuana nijaniya. Canaa cutaraari nia tiuutiquiaari
Jesucristoocuaani, niaacua Pueyaso jiyaronuucua canaa. Naajaa, canaari socua nia
pahuatanu paniya Pueyaso rupaani, seetanujuanaa Jesucristo rupaacua tiuujia nia
quiniuria. Naacuajitij, niaa jaara seetanujuanaa Pueyaso rupaa tojijiaca quiri, niaari
saniniuujia na naata canaa cumaquiniu. ¹⁶ Niocua canaa cumaquiri canaa quianura

tamaqui, tee Jesucristojiniji pohuatasoojua quiyacuajani, tii canaa pohuatanura nojuajiniijihuhuj. Majaari canaa quiniu paniniu pootia tamasa poonijiosaqui, taa cuno rimiaacoori quiquioya shuquiriaatia canaa poonijiosaquicuaani. ¿Nojori shuquiritiasanoteeri tama nojori poonijosanojuaja? Maja. Niaacuajaari Pueyaso muerasura quiquiaari canaa nia tojtianuucua.

¹⁷Pueyanaa, nio tariucuacaanu naajiotasanoori niaara, nia niishishocoriquiano. Naa sequeyari: “Cante shuquiriaatia quijia quiniu paniyani, nojuaja cuara pa Jiyaniijia shuquiritiaara cutara”. ¹⁸¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pohuatasano na paraajiniji

¹Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. ²Janiyari jiyanohua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatuniyojua canuucujani, saaja na camiriquiano pueyanora na quiniuria, naajuhuj, janiyari nia cojuanu paniyani sesosoo nia quiniuria nia Jiyaniijiaara. Cristocujaaari juhua nia niyacarano. Nia jiitiana cua quishacari, janiyari juhua nia queni. ³Tarijia, niaacuajaari saaja Cristo tojtiaajaca quiquiaari, na paniijaca nia quishacari. Quiarijia saniniuujia, janiyari Sesaaca nia pueretaani, nojuaja mariqui nia sapojoreeri Cristoocujani nia rupatenura, taa cuno Susanacu sapojoquiaari Eva tariucuacaanucuaani. ⁴Cuno sapojonuujua tiuquijiosacari niaacua, tamaatia nojori pohuatanura Jesujiniji niajaniya, niaari jaarajaaja ritia na tojiquiaa. Nojori niishitiosanoori tojetaarucujanaa tamaatia canaa niishitiosanojiniji niajaniya. Nojori nia tojishacari, niaari juhujaniya samaruhua niishishano tojtiaquiaajuhuj. Niaacuajaari tari tiuquiaari Jesucristoocua, Pueyaso jiyanooniuria niajaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuj. ⁵¿Cuno sapojonuujucateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! ⁶Seetanujuanaa, majaari cua niishiniu maniniuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupajanaa, tojishocoriquiano cutara. Maja najuhuanaj. Niaacuajaari cuno niishiya, pueyaracaanu saaja maninia cua miishacari nia niqiuara, cua pohuatasanojinijinio.

⁷¿Casaara nia tojtiaa cuno pojori quiarijianijia, majaari saniniuujia nia tojtianu janiya? ¿Janiyateeri sesa miiquianu niajaniyani, cua masejoyaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria niajaniya. Naa cua miiniuucuatej, ¿cunoteeri sesa niaara? ⁸Janiyari tamonu jiyacinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niqiuara cua pohuatanura Pueyaso Rupaa. ⁹Saniniuujia, nia tajinia cua quishacari, cua jiitiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiitiaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niqitioquiaari, cua panishano cua masetajara. Janiyari

naa pueyaracaanu tama cua cuaqueyajaaja cojuaquiaani, maja cua taajetenura ni-ajaniya cua panishano cua jiiitaaquishacari. Janiyari naa miiniutianiya pueyara-caanuni. ¹⁰ Cua Jiyaniijia Cristocuaajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuaajaari cumaneeca mashiniquijiojua canaajiniji”. ¹¹ Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacaritij, ¿janiyateeri nia paniyaquiyani? ¡Maja! Pueyasocuaajaari niishiya, janiyari jiyanojua nia panijiani.

¹² Nia sequereera casaara cua mashiniquijiyacuquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanojua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. ¹³ Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. ¹⁴ Cunoori maja jiyajeneta naa nojori miiniuriatej. Satanáscuaajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaca pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

Pablo pohuatasacari naquiya na miiniujiniji, Cristo jiyaramiquishano na quiniuucua

¹⁶ Socua nia sequenu pacuteyanijia, majaari nia jiyaniniu janiyari paatecani cua pohuatasacari tama janiyajinijijiaaja. Niaa jaara jiyaniya janiyari seetanujuanaa paatecani, naajaa, rupaquijia cua tojitiare quenaaja. Janiyari juhua paateca tama janiyajinijijiaaja niaara pohuatanu paniyajaaniuhuj, taa nia tojishano pueya mi-iquiaacuaani. ¹⁷ Naa cua pohuatasacari tama janiyajinijijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaaja, juhua paateca cua quishacari. ¹⁸ Naatej, taa queraatia Pueyaso rupaa pohuataanaa tama nojorijinijijiaaja pohuatanuquiquiaacuaani, janiyari quiarjia naa tama janiyajinijijiaaja pohuatanu paniyajuhuj. ¹⁹ Jiyanojua niishijiaca nia quishacari, niari cuno paate-coori tojitiaquiaa juhujaniya. Naatej, taa nia tojitiaquiaa cuno pojoricuaani, quiarjia cua tojitiarejuhuj. ²⁰ Naajuhuj, niaanaari juhujaniya rejeretaquiaa cuno pojori, nojori jaara nia poonijotequiaa juhua nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiquiaa saaja, naajaa, nojori soosacari niajaniya. Niaanaari juhujaniya nojori rejeretaquiaajuhuj, nojori jaara nia jiquioco maseteriquia. ²¹ ¡Nojoriqiiiri jiyaniijianucuajanaa cutara! Saniniuujia, janiyari nojori naaqui caririquiyani juhua nojori cua quiyacuquiniuucua, maja naa canaa miiniuucua niajaniya, taa nojori miiquiaa sesa niajaniyacuaani.

Naajaa, quiarjia cutara, janiyari tama janiyajinijijiaaja pohuatanutaniyani, taa nojori pohuataquiaa juhua paateca tama nojorijinijijiaajacuaani. ²² ¿Taa nojori se-quequiaani? ¿Nojoritiniaari Hebreo pueya, Hebreo rupaa pocuajacajuhuj? Janiya-juhuj. Janiyari Hebreo pueyanohuj, Hebreo rupaa pocuajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari Israel pueyacujinio

supuenojuhuaaj. ¿Abrahamtenaari nojori supuetana? Abrahamcuajaari cua supuetana-juhuaaj. ²³ ¿Nojoritiniaari Cristo jiyaramiquishano pueya? Janiya cutaraari seetanujua-naa Cristo seruni. Janiyari jiyanoehua soyani, juhua paateca naa cua pohuatasacari tama janiyajiniijiaajatej. Naajaa, janiyari seetanujuanaa nia sequeyani. Janiya cutaraari socua jiyanoehua nojorijiniji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuaaj, janiyari pueyaracaanu caminiujiushaaquiaari majacununi. Naajuhuaaj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari carteja na majacusano pueyano. ²⁵ Naajuhuaaj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniniacu camini-ajinia cua jaaretasacari buquejinia, jiuujianaraca buqueeri tiuquitiaquiaari. Naa tamacari buque tiuquitasacarijuhuaaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniniacu caminia jiuujiajinia. ²⁶ Janiyari pueyaracaanu tiqiyocua rucuanejoua quiquiaarini. Naacua-jitij, moocua cua niuniujiushacari, janiyari cocuaatia miiquiaarini. Naa cua rucuanajosacaritij, janiyari pueyaracaanu puereeta nohuasenuujuaca quishaqui shocoua-ariaarini. Naajuhuaaj, tama cuarta Judiocuacajaarijia pueyaracaanu cua miitianu panijia, taucucanio. Puereetaari quiquiaarijuhua cua rucuanajosacari tiacajinia, tiqiyocua pueya quiyaquishaqui, shoniniacu caminiajiniano. Naajuhuaaj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷ Jiyanoehua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuaaj. Janiyari noojiaqueya miaqueyaquiaarijuhuaaj, jeya cua quiyaquishacari. Janiyari naquiya miiquiaari cua rucuanajosacari shiniquiajinia-juhuaaj, toqueeju cua quishacarijuhuaaj.

²⁸ Janiyari naa naquiya miishaaquiaarini, mariyata tamaatia naquiya miiniujiuhuaaj. Naajuhuaaj, janiyari puetunu juucujanaa niishiriojoquiaani, taariquitijia Pueyaso muerasu maapue quiya puetunu jiyacajiniajanaatej. Janiyari jiyanoehua nojoriicua tacaquiaani. ²⁹ Naacuaajitij, tamonu cuarta Pueyaso pueyano jaara rejeretaaquiriquia Sesaaca saniniujiushacari nojuaja, janiyari jiyanoehua taraajeja nocuani. Tamonu jaara sesa miitishaare, janiyari na naaqui caririquiyajuhuaaj. ³⁰ Naa jaara paniya socua cua pohuatanura niajanija tama janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. ³¹ Pa Jiyaniijia Que Pueyasocuaajaari niishiya janiyari seetanujuanaa sequeyani. Nojuajanaa cuara pueyaracaanu maniniuhuaqueetasaaria cutara, maja nojuajiniji pohuataanaa. ³² Tarijia, Damasco tiacajinia cua quishacari, tamonu pueyanoori Damasco tiaca jiyani-ijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadoehua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohuatanuucua. ³³ Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tacuhua shuucuaaji. Janiyari naa mashiquishaaquiaari cua paraacuajini.

12

Pablo pohuatasano Pueyaso niquitishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niquitishaaquiaari pa

Jiyaniijia casaa jiyocuacaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocuaajaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuaajaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pahuatasaanu mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quiniaa pueyara. ⁵ Naa Pueyaso niqutinuuca janiyatej, janiya maara tama janiyajinijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhuaaj, janiya jaara tama janiyajinijiaaja pahuatanu paniriquiani, cuno maara seetanujuanaa pahuatasano quiriquia, maja juhua paateca pahuatasano. Seetanujuanaa majaari naa cua pahuatanu paniniu, pueya mariqui cua pahuatasanojiniji cua jiyaniriiri janiya jiyanoehua maninia pueyanoni. Pueya cuara niishiiria cutara taamueca pueyanote janiyani, saaja nojori namijiata nojori niqushacari cua miishano, tama nojori numaatajaaja nojori tojishacari cua niishitiojosanojuhuaaj. ⁷ Pueyaso niqutishano janiyani, na niishitishano janiyajuhuaaj, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaaquiaari juhua jiohuacatani, janiya mariqui pueya shocotajara quiriiri. Cuno taajeta noonuuri Satanás miishano quiquiaari, na tacaatiniuria janiya. ⁸ Janiyari jiyanoehua secojoquiaari pa Jiyaniijiani, nojuaja cuara shaataara cua nootunenu. Janiyari jiuujianaraca pacutejoquiaari secojonuni. ⁹ Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniuuca. Saaja cunocuaajaari quiara. Cua naatacuajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuuca pueyaracaanu. Naacuajitij, Cristo cumaacaari socua janiyajinia niqushaaquiaa poonijiyano. ¹⁰ Naacuajitij, janiyari shuquiriquiaani cumaacaaju pueyano cua quiniuuca, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuaajaniya na rejeretaquiaani. Naajuhuaaj, janiya jaara cua panishano jiitiaaquiriquiani, naajaa. Pueyaso cumaquishacari janiya, janiyari juhuaajaniya rejeretaquiaani. Naajuhuaaj, janiya jaara naquiya miitiasaaquiaani, taraatia cua miishacarijihua Cristora cua poonijionuuca, naajaa. Pueyaso cumaacata, janiyari juhuaajaniya rejeretaquiaa saajani. Naacuajitij, janiya jaara tojetaarucuaajanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniuuca janiya.

Pablo tacaashacari Corinto tiacajinia quiniaa Pueyaso muerasu maanuucua

¹¹ Janiyari seetanujuanaa juhua paateca tama janiyajinijiaaja pahuatareeni, juhua pueya shocotaja. Niaacuajaari naa cua pahuateree, niaacuaja naara cucuaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijinijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhuaajaniya cua rejere-tasacari naquiya cua miiniu nia tajinia cua quishacari, naajaa, janiyari pueyaracaanu

jiyajeneta casaa miiioquiaari Pueyaso cumaacata nia niquliarani. Niaari nocuaji jiuuji-atecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. ¹³ ¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhuj, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajiniji. ¡Cua jiyanoori cunora, jaara sesa quiquiaari niajaniyara!

¹⁴ Quiarijiani, janiyacuaajaari quera quiaa niaacuani. Janiya jaara niaacua quiaareni, cunota quiniutianiyari jiuujanaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyacuquishacari cumaneeca niajaniyajiniji, janiyari seetanujuanaa juhua nia quení. ¹⁵ Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaniya. Naacuajitij, janiyari tama cua cumaacajaaja puecanutaniyajuhuj, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajaniyajinijionaaari soquecoya, janiya naasucuaanaari jiyasohuaja nia cumaneeca nohuasejoquiaani, cua sapojonuta niajaniya. ¹⁷ ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiri nia cumaneeca masequiaari? ¡Maja! ¹⁸ Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanojuhuj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuaajaari cumaneecaacua jiaatiaashijia, juhua janiyajuhuj. Janiya Titota, canaacuaajaari jiyanoohua nia paniquiaani.

¹⁹ Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuajijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niqiara nio naajiya niaacuarani, Cristo pueya canaa quiniuucua. Naajuhuj, puetunu cua sequesanojuanaa niajaniya nio cua naajiojiniani, cunoori cua cumaquiniuria niajaniya cua panishano pueyanaa. Janiyari naa nia nacasuyani, seetanujuanaa Jesucristo tojijica nia quiniuria. ²⁰ Janiyari puereyani, niaacua cua tiuquishacari, janiyari niaacua taraajenutaniyani cua riuriatasacari niajaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojua, jeecatoojua, niaari saniniuujia taraajenutaniya nia niishishacari taa cua miiniutianiya niajaniyani. Janiyari puereyani niaa naasucuaari juayonuujutaajaa. Naa naasucuaari niarta pueyano jiitiasanoocua jiaatiajaca quiyajaa. Naa naasucuaari juaaniu porocua quiyajaa. Naa naasucuaari tama nia panishanojuaaja miijiaca quiyajaa. Naa naasucuaari niarta pueyacuara coriaacojojuaca quiyajuhuj. Naajuhuj, niaa naasucuaari niarta pueyacuara rimiaaquenuujuaca quiyajaa. Naajuhuj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Naa naasucuaari jatiqui quiyashijiacajuhuj, pueyaracaanu nia juayonuujutanuucua. ²¹ Naacuajitij, janiyari puereyani janiya naasucuaari Pueyaso niqiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhuj, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiquianujua. Noojiaqueya niajaniyajinijioori sacuaraatia

miijiaca quiquianujua: cararaatia miijiaca sacuaraatia, na camishoo maaji numuetu-cunu porocajuhuaaj, naajuhuaaj, majaari tama nojori cuaqueya panishanojuaaja nojori rejetenu quiquiaa.

13

Socua Pablo nacasusacari Pueyaso pueya

¹ Nioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaaajinia, paari nio niishitiojosaaquiaarini: querajaa pueya jaara mariyata pohuatate nojori niquishanojiniji, pa naata seetanujuanaa na pohu-atasanooqua tiuuniu cutara. Naajuhuaaj, niaacua cua tiuquishacari, janiyari naa miiniutianiya cua nequesoreesacari cuno sesa miijiaca. ² Pueyanaa, janiya jaara pacutequiaariuhua niaacua quianutej, janiyacuaajaari puetunu niajanijajinijinio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. ³ Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujiuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jiiitanu niajaniya juhua cumaacaaju pueyano. Niaacuajaari na cumaaca niquiquiaa tama niajanijajiniaajaaja na saniitiosacari niajaniya. ⁴ Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiiitiaa. Naajuhuaaj, canaa, na rupaa pohuatanaani, canaari naquiya miishaaquiaaaniuhua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacarani, maninia canaa jiiitanura niajaniya.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujiaa, maja soj? ¿Niaate maninia miijiaca taa Pueyaso muerasu miiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujiaa quiri, nojuajaari nioojiaajinia quiya? ⁶ Naajuhuaaj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaa. ⁷ Canaari Pueyaso secojoquiaa niaacuarani, tojetaarucujanaa sesa miyashijiaa nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacuajitij, majaari pueya niquiniu quiniutianiya Pueyaso cumaaca canaa jiiitiasano. Naajaa, pueya jaara jiyaniya canaa najuhuaana quijiaa pueyani, naajaa. ⁸ Canaa jiiitiasano cumaacaari maja canaa saniitiotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojitiajaca nia quiniuria. ⁹ Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojitiaashijiaa quiriquia. Naacuajitij, canaari juhua cumaacaaju pueya niquishano quiniutianiya, cumueca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneejinia jiyanohua nia nacasuyani tucuacaanu cua quishacarijia, maja jiyanohua cua nacasunura niajaniya, niaacua cua tiuquishacari. Pa Jiyaniijiacuaajaari cua jiyatequiaari juhua nia jiyaniijia cua quiniuria, na cumaacata

cua canashitijionura niajaniya, seetanjuanaa cumueeca na muerasu nia quiniuria. Pueyaso niquitiosano na cumaaca janiyari maja cua sesonura niajaniya.

¹¹ Cua tucuatanura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatiajaca nia quiri. Nioojia nia cumaquiri, maninia cua rootasanota. Naajuhuj, nia jiyanootooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhuj.

¹² Pueyanaa, Pueyaso tojjiaca nia quiniuucua, nia saruhujotooriquia nujuunuta, seetanjuanaa nia paniniutia niarta Pueyaso pueya. ¹³ Puetunu niqijinio parta Pueyaso muerasujuanaari cua sequeya cua saruhuatanura niajaniya.

¹⁴ Pa Jiyaniijia Jesucristo cuara cumaquiiria niajaniya pueyaracaanu. Niajaniya cuara quiiria pa Que Pueyaso panishano pueyaracaanujuhuj. Naajuhuj, niaa cuara quiiria Pueyaso Sohuanu rupuesano pueyaracaanu. Puetunu niajaniyajanaa cuara naa quiiria.

PABLO NAAJIONEE GÁLATA JIJAJINIA QUINIAA PUEYASO PUEYACUARA

Gálata pueyacuara naajionee

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojua-naacuajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristoni, nojori cuara cumaquiiria nijaniya, nioojia cajitishano nia quiniuriajuhuaj. ⁴ Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. ⁵ Naaratej, pa Que Pueyaso cuara maniniuhuaqueetasano quiiria. Cuaara naa quiiria pueyaracaanutej.

Maja tamonu maninia rupaa quiniu socua Jesucristo rupaaajiniji

⁶ ¿Taa nia miiquianuni pueyanaa? Quiarijiani, janiyari jiyanoehua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuajaari Neyanutaja nia cojiritiaquiaari paniniu, Jesucristo miiniucua maninia niaara, na panishano pueya nia quiniuria. ⁷ Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhuanaj, mariyateyacato nojori quiniucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na sanitionutaniya. Naajuhuaaj, janiya jaara tamaatia pohuatate Jesucristojiniji nijaniyani, jiyocuacaanuji roseno Pueyaso serujuhuaaj, Pueyasojuaanaari canaa sanitionutaniya. ⁹ Janiyacuajaari naa sequeja nijaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Niaa jaara tamaatia pohuataaariquia Jesucristojiniji, maja naate taa tari cua pohuataquiaari nijaniyacujani, Pueyaso cuara sanitionoranoj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pohuatateera cante cua niishitiojoquiaari Jesucristo rupaani, cua pohuatasano nijaniyani. Pueyanaa, nio rupaa janiya na pohuataa nijaniyani, nioori maja mijiria quiniaa pueya niishitiojosano janiya. ¹² Taa cua sequeya nijaniyacujani, majaari nio rupaa cua niishiniu quiquiaari tamasa pueyajiniji. Jesucristojuaanaacuajaari na rupaa cua niishitiquiaari.

¹³ Niaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jiyanoehua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. ¹⁵ Naajaa, jiyanoehua panijia Pueyaso quiniucua, cua

supueyaquishacarijia, nojuajaquiiri tari cua saquiriojoquiaari na pueyano cua quiniuria! ¹⁶ Naacuaajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasaca nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. ¹⁷ Naajuhuaaj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiaquiaaqui Arabia jiyajiniani. Na nuhuaji, janiyari tacatequiaariuhua Damasco tiacajiniohuani.

¹⁸ Jiujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocuaajaari niishiya, janiyari nio cua naajiojina seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniani, Cilicia jiyajiniano. ²² Saniniuujia, Judea jiyajinia Jesu tojitiajaca maapueeri juhuanajuaja maja na niishitiniu quijia janiya. ²³ Nojoriiri saaja naa poojotasaaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiarijia pa Jiyaniijiajiniji pohuataa pueya niquiarajuhuaaj”. ²⁴ Naa nojori tojinuuushacari janiyajinijitij, nojoriiri Pueyaso maniuhuaqueetaquiaari nojori paraca na jataniniuucua Jesu rupaa pohuataana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanujuhuaj

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuaaj. ² Pueyasocuaajaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiajaca jiitianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niquiara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaana sesa niishitiojiya taucuacani?” Cua sequetteeri: “Maja. Quiaacuaja seetanu rupajanaa niishitiojiya taucuaca, naa Jesucristojiniji quia pohuatasacari nojori”. ³ Naajuhuaaj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaaanu quiquiaari. Canaa rerejosacari Pueyaso pueya jiitianaata, nojoriiri Tito niquiquiaari nareja, nojori na rpuenurajuhuaaj. Nojoriiri niishiquiaari nojuajaari seetanujuanaa Pueyaso pueyanujuhuaj, saaja Jesucristoocua na tiuuniuucua. ⁴ Saniniuujia, noojiaqueya canaa Judioacuajinijinioori tama nojori cuaqueyajaaja jiyatequiaari juhua Jesu tojiijaca pueyara, nojori cojiniuria canaa. Nojoriiri naa canaa rupuequiaari na sajojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuacaanu Moisés Rootasano tojiijaca canaa quiniuhuaa. ⁵ Canaari nojori niishitiojosano pataquiaari saajani. Majaari quenaaja

shiitaniyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosanota.

⁶ Cuno pojori Pueyaso pueya maapue jiitianaa Jerusalén tiacajiniani, nojoriiri jiyanohua tojishano pueya quijia. Janiyara naajaa. Pueyasocuaajaari najuhuana qui-jiaca jiyanooquiaajuhuaaj, taa na jiyanooquiaa tojishano pueyacuaani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari que-naaja niquiriyatu rupaa nojori sequenu quiquiaari, nojori niishitiojonura janiya socua.

⁷ Nojori cutaraari niishiquiaari Pueyasocuaajaari seetanujuanaa cua jiyatequiaari na rupaa pohuatana cua quiniuria taucucara, taa Pedro na jiyatequiaari Judiocuaca niquiara pohuatana na quiniuriacuaani. ⁸ Pedro Jiyatena Judiocuaca niquiara Jesucristojiniji pohuatariquianoni, cuno Pueyasojuanaacuaajaari cua jiyatequiaarijihua taucucara niquiara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojishano quijia puetunu Jesuucua tiuuniaa cuarta Judiocuacajinijiojuanaa. Nojoriiri seetanujuanaa puetunu Pueyaso muerasu jiyaniijianucuajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanooquiaari, na jiyatenura janiya Neyanujiniji pohuatana cua quini-uria taucucara niquiara. Naaratej, nojoriiri na juaashiquia niquitiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaariijaariuhuaaj: “Maniniacuaja. Nia quiojiyare taucucacua tii nia pohuatanura Jesujiniji nojorijihuaaj. Canaari saniniu-ujia parta Judiocuaca tajinia poonijionutanianijia, nojori niquiara canaa pohuatanura Jesujinijihuaaj”. ¹⁰ Nojoriiri canaa sequequiaarijihuaaj: “Canaa panishano pueyanaa, majaari nia niyajetanu casamijiuniucua pueya naacunu”. Naaratej cuarta Pueyaso pueyanaa, puetunu tiqiyocuaajanaa cua rucuanesacari, janiyari naa miiquiaa seetanujuanaani.

Antioquiya tiacajinia Pedro nacasusaanujiniji pohuatasano

¹¹ Tamacari, canaa quishacari Antioquiya tiacajinia, Pedroori canaacua niquiaarijihuaaj, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanohua na nacasuquiaarini. Cuno na miishanoni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. ¹² Pedroori naa miiquiaaritij. Coteenu canaa cojiquiaari maniniaari tariucua Jesuucua tiuujia taucucata, canaata na miaquejonura jatiqui. Jiyacaritij, canaacua tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujia taucucata. Narta Judiocuaca puerequiaariiri maja na sequesaaanura: “Cunoqui sacuaraatia miaquejojua taucucata”. ¹³ Tii quiniaa Jesuucua tiuujia Judiocuaca jaara niquiquiaari naa Pedro miishanocuaatej, nojori-iri jaarajaaja canaacuaji rupatequiaarijihuaaj, Pedro na cojitiuniuria. Naajuhuaaj, jBernabeeri jaarajaaja canaacuaji rupatequiaarijihuaaj cuno mosanucua na cojiniuria! ¹⁴ Naaratej, janiya jaara naa nojori niquiquiaari tariucua Jesuucua tiuunio taucucata tamacatiyanoni, janiyari niishiquini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarijia saniniuujia, quiaari Jesuucua tiu- unio taucucata shiniujia nojori quiniuria seetanujuanaa juhua Judiocuaca, nojori

rupuenura pajaniya. ¿Casaara naa quia shiniujiya nojoriirini? ¹⁵ Paacuaajaari Moisés Rootasano tojijiaca cutarani, Judiocuaca pa quiniuucua. Paari maja tahuani, Pueyaso tojiyashijiaca. ¹⁶ Naajaa, paacuaajaari niishiyani, majaari Pueyaso jiyanooni pajaniya Moisés Rootasano tojijiaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquuaani, nojuaja jiyanooniuria pajaniya puetunu sesa pa miishanojinijijianaa. Sesa pa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

¹⁷ Paacuaajaari Jesucristoocua tiuquuaarini, jiyanooshano pa quiniuria, maja socua Moisés Rootasano tojijiaca pa quiniuria. Na nuhuaji, paa jaara jiyaniyani paa sesa miijiaca quiriohuani Moisés Rootasano pa tojiyaquishacari tarini, saaja Jesucristoocua pa tiuushacari, paari jiyanoohua jiyajeneyani. Naa pa jiyanishacaritij, paari juhua sequeyani Cristoori pa jiyaterohua sesa miijiaca pa quiniuhua nocua pa tiuuniuucua. ¿Quiaateeri naa sequenu paniya Pedronaa? ¡Maja! ¹⁸ Paacuaajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaca quiniutianiya Pueyaso niquiarani, paa jaara Moisés Rootasano tojijiaca quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuaajaari seetanujuanaa pohuatanuquuaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatanuusano jaara sapojosano quiriquia, paa maara jiyanoohua sesa miijiaca quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. ¹⁹ Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojijia cua quiniuria socua. Naacuajitij, janiyari quiarjia saaja Pueyasora quiya cutarani. Janiyara, janiyari tari cojiritiasaquiaari monu Cristota niyacutesanojiniani. ²⁰ Naacuajitij, quiarijiani, majaari nio janiya quiyani. Jesucristocuaajaari nio, cojiajinia quiyani. Majaari tamajaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. ²¹ Majaari cua ruuretanu Pueyaso jiyanooni panishacari janiya. Jaara pa naata quiriquia tama pa cuaqueyajaaja jiyanootiniyu Pueyaso, Moisés Rootasano tojijiaca pa quiniuucua, Jesucristo maara najuhuana cusoquiaari pocuara.

3

¿Teyano tojijia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiaru pohuataquiaari Jesucristojinijitij, canacuajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaariuhuj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohanu tiuquiquiaari nioojiajinia Moisés Rootasano

nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacua-jaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³ ¡Niaaquiiri tojetaarucujanaa mosanucujuhuanajaj! Nia niquishuriiraj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? ¡Maja! ⁴ Pueyasocujajaari jiyanoohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj? ⁵ Pueyanaa, Pueyaso jaara na Sohuanu niquitioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiuujia nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcujajaari Pueyaso sequesanoocua tiuquiciaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua na tiuuniuucua. ⁷ Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiciaaricuaani, nojoriiri seetanujanaa canaa supuetana Abraham niquiohuajanaa cutara. ⁸ Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajanihuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujajinio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijiojuanaa nocua tiuuriquiano pueyatej”. ⁹ Naaratej, cante Jesucristoocua tiuujiani, Pueyasoori na jiyanooniutianiyajuhuj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujia, taa na miiquiaari Abrahamcuaani.

¹⁰ Saniniuujia, cante jiyaniyani Pueyasoori na jiyanooniutianiya Moisés Rootasano tojjijia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjijia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

¹¹ Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniuucua”.

¹² Saniniuujia, Moisés Rootasani, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjijiani, nojuajaari cuno na tojiniuucua rishiniutianiya”.

¹³ Maja maninia pa tojiyaquiniuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaa:

“Pueyaso sesacasanoori cuno, niyacutesanojinia teetesanoni”.

¹⁴ Naa Jesucristo cusonuucua pocuaratej, saaja nocua nia tiuushacari, Pueyasoori na naata shuqiritiniu niajaniya taucuacajuhuaaj, puetunu na sequesano tajananaa canaa supuetana Abraham. Naajuhuaaj, saaja pa tiuuniuucua Jesuucua, puetunu pajaniya-janaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

Moisés Rootasanoori maja na naata Pueyaso sequesano Abraham jataniniu

¹⁵ Cuarta Pueyaso pueyanaa, maatia nia pohuatateera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶ Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujiniao supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujiniao supueno pueyara”. Maatia sequeyacuajaari: “Abraham jinianuucujiniao supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocujaja. ¹⁷ Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniujuhuaaj. Seetanujuanaa Pueyaso sequenu nuhuaaji Abraham, taa nera na miiniutianiyani, cuno nuhuaaji, shocojoquiaarijiaaraari cuatrociento treinta marijia. Cuatrociento treinta marijia shocojonu nuhuaaji, Pueyasoori jiyacari shusha Moisés niqutioquiaari na rootasano, saajianeecaacua na quejasano. Moisésri saniniuujia pueya na niishitiojoquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhuaana na quiniuria pajaniyara. ¹⁸ Pueyaso niqutionu panishano pajaniya jaara pa niquticosaariquia saaja pa tojinuuucua Moisés Rootasano, na niquticosocoriquiano pajaniya maara nareja niquticosoo quiri. Saniniuujia, Pueyasocujajaari seetanujuanaa naa Abraham sequequiaari:

“Janiyari nareja quia niqutionutaniya cua sequesano”.

¹⁹ Niaa naasucuaari sequeya: “Jaara naa quiriritij, ¿casaarano socuateeri Moisés Rootasano?” Nia sequereera pueyanaa. Jiyanojia Abraham nuhuaaji, Pueyasoori Moisés caminiuujitiquiaari na rootasano, pueya niishiniuria nojoriiri seetanujuanaa Pueyaso tojiyashijia. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujiniao supueno pueyano cuara tiuquiquiaarijiaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocujaja. Naacuajitij, Jesucristocujajaari Pueyaso jiyaniquishano quiquiaari, na sequesacari Abraham, “quia jinianuucujiniao supueriquiano pueyano”. Cristocujajaari puetunu Pueyaso sequesano Abrahamjanaa masequiaari pajaniyarajuhuaaj, taa Pueyasojanaa sequequiaari Abrahamcuajani. Saniniuujia, Moisésri saaja pueya niishitiojoquiaari Pueyaso seya caminiuujishano nojuaja. ²⁰ Abrahamra saniniuujia, majaari quenaaja tamonu pueyano quiniu quiquiaari nera na caminiuujiquiano. Pueyasojanaacujajaari nocua muetaquiaari, na sequenura seetanujuanaa taa Neyanuucua tiuujiaca na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanojiniji.

Casaaranote Moisés Rootasano

²¹ Naa cua sequesacaritij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanooniniu pajaniya,

paa maara Moisés Rootasano tojtiajaca quiriquiani, Pueyaso jiyanooniuria pajaniya. ²² Saniniuujia, tariucuacaanu Pueyaso Rupaajinijini, paari niishiyani puetunu pueya-puejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiiiasano pueya quijiani. Paari naa quijia taraatia pueyacuaani, paa jaara tojiquiaari Jesucristojinijiaatijia, nocua pa tiuuniuria. ²⁴ Naacuajitij, Moisés Rootasanoori juhua pa jiiitiana quiquiaari. Juhua naatujuoriniyoyua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuaari. Naacuajitij, paa jaara Jesuucua tiuquiarini, paari puetunu sesa pa miishanojinijijianaa jiyanooshaaquiaarini. ²⁵ Naa Jesuucua tiuujia pueya pa quishacari quiarijiatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujuori pa quishacarijia. ²⁶ Quiarijia cutara, puetunu nijaniyajanaari Pueyaso pueya, Jesuucua nia tiuuniucua. ²⁷ Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyoyua nia quiniucujuhuaaj. ²⁸ Naa Pueyaso muerasu pa quiniucuatej, majaari Pueyaso niquiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijihuaaj, naajaa. Poonijotesano pueyano maaraja, camarnuuju pueyanonio, cunoori maja rimiajata Pueyasora. Naajuhuaaj, caya, maaji, cunoori maja rimiajata Pueyasora. Jesucristoocua tiuujia pa quishacari, Pueyasora, puetunu pajaniyajanaari juhua niquiriyatu pueyanoni. ²⁹ Naajuhuaaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacuajitij, niaari Pueyaso sequesano Abrahamrano maseriquianojuhuaaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanojuaja maja na naata na que casami jiiitianu. Nojuajaari saaja juhua pataaco seru, naatujua na quishacarijia. ² Naacuajitij, tamasacaari cuno mueya canashitijia, cuaara mashajara quirijiaatijia, jiyaniijara jiyatesocoriquiano, taa na shipininio sequequiaaricuaajani. Juhuacarijia niishitiojoshiyajaariuhuaaj, maninia na jiiitianura nerano na que riuriotaca. ³ Paari naajuhuaaj. Pueyaso pueya pa quiaquishacarijia, paari juhua naatujuori quiquiaarini. Paari mijiria niishishano tojtishaaquiaarini, pa supuetanaa niishishanonio. Paari naa taraatia jiiiasaaquiaarini. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijinjijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuajitij, nojuajaari na naata Moisés Rootasano tojijia jiyanooni, maja socua pa tojtishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacaritij, nojuajaari Pueyaso pa sequetequiaa, "cua Quena". ⁷ Naacuajitij pueyanaa, majaari tari nia quiniu Moisés Rootasano tojijia, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacaritij, niaari tariu-

cuacaanu Pueyaso sequesano Abrahamrano maseriquianojuhuaj, taa na muerasurano niqutionu na sequequiaaricujani.

Pablo tacaashacari Galacia jiyajinia quiniaa Pueyaso pueyacia

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijiaca quiquiaari taraatia. Cuno casaari maja seetanujuanaa Pueyaso. ⁹ Quiarijia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhuana supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaguiniu niajaniya. Niaari najuhuana na tojijiaca quiniutianiya. ¹⁰ Niaanaari puetunu juucajanaa niishijiaca quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniarajanaa, puetunu marijarajanaano. ¿Casaara naa miijiacara nia quiriohuacuaarini cuarta Pueyaso pueyanaa? ¹¹ Naa nia miiniuucuatej, janiyari jiyanohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua niajaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiaquiaari niaata cua quishacari. ¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niquiarani. ¹⁴ Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojitiaquiaari juhua Pueyaso serujuanaa, nia niquiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niajaniya. ¹⁵ Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucujani? Janiyacuajaari niishiquiaarini, jiyanohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraajesacari. ¹⁶ Quiarijia naa cua sequesacari seetanujuanaa niajaniyatej, ¿niaateeri cunora cua niqiniutianiya juhua nia paraca? ¹⁷ Cuno pueya, najuhuana tamaatia nia niishitiojoquiaa Pueyaso rupaani, quiarijia nojoriiri maninia miiquiaa niajaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacuajitij, majaari tari cua rootasano tojitiajaca nia quiniu quiniutianiya. Niaari cua cartenutaniyajuhuj. ¹⁸ Quiarijiani, cuno pojoriiri nia shuquiritiyacuaaja. Majaari nia jiyaniniu janiya nia sequeyani, maja maninia parta pueya pa shuquiritiniuria. Taaquiriirinij, maniniacuajaari parta pueya pa shuquiritiniuria, seetanujuanaa pa naacunura nojori. Niaacuajaari niishiya pueyanaa, janiyari jiyanohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹ Quiquihuaniyojuanaa, jiyanohua cua tacaashacari niaacua, coojaari jiyanohua noonu pacuterohuacuhuj, naatej, taa maaji nooquiaacuaa na manajani, quera na ranu panishacari. Naajuhuj, janiyari naa pueyaracaanu miijionutaniya naquiya niaacuani, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. ²⁰ ¡Seetanujuanaa nia shuriucua

cua jatariquiani, maninia cua niishitiojonura niajaniya! Naa cua quishacari tucua-caanu niajanijajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjiiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijinio

²¹ Moisés Rootasano tojjitajacanaa, cua tojiri. ¿Majateeri tariucuacaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? ²² Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajinijuhuj. Abrahamri neco seru muetutequiaari. Na sesojokuvaariiri Ismael. Na nuhuaji, saniya necojuanaari nera muetuquiaarijihuhuj. Na sesojokuvaariiri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoari tarijia na sequesano Abraham tohuateequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenuucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarr miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojjitajacaari juhua seya quiquiaa, taa Agar quiquiaari serucuaani. ²⁵ Seetanujuanaari, Agarr miriqui juhua Sinaí tuhuananu Arabia jiyajinia. Saniniuujia, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniuucua Moisés Rootasano tojjiiaca. Cunora, Moisés Rootasanoari juhua nojori jiiitiana quiya, juhua poonijjotesano seya nojori quiniuria. ²⁶ Saniniuujia, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjiiacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuacaanu Pueyaso sequesanoacuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniuucua. Naajaa, quiaacuajaari socua queraatia niquiohuaraca quiriqiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nucuarano Saara tiuuniuucua Pueyaso sequesanoocua, taa na muetunutaniani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoari na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocuajanaa jaara nera muetuquiaari, cunoori Pueyaso Sohuanu cumaacata rasaanquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. ³⁰ Quiarijia nia niishiri cutara, naa naajiotasaaquiaaricuaajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori

seetanujuanaa quia niquiocoa muetusanorano, cua Sohuanu cumaacata rasano mueyaranotuhaj”.

³¹ Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

5

Saaja Jesucristoocua tiuujia pa quiri

¹ Jesucristo cusuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojijia pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojijiacara nia quiniuhua. ¿Moisés Rootasano tojijiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojiniucua. ² Cua tojitiare pueyanaa. Janiyari Pabloni. Janiyajanaari seetanujuanaa nia sequeyani, niaacuajaari Jesucristoocua tiuujia, Gálata jiyajinia quinia pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiriojiya, niaari Jesucristo cusu jiyatenutaniya najuhua na quiniuria nijaniyara. ¡Pueyanaa, majaari nia tojiniu cuno Judiocuaca, canapuate nia shiniujuquia nia cararaatiuuquia co miatejosaa-nuracuajani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniiniucua naa nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jiyanooniuria nijaniya? ¡Maja! ⁴ Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojiniucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. ⁵ Pajaniya saniniuujia, paari Pueyaso Sohuanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quiarijiani, Jesucristo rupuesano pa quishacari nocua pa tiuuniucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijia pa quiniuria, parta pueya pa paniniuriajuhaj.

⁷ Cuarta Pueyaso pueyanaa, niaacuajaruhua Jesuucua tiuujia quijia seetanujuanaa. ¿Quiarijiaariuhuj, cante nia tarinitiriohuacuaa seetanu rupaacuajanaa nia tiyaquiniuriani? ⁸ Cuno pojori niishitijosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujuanaari nio sequesano: “Shiitaniyoyua jereeca mashaca jaara shoqueeca mashacajinia shuushaare, cuno shiitaniyoyuaari puetunu cuno mashacajanaa jereteja”. Naajaariuhuj, shiitaniyoyua sesa niishitijosanoori puetunujuanaa pa sesojuajuhuj. ¹⁰ Naajaa, janiyacuaajaari pa Jiyaniijiaacua tiya seetanujuanaani, majaari nia tojiniu quiniutianiya tamaatia cuno pojori niishitijosano. Saniniuujia, Pueyasoori noo pojori saniitioriquiano, tamaatia na niishitijonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitijonu quiquiaa taucua-jinijinio Jesucristoocua tiuujia, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriqiani.

Saniniuujia, Jesucristo cusuucua niyacutesanojinia pocuara, paari saaja naacua jiyanoshaaquiiani. Naa cua niishitiojonuucuatej, Judiocuacaari jiyanohua cua juaaquiiani. ¹² Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

¹³ Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojijiaca nia quiyaquishacari taritij, naajaa, majaari nia jiyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. ¹⁴ Naa jaara nia miijiaca quiriquiatej, niaari puetunu Moisés Rootasanojuanaa tojiyacuaaja, taa na rootasanojinia naajiotasano quiyacuajani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya sayonuujutaquiaacuaani. Naa jaara nia quiriquiatej, niaari socua puecootoonutaniyaquij.

Taa quiijate tama na panishanojuaaja miijia pueyanoni, Pueyaso Sohuanu tojjia pueyanonio

¹⁶ Janiya nia sequeya cutarani pueyanaa. Cua tojiri. Pueyaso Sohuanu tojijiaca nia quiri pueyaracaanu. Naacuajitij, majaari sacuaraatia tama nia panishanojuaaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuaaj, Pueyaso Sohuanuuri poojiajinia sesa casaa pa panishano paracajuhuaaj. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniuujia, Pueyaso Sohuanu jaara nia cumaquiquiaacuaja saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

¹⁹ Maatia niquishanocuajaari taa pueya miiquiaani, noo pojori, canapuate tama na panishanojuaaja miijiacani. Nojoriiri juhuajaniya na camishoo maajipohua numetucunujuaca, sacuaraatia miitioojua narta canuutajaariuhuaaj. Maajipohuari naa sacuaraatia miitioojua narta maajipohuatajuhuaaj. Pueyari saaja naa miiniuucua jiaatiajaca sacuaraatiatej. ²⁰ Naajuhuaaj, nojoriiri tama nojori pueyasorajaaja nojori shipinishano casaa secojonujuaca. Nojoriiri shimiacurijiuhuaaj, narta pueyano shimiojonujuaca. Narta pueyano niqiniu paniyashijiacajaariuhuaaj. Nojoriiri juaatioojuaajuhuaaj. Nojoriiri narta pueyano jiiitiasanoocua jiaatiajacajuhuaaj. Cunora, nojori niquiniu paniyaquijiaari. Nojoriiri maja na niishiniu rejetenu na juaaquiaca. Ritia juaajiacaari. Pueya nasojojua narta pueyanoocuarajaariuhuaaj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijia, canapuate maninia miiquiaa nojoricuajani. ²¹ Cuno pojori, naa sacuaraatia miijiaca pueyaracaanu Pueyaso niquiarani, nojoriiri maja na niqiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacajuhuaaj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuaaj. Nijaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiiitiasano na quiniu quiniutianiya, pueyaracaanu rishijia na quiniuria shuquiriaatia.

²² Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijiara pa jiyateja. Poojia jiyateya shuquiriaatia quijiaraari. Poojia cajitijiaariuhuaaj. Jacaria pocujara pa jiyateyajaariuhuaaj, juhua-janiya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijiara pa jiyatejajaariuhuaaj, pueya tiuuniuria pocua. ²³ Pueyaso Sohuanuuri pa jiyateja pueya shocoteyashijiarajuhuaaj. Pa niishitiquiaajaariuhuaa tama sesa casaa pa cuaqueya panishanojuaaja pa rejetenura. Paa jaara naa miijiaaca quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. ²⁵ Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuanaa pueyaracaanu na tojijiaca nia quiri cutara. ²⁶ Majaari tama pa cuaqueyajaaja pa jiyaniniu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyan. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuaaj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijiaca pa quiri cutara.

6

Niarta Pueyaso pueyata nia cumaquitioojoriquia

¹ Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajaniyajinijinio canapuate Pueyaso Sohuanu niishitiajaraca cutarani, nojori cuaara jacaria na nacasuuranon, sesa miiniu na tarinitianuhuaa. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuaaj, jiyanohua nia cojuare tama nia cuaqueyajaaja Sesaaca mariqui nia saniniujiurijiaariuhuaaj, sesa nia miiniurijuhuaaj.

² Maninia cutaraari nia cumaquitioojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutaniyani.

³ Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuaaj, naa niishiriojuaari tama na cuaqueya sapojiyajaacujua.

⁴ Puetunu niajaniyajanaa cumaati tama niishiriojquiaajaacujua, taamueca pueyanote niajaniyani, maninia miijia, sesa miijia soj. Niaa jaara seetanujuanaa maninia miijiaca quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miijia quiri niajaniyajiniji, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujiuhuaaj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵ Puetunu pajaniyajanaari tamaatia poonijosano jiiitiani. Tama niajaniyajaaja cumaati na miiquiaa maninia, Pueyaso shuquiritianura niajaniya, seetanujuanaa shuquiriaatia nia quiniuria.

⁶ Canapuate Pueyaso rupaa niishitiojosaaquiaani, cuno pojori cuaara na niishitiojonaa niquitiojora nojori casamijiniji saniniuujia, nojori niishitiojonaa jiiitianura nojori panishanojuhuaaj.

⁷ Pueyanaa, maja tama nia cuaqueyajaaja nia sapojonu nia jiyanishacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhuaaj”. Nio miriqui sequesanoori nio niishitiojia: cante maninia miijiani,

nojuajaari maninia miishaanutaniyajaacuhuj. Naajuhuj, cante sesa miijiani, nojuajaari sesa miishaanutaniyajaacuhuj sesa na miiniuucua. Cunoori maja rimiajata. ⁸ Naacujitij, canapuate tama na cuaqueyajaaja shuquiritijiaca sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijiara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia miijiaca quiri, majaari maninia miiniuria nia taajenu. Pueyaraacaanu maninia miijiaca nia quiri. Niaacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuaara sashiriajuhuaj. Na nuhuaji cutara paari jiyanoohua shuquiriaatia quijiacara jiyatesaanutaniyani, maninia pa miiniuucua. ¹⁰ Naacujitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatascari na naajio

¹¹ Nia niqiri cua naajio pueyanaa. Naa quera namijiaaca cua naajiosacari ni-aacuaratej, nia niishiri janiyajanaari nio naajiya tama cua juaashiquiatajaajani. ¹² Socua cua tojiri pueyanaa. Cuno pojori, nia shiniuuiuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanoohua paniya nia cararaatiuuquia co miatesano pueya nia quiniuriajuhuaj, taa puetunu Judiocuacajanaacuaani. ¹³ Cuno pojori, canapuate na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniuriajuhuaj. Niaa jaara miatejosaare, nojoriiri tama timiquionutaniyajaaja, nojori tojtiajaca nia quiniuucua. ¹⁴ Janiya saniniuujia, Pueyaso cuaara cojuaara janiya maja cua shuquiritianura tama cua miishanojuajaaja. Janiyari saaja pa Jiyaniijia Jesucristo shuquiritianu paniquiaani, pocuara na cusuucua niyacutesanojinia. Naacujitij, janiyari mijiria niishishanoocua jiaatiaashijiara jatanishaaquiiaarini. Mijiria casaari maja na naata shiniujiuniu janiya, nocua cua jiaatianura socua. ¹⁵ Pueyanaa, pa cararaatiuuquia co jaara miatesano quiri, naajaa. Naajuhuj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. ¹⁶ Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucuaajaari cua rootasano nio naajioneeginia. Quiarijiani, tamonu cuaara socua cua taajeteyaquiiria sesa na niishitiojosanota niajaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitiajano. Cuaara naa quiiriatej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojitiajaca

¹ ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyaniija, canapue Pueyaso saquiriojoquiaari tama neracuajani, canapue te Jesucristo tojitianaacuajani. ² Pa Que Pueyaso, mariyata pa Jiyaniija Jesucristo cuaara taraajeera niaacua, maninia na miiniuria nijaniya. Nojori cuaara cajitiiria nioojia pueyaracaanujuhuj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupenuucua, Pueyasoori capora pajaniyara. Nojuajaari jiyanojua maninia miiquiaa pajaniya, puetunu jiyocuacaanu na jiiitasano cumaacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojijiaca pa quiniuria, tojetaarucujanaa sesa miyashijia pa quiniuriajuhuj. ⁵ Panijia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacuajani. ⁶ Jiyanojua maninia na panishano Niyanuniyojua miiniucua pocuara, nojuajaari pueyaracaanu jiyanoquiaa pajaniya. Nojuajaari jiyanojua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. ⁷ Niyacutesanojinia Neyanu shootenuucua na nanaca pocuara, Pueyasoori pa jiyanoquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanoquiaariiri. ⁸ Pueyasoori na paniniu niishitiquiaari pajaniya, na niqitiosacari na niishitiaja pajaniya, puetunu casaa niishijiajanaa pa quiniuria. ⁹ Nojuajaari jiyanojua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiyani. Nojuajaari Cristo jiyatenutaniya Jiyaniijaajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojijiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

¹¹ Pueyasoori tariucuaaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. ¹² Nojuajaari pa saquiriojoquiaari maninia quijiacara na jataniniuria pajaniya. Cuarta Judioacuajiniinio pueyani, canaari coteenujanaa Jesucristoocua tiuquiaarini. Naa jiyanojua maninia Pueyaso miiniucua canaa, nojuaja cuaara maniniuhuaqueetasaaria jiyanojua. ¹³ Quiari naataja nia tojishacari Jesucristo rupaa, niaari cunoseetanu rupaacuajanaa tiuquiaarijuhuj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupuetequiaari. Na Sohuanu niqutioquiaari nijaniyajaariuhuj taa na sequequiaaricuajani. Naacuaji niishishaaquiaari, niaari seetanujanaa Pueyaso muerasu. ¹⁴ Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranuojanaa masenutaniya

Neyanutajuhuj. Pueyaso Sohuanu pa jiiiasacari, paari niishiyani, Pueyasoori pa rijionutaniya puetunu na saquirojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niquishaanurajuhuj. Cunora, Pueyasoori jiyanoehua maniniuuaqueetasano quiniutianiya, jiyanoehua maninia na miiniuucua pajaniya.

Taa Pablo secojoquiaari Pueyaso pueyacuarani

¹⁵ Janiyari niajanijajiniji tojiriucuaani, taa pa Jiyaniijia Jesuucua tiuujica nia quiyani, taa parta Pueyaso pueya panijica nia quiyajaaniuhuj. ¹⁶ Cunora, pueyacaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniuucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura niajanija jiyocuacaanuji niishitiaja. Naacuaji nia naata niishiniu na niishitiniu panishano niajanija, maninia nia niishiniuria nojuajuhuj. ¹⁸ Janiyari niaacuara secojoquiaajaaniuhuj, Pueyaso cuara cuhuataara nioojia, maninia nia niishiniuria casaara Pueyaso saquirojoquiaari niajanijani, casaa na miiniutianiya niaarajaniuhuj. Janiyari niaacuara secojoquiaajuhuj, maninia nia niishiniuria taa Pueyaso muerasu jiyatesaanutaniya shacantuuca quijica nojori quiniuriani. ¹⁹ Janiyari secojoquiaajuhuj, Pueyaso cuara niishitiiria na cumaaca niajanija, cuno, nioojiajinia poonijiyani. Na cumaacari jiyanoehua, puequeyashijia. ²⁰ Pueyasocujaari cuno na cumaaca poonitijioquiaari Cristo quetejinia, nojuaja jaara na samiitianiquiaari iuhua macujiniji. Jaara na samiitianiquiaari, cuno na cumaacata na cajitiquiaariiri Jiyaniijiajanaa cajitiujinia na miaquetajara jiyocuacaanu. ²¹ Tii na cajitiquiaariiri puetunu tamasaca cumaacaraca quijica Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasaca jiyaniijianucujanaa Jiyaniijia. Puetunu mijiria quijica jiiiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipinirioehua, Jesucristoori jiyacari Jiyaniijiajanaa quiniutianijuhuj, taa quiaritia na quiyacujani. ²² Naacuajitij, Pueyasoori puetunu na shipinishanojuanaa jiyatequiaari Jesucristo jiiiasocoriquiano. Naajuhuj, Pueyasoori Jesucristo jiyatequiaari na saquirojosano pueya jiiitariquiano, canapuate nocua tiuujiacacujani. ²³ Pueyaso saquirojosano pueyari juhua Jesucristo cuaqueya. Nojuajaari juhua poojia saniniuujia, pa jiiitiana na quishacari. Puetunu Pueyaso saquirojosano pueyajanaa jaara Cristo cuaqueyajinia rupuetesaare, Cristo cuaqueyari tucateenutaniya seetanujuanaa maninia jeecanamitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuj, nojuajaari puetunu tiqiyocujanaa quijiajuhuanajaj.

2

Panijia Pueyaso quiniuucua, nojuajaari pa jiyanooquiaari

¹ Sesa miijica nia quiniuucua tarijia, Pueyaso tojiyashijiacajuhuj, niaari macunucua quijia Pueyasora. ² Naa jaara naa sesa miijica quiquiaaritia, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruehua jiyaniijia tojijica quiquiaari, cuno, paratu piyarojosaqui quijiani. Nojuajaari Pueyaso tojiyashijica shiniuujia, nojori miiniuria sesa, taa Sesaaca seque paniyacujani. ³ Tarijia, puetunu pajaniyajanaari Pueyaso tojiyashijica quiquiaarini. Paari tama pa miiniu panishanojuaja miijica quiquiaarini. Naacuajitij, paari puetunu pa cuaqueya miiniu panishanojuanaa miijica quiquiaarini, puetunu sacuaraatia pa niishiriojosanojuhuj. Naa sesa miijica pa quiniuucuatej, paari tojetaarucujanaa jiyanoehua Pueyaso saniitiosocoriquiano quiquiaari juucuanu, juhua tamasacajuhuj. ⁴ Saniniuujia, Pueyasoori pocua taraajeja cutara. Jiyanoehua pa paniquiaariiri. ⁵ Cunora, macunucua pa quishacarijia nera, sesa miijica pa quiniuucua, nojuajaari

Jesucristota pa cojiritiaquiaari samiitianijionu. Jiyanootio Pueyaso quiniuucua, nojuajaari nia jiyanooquiaari. ⁶ Naa na samiitianijionuucua pajaniya Cristoocua pa tiuuniuucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. ⁷ ¡Naa Cristota na cojiritianuucua maninia miiniu pajaniyatej, cunoori jiyanohua maninia! Nojuajaari naa pa miiquiaaritij, puetunu quiijacajanaa nio pa quishacari nuhuaji niishiniuria maatia, Pueyasoori jiyanohua pa panijia. Maatia niishishaanutaniyari Pueyasoori tojetaarucujanaa jiyanootio cutara, na jiyanooniuucua pajaniya, Neyanuucua pa tiuuniuucua. ⁸ Naa Pueyaso quiniuucua jiyanootiotej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanootiniu quiquiaari tama nijaniyajaaja. Pueyasojuanaacuaajaari nia jiyanooquiaari niaacua na taraajenuucua. Naajuhuj, nojuacuajaari nia tiuutiquiaari Neyanuucua. ⁹ Majaari Pueyaso jiyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanootiuciaari tama pa cuaqueyajaajani, paa maara tama pa cuaqueyajaaja timitiarení juhua najuhuaana pocuaja. ¹⁰ Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacuajaari tari naa niishiriojoquiaari, maninia miijiacara na jataniniuria pajaniya.

Jesucristoori pa jiyateja jiyanootiojuacara

¹¹ Éfeso tiacajinia quiniaa pueyanaa, quiaríjia nia niishiriohua taa nia quiquiaari tariucuacaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniuucua. Canaa cutaraari canaa cararaatiuuquia co miatesanoni. ¹² Nia niishirijihuj, naa nia quishacaritij, niaari Cristoaju quiquiaari. Majaari nia naata rupuenú quiijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria nijaniya. Niaari saaja taraatia shaajeriquiano quiquiaari. ¿Cantucua niaacua taraajerení? Niaari seetanjuanaa tojetaarucujanaa Pueyasooju quiquiaari mijiria. ¹³ Tarijia, niaari seetanjuanaa tucuacaanu quiijaca quiquiaari Pueyasojiniji. Quiaríjia saniniuuja, Jesucristo shootenuucua na nanaca niyacutesanojinia, niaari nata rupuetootesaquiaari, nocua nia tiuushacari. Naacuajitij, niaari canaa rupuejacajuhuj. ¹⁴ Cristocuajaari pa jiyanootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuj, taucuaca nia quiniuucua. Jesucristocuajaari cunora tama na cuaqueyajaaja tarinitiaquiaari na mosaanura pa niti, cunó jiyaconaja sohuaca niyartasaanura, pa juaaquiaca tajiyaatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, nijaniya taucuacanio. ¹⁵ Naa pa niti Jesucristo cusonuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatioojua quiijani. Quiaríjia saniniuuja, Jesucristo cusonuucua, nojuajaari pa jiyanootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶ Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanootiuciaari pajaniya, na panishano muerasu pa quiniuria puetunujuanaa, nijaniya taucuaca, canaajuhuj. Naacuajitij, Jesucristoocua pa tiuushacari, paari juhua niquiriyatu tiaca nerani.

¹⁷ Nijaniya taucuacanaa, niaari juhua tucuacaanu quiijaca quiquiaari Pueyasojiniji. Canaa cutaraari juhua cateca quiijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooniu paniya pajaniyani.

¹⁸ Cristo jiyanootiniuucua na Que Pueyaso pajaniya, naacuajitij, pa naata pa Que

Pueyaso rupuenu pa secojosacari nojuaja, mariyata na Sohuanuraca pa quishacari, niajaniya, canaajuhuj. ¹⁹ Jesuucua tiuujiaa nia quishacari quiaritia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio ruconaa. Quiaritia, niaari seetanujuanaa Pueyaso pueya cutara. Pueyasoori maninia nia jiitiaajuhuj, taa na jiitiaquiaa puetunu na saquiriojosano pueyacuanaa. ²⁰ Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiuniaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijiujanaa cutara, cuno tia nujuatana. ²¹ Pueyasoori naa saquiriojoquiaa Neyanuucua tiuuriquiano pueya, na quiquiorano na tucuatana. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijaraari. ²² Niaari naajuhuj, Cristo nia rupuesacari, niarta Pueyaso pueya nia rupuesacarijuhuj, Pueyasora, niaari juhua riana, tucurunio. Nojuajaari nia morojotaquiaa na tia na tucuatana, na Sohuanu quiquiorano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatuucua niarta taucuaca, janiyari cunora nujuatesano quia nujuatejojuajiniani. ² Naa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatuura taucuaca, jiyanooshano nojori quiniuriajuhuj. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuj, taa na jiyanooquiaacuaa Judiocuacani. Pueyasojuaanaacuaajaari naa jiyasohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa niajanuyacuajani. ⁴ Naa jaara cua naajione serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanoohua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuacani. Na sequenu panishano caminiujiunia pueya na niishitiquiaarijiaarijuhuj. Pueyaso Sohuanucuaajaari cuno canaa niishitiquiaari. ⁶ Nijaniya taucuacanaa, niocuajaari Pueyaso miiniu panishano jiyasohuaja niajanuya: Jesucristoocua nia tiuuniucua, Pueyasoori puetunu Judiocuacarano na sequesanojuanaa jiyatenutaniya niaarajuhuj. Canaari Judiocuacani. Naajaa, Jesucristoocua nia tiuuniucua, Pueyasoori canaa rupuetequiaa niajanuya, juhua niquiriyatu pueyano pa quiniuria nera. Naajuhuj, cunora, Pueyasoori nia niquitioquiaa na Sohuanujuhuj, taa na sequequiaari Neyanu Jesucristoocua tiuujiaacuajani.

⁷ Janiyari Jesucristo ruuretaja quiquiaarini. Naajaa, jiyanoohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuataa cua quiniuria. ⁸ Jesucristo paraca cua quiniuucua tarijia, janiyara, janiya cuara socua rerequetesano pueyano quiiria puetunu cuarta Pueyaso pueyajinijijianaa. Saniniuujia, jiyanoohua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupajanaa Neyanu Jesucristojiniji pohuataa cua quiniuria taucuacaa. Janiyari cunora Pueyaso shuquiritiaa jiyanohuani. Cristo jiiitasano pajaniyanoni, puetunu cuno casaajanaari pa niishishoojua. ⁹ Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari

cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyaracaanu tama na niishitiajajiniaajaaja. Saniniuujia, nio pa quishacarini, nojuajaari na niishitiquiaari. Quiarijiani, jiyanoehua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanoehua niishijia cutara. Naacuajitij, Pueyaso seya, Satanás, samaruhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacuajitij, Jesucristoocua pa tiuuniuucua, pa naata juhuajaniya rupuenu na Que Pueyaso pa puereyaquiniutia. ¹³ Naa Pueyaso miiniuucua pajaniyaratej, majaari nioojia nia niquijiotenu Pueyasoocuaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua niajanijatej, shuquiriaatia nia quiri juhuari. Naa naquiya cua miishacaritij, cuno cuara shiniuuiuuria niajanijatej, socua pa Jiyaniijia tojijiaca nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucuaajuahuj, janiyari mojuquetaquiaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujuanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniuucuaajuahuj, janiyari niaacuara secojoquiaani, nojuaja cuara cumaquiiria jiyanoehua niajanijatej na Sohuanuta nioojiajinia. Na Sohuanuuri puetunu pa panishanojuanaa jiiitiana. ¹⁷ Naajuahuj, niaacuara secojoquiaanijia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajanijatej, nocua tiuujia nia quishacari. Naacuajitij, niocua niishiri taa Jesucristo panijatej jiyanoehua niajanijatej. Naacuajitij, majaari nioojia nia niquijiotenu quiniutianiya socua. ¹⁸ Naa Jesucristo panijatej nia niishishacari taritij, niaari puetunu Pueyaso pueyatajanaa niishiniutianiya taamuecate Cristo panijatej. Naajuahuj, niaari seetanujuanaa niishiniutianiya tee na panijatej pueetaani. Jesucristo panijatej jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiaconaja shanacujunu paniriquiani, majaari na puequeetej pa riuritanu quiniutianiya. ¹⁹ Seetanujuanaa, majaari pa naata niishiniu taa jiyanoehua na panijatej pajaniyatej. Naajaa, janiyari niaacuara secojoquiaa Pueyasoni, seetanujuanaa nioojiatej nia niishiniuria cuno, na panijatej. Naa jaara na panijatej niishiri, Pueyasojuanaari nioojiajinia quiniutianiya. Naacuajitij, niaari tojetaarucujatej nia panijatej quiniutianiya taa Pueyasocuaani.

²⁰ Naa Pueyaso miiniuucua manijatej, nojuaja cuara shuquiritiasaaria. Naa jiyanoehua na cumaacata na poonijosacari poojiajinijatej, nojuajaari na naata miiniu socua jiyanoehua queraatia pa masesanojinijatej nojuaja, pa niishiriojosanojinijatej. ²¹ Puetunu quijiacajanaa cuara niishiiria Pueyasoori jiyanoehua maninia. Nojori cuara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

4

Pueyaso Sohuanu pa jiiitiasacari, paari rupuetootesano quijiani

¹ Janijatej niya nujuatesano quijatej pa Jiyaniijiajinijatej cua poojotanuucua. Cunora, cua tojijatej. Janijatej nia sequeyani, saaja pa Jiyaniijia tojijatej nia quiri, seetanujuanaa maninia na muerasu nia quiniuria. Pueyasocuaajaari nia saquiriojoquiaari naa maninia

na muerasu nia quiniuria. ² Majaari niarta Pueyaso pueya rerequetejaca nia quiniu. Maninia miitioojuaca nia quiriquia. Puetunu casaajanaa rejeretajaca nia quirijiuhuj. Naa jiuujiaatioojuaca nia quiri nia panitioosacari. ³ Naa Pueyaso jiyanoootiootesacari nijaniyatej, pueyaracaanu nia jiyanoootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari nijaniya. ⁴ Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijiaara, mariyata niquiriyatu Sohuanuraca pa quishacarijuhuaj. Naa Jesucristoocua tiuujia pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijiaara. ⁶ Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacuaajaari tari jiitiaa tamaatia poonijosano pa miiniuriani, teyano Cristo niqutionu paniquiaari pajaniyacujani. Naacujitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuaaanu Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojiniijiri:

“Na quioosano pueya tacataquiaariuhua jiyocuacaanuuri. Nareja na niqutionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojuaja jiyocuacaanuujii rosequiaari coteenu, taraatia mijiria na mosaanura pocuara. ¹⁰ Nojuajani, jiyocuacaanuujii rosequiaarini, nojuajaari tojetaarucujanaa jiyocuacaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiya cajiniocujanaa na mishininiuria na cumaacata, puetunu jiyajanaanio. Naacujitij, nojuajaari puetunu tiquiyocujanaa quijia. ¹¹ Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano caminiujiuniaa nojori quiniuria. Saniniuujia, tamasaca jiyatequiaariiri Jesucristo niishiyashijiaca niqiaraa poojotanaa nojori quiniuria, Pueyaso jiyanooniuria nojorijiuhuj, Jesucristo nojori tiushacari. Tamasaca jiyatequiaariiri na tojitiajaca pueya jütianaa nojori quiniuria. Tamasaca jiyatequiaariiri na rupaa niishitiojonaa nojori quiniuria narta Pueyaso pueyara. ¹² Naacujitij, Jesucristoori na Sohuanuta cumaquiquiaa cana na paniani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhuj. Naa Jesucristoocua tiuujia pueya canesacari socuatej, Jesucristo cuaqueyari canequiaa. ¹³ Jesucristora poonijionaa pueyari naa poonijioquiaatej, paa cuara tojetaarucujanaa pa Jiyaniijia tojijia quiriijaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Nyanu niishijiaca quiriijaatijia. Naacujitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴ Naacujitij, majaari tari pa quiniu quiniutianiya juhua naatujua. Niacuajaari niishiya naatujooriiri na niishiriojosano jatanijia ritia. Noojia niqijiotejajaariuhuj. Naa juhua tariucua cumueeca mashaja pa quishacaritij, majaari que-naaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanoohua sapojonu niishijiaca, nojori tojitiajaca na tashuquiootenura Pueya-

sojiniji. ¹⁵ Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶ Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetootesano. Puetunu cunujuanaa jaara maninia poonijioquiaa jatiqúi, paari maninia quiyani. Pueyaso muerasuuri juhua pa cuaqueya jiitiasano casaa. Naacuajitij, puetunu Pueyaso muerasujuanaa jaara tama na poonijosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqúi rupuetesano pa quishacari, seetanujuanaa panitioojuaca pa quiniuria.

Cristoocua tiuujiaaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuucua. Naajuhuaaj, nojoriiri tama na panishanojuaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. ¹⁹ Naa pueyaracaanu sesa nojori miijonuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja miijiaca. Nojoriiri puetunu sacuaraatia casaajanaa miiniuucua jiyartuucono. ²⁰ Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹ Niaa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia miijiaca nia quiniuria, sesa nia miiniu nia tarinitianurajuhuaaj. ²² Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijaaja naa sesa miijiaca nia quiniuriatej. ²³ Quiarijia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niq-uitiosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

²⁵ Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiiria seetanujuanaa.

²⁶ Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaaj, nia jaara juaari, majaari nia juaaquiaca nia ninitianu. ²⁷ Ritia nia jecatoore, Sesaaca mariqui sesa nia miitiriiri nia jiyanoyaquishacari.

²⁸ Nio nia tojirijihuaaj. Cante nohuasejojua quiyajaani, cuara tarinitiaara nohuasejonu. Saniniuujia cuara poonijioora tama na numatucuatajaaja cutara. Naacuajitij, nojuaja na naata na jiitiasanojiniji nareja niqutionu tamasaca, cante na panishano jiitiaaquiyani.

²⁹ Naajuhuaaj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuaaj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Naa naata nojori cumaquiniu. Naa naata nojori nacasunujuhuaaj. Naacuajitij, nia naata nojori shiniujiuniu saaja Pueyaso tojiijaca nojori quiniuria. ³⁰ Majaari sesa miijiaca nia quiniu, niaa mariqui nioojiajinia quiijia Pueyaso Sohuanu taraajoreeri. Pueyasocuaajaari juhua na sesa naajiotaquiaari

poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹ Pueyanaa, majaari jiyanoashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaanijianaa nia tarinitiare, puetunu sesa nia miiniuujianaanio. ³² Saniniuujia, maninia mitiojuaca nia quiri. Taraajetoojuaca nia quirijihuaaj. Naajuhuaaj, jiyanoootiojuaca nia quirijihuaaj, taa Pueyaso jiyanooquiaari pajaniyacuaani, Neyanuucua pa tiuushacari.

5

Seetanujuanaa juhua Pueyaso pueya nia quiri

¹ Pueyanaa, niaacuajaari Pueyaso panishano muerasuniyojua. Cunora, pueyara-caanu juhua nojuaja nia quiniuria nia saniniuujuri. ² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanojua nia paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanojua. Naa miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanojua sacuaraatia Pueyasora. Majaari quenaaja jiyano sacuaraatia casaajiniji nia pocoojonu. Naajuhuaaj, majaari tamasaca jiiitiasanoocua jiaatiajaca nia quiniu. ⁴ Majaari najuhuaana sacuaraatia pocuajaca nia quiniuujihuaaj. Majaari najuhuaana nia niti nia taquiriocuatenu juhua maninia pocuaja. Naajuhuaaj, majaari sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maninuhuaqueetanura Pueyaso. ⁵ Niaacuajaari tari niishiya, cante juhujaniya na camishoo maajipohua numuetucujujani, maajishuriuhuanio, nojoriiri jiyanojua taraatia quiniutianiya. Pueyaso jiiitiasano na tojijiaca pueyaranoni, majaari na quiniu quiniutianiya naa miijiaca pueyara. Naa taraatia miishaanutaniyajaariuhua puetunu tamasaca jiiitiasanoocua jiaatiajacajanaa. Pueyasora, jiyano pueyari jiyanojua sesa, juhua juaashiquiata shipinijosano pueyasohua secojonuujuaca. ⁶ Naacuajitij pueyanaa, majaari nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuaajaari juaatishaare. Tari saniitioya na tojiyashijiaca pueyari. ⁷ Cunora pueyanaa, majaari quenaaja naa sacuaraatia miijiaca nia cojiniu.

⁸ Pueyaso niishiyashijiaca nia quishacarijia tarijia pueyanaa, niaari ninishiqui quijiaca quiquiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. ⁹ Paa jaara seetanujuanaa cuhuashiqui quijiaca quirini, paari maninia miijiaca quiniutianiyanani. Naajuhuaaj, paari tojetaarucujanaa sesa miyashijiaca quiniutianiyanani. Paari seetanujuanaa Pueyaso Rupaa tojijiaca quiniutianiyaajuhuaaj. ¹⁰ Naajuhuaaj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori miijosano sacuaraatiaari tojetaarucujanaa jiyanojua cararaatia. Pohuataaquishoo. ¹³ Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacuaajaari nojori jiuujia cuhuataquiaa na

cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

¹⁵ Naacuajitij cua panishano pueyanaa, tama nia cuaqueyajaaja nia cojuare jiyanoehua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶ Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiri quia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhua, majaari nia mashaasequejonuunu. Niaa jaara mashaaseca quiri quia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiacara nia quiniuriajuhua. ¹⁹ Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhua, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatjanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaca nia quiniuucua.

Taa quijia pa quiyani Pueyaso tojijia pa quishacari

²¹ Pueyanaa, maninia tojitioojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

²² Maajipohuanaa, nia niyaca tojijiacara nia quiri, taa pa tojiquiaa pa Jiyaniijiacuaani. ²³ Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. ²⁴ Naacuajitij, taa Jesucristo saquiriojosano pueya na tojitiajaca quiyacuuaani, maajipohua cuaara naa pueyaracaanu neyaca tojitiajaca quiri juhua.

²⁵ Canuuna, nia niquiocohua nia paniri taa Jesucristo na saquiriojosano pueyarano paniquiaaricuaa jiyanoehua. Nojuajaari cunora tama na cuaqueyajaaja tarinitiaquiari na mosaanura. ²⁶ Nojuajaari naa miiquiaariti seetanujuanaa nerano pa quiniuria. Tojetaarucuaajanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucuaajanaa tari jeequejosano quirini, pa Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucuaajanaa sesa miyashijia quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano niyacoo, tojetaarucuaajanaa jiyanoehua cohuajaque toqueraca. ²⁸ Pueyanaa, taa nia paniyacuuaa tama nia cuaqueyajaajani, naa nia paniri nia niquiocuajuhua. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijini. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiri na que, na nucua shuriucuaaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuanaacuajaari pa niishitiojoquiari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu

Pueyaso saquiriojosano pueya maanujuanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijiaca nia quiri juhua tama nia cuaqueyajaaja. Naajuhuj, puetunu maajipohuajanaa cuaara neyaca tojijiaca quiiria.

6

¹ Muerasunaa, pa Jiyaniijia tojijiaca nia quishacari, nia queya tojijiaca nia quirijiuhuj. Naa jaara naa miiritij, cunoori jyanohua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijiaca nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuajani taa na tojitiajaca na miiniutianiya maniniani.

⁴ Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Nia niishitiojore maniniajuhuj. Nojori nia nacasurejuhuj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niquishacari niajaniya, nojori shuquiritanura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Naa jaara naa maninia poonijionuujuaca quiriquatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutaniya maninia pa miiniucua mijiria, poonijotesano pueya, camarnuuj pueyanio.

⁹ Niajanijuhuj seya jitiacajanaa, nio sequesano nia tojiri. Maninia nia jitiare nia poonitijosano pueya. Majaari na miananajonu. Nia niishirijihuj, niaari mariyata niquiriyatu Jiyaniijiaraca, niajaniya, nojorijihuj. Nojuajaari jiyocuacaanu quiija. Naaratej, tamonu pueyanoori maja rimiajata nera, narta pueyanojiniji.

Taate pa naata Sesaaca nujuatanuni

¹⁰ Quiarijia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jyanohua cumueeca nioojia quiniuria jyanohua na cumaacata. ¹¹ Puetunu Pueyaso niquitiosano casaajanaa nia cushiyore juhua toqueya, Sesaaca sapojiaquiniucua niajaniya. ¹² Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quiija jia cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quiija pueya nojori jitianura. Nojoriiri Pueyaso paraajuhuj. ¹³ Naaratej Pueyaso pueyanaa, puetunu Pueyaso niqutiojosanojuanaa nia paracata nia miaquetoojotaqueya nia cushiyore. Naacuajitij, sesashiquiari niocua na nujuatare, Sesaaca saniniuujishacari niajaniya. Naa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriquiajanaa na mishiquiojonura cashiicuaji. Naajuhuj, na sapatuhua cushiyonuujaariuhuj. Na nareenee pootujuaari, nocuaji na nujutajara cashi. Naajuhuj, na naca na cojuatajara, cumoco casaa cushiyonuujaari. Na nijiniaquetucujaja mueruu pootujuaariuhuj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiaca nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. ¹⁵ Pueyaracaanu jeenucuasano nia quiri quia juhua tariucua sapatu cushinio. Naa tariucua pueca nia quiri quia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni paniyajuhuj. ¹⁶ Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasooacuaji. Naajuhuj, Pueyaso Rupaa nia niishiri maninia. Cunocujajaari Pueyaso Sohuanu nijiniaquetucujaja mueruu, pueya jiuujiajinia na poonijionura. ¹⁸ Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuri quia pueyaracaanu, naajuhuj, na Sohuanu niishitishacari niajanija casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuri quia puetunu niarta Pueyaso pueyacuarajanaa. ¹⁹ Naajuhuj, cucuara nia secojonuure, Pueyaso niqutionura janiya na niishitiaja, maninia cua pohuatanura Jesujiniji cua puereyaquiniutia. Cucuara nia secojorejuhuj, maatia cua niishitiniuria pueya, Pueyasoori puetunu pueyajanaa jiyanooni paniya saaja Jesucristoocua nojori tiuushacari. ²⁰ Pueyasojuaanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹ Pa panishano Tíquicojajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. ²² Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuara cuniqui quiniaa parta Pueyaso pueya jiuujia cajitiiria, juhujaniya nia quiniuria. Nojori cuara nia jiyateera panitiojuacarajuhuj, seetanujuanaa Jesucristoocua tiuujia nia quiniurijuhuj. ²⁴ Naajuhuj, Pueyaso cuara puetunu pa Jiyaniijia panijiacajanaa cumaquiiira na Sohuanuta, shuquiriaatia nojori quiniuria, cuno pojori, canapuate seetanujuanaa Jesucristo panijiacujani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni. Janiyari Timoteota nia saruhuataani, Filipino tiacajinia quiniaa Pueyaso pueyanaa. Canaari Jesucristo poonitijosano pueyajuhuaaj. Canaari nio naajiyani puetunu Pueyaso jatanishano pueyacuaraanaa, nojori tiuuniuucua Neyanu Jesuucua. Canaari cuniqui nia jiitianaa pueyacuara naajiyajuhuaaj, nia cumaquiniaa pueyacuaraano. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuara cumaquiiria niajaniya na Sohuanuta. Nojori cuara cajitiiria nioojiajuhuaaj.

Pablo secojosano, Filipino tiacajinia quiniaa Pueyaso pueyacuara

³ Pueyaracaanu cua niishiriojosacari niajaniya, janiyari pa Pueyaso sequequiaani “paacarasho”, maninia na muerasu nia quiniuucua. ⁴ Cua secojosacari, janiyari pueyaracaanu puetunu niaacuaraanaa cua shuquiriniutia masequiaa Pueyasoni. ⁵ Naa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. ⁶ Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniacuaani, nojua-jaari naa nia jeenucuanu tucuanutaniya, Jesucristota pa naacuneetosacarihua. ⁷ Majaari cua jiyajenenu naa cua taacanyaquishacari niaacuaji. Janiyacuajaari tari naa niishiyani, jyanohua cua paniniuucua niajaniya. Naajuhuaaj, niaari cua cojiritiasaaquiaa cumaaca niquitiosaanujuhuaaj. Naacuajiti cua naata Jesucristojiniji pohuatanu niya nio nujuatejojuajinia, naajuhuaaj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jyanoo-niujuhuaaj. Naa nioojia rupuesacari cojiatej, cunoori jyanohua cua shiniujuquiaa Jesucristojiniji cua pohuatanura. ⁸ Pueyasocujaari niishiya taa cua paniya jyanohua niajaniyani, Jesucristo paniniu cua jiitiasacari cojiajinia. ⁹ Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jiitia-nurajuhuaaj, seetanujuanaa maninia panitioojuaca nia quiniuria. ¹⁰ Naacuajitij, niaari niishiniutianiya teyano casaate seetanujuanaa maninia niaarani, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaca quiniutianiya, tojetaarucuajanaa sesa miyashijiaca. ¹¹ Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniuucua, pueyari Pueyaso timitianutaniya.

Pabloori saaja Jesucristora quiniu panijia

¹² Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriquiano cua quiasaanucua, naquiya cua miishacarijuhuaaj, cunoori seetanujuanaa pueya naacuya Jesucristojiniji tojishaanura socua. ¹³ Naacuajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanuucua. Majaari saaja soldadohua niishiniu cuno, mariyata puetunu pueyajanaari na niishiyajuhuaaj. ¹⁴ Parta Pueyaso pueyari namitia niishiyajuhuaaj, janiyari cumayocua casaata morotasaarucuaani. Naacuajitij, cunoori

quera puetunu nojorijianaa shiniujiuriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiushacari socua.

¹⁵ Seetanujuanaa, noojiaqueya nojorijinijinoori Cristojiniji pohuatanuuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pohuatanuuquiaa nojori shuquiritiniuria Pueyaso. ¹⁶ Nojoriiri naa pohuatanuuquiaaquij, Jesucristo panijiaca nojori quiniucua. Nojoricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji. ¹⁷ Tamasacaari saniniuujia Jesucristojiniji pohuatanuuquiaacujua nojori shocotanu paniniutia janiya. Naa nojori miishacaritij, nojoriiri socua cua tacaatinu paniya juucua. Majaari nojori pohuatanunu quiquiaa seetanujuanaa nojori paniniutia pa Jiyaniijia Jesucristo. ¹⁸ Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuuquiaa. Janiyari cunora shuquiriaatia quiyani.

¹⁹ Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maninaraja. Naa miiniutianiyari nia secojonuunuucua cucuara, naajuhua, Jesucristo Sohuanu cumaquiniucua janiya. ²⁰ Naacuajitij, janiyacujaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuya-jaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanojua paniyani cua Jiyaniijia Jesucristo timitiasaanura. ²¹ Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquiajani, cua naata socua poonijionu cua Jiyaniijiaara. Naacuajitij, quiarijia, majaari cua naata saquiriojonu; rishiniu, shaajenu soj. ²³ Naaratej, janiyari coojia niqijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maninaruhua mijiria cua rishiniuraja, pa Jiyaniijiaacua cua shiniujiuniuria socua nijaniya. ²⁵ Naa cua niishiriojosacaritij, janiyacujaari tari seetanujuanaa niishiyani, janiyari juhuanujuaja mijiria niaata rishiniutianiyani. Naacuajitij, cua naata socua nia naacunu, socua pa Jiyaniijiaacua nia tiuniuria. Cua naata nia naacunujuhuaj, socua shuquiriaatia quiijaca nia quiniuria nocua nia tiushacari. ²⁶ Naa cua rishishacari mijiriatej, janiyari niaacua quianutaniyani cua niquiniuria nijaniya. Naa cua quishacariuhua niaatatej, niaari Jesucristo timitianutaniya maninia na miiniucua janiya.

²⁷ Pueyaso pueyanaa, nio nia sequenu paniyanijia, seetanujuanaa maninia miijiacua nia quiri taa Jesucristo rootaacujani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijaniyajiniji pohuataaariquiani, taa jiyanojua Jesucristo tojijiacua nia quiyajaani, jiyanojua panitiojuacajuhua. Naajuhua, jatiqiu Jesucristora nia poonijioteriquiani, na rupaa nia pohuatanuucua. ²⁸ Naajuhua, Jesucristo Rupaa paraa puereyashijiacara nia jiyateriquiani. Nojori piriyojosacari nijaniya, majaari nojori puerenu quenaaja. Naa jaara naa nojori puereyashijiacua quiritij, nojoriiri cunojiniji niishiniutianiya, nojoriiri seetanujuanaa saniitosocoriquiano taa nia pohuatanuuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu nijaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocujaari naa cumaquijia na pueyatej, puereyashijianucua nojori quiniuria. ²⁹ Pueyasocujaari nia tiutiquiaari Neyanuucua, na muerasu nia quiniuria. Naajuhua, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuhua, taa

Neyanu miiquiaari naquiya pocuaracuaani. ³⁰ Nia niishiri, janiya, niajanijuhuaaj, paari mariyata naquiya miiniu rejeretaquiaani, pa Jiyaniijara pa poonijosacari. Ni-aacuaajaari tari niqiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutianijuhuaaj, taa cua tarinitiaaquiya Jesucristojiniji pohuatanuni, naajaa naquiya cua miishacari.

2

Juhua Cristo pa quirij, taa na quiquiaaricuaani

¹ Naacuajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu niajanijani, maja nia tacaaniuria. Nia niishirijuhuaaj taa na paniniu cumanijiaquiaa niajanijani, naajuhuaaj, taa Pueyaso Sohuanu jiuujiaatiootequiaa niajanijani. Nia niishirijuhuaaj taa Cristo taraajequiaa jyanohua niaacuani. Naa panitiojuaca nia quirijuhuaaj. ² Jiuujiaatiojuaca nia quirijuhuaaj, seetanujanaa panitiojuaca nia quishacari. Naajuhuaaj, nareja nia shanacure Pueyaso Sohuanu niaacua, nojuaja cuaara puetunu niajanijanaa ruputeera, jatiqui nia poonijionura pa Jiyaniijara. Naa jaara naa puetunu nio cua sequesanojanaa miijia quirij, niaari tojetaarucujanaa shuquiriaatia quijara cua jiyatenutaniya. ³ Maninia nia miishacari, majaari na miiniu juhua tamasa nia shocotanura, nia jyanishacari niaa naasucuaari socua maninia miijaca tamacajiniji. Puetunu maninia nia miishanojanaa nia miiri tamasa nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijaca niajanijani. ⁴ Naa jaara maninia miijaca quiriquiacuaa, majaari tama maninia miijacajaaja nia quiniu. Niarta Pueyaso puey-acua nia taraajerejuhuaaj, maninia quijaca nojori quiniurijuhuaaj.

⁵ Tama nia cuaqueyajaaja nia tarinitiare niarta pueyacu nia taraajesacari, taa Jesucristo tarinitiaquiaari tama na cuaqueyajaaja pocuaracuaani. ⁶ Nojuajaari naa miiquiaaritia: tariucuaaanu, nojuacuajaari Pueyaso quijajuhuanajaj, juhua na Que. Naajaa, nojuajaari maja na cuaqueya na jiyatenu quiquiaari seetanujanaa juhua na Que Pueyaso na quiniuria. ⁷ Nojuajaari jyanohua cumaacaraca Jiyaniijia na quiniu tarinitiaquiaari, juhua nareja poonijotesano pueyano na quiniuria. Naaratej, mijiria rasaaquiaari seetanujanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojijia na quishacari, nojuajaari tama na cuaqueyajaaja tarinitiaquiaari na mosaanura. Seetanujanaa cararaatia cusoquiaari niyacutesanojinia teetesano, juhua sesa miijia pueyano. ⁹ Naaratej, Pueyasoori seetanujanaa Jiyani-ijiarajanaa na jiyatequiaari puetunu jyanijianucujinijianaa. Na sesojoquiaari-iaarijuhuaaj “Jesu”. Niiori sequeya “pocujaj Tacuna”. Majaari socua tamonu pocujaj tacuna quiniu mijiria, jiyocuaaanunio. ¹⁰ Puetunu pueyajanaari niishiniutianiya Jesuuri Jiyaniijajanaa. Maja tamonu. Cunora, nocuara mojuquetaconutaniyari puetunu jiyocuaaanu quijacajanaa, puetunu mijiria quijacajanaajuhuaaj, puetunu jiya cariquimia quijacajanaanio. ¹¹ Puetunu tamaatia rupaaca pocujacajanaari niishiniutianiya Jesucristoori Jiyaniijajanaa cutara. Naa Pueyaso miiniuucua Neyanutej, puetunu nojorijianaari niishiniutianiya, Pueyasoori tojetaarucujanaa maninia miijia.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojitiajaca nia quiri. Naatej, taa pueyaracaanu cua tojitiajaca nia quiquiaaricujani niaata cua quishacari, quiarijia socua cua tojitiajaca nia quiri, tucuaaanu cua quishacari niajanijani. Naacuajitij, seetanujanaa pa Jiyaniijia tojitiajaca nia quiri nia niishini-uria niaari seetanujanaa Pueyaso pueya. Majaari na rupaa ruuretanu. Jyanohua puereeta quiniutianiyari na tojiyashijianucua. ¹³ Pueyasojuanaacuaajaari nioojiajinia

poonijioquiaa maninia nia miiniu paniniuria. Na cumaaca nia niquitioquiaajaariuhua j maninia nia miiniuria nera nia panishano, taa na paniyacujani.

¹⁴ Cunora, puetunu nera nia miishanojuanaa nia miiri shitimia, maja nia riri-jiotanuta. Majaari nocua juayonuujutanujuhua j. ¹⁵ Naa jaara naa maninia miijiaca quiriritij, majaari Pueyaso niishiyashijiaca pueya naata quiniutianiya sesa na saquirio-jotanura niaacuara. Naaratej, tojetaarucujanaa sesa miyashijiaca Pueyaso niquiohua nia quiri, mijiria sesa miijiaca pueya niquiara. Nojoriiri seetanujuanaa sacuaraatia, Pueyaso tojiyashijiaca. Cuno juhua ninishiqui quijiaca pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. ¹⁶ Pa samiitianijia rupaa Jesucristojiniji nia jiitiasanoni, niaari cunota cuhuataquiaa mijiria quiniaa. Naa maninia Pueyaso pueya nia quiniuucuatej, Cristo jaara tiuquiriohua na rijionuhuara pajaniya, janiyari jiyano hua nia timitianutaniyani. Janiyari naa nia timitianutaniya cua niishishacari puetunu cua poonijosanojuanaari maja najuhua na quiniu quiquiaari. Naajuhua j, majaari najuhua na quiya cua miiniu quiquiaar-ijuhua j. ¹⁷ Niaacuajaari maninia miijiaca Pueyasocua tiuujia nia quiniuucua, Jesucristojiniji cua pohuatanuucua niajaniya. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasaare Jesucristojiniji cua pohuatanuucua niajaniyani, cua nanacaari shoonutaniya juhua Pueyasora niquitiosocoriquiano. Janiya jaara naa miishaareni, janiyari cua nanacata tucatanutaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiyan. Janiyari puetunu niajaniyatajanaa jiyano hua timiniutianiyan. ¹⁸ Shuquiriaatia nia quirijiuhua j, janiya jaara mosaareni, cua Jiyaniijia tojijia cua quiniuucua. Cua cojitiuri shuquiriniujuhua j.

Pablo pohuatasano Timoteojiniji, Epafroditojinijinio

¹⁹ Janiyari niaacuaji tojinu paniyani taa nia quiyani, shuquiriaatia cua quiniurijuhua j janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua niajaniyajiniji saniniuujia. Janiyari cua Jiyaniijia Jesucua tiuyani na rishitiniuria janiya, niajaniyajiniji cua tojiniuria. ²⁰ Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuhua j, na naacunura niajaniya, maninia nia quiniuria. ²¹ Tamasacaari saniniuujia saaja tama nojori panishano casaacuajaaja tacaajia, maja Jesucristo casaacua. ²² Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴ Naajaa, janiyacuaajaari cua Jiyaniijiaacua tiuyani cua cartesaanura niiquiji, niaacua cua quianura ritiajuhua j.

²⁵ Cua sashishacari Timoteo cua jiyaronura niaacua, maniniacujaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhua j. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶ Nojuajaari puetunu niajaniyajanaa niquiniuucua jiaatiaa. Na niishishacari niaari jiyano hua nocua tacaquiyoa nia niishiniuucua nojuaja cusosu quiquianu, cunora, nojuajaari ritia nia niquiniuria tacaya. ²⁷ Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaariuhua j, maja cua taraajenu jiyacatenura socua. ²⁸ Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquihuano. Naa shuquiriaatia nia quishacariuhuatej, janiyari coojia cajitiniutianiyaacuhua j. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa

panijiaca nia quiri, noo pojori pa Jiyaniijiara poonijionuujuacatej taa Epafroditocuaani. ³⁰Nojuacuajaari quera shaajeyarucuaa Cristora na poonijosacari. Cocuaatia miijiocanujaariuhuj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

3

Nio rootasano tojiijaca pa quiri cutara

¹ Quiaritia saniniuujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaniya tari cua sequesano niajaniya. Cunoori seetanujuanaa maninia niaara. ²Tama nia cuaqueyajaaja nia cojuare cuno sacuaraatia niishitiojonuujuaca pueyacuaji, cuno pojoriicuaji, sesa miijiacani. Nojoriiri pueya cararaatiuuquia co miatejonuujuaca najuhuanaj, nojori jyanishacari nojori miatesano pueyari seetanujuaanaa Pueyaso pueya. ³Paa cutaraari seetanujuanaa Pueyaso pueyani, Pueyaso Sohuanu jyatenuucua pajaniya Pueyaso tojiijaca pa quiniuria. Paari timiquiaaaniuhuj Jesucristo rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jyaniquiaarijiuhuj. ⁵Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicuajani, seetanujuaanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujinino supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicuajinino cua supuenucua. Naajuhuj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarijiuhuj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jyanohua supuetana Moisés Rootasano tojiijaca puetunu cuarta Judiocuacajinijinijuanaa. ⁶Jiyacaritij, janiyari cua niishitiojonaa tojiijia quiquiaari jyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojitiajaca miiijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiaritia saniniuujia, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiaritia najuhuaana janiyara. ⁸Quiarijiani, janiyari socua cua Jiyaniijia Jesucristo niishiniuria jiaatiao jyanohuani. Naaratej, puetunu tariucuaaanu cua timitiasano casaajanaari najuhuaana janiyara quiaritia. Cristo pueyano cua quiniuucua, janiyari juhua taanuusaaquiaari puetunu cuarta Judiocuacajinijijianaani. Naa Cristo tojiijara cua quiniuucuatej, cua shipininiojiniji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹Majaari cua jyaniniu janiya sesa miyashijiani, Moisés Rootasano cua tojiniuucua. Saniniuujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jyanooquiaari, maja na sesacunura janiya, Neyanuucua cua tiuuniuucua. ¹⁰Janiyari Jesucristo niishiniu paniya jyanohua socuani, seetanujuanaa nata rupuetootesano cua quiniuria. Janiyari na

samiitianitiaja cumaaca paniyajaaniuhuj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanoehua taraatia miishaaquiaari mijiria na quishacari, na Que tojjia na quiniuucua. Janiya cuara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarija na cuaqueya tarinitiaquiaari na mosaanura. Naajuhuj, tama janiya-jaarija cua cuaqueya tarinitiaja quiniu paniyani, cua miiniuria puetunu cua Jiyaniija sequesanojuanaa janiya. ¹¹ Janiyari tojetaarucujanaa maninia miija quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quirij, Pueyaso muerasu pa quishacari

¹² Juhuanujuaja majaari cua quiniu tojetaarucujanaa maninia miija. Sesa miiniu niishiyajaanija. Jeecasoojuaanija. Naajaa, majaari cua tacaani. Jesucristocujaari cua jiyatequiaari na pueyano cua quiniuria. Naaratej, janiyari jiyanoehua saniniujuquiaani maninia na pueyano cua quiniuria. ¹³ Cua panishano cuarta Pueyaso muerasuna, janiyari niishiyacuajani, juhuanujuaja maja maninia cua quiniu taa cua Jiyaniija quiyacuaani. Naajaa, majaari cua tariniinu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijinara niqiyashija. Naajuhuj, majaari cua niishiriojonu maninia cua miishano tariucua. Janiyari saaja cua tacoji niqiquiaani, socua maninia miija cua quiniuria tari cua quiniujiniji. ¹⁴ Pueya tacuarishijosacari, netena jaara narta netecuatunaa shocotare, nojuajaari shanoehua casaa niquitiosaaquiaa. Majaari najuhua na netenu jiyanoehua. Janiyaraari naajuhuj. Majaari najuhua jiyanoehua cua saniniujuuniu quiquiaa, maninia cua quiniuria juhua Cristojuhuj. Mijiria cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristoocua tiujia cua quiniuucua.

¹⁵ Pueyanaa, nijaniya, cante seetanujuanaa Pueyaso tojjiaa quiyani, mariyata naa nia niishiriojore taa cua niishiriojiyacuaani. Naatej, jiyanoehua nia saniniujiuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuara na niishitiiria maninia. ¹⁶ Paa jaara maninia miiniu niishijiaa quirini, majaari pa jiyacatenu saaja sesa miiniuucua. Saniya maninia miijiacara pa quiri socua.

¹⁷ Cuarta Pueyaso pueyanaa, maninia miijiaa nia quiri taa canaa nia niqiquiaari maninia miyanocuaani. Naajuhuj, maninia miijiaa nia niqiri, cante maninia miiquiaani taa canaa niishitiquiaari nijaniyacujani, maninia canaa miishacari. Nojorijiniji nia niishiriquia, maninia nia miiniuriajuhuaj. ¹⁸ Jesucristocujaari pocuara cusocuaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhujaniya miiquiaa sesa. Janiyacuajaari nojorijiniji pohuatanu pacutejoquiaari nijaniyani, maja juhua nojori nia quiniuria. Quiaritia cua nujuquenuta, janiyari nia pohuatarohuanuhua jiyano sesa miijiacajiniji. Nojoriiri pa Jiyaniija cusonu sojeaca. Nojoriiri maja na paniniu naquiya na miishaanura Cristo tojjiaa nojori quiniuucua. ¹⁹ Nojoriiri puetunu quejoosaanutaniyajanaa mani quiquiojinia. Nojoriiri tama nojori panishanojuaja jiyatecanu juhua nojori pueyasora. Naa sesa miijiaa nojori quishacaritij, majaari nojori niishiniu caririquiniu. Saaja sesa na miitiushano timitiatuuyari. Nojoriiri saaja mijiria casaacua jiaatiajaca. ²⁰ Pajaniya saniniuujia, paa cutaraari tari jiyatesaaquiaari jiyocuaaanu quijiacararoni. Paari cuniquiji pocuaji Tacuna niniuria sashiyani. Nojuacuajaari pa Jiyaniija Jesucristo. ²¹ Jiyanoehua na cumacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajujuaj. Nojuajaari cumaacaraca puetunu casaajanaa na tojitiniuria nojuaja. Naacujitij, nojuajaari na naata moqueja pa cuaqueya jataniniu, pueyaracaanu rishijiaa pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojjiaca nia quiri. Janiyari jiyanoehua nia niqiniuucua jiaatiaani. Nia niqiiara cua pohuatanuucua Pueyaso rupaa, niaaquiiri seetanjuanaa na tojjiaca quiqiiara. Naa jiyanoehua maninia Pueyaso muerasu nia quiniuucuatej, cunoori jiyanoehua cua timitiqiiara.

² Janiyari Evodia sequeya cutarani, narta maaji Síntiquenio, nojori cuaara jiyanoetioora juhua seetanjuanaa Pueyasoocua tiuujia maajipohua. ³ Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maajipohua quia jiyanoetiooterohua, nojori rupuetoonuhua. Cuno maajipohuacuajaari jaarajaaja cuata poonijionuuquiiara, Clementejuhua, pa Jiyaniijiajiniji cua pohuatasacari. Naa cuata poonijionuuquiiara-ijiaariuhua tamasa, canapute cuata quiqiiaricuajani. Nojori sesacacuajaari tari naajiotasano quia Pueyaso nequesoretuneejini, tee cuniqui pueyaracaanu rishijiacarano sesaca naajiotasano quiyacuajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. ⁵ Puetunu pueyajanaa cuaara niishiiria niaari seetanjuanaa maninia pueya, maja juajia. Pa Jiyaniijiacuajaari quera tiuquiihua.

⁶ Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhua “paacarasho”. ⁷ Naa nia miishacaritij, Pueyaso nioojia cajitiniutianiya. Naa Pueyaso cajitiniuucua nioojiatej, majaari socua nioojia tacaaniu quiniutianiya, nia niishitiajanio. Naacuajitij, niocua juhujaniya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoehua jiyajeneta. Nocuaji jiuujiatesano.

Saaja maninia casaacua niishiriojuaca nia quiriqiiara

⁸ Naajuhua cuarta Pueyaso pueyanaa, nio tojjiaca nia quiriuhua. Pueyaracaanu saaja seetanjuanaa rupaacua niishiriojuaca nia quiriqiiara. Naajuhua, saaja rerequeteyaquishoo casaacua nia niishiriojore. Saaja maninia casaacua niishiriojonujuaca nia quiri, maja cararaatia casaacua. Naajuhua, saaja Pueyaso shuquiritiasano casaacua nia niishiriojore, maja Pueyaso sesacasano casaacua. Naacuajitij, puetunu maninia casaacujanaa nia niishiriojore, casaajinijiti pueya naata Pueyaso shuquiritianuni.

⁹ Maninia nia miiriquia pueyaracaanu, taa cua niishitiojoquiiara niajaniiacuajani. Niaacuajaari cua rootasano tojiqiiara. Naajuhua, niaacuajaari cua niqiiara taa miijia cua quiqiiarini. Naa jaara naa miijia quiriuhua, poojia cajitiniya Pueyaso niaata quiniutianiyajuhua.

Pablo pohuatasano, Filipo tiacajinia quiniia Pueyaso pueya jiyaronuucua cumaneeca nera

¹⁰ Janiyari jiyanoehua cua Jiyaniijia timitiaani juhua shusha nia niishiniuuquiihua janiya, cucua nia jiyaronuucua nia reratesano cumaneeca. Naa cua sequesacari niajaniiatej, majaari nia jiyaniini janiya nia sequeyani niaari cua niyajetacanu. Maja. Janiiacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajaniiatej cua panishano cua jiiitaaquiniuucua. Maja. Janiiacuajaari tari jiyartuunoni, juhujaniya cua quiniuria cua jiiitiasanoniyajuata. ¹² Naajuhua, janiyari niishiyani juhujaniya cua quiniuria cua panishano cua jiiitaaquishacari. Naajuhua, janiyari niishiyani taa quishanote puetunu cua panishanojuanaa cua jiiitiasacari. Janiiari tariucua saniiuujishanoni puetunu casaajanaa cua rejeretanura. Juhujaniya

quiniu niishiyaniija miaaajaraca cua quishacari, miaajeeju cua quishacarijuhuaj. Cua naata juhuajaniya quiniu casamiiju cua quishacarijuhuaj, maja saaja casamiriaca cua quishacari. ¹³ Cua naata rejeretanu puetunujuanaa, Cristo cumaquishacari janiya. ¹⁴ Naajaa, niaari maninia miiriucuaa nia cumaneeca nia jiyarosacari cucua, naquiya cua miishacari niya. Niaari niarta pueyanoocua taraajeja cutara.

¹⁵ Naajuhuaaj, Macedonia jiyajiniji cua quiasacari nia shuriucuaaji Filipino tiacajiniji, tamonu jiyacajinia cua pohuatanura Pueyaso rupaa, saaja nijaniya cutaraari cucua jiyanoocuaari. Cunoori quiquiaari shushajanaa Jesucristoocua tiuujia nia quishacari. Jiyacarij, niaari nia reratesano cumaneeca jiyaroquiaari cucua, shuquiriatia nia quishacari cua pohuatanuucua nia niqiara Jesucristojiniji. ¹⁶ Juhuanajuaja nia Macedonia jiyajinia cua quishacarija, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyaracaanu nia niqutiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacujitij, Pueyasoori saniniuujia socua queraatia nia niqutionutaniyacujua. ¹⁸ Epafroditocuaajaari puetunu nia jiyarosano cumaneecajanaa cucua tiuquitiaseecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosanoi, cunoori juhua Pueyasora niqutiosano casaa. Nera, cunoori juhua shanohua jaanutaja catijiasano nocuara. Na shuqiritiriiri. ¹⁹ Naaratej, cua Jiyaniija Pueyasoori puetunu nia jitiiaquishoo casaajanaa nia niqutionutaniya. ¿Pueyasoteeri casamiiju? ¡Maja! Nia rupuesacari Neyanu Jesucristo, puetunu na jitiiasanojuanaari niaaranojuhuaj. ²⁰ ¡Pa Que Pueyasoori jiyanohua maninia! Saaja nojuaja pa shuqiritiare pueyaracaanu. Cuaara naa quiiriatej.

Nata quiniaata Pablo saruhuatasacari narta Pueyaso pueya

²¹ Quiria nia sarhuatare puetunu Jesucristo jiyanooshano pueyajanaa. Niya cuata quiniaa Pueyaso pueyari nia sarhuataajuhuaaj. ²² Naajuhuaaj, Jesucristoocua tiuujia jiyaniija Césarra poonijionaa pueyari nia sarhuataajaacuhuaaj, puetunu niya Jesucristoocua tiuujiacajanaanio.

²³ Pa Jiyaniija Jesucristo cuaara cumaquiiria puetunu nioojiajanaa. Tariucuaaja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaa naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiya nionijia. ² Niaacuara naajiyaniija, canapue Pueyaso saquiriojoquiaaricuajani tama nerajaaja nia quiniuria. Niajaniyacuaajaari maninia tiuquuaa Pueyasocua, Cristo rupuesano nia quishacari. Pa Que Pueyaso cuaara cumaquiiria niajaniya, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucua tiuuniaa pueyacuara

³⁻⁴ Canaari pohuatasaacanuni taa nia tiuquuaa Jesucristoocuaani, naajuhuaaj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quena”. ⁵ Niaari naa maninia quiyatej, nia niishishacari Pueyasoori jiyanoehua maninia pa miiniutianiya na niquitiosacari pajaniya jiyocuacaanu na jiitiasanojiniji. Niaacuaajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. ⁶ Cuno maninia rupaari puetunu jiyacajiniajanaa paaqueyaree, mariyata taa na paaquecanucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujiajania, mariyata taa na caneya nioojiacajiniacuaani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricuajani. ⁷ Pa panishano Epafrasri naa pohuataquiaari niajaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa niajaniyajiniji, naajuhuaaj taa Pueyaso Sohuanu panitiooteya niajaniyani.

⁹ Naaratej, canaa jaara tojiqiuianu niajaniyajinijini, majaari canaa tarinitianu quiriqiaa Pueyaso secojonu niaacuara. Canaari Pueyaso secojoquiaani, nojuaja cuaara nia jataniiria niishijara nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. ¹⁰ Naa jaara Pueyaso panishano niishijaca quiri, naacuajitij, niaari maninia quiniutianiya taa pa Jiyanijia paniya na pueya quiniuriacuajani, nojuaja shuqiritianura niajaniya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuaaj, niaari socua maninia niishiniutianiya Pueyaso. ¹¹ Canaari Pueyaso secojoquiaa niaacuarajuhuaaj, Pueyaso cumaquiniuria niajaniya puetunu na cumaacatajanaa. Jiyanohua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secojoquiaajuhuaaj niaa cuaara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojina pa quishacari. ¹³ Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyosua jiitiasano pa quiniuria maninia cutara. ¹⁴ Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵ Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipinitiquiaari puetunu casaajanaa jiya cajiniocua, mijiriano; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuua, maninia na quiniuria. ¹⁸ Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniu na Quejiniji. ²⁰ Naajuhuj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusunutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

²¹ Tarijia, niaari Pueyaso paraa quiquiaari, juhua taanuusano pueya Pueyasojiniji, sesa miijiaca nia quiniuucua. ²² Saniniuujia quiarijiani, Pueyasoori nia rupuetequiaariuhua nocua, Cristo cusuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumaatia rupaquiaa Cristoocua, nocua nia tiuushacari, nioojia nia niquijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuataaacanu puetunu jiyacajiniajanaa. Janiya, Pablioni, janiyari na pohuatanu naacutaajaaniuhuj.

Pablo Pueyaso pueya maanu cumaquiniara jiyatesaaquiaari

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocujuhuj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocatej, janiyari Cristo naquiya miiniu tucuataa tama cua cuaqueyajiniajaajani. ²⁵ Pueyasocujaari cua jiyatequiaari na saquiriojosano pueya cua jiitianura, cua cumaquiniuria niajaniya puetunu na rupaatajanaa. ²⁶ Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuacaanu quijiaa. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyaraajaaja. ²⁷ Pueyasoori pa niishitiniu paniquiaari taa jiyanojua shacantuuca na cumaaca quiya niajanijarani, canapueje maja na saquiriojosano Judiocuaca quiquiaaricujani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiaara jatanishaanutaniyajujuaj.

²⁸ Naaratej, Cristocuaajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. ²⁹ Naaratej, puetunu Cristo niqutiosano cumaacatajanaa jiyanoehua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanoehua cua poonijioquiaa Pueyaso cua secojonuta niaacuarani, Pueyaso muerasuucuaara Laodicea tiacajinia-juhuaj, puetunu juhuanajuaja cua niquiyaquiniaa pueyacuarajanaano. ² Jiyanoehua secojoquiaa niaacuaranijia, nioojiaca cumaquishaanura, nioojiaca rupuetoonura jatiqijiuhuaj, jiyanoehua nia panitioosacari. Naajuhuaaj, secojoquiaanijia maninia niishijiacara nia quiniuria, maninia nia niishiniuria tariucuaaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocuaajaari puetunu niishijiajanaa. Majaari tamonu niishijia quiniu juhua nojuaja. Jiyanoehua maninia miiijia puetunu na niishishanotajanaari. ⁴ Janiyari nio sequeya niajaniyani, tamonu mariqui nia sapojoreeri najuhuaana tamaatia na pohuatasanota. ⁵ Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

⁶ Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. ⁷ Maninia nia rupuetooore Cristota, naatej, taa naana cumaatia nujuaacuaani, jaara tucumaaca nujuacaraca quiriri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricujani. Cunora, pueyaracaanu nia sequeriquia Pueyaso: “Paacarasho canaa Quenea”.

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuaanajuhuaaj.

⁹ Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jiitiaja, puetunu na niishitiajananaano. ¹⁰ Naajuhuaaj, niaari Pueyaso cumaaca jiitaa, na niishitiajanio, nia rupuesacari Cristo. Naacuajitij, niaari puetunu nia panishanojuanaa jiitaa tari, maninia quiijaca nia quiniuria. Cristojuanaari Jiyaniijiajanaa. Cristo jaara na jiyarore, puetunu tamonu cumaacaraca quiijacajanaari na tojitaa; jiyocuacaanu camarnu, mijiria camarnunio. ¹¹ Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cuara quiiria saa Pueyasoraja, maja sesa miiijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiaari, seetanujuanaa sesa nia quiniu jataaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacua nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Niaari juhua macu quiquiaari tarijia, sesa miiijaca nia quishacarijia, sesa jiuujiaraca nia quishacarijanio. Jiyacaritij, Pueyasoori nia samiitianiquiaari Cristota, na jiyanooshacari niajaniya

puetunu sesa nia miishanojinijijiana. ¹⁴ Pa tojiyaquishacari tariucuacaanu Pueyaso rootasano, paari puecoosocoriquiano quiquiaari juucuani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiuti-aquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quiijacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quiuosano pueya jaatucunuusaaquiaacuaani, pueya niquiara macaatisocoriquiano.

Saaja Pueyaso casaacua nia jiaatiariquia

¹⁶ Naaratej, majaari nia tojiniu noo pojori, canapuete nia tojitiniu saniniujiya supuetana niishitiojosanocujani. Nojoriiri najuhuaana niishitiojoquiaa casaa sumatuute puereshiyani, ratasanonio. Nojoriiri niishitiojoquiaajuhuaaj teyano juucate poonijiyaquishiyani, naajuhuaaj, Pueyaso niquiara pa queranacunuunura raca macura. Nojoriiri naa niishitiojonuquiaa nojori jiyanihacari paa jaara naa miyaquirini, Pueyaso mariqui pa saniitioreeri. ¹⁷ Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujuaana quiniutianiyani Niriquiano jaara tiuquiri. Cuno Niriquianocujajaari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niquisitionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jiyanihacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujinia na niquishanoocujajaaja tiuujiaca, maja Pueyaso rupaacua. Naacuajitij, nojori tiuushacari tama na niishiriojosanoocujajaaja, nojoriiri seetanujuaana pueya shocotajaca quiya. ¹⁹ Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatano. Pueyasoori naa pa maashitiniu paniyajuahuaj Cristota rupuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quiijaca nia quiniuria. ¿Macutucua taa supuetana rootasano tojirini? Maja na naata. ¿Nijaniyariuhuaj? ¿Casaara nia tojitiaajaa cuno tariucuacaanu rootasanoni? Niaari juhua nareja mijiria quiniaa quiyajaa, nia tojishacarijia cuno rootasano. ²¹ Supuetanaari naa piriyojoquiaaritij: “Maja pa quianu cuno. Maja pa miaquenu cunohuhuaaj. Maja cuno pa cooniu”. Pa supuetanaari naa sequejatej. ²² Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuacaanu rootasanoori saaja tama pueya niishishanojuajaaja quiquiaari. ²³ Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puererene, naajuhuaaj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaana Pueyasora. Cunoori maja na naacunu pajaniya sesa casaacua pa jiaatiaaquiniuria.

3

¹ Naa jaara samiitianishaquiaari Cristota, jiyocuacaanu Pueyaso jiišanasoocua nia jiaatiare, tee Cristo cajiya na Que Pueyaso miaquetajaracujani. ² Pueyaso casaacua nia niishiriojore saaja, maja mijiria casaacua. ³ Puetunu tarijia sesa nia quiniujianaari tari

juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samitianiija. Saniniuujia, juhuanajuaja maja niishishano taamueca quijiaca pa cuaqueya quiniutianiyani. ⁴ Cristo jaara muetarohua pocua mijiria, shacantuuca cumaacaraca quiija na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuj.

Maninia rootasano Pueyaso muerasura

⁵ Naaratej, nia cuaqueya cuara quiiria juhua macu tama nia niquiarajaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatiajaari juhua Pueyaso ruuretaja quiya, tama na jiiitasano casaacuajaaja na tiuushacari juhua Pueyasooquaja. ⁶ Pueyasoori jiyanoehua saniitionutaniya na tojiyashijiaca, canapueete naa sesa quijiacacuajani. ⁷ Pueyaso tojiyashijiaca nia quishacari tariija, niaari naa sesa miijiaca quiquiaari. ⁸ Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyanoehua nia quiniu. Maja sesa miijia nia quiniu. Maja pueya sesacaja nia quiniu. Maja sacuaraatia najuhua nia niti taquiriocuateja nia quiniu. ⁹ Maja nia cuaracashijiootonu. Niaari tari jatanishaaquiaari tariija sesa nia quiniujiniji, sesa jiuujiaraca nia quishacariija, sesa miiniuucua jiiitino nia quishacarijuhuaj. ¹⁰ Niaari quiarinio jiuujiaraca quijiaca tari. Quiarijiani, tama nia cuaqueyajaariija tari jataa juhua nia Shipininia Pueyaso nia quiniuria, seetanujuanaa Pueyaso niishijia nia quiniuria. ¹¹ Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasa pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua mococori, poonijiootesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhuj.

¹² Pueyasoori nia saquiriojoquiaari saa maniniaja nia quiniuria nera. Niajaninyari na panishano muerasu. Naaratej, pueyacua taraajeja nia quiri. Maninia miijia nia quiri. Majaari nia jiyaniniu tama nia cuaqueyajaariija socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miirii najaniyani. Taa pa Jiyaniija jiyanooquiaari pajaniyacuaani, naa nia jiyanoootioorejuhuaj. ¹⁴ Seetanujuanaa pueya panijiaca nia quiirijuhuj. Cunoori socua jiyanoehua panishano. Panitiojuaca nia quishacari, puetunu nia miishanojuanaari jiyanoehua maninia quiniutianiya, jatiqui nia quiniuriajuhuaj. ¹⁵ Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijiaca nia quiniuria, maninia rupuetootesano. Pueyaso muerasu cuara jatiqui poonijionuujuaca quiiria, naatej, taa pa cuaqueyajiniacuma casaa puetunujuanaa jatiqui quiyacuaani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijianaa niaara.

¹⁶ Nioojia cuara quiiria mishaja Cristo rupaata, jiyanoehua na tojijiaca nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitioojore puetunu Cristo niishishanotajanaa. Naa jaaquequejonuure Pueyaso Rupaa naajiosanojiniji, pueya naajiosanojinijijuhuj, Pueyaso Sohuanu niishitiojosano najaniyano. Naa nia jaaquequejore Pueyasora, nia shuquiritianuta nojuaja. ¹⁷ Jesucristocuajaari nia Jiyaniija quiya. Naacuajitij, niaari na sesaanucua. Naaratej, nia sequesano, nia miishanojuhuaj, puetunu cunojuanaa cuara quiiria maninia nera. Naa nia miiriqia pa Que Pueyaso nia sequenuta “paacarasho”, Neyanu cumaquiniuucua najaniya.

Maninia miijia pa quiri Pueyaso muerasu pa quishacari

¹⁸ Maajipohuanaa, nia niyaca tojtiajaca nia quiri. Pa Jiyaniijiaacua tiuujiaca cumaati naa miiquiaaquij. ¹⁹ Pueyanaa, nia niquiocua nia paniri. Majaari na juaaniu. ²⁰ Mueraasapuenaa, nia queya tojijiaca nia quiri, nia shuquiritiniuria pa Jiyaniijia. ²¹ Pueyanaa, maja nia juaatiniu nia niquiohua, nojori mariqui maninia miiniuucujaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari niajaniya, na shuquiritianura niajaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijiaari nia niquitionutaniya jiyocuacaanu niaara na jittiasanojiniji. Mijiria camarnura nia poonijosacari, niaa cutaraari Cristora poonijija. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniuujujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”. ³ Naajuhuj, canaacuara nia secojore Pueyaso, nojuaja cuara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyaniija nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

⁵ Maninia nia niishiriojore taa nia miiniutianiya noo pojorini, canapuetucujaja maja Pueyaso muerasuni. Maninia nia miiri nojori, mijiria nia quishacarijia. ⁶ Nia pocoojosacari nojoritia, maja najuhua nia pocuanu. Pueya nia cumaquiri nia sequesano. Nia niishiriojore taa nia riucuanutaniya tamasaca pueyani, nojori jaara nequesotariquia niajaniya Pueyasocua nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tíquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijiaara canaa poonijionura. ⁸ Niaacua na jiyaroyanijia na pohuatanura niajaniya taa canaa quiyani, naajuhuj, na cumanjianura niajaniya. ⁹ Pa panishano Onésimoori nata quianutaniyajuhuj. Nojuacuajaari niajanijajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuata nura niajaniya nera. Marcoori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹ Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijinioori cuata poonijioquia Pueyasora, canaa niishitiojonura Cristojiniji pueya niquiara. Nojoriiri cua cumanjianaa quiquiaa. ¹² Epafrasri nia saruhuataajuhuj. Nojuajaari Cristo seru niajanijajinijiojuhaj. Nojuajaari pueyaracaanu niaacuara secojoquiaa queraatia,

jiyanohua cumaatia Pueyasooocua tiuujiaa nia quiniuria. Secojoquiaajaariuhua ritia Pueyaso tojijiaa nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafraasi jiyanoocua tacaquiaa niaacua, Laodicea tiacajinia quiniaa Pueyaso muerasuucujuhuaaj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia saruhuataa. Demas nia saruhuataajuhuaaj.

¹⁵ Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhuaaj, na tiacajinia rerejonaa Pueyaso pueya maanujuhuaaj. ¹⁶ Niaa jaara nio naajionee serojorecuaa nia rerejosacari, Laodicea tiacajinia nia jiyarotarejuhuaaj, cuara serojosaaria Pueyaso pueya maanu niqiuara tiijuhuaaj. Naajuhuaaj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucuatánura quia poonijiosano pa Jiyaniijia. Nojuajaari quia jiyatequiaari nera poonijioriquiano”.

¹⁸ Janiyari Pablóni. Quiarijiani, tama cua juaashiquiatajaaja naajiyaniija saaja cua saruhuatanura niajaniya. Nia niishiriquia, janiyari moronucua nujuatesano quiyani. Pueyaso cuara cumaquiiria niajaniya na cumaacata jiyanoocua. Tariucuaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacio. Canaari mariyata nia saruhuataani, Silvano, Timoteonio. Pueyaso cuara maninia jitiara na cumaacata niajaniya, maninia nia quiniuria. Cuara nioojia cajitiirijuhuaaj, juhuajaniya nia quiniuria.

Tesalónica pueyanaari Jesuucua tiuujica quiquiaari seetanjuanaa

² Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuquiaani. ³ Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhuaaj taa nia paniniutia nia naacuquiaa niarta pueyani. Naajuhuaaj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. ⁴ Pueyaso panishano pueyanaa, canaacuajaari niishiyani, nojuajaari nia saquiriojoquiaari na panishano muerasu nia quiniuria. ⁵ Canaa jaara nia niqiara pahuataquiaari Pueyaso rupaa Jesucristojiniini, cunoori maja najuhuaana pahuatasano quiquiaari. Canaa pahuatasanoori jiyanoehua Pueyaso cumaacaraca quiquiaari. Pueyaso Sohuanuuri jiyanoehua poonijioriquiaa nioojiacajinia. Naacuajitij, niaari niishiquiaari canaa pahuatasanoori seetanu rupaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

⁶ Naaari canaacua jiaatiaquiaari, juhua canaa nia quiniurijuhuaaj, juhua pa Jiyaniijia Jesu nia quiniurijuhuaaj. Naaari seetanjuanaa naa miijiacara quiquiaari, Pueyaso tojjiaca nia quiniurijuhuaaj taa canaacuaani. Pueyaso rupaa nia tojishacari, niaari jiyanoehua na timitiaquiaari. Cunora, niaari jiyanoehua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria.

⁷ Naa shuquiriaatia Pueyaso tojjiaca nia quiniucuatej, niaari niarta Pueyaso pueya shiniujuquiaari, seetanjuanaa Pueyaso tojjiaca nojori quiniurijuhuaaj. Naaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio.

⁸ Pa Jiyaniijia rupaari niajanijini tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocujanaa poojotasaquiaari. Naacuajitij, puetunu tiqiyocua quijiaca pueyajanaari tari niishiya taa Pueyasocua tiuujica nia quiya seetanjuanaani. Naacuajitij, ¿canaatucua casaara niishitiojore Jesujinihi socuani, tee cuniqui pueya niishiya tari nojuajinihi cuajani? ⁹ Tee cuniqui canaa tiuquiquiaani, pueyari canaajinihi poojotanuya tari, taa Jesujinihi canaa pahuataquiaaricuaja niajaniyani. Nojoriiri niishiyajuhuaaj taa canaa nia tiuquinitiaquiaari maninia nia tiacajiniaqueyani, canaa pahuatasano nia tojiniuria. Naajuhuaaj, niaanaari pueya shipinijiosano nia jiyatesano nia pueyasora cartequiaari, pueyaracaanu rishijia seetanu Pueyasojanaa tojitiajaca nia quiniuria.

¹⁰ Naajuhuaaj, niaanaari Neyanu sashiya, jiyocuaaanuji na tiuquiniuhuaa, teyano Pueyaso samiitianihi cuajani. Pueyari niajanijinihi niishiya-jaacuhuaaj, Jesuuri pocuaji Tacuna, maja mani quiquiojinihi pa quejoosaanura, Pueyaso saniitosacari na tojitiaashijaca.

2

Pablo niishitiosacariuhua pueya, taa na quiquiaari nojoritiani

¹ Cuarta Pueyaso pueyanaa, niaacuajaari niishiya, majaari najuhuana canaa quiniu quiquiaari, niaata canaa quishacari. ² Niaacuajaari niishiya, Filipo tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaquiaarini. Canaari jiyanoehua taraatia miishaaquiaarijiuhuj. Naajuhuj, nia tiacajinia canaa tiuquiiijosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niquiarajuhuj. ³ Canaacuajaari niishiquiaarini canaa pohuatasanoori seetanu rupaaanaa. Majaari canaa pohuatanu quiquiaari canaa miiniuria sesa niajaniya, canaa sapojonura niajaniyajuhuj. ⁴ Pueyasojunaari canaacua tiuququiaari. Cunora, canaa jiyatequiaariiri Neyanujiniji pohuatanana canaa quiniuria. Naacuajaari taa canaa poojotaquiaa pueya tiuuniuria nocuacuajani, Pueyaso jiyanooniuria nojori. Canaari seetanujuanaa Pueyaso timitiniu paniyani, maja saaja pueya. Pueyasocuaajaari canaa jiuujia niishijia. ⁵ Niaacuajaari niishiyajuhuj, majaari canaa sapojonu quiquiaari niajaniya shanohua canaa sequesanta, canaa nia maniniucuanura. Naajuhuj, majaari canaa cuaracashijionu quiquiaari niajaniya, canaa nia niquitiojonura nia cumaneecajiniji. Pueyasoori na niishiyacuaja. ⁶ Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniurijuhuj. Maja. ⁷ Canaacuajaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari niajaniya, juhua canaa seya nia quiniuria. Saniniujia, canaari tojetaarucujanaa juhua naatujoori quiquiaarini, niaata canaa quishacari. Naatej, taa maaji jiiitiaa maninia necohuacuaani, canaari naa nia jiiitiaquiaarijiuhuj. ⁸ Jiyanoehua canaa paniniucua niajaniya, majaari saaja Pueyaso rupaa canaa pohuatanu quiquiaari niajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiiitiaquiaari niajaniyani, jiyanoehua canaa paniniucua niajaniya. ⁹ Cuarta Pueyaso pueyanaa, niaacuajaari niishiya taa canaa poonijioquiaari jiyanoehua, tama canaa panishanojuaaja canaa masetajara. Canaari naa poonijionuquiaarini juuca, niucuanio, canaa pohuatanura Pueyaso rupaa niajaniya. Canaari naa miiquiaarini maja canaa taajetenura niajaniya canaa mashiniquijionuta nia cumaneeca.

¹⁰ Naacuajitij cuarta Pueyaso pueyanaa, niajaniya, Pueyasojuhuj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacuara saquiriojotanu, canaa jaara tojetaarucujanaa sesa miyaquiaarini. ¹¹ Niaari niishiyajuhuj taa canaa shiniujuquiaari niajaniyani Pueyaso nia tojiniuria. Niaari niishiyajuhuj taa canaa cumanijaquiaari puetunu niajaniyajanaani taraatia nia quishacari, naatej, taa pueyano miiquiaa na panishano niquihuacuaani. ¹² Naajuhuj, canaacuajaari jiyanoehua nia nacasuquiaarini maninia miijica nia quiniuria juhua seetanujuanaa Pueyaso pueya. Pueyasocuaajaari nia saquiriojoquiaari pueyaracaanu nata nia quiniuria, jiyaniijianucua nia quiniurijuhuj, juhua nojuajuhuj. Nojuacuajaari na shacantuuca cumaacajinia quijia.

¹³ Canaa jaara Pueyaso rupaa pohuataquiaari nia niquiarani, majaari nia jiyaniniu quiquiaari cunoori saaja pueyajiniji canaa tojiniushano. Maja. Niaari seetanujuanaa na tojitiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria niajaniya, Jesucristo tiuujica nia quiniucua. ¹⁴ Naa Jesucristoocua tiuujica nia quiniucuatej, niarta pueyari nia

miiquiaari naquiya, taa Judea jiyajinia parta Pueyaso pueya maapue miishaaquiaar-icuaani. Tama narta Judiocuacajaarijia nojori miiquiaari naquiya, Jesucristo tojijiaca nojori quiniuucua. ¹⁵ Nio cuarta Judiocuacani, nojori supuetanaajuhua, nojoricua-jaari pa Jiyaniijia Jesucristo motuquiaari. Nojori supuetanaari naa tariucuacaanu puecooquiaarijuhua Pueyaso sequesano caminiujiuniaa pueyatej. Naajuhua, Jesu-ucua tiuyashijiaca cuarta Judiocuacaari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuaajaari juhua puetunu mijiria quiniaa paraajanaa. ¹⁶ Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhua, Judiocuacaari canaa tenujuquiaa juucuani. Naacuajitij, Pueyasora, sesa Judiocuaca miiijosanoori tari tojetaarucujanaa puera. Cunora, Pueyasoori nojori saniitioquiaa jiyanoehua.

Pablo naquerejosacari juucua Tesalónica tiacajinia quiniaa Pueyaso pueyacua

¹⁷ Cua panishano pueyanaa, canaacuajaari rupaquiijara nia shuriucuaji quiaquiaar-iuhua. Jiyacari canaa niquiyaquishacari niajaniya, naajaa, canaacuajaari juhua ni-aata quiquiaajaani, pueyaracaanu canaa niishiriojosacari niajaniya, niaacuara canaa secojosacari. Canaari juucua jiyanoehua nia niquiniu paniriquiaani. ¹⁸ Cunora, canaari niaacua naquerejoquiaari juucuani. Janiyari niaacua naquerejonu pacutejo-quiaarini. Satanásri canaa cushitioquiaari saajani. ¹⁹ ¿Janiyatucua casaara nia niquiniu paniyaquiririni? Niacuajaari jiyanoehua cua timitiasano pueya. Pa Jiyaniijia Jesu-cristo tiuquishacariuhua, janiyari niishiyani, nojuajaari canaa shuquiritianutaniya maninia na tojijiaca nia quishacari canaa niishitiojonuucua na rupaa niajaniya. Pa Jiyaniijiata pa quishacari, jiyacaritij, canaari jiyanoehua nia timitianutaniyani, maninia na tojitiajaca nia quiniuucua mijiria. ²⁰ Taaquiririni, canaacuajaari tari shuquiriaatia quiyani, maninia na tojitiajaca nia quiniuucua. Niacuajaari seetanujuanaa canaa timitiasano pueya.

3

¹ Naa jiyanoehua canaa niishiniu panishacari juucua niajanijajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacua-jaari canaa jateenura tamajaaja Atenas tiacajinia. ² Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janiyari niaacua na jiyaro-quiaarini na cumaquiniuria niajaniya, mariyata socua na shiniujiuniuria niajaniya Jesuucua nia tiuuniuria saaja. ³ Na jiyaroquiaarinijia na cumaquiniuria niajaniya maja quenaaja niquiriyatu niajanijajinijinio pishiniuria Pueyasooquaji, naquiya nia miishacari. Niacuajaari tari niishiquiaari, paari naquiya miishiyani Jesucristoocua pa tiuuniuucua. ⁴ Canaa quishacari niaataja, canaacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niacuajaari niishiya, seetanujuanaa naa tohuatecanuuri cua sequesano. ⁵ Cua niishishacari niajanijajiniji, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiritij, puetunu canaa miishano-juanaa niaara maara najuhua quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniji cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pohuatanuhua janiya, niaate Jesuucua tiuyajaa.

⁶ Timoteocujaari tari niajanijajiniji tiuquiriohuacuaa. Nojuajaari canaa pohuata-suhuacuaa, niaanaari Jesuucua tiuyajaa. Niaanaari panitiojuaca quiyajaa. Canaa po-huatasuhuacuaajaariuhua, niaanaari canaa niishiriojoquiaa jiyanoehua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquini-uria niajanijajinijia. ⁷ Cuarta Pueyaso pueyanaa, seetanujuanaa canaari taraatia

miishiya niyani. Canaari tacayajuhuj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuajitij, canaari juhua samiitiacorohuani, pa Jiyaniijia tojitiajaca nia quiniuucuaaja. ⁹ Cunora, canaari jiyanojua nia shuquiritiaa Pueyaso niquliarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanojua shuquiriaatia quiyani. ¹⁰ Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucuatenu paniyani, seetanujuanaa maninia jeenucuasano Pueyaso pueya nia quiniuria.

¹¹ Canaari paniyani pa Que Pueyasojuanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. ¹² Pa Jiyaniijia cuara nia jiyateera socua jiyanojua panitiojuaca nia quiniuria, tamasa panijaca nia quiniuriajuhuj, taa canaa paniya niajanuyacuani. ¹³ Naa panijaca na jiyatesacari niajanuyatej, niaari nioojia niqijioteyashijaca quiniutianiya cutara. Naajuhuj, niaari tojetaarucujanaa sesa miyashijaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

4

Taate pa naata Pueyaso shuqiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujiyani socua maninia miijaca nia quiniuria. Canaari nia niishitiojoquiaari maninia miijaca nia quiniuriani, Pueyaso nia shuqiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquiorijianaa cuara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuara na cuaqueya panishano rejetenu niishiiria. ⁵ Majaari sacuaraatia nia miiniu taa Pueyaso niishiyashijaca pueya miiquiaacuani, jiyanojua nojori jiaatiasacari maajiicua. ⁶ Naajuhuj, majaari quenaaja jiyasohuaja niarta pueyano niqiuocua nia numuetucunu, neyaca nia sajonuta. Cuno maajicuajaari saa neyacara, maja tamonura socua. Pueyasocuajaari naa miijaca saniitionutaniya jiyanojua, taa canaa numootequiaari tari niajanuyacuajani. ⁷ Pueyasoori maja na saquiriojonu quiquiaari pajaniya sacuaraatia miijaca pa quiniuria. Pa saquiriojoquiaari tojetaarucujanaa sesa miyashijaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohanu niqutioquiaari niajanuyacuajani.

⁹ Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria niajanuyacuajani, panitiojuaca nia quiniuria. Pueyasocuajaari tari nioojiajinia nia niishitiquiaari panitiojuaca nia quiniuria. ¹⁰ Niaacuajaari seetanujuanaa puetunu Macedonia jiyajinia niarta Pueyaso pueya panijaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijaca nia quiri! ¹¹ Tama nia cuaqueyajaaja nia cumaquiriquia juhujaniya quijaca nia quiniuria. Tama nia poonijosanojiniajaaja nia cojeriquia, tama nia juaashiquiatajaaja nia poonijosacari, taa canaa rootaquiaari niajanuyacuajani. ¹² Naacuajitij, Pueyaso niishiyashijaca pueyari nia rerequeteyaquiniutianiya. Naajuhuj, niaari puetunu nia panishanojuanaa jitianutaniya.

Taa pa Jiyaniijia tiuquishacariuhua quiniutianiyani

¹³ Cuarta Pueyaso pueyanaa, canaari juhuacarijia nia tonu paniyani taa Jesuucua tiuuijaca shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jiitianu nojori Jiyano, nojori na samiitianijionuhua. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuj, paari niishiyani, Pueyasoori Jesuucua tiuuijaca shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵ Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapuate pa Jiyaniijia tiuquishacariuhua saminiucua quiniutianiyajaani, majaari macunucua pa puetanu quiniutianiya pa Jiyaniijata pa naacuneetonura jiya cajiniocua. ¹⁶ Naa quiniutianiyari. Pa Jiyaniijia nacanuari tojishaanutaniya, Pueyaso seya jiyaniijia nacanujuhuj, Pueyaso trompeta jonenenunio. Jiyacaritij, pa Jiyaniijajanaari jiyocuacaanuji rosenutaniya cohuaja najacajiniara. Jiyacarijihuuj, puetunujuanaa Jesuucua tiuuijaca shaajecono pueyari samiitiaconutaniuhua coteenu.

¹⁷ Na nuhuaji pajaniya, canapuate saminiucua quiyajaani, paari nojoritia ritia rijosaanutaniya cohuaja najacajiniarani. Paari tii coquetonutaniya pa Jiyaniijata paratujiniani. Jiyacaritij, paari tari pueyaracaanu nata quijiacarano quiniutianiyani.

¹⁸ Cua panishano pueyanaa, nio cua pohuatasanta nia cumanijiatooriqia.

5

¹ Majaruhua maninia cua naajionura niaacuara cua niishitiniuria niajaniya socua, taacari pa Jiyaniijia tiuquiniutianihuani. Niaacuajaari tari na niishiya, naajuhuj, taate mijiria quiniutianiyani na tiuquiyaquishacarijia. ² Niaacuajaari maninia niishiya, pueya jiyaniishacari juhuanojuaja maja pa Jiyaniijia tiuquiniu quiniutianihua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. ³ Naajuhuj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaaja miaquetoojonu”. Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. ⁴ Niajaniya saniniuujia cuarta Pueyaso pueyanaa, niaari maja juhua ninishiqui quijiacaa, pa Jiyaniijia cariyatunura niajaniya. ⁵ Puetunu niajaniyajanaacuajaari cuhuashiqui quijiacaa. Pueyasojanaacuajaari nioojiaca cuhuataquiaari. Majaari tari juhua ninishiqui quijiacaa pueya pa quiniu. ⁶ Cunora, pa Jiyaniijia sashijiaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojuacajuhuj. ⁷ Maquetujuacaari niucua maquetuquiaa. Naajuhuj, mashaasequenuujacaari niucua mashaasequenuuquiaa. Naa miijiacaaari Pueyaso tojiyashijiaca. Majaari na maniniucuanu cuhuashiqui. ⁸ Pajaniya saniniuujia, paari cuhuashiqui quijiacaa cutarani. Naaratej, pueyaracaanu maninia niishiriojuacaa pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueeca casaa cushiyonuujuaariuhuj, na naca na cojuatajara. Naajuhuj, naa poojia pa cojuare, saaja Jesuucua pa tiuuniutia, seetanujuanaa panijiacaa pa quishacarijihuuj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niqijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. ⁹ Pueyasoori maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa

quiniuria, Neyanu Jesucristoocua tiuujia pa quishacari. ¹⁰ Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiaajanaari pueyaracaanu saminio quiniutianiya nata. ¹¹ Naaratej, pueyaracaanu nia cumaquitioojoriquia Pueyaso rupaata. Nia shiniujiutiooriquia-juhuaaj, seetanujuanaa pa Jiyaniijia tojijiaca nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqui nia jiitianaa tojijiaca nia quiri. Majaari nojori rerequetenu. Nojoriiri jiyanoehua poonijioquiaa pa Jiyaniijia nojori niishitiojonura niajaniya, na nacasunura niajanijuhuaaj. ¹³ Cunora, jiyanoehua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuhuaaj cuarta Pueyaso pueyanaa. Taajecori nia nacasure. Noojia niquijotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaaj, Satanás saniniujiushacari na cuaqueya miiniu panishano rejeretaashijiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhuaaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuaaj.

¹⁶ Pueyaracaanu nia shuquiririquia, Pueyaso pueya nia quiniucua. ¹⁷ Naajuhuaaj, pueyaracaanu nia secojoriquia Pueyaso. ¹⁸ Niaa jaara maninia miishaare, niaa jaara sesa miishaarejuhuaaj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuaanaacuajaari naa paniya pa miiniuria, Jesucristo Sohuanu pa jiitianuucua poojiajinia. ¹⁹ Majaari Pueyaso Sohuanu nia ruuretenu, nojuaja jaara nioojiajinia nia shiniujiya maninia nia miiniuria. ²⁰ Naajuhuaaj, majaari nia soonu Pueyaso sequesano caminiujiuniaa pohuatasano. ²¹ Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojininiote maniniani, cuno tojijiaca nia quiri. ²² Puetunu sesa niishishano casaajanaa soojeaca nia quiri.

²³ Poojia cajitinia Pueyasojuaanaa cuara nia jeenucuaara juhuacarijia, tojetaarucujanaa sesa miyashijiaca nia quiniuria pa Jiyaniijiaacuaji. Nojuaja cuara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuara tiuquiriohuajaatijia. ²⁴ Cante nia saquiriojoquiaaricujaja na pueya nia quiniuriani, nojuajaari puetunu shusha cua sequesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miiija pueyaracaanu.

Pablo sequesano na naajionee na tucuatasaari

²⁵ Cuarta Pueyaso pueyanaa, Pueyaso nia secojonuuriquia canaacuarajuhuaaj.

²⁶ Canaara nia saruhuatate cuniqui quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

²⁷ Pa Jiyaniijia jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

²⁸ Pa Jiyaniijia Jesucristo cuara cumaquiiria nioojia. Cuara naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujia

¹ Janiyari Pablóni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapuate pa Que Pueyaso rupuejacacuajani, pa Jiyaniijia Jesucristo rupuejacionio. ² Pa Que Pueyaso, pa Jiyaniijia Jesucristojuhuaaj, nojori cuaara nioojia cumaquiiria. Cuaara nia jiyateera juhuajaniya quijiacarajuhuaaj.

Pueyasoori na tojtianu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanoehua nia timitiaani jiyanoehua Pueyasooocua tiuujia nia quiniuucua socua, panitioojua nia quiniuucua socuajuhuaaj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa niajanijajiniijia Pueyaso pueya maapue niquiara tamaquiicua canaa rucuanesacari. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujiuhuaaj, Pueyasooocua tiuujia nia quiniuucua. ⁵ Pueyaso saquirojionuucua niajanijia pueyaracaanu shuquiriaatia quijia nia quiniuria na shuriucua, cunoori maja najuhuaana quiquiaari. Niaacuajaari seetanujanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaca pueyari naa naquiya miiquiaa niajanijatej, Jesucristoocua tiuujia nia quiniuucua.

⁶ Naajaa, Pueyasocuaajaari tojetaarucuaajanaa sesa miyashijia. Nojuajaari niaacua naminiutianiya noo pojori, naquiya miitajaca niajanijatej. ⁷ Nijaniya saniniujia, naquiya miijosaaquiaarini, niaari canaata samaraatasaanutaniyajuhuaaj, Jesucristo tiuquishacariuhua pocua. Jiyacariitij, nojuajaari niquishaanutaniya mani rimianuqueyano tiuquitiohuano, jiyanoehua cumaacaraca na seyata jiyocuaaanuji. ⁸ Tiuquiniutianihuari na saniitionura noo pojori, canapuate Pueyaso niishiniu paniyaquiquiaani, noo pojorijuhuaaj, pa Jiyaniijia Jesu rupaa ruuretajatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoasaanutaniya pa Jiyaniijia shuriucuaaji. Naacuajitij, majaari nojori niquiniu quiniutianiya na jiquioco, shacantuuca na cumaacacionio, nojuaja jaara mijiria tiuquiriohua pa shuquiritianura nojuaja. ¹⁰ Jiyacariitij, puetunu na jeenucuasano pueyajanaari jiyanoehua na timitianutaniya. Puetunu nocua tiuujia pueyajanaari jiyanoehua jiuujiateconutaniya, pa Jiyaniijia na shootiatuacari. Niaari na niquiniutianiyajuhuaaj, nojuajiniijia canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquirojionuucua niajanijia. Canaari niaacuara secojoquiaaaniuhuaaj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniirijuhua puetunu nia miishanojuanaa, cuno, Pueyasooocua nia tiuuniutia nia poonijiosanoni. ¹² Naacuajitij, pa Jiyaniijia Jesuuri socua timitiasaanutaniya naa nia miiniuucua maninatej. Naajuhuaaj, nojuajaari nia timitianutaniyajuhuaaj. Naa maninia quiniutianiyari pa Pueyaso pa Jiyaniijia Jesucristota na cumaquishacari niajanijia.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajaniuhuj. ² Canaa sequesano niajaniya nia tojiri, pueyanaa. Majaari nia niyajetanu tariucuacaanu canaa niishitiojosano niajaniya, nia jiyajeneyaquiniucuaaji tamasaca sapojosacari niajaniya. Majaari nia shiriiquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasa jaara naa nia pohuatare, majaari na sequesano tojiniu. Naajuhuj, tamasaca jaara naajionuure tamajaaja, niaara na jiyate-socoriquiano juhua canaa naajione, majaari nojori tojiniu. Nojoricuajaari nia sapojija. ³ Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhuj, queraatia pueyari Pueyasocuaaji pishiniutianiya. Jiyacarijuhuaj, Pueyaso rootasano Ruuretajajanaari supenutaniya. Nojuacuajaari tariucua Pueyaso saniitiosocoriquiano na riuriotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojinuria Pueyaso, pueya shipinijosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijiajanaa cajitiujinia. Jiyacari sequenutaniyari: “Janiyacuaajaari Pueyasoni”.

⁵ Pueyanaa, ¿majateeri nio nia niishiniucuaaja? Janiyacuajaari nojuajiniji nia pootajani niaata cua quishacari. ⁶ Niaa naasucuaari niishiyacuaja canteeri juhua na quiaajaani, maja juhuanouaja mijiria na miiniuria tama na panishanojuaja, Pueyaso paniyaquishacarijia. ⁷ Seetanujuanaa, Sesaaca cumaacaari tari mijiria poonijija jiyasohuaja. Naajaa, Pueyaso paracaari juhuanouaja maja na naata muetanu, pueya niishiniuria nojuaja, na tenujuna cuaara niiquiji rishaarejaatijaj. ⁸ Na tenujuna jaara rishaare niiquiji, jiyacaritij cuno sesaaca sequeeri muetanutaniya, jyanohua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujuanaa. ⁹ Cuno sesa miijia sequeeri muetanutaniya Satanás cumaquishacari nojuaja. Naacuajitij, nojuajaari jyanohua cumaaca jitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. ¹⁰ Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniucua. Nojoriiri maja na tojiniu paniniu quiquiaari seetanu rupaajanaa, Pueyaso jyanooniuria nojori. ¹¹ Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuunuucua. ¹² Naacuajitij, puetunu noo pojorijianaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucuaajaca nojori quiniucua.

Pueyaso muerasuranoori tariucuacaanujiniji saquiriojosano

¹³ Niajaniya saniniujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaaja, na Sohuanu jataniniucua niajaniya quiarinio pueya nia quiniuria, seetanu rupaacuajanaa nia tiuuniucua. Cunora, canaari pueyaracaanu Pueyaso sequequiaa niaacuarani, “paacarasho”. ¹⁴ Canaa pohuatasacari Pueyaso rupaa nia niquiara, niaari Jesucristoocua tiuquiaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuaani.

¹⁵ Naaratej cuarta Pueyaso pueyanaa, majaari nioojia nia niquijiotenu Pueyasocuaaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajanijajuhuj. ¹⁶ Jyanoojia pa Jiyaniijia Jesucristo quiniucua, pa Que Pueyasojuhuj, nojoriiri pa

paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanohua maninia miishaanutaniya pueyaracaanuni. ¹⁷ Naajuhuj, nojori cuaara nioojia shiniujiiria, maninia nojori tojitiajaca nia quiniuria pueyaracaanu. Nojori cuaara cumaquiiria nijaniya, tojetaarucujanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuj, cuno rupaa pueya tojishacari, nojori jatanishaanura, naatej, taa na jataniquiaari nijaniyacuaani. ² Canaacuara nia secojorejuhuj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasocua. Cuno pojoricuajaari canaa paracaajiaca. ³ Naajaa, paacuajaari niishiya pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niqijiotenura nocuaji. Sesaacuaji nia cojuanutaniyajaariuhuj. ⁴ Pa Jiyaniijiacuaa canaa tiuushacari, majaari canaa taacanunu niaa naasucuaari canaa rootasano tojitiaaquiniutianiya. Maja. Niaa naasucuaari na tojitiaacuaja. ⁵ Pa Jiyaniijia cuaara niishitiiria nioojiajinia, panijia nia quiniuria taa Pueyaso paniyacuaani. Naajuhuj, cuaara nia niishitiiria naquiya miiniu rejeretajaca nia quiniuria, Jesucristo cumaquishacari nijaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijiacatej. ⁷ Niaacuajaari niishiya taa quijia canaa quiquiaari niaata canaa quishacarini. Naa quijia nia quirijuhuj. Majaari canaa taajeyaca canaa matanu quijiani. ⁸ Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitiana, maja quenaaja canaa taajetenura nijaniya, maja nia tacaatianura canajuhuj. ⁹ Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canajuhuj. ¹⁰ Canaa quishacari niaata jiyacarijuhuj, canaari nio nia niishitiojoquiaarini: “Cante poonijionu paniaquiyani, cuaara miaqueteshiyaquiiriajuhuj”. ¹¹ Canaari pohuatasaru-cuaajaaniuhuj, noojiaqueya nijaniyajinijionaaari juhujaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuaara poonijionuura, nojori panishano nojori jiitiana.

¹³ Cuarta Pueyaso pueyanaa, teyano nijaniyajinijiniote maninia miijiacacuaani, majaari maninia miiniu nia tarinitianu. ¹⁴ Saniniuujia, cante nio naajioneejinia canaa sequesano tojiniu paniaquiyani, nojuaja nia niishiri cantenononi. Majaari na rupeenuj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatascari

¹⁶ Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiiitaara puetunu niajanijajanaa.

¹⁷ Janiyari Pabloni. Cua saruhuatanura niajaniya, janiyari tama cua juaashiquiata-jaaja nio naajiyani. Nia niquiri cua naajiosano, taamuecatenonjoni. Janiyari naa puetunu cua naajioneecajanaa tucuataquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiiria puetunu niajanijajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo sarhuatasacari Timoteo

¹ Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ² Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuj, nojori cuaara cumaquiiria quiajaniya. Nojori cuaara quioocua taraajeerajuhuj. Nojori cuaara pueyaracaanu quioojia cajitiiriajuhuaj.

Pablo sequesacari sesa niishitiojonuujuaca cuaara sanaajasaaria

³ Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴ Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucuyocuara naajionuutasanoni. Pueya niishiriojonuusacari pueyaracaanu cuno najuhuana casaa-jinia, nojoriiri cunoocua juayonuujutaquiaa saaja. Saniniuujia, nojori cuaara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitioojuaca nojori quiniuria. Nojori cuaara shitimia panitioojuaca quiiria, juhua jeequesano nojori jiuujia quishacari. Seetanujuanaa Pueyasooocua nojori tiuushacari, nojori cuaara panitioora maja noojia macuhujenuta sesa nojori miishanojiniji. ⁶ Noojiaqueya cuno pojorijinijinioori tari tarinitiacanu tojiniu nio maninia niishitiojosano. Nojoriiri cushitiiguanu na pocoojonuucua, na nacojonuucua najuhuana tama nojori niishishanojinijiaaja. ⁷ Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniuujushacari pueya, pueya tojiniuria najuhuana capa nojori niishitiojosano.

⁸ Paacuaajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. ⁹ Paacuaajaari niishiyani, Moisés Rootasanoori maja na pueretenu maninia miijiaca pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojeacarajuhuj, sesa miijiacaranio. Moisés Rootasanoori Pueyaso rerequetejacara, Pueyaso casaa rerequetejacarajuhuj, noo pojorirajuhuj, tama na que tacartaja monutej, na nucuanio, pueya puecoojuacarajuhuj. ¹⁰ Moisés Rootasanoori na camishoo maajipohua numuetucunujuacara, maajishuriuhuara, na numuetucunujuacaranio. Moisés Rootasanoori pueya nohuasenujuacara juhua casami na niqitiojosocoriquiano tamasaca seyara; sapojonuujacaranio; na sapojonuta na sequesano maatejacaranio, nocua na tiuushaanura; puetunu noo pojorirajanaanio, maninia niishitiojosano tojiyashijiacatej. ¹¹ Cuno maninia niishitiojosanoni, cunocuaajaari cua pohuatasano Jesucristo rupaa-jiniji, pueya jatanura Pueyaso pueyara. Pueyasoori jiyanoohua maninia, cuno rupaa pohuatanara na jiyatenuucua janiya.

Pablo shuquiritasacari Pueyaso, na rupaa pohuatanara na jiyatenuucua nojuaja

¹² Pa Jiyaniijia Jesucristoori cucua tiuquuaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, “paacarasho”. ¹³ Tariucuacaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijuhuaj, nocua tiuujiaa cua miitiasacari. Janiyari jiyanohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miriquiaani, nocua tiuyashijia cua quishacarijia. ¹⁴ Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniuriajuhuaj.

¹⁵ Timoteonaa, niiori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jiyanootiniuria sesa miijiaa. Janiyacuajaari tojetaarucujanaa cuno sesa miijiaa pueyajinijinio na jiyanooshanoni.

¹⁶ Janiyari naa jiyanooshaaquiaarini puetunu pueyajanaa niishiniuria taa jiyanohua jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaa janiya, sesa miijiaa cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhua Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj.

¹⁷ Naa jiyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari Jiyaniijiajuhanajaj. Nojuajaari Pueyasocujaja, shaajeyashijia, namijiata niquiyaquishoo. ¡Jiyanohua maniniaari pa Jiyaniijia! ¡Naa seetanujuanaari!

¹⁸ Timoteonaa, quiaacuajaari niishiya taa Pueyaso cumaquiquiaari quiajanijacua-jani, nera quia poonijionura. Cunoori quiquiaari Pueyaso pueya jitianaa jaara caminiujuquiaari Pueyaso sequenu panishano quiara, nera poonijiona quia quiniuria. Naacuajitij quianunaa, cua tojiri. Pueyaso cumaaca quia jiiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojijia quia quishacarijuhuaj. Naa quijia quia quiritij, quioojia mariqui quia macuhujareeri quiaa jaara sesa miiriquia. Noojiaqueya pueyari tari Pueyasocua tiuuniu tarinitiacanu nojori ruuretanuucua Pueyaso Sohanu numootesacari nojori jiuujiajinia, sesa nojori miishacari. ²⁰ Naa miitiquianuuri Himeneo, Alejandronio. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimiaaquenura Pueyasocuaara.

2

Secojonuunura niishitiojosano

¹ Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacuara nia secojoriquiajuhuaj. Naajuhua, Pueyaso nia sequeriquia “paacarasho”, pueyaracaanu maninia na miiniuucua. ² Jiya jiyaniijianucuaacuara nia secojonuuriquiajuhuaj, puetunu pueya camarucuaacuajuhua. Nojoriicuaara nia secojonuuriquia, juhua janiya pa quiniuria panaatia, juhua janiya pa tojiniuria Pueyaso, maninia pa quiniuria parta pueyatajuhuaj. ³ Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. ⁴ Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaaajanaa niishijiaa nojori quiniuriajuhuaj. ⁵ Pa Que Pueyasoori niquiriyatujua. Majaari tamonu Pueyaso quiniu socua. Naajuhua, niquiriyatujua pueyanoori quia Pueyaso Jiyanootijia pueya. Nojuajaari Jesucristocujaja. ⁶ Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuajitij, na

Que Pueyasoori na naata jiyanooniu pajaniya saniniuujia. Quiarijiacuajaari Pueyaso panishacari Neyanujiniji pohuataaanura pueya niquiara, nojori jiyanooshaanura. ⁷ Nio rupaa cua pohuatanurajuhuj, Pueyasajuanaari cua jiyatequiaari Jesucristojiniji pohuataa cua quiniuria. Cua jiyaramiquiquiaariiri taucuaca cua niishitiniuria Jesuucua nojori tiuniuria, seetanu rupajaanaa nojori niishiniuriajuhuj. Nio cua sequesanoori seetanujuanaa. Majaari cua sapojonu.

⁸ Cunora, cua tojiri. Janiyari paniyani puetunu tiquiyocuajanaa pueya secounuunura Pueyaso. Jiyocuacaanu nojori shiitiosacari nojori juaashiquia nojori secounura, nojori jiuujia cuaara quiiria jeequesano sesa nojori miishanojiniji. Naajuhuj, cuaara quiyaquiiria najiquitishano, maja sesa niishiriojonutajuhuj. ⁹ Naajuhuj, janiyari paniyani maajipohua cuaara cushiyaquiiria puera maniniuquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajuhuj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojoriiri seetanujuanaa shanohua niquishano, nojori muecaca jeeacasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushitianuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. ¹⁰ Nojori cuaara maniniucuasaariquia cutara, maninia miijiaca maajipohua nojori quiniuucua. Nojori cuaara quiiria juhua noo maajipohuj, canapuetucujaja tama nojori cuaqueyajaaja jiyatecanu Pueyasora na quiniuria seetanujuanaani. ¹¹ Pueyaso rupaa niishitiosacari, maajipohua cuaara tojitiariquia sanaa, maja Pueyaso rupaa pohuataanaa na rejetenuta. ¹² Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaanura narta Pueyaso pueya jitianana na quiniuria. Nojori cuaara sanaa tojitiariquia cutara, narta Pueyaso pueya rerejosacari. ¹³ Quia niishiri Timoteonaa, casaara naa cua sequeyani. Pueyasocuajaari coteenu Adán shipiniquiaari. Na nuhuaji Adán niquiorano Eva shipiniquiaariiri. ¹⁴ Quia niishirijuhuj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuajitij, na sapojosaanuucua, Evaari Pueyaso tojiyashijjara quiquiaari. ¹⁵ Naaratej, maajipohua cuaara maninia canashitijjoora necohua. Cuaara panijiaa quiiriajuhuj. Cuaara maninia miijiaca quiiriajuhuj, maninia niishiriojjuaca nojori quishacari. Naa maajipohua miishacariitij, Pueyasoori nojori jitianutaniya maninia, Jesucristoocua tiujujiaa nojori quishacari.

3

Pueyaso pueya jitianatucua taamueca pueyano quiriqiani

¹ Nio sequesanoori seetanujuanaa: cante Pueyaso pueya jitianara quiniu paniyani, nojuajaari maninia poonijosano miiniuucua jiaatiaa. ² Naaratej, cante Pueyaso pueya jitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niquijioteyashijia, maninia niishiriojjuajuhuj, pueya rerequeteyaquishoonio. Cuaara quiiria maninia pueyano, rucoojuaca pueya tiuquinitiaja na tiajinia. Cuaara quiiria Pueyaso rupaa niishitiojjuua maninia. ³ Naajuhuj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya rihuaneyashijia, pueya juaashacari nojuaja. Cuaara quiiria shiniquiajuhuj. Cuaara cumaneecaacua jiaatiaashijia quiiriajuhuj. ⁴ Naajuhuj, nojuaja cuaara na tiajinia quiniaa jitiaja quiiria maninia. Cuaara necohua niishitiojjuua quiiria maniniajuhuj, tojitiajaca nojori quiniuria, pueya rerequeteyashijiacanio. ⁵ Naacuajitij, pueyano jaara maninia casaa necohua niishitiojiyashijia quiriqia, ¿maatucua taa maninia jitiariquia Pueyaso

pueya maanuni? ⁶ Naajuhuj, Pueyaso pueya maanu jiitariquiiano cuaara quiiria seetanujuanaa Pueyaso tojijia pueyano cutara. Cuaara quiyaquiiria shusha Pueyasoocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaaricuaani. Pueyaso panishano seru Satanás quishacarija, nojuacuajaari taanuusaquiaari Pueyaso shuriucujaji, na jiyaniishacari nojuaja na naata na Jiyaniijia Pueyaso shocotanu. ⁷ Naajuhuj, Pueyaso pueya maanu jiitariquiiano cuaara quiiria maninia miijia pueyano, Jesucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quirij, nojuajaari juhua Sesaaca norijosano quiniutianiya. Naacuajitij, pueya tojiyaquishano quiniutianiya.

Narta Pueyaso pueya naacunaatucua taamueca pueya quiriqiani

⁸ Naajuhuj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijia. Cuaara quiyaquiiria puera mashaca jereeca ratunuucua jiiinio. Cuaara quiiria cumaneecaacua jiaatiaashijia, jiyasohujaja na nohuasejonura, na sajonuta na masenuranio. ⁹ Naajuhuj, nojori cuaara seetanujuanaa Pueyaso rupaa tojiijaca quiiria, teyanocua tiuujia pa quiyacujani. Naacuajitij, nojori jaara naa miijia quirij, ¿nojoritiucua casaacua cararosaariqiani? ¹⁰ Cunora, pueya cuaara senota jiyateyaquishaaria Pueyaso pueya naacuna nojori quiniuria. Cuaara coteenu maninia niishishiiria nojoriiri seetanujuanaa Pueyaso tojitiajaca. Nojori jaara maninia miijia pueya quiri, na nuhuaji cutara, nojori cuaara jiyatesaaria narta Pueyaso pueya naacuna nojori quiniuria. ¹¹ Naajuhuj, Pueyaso pueya naacuna niquiocoehua cuaara quiiria tojishano maa-jipohua, maja rimiaacatuji. Cuaara quiiria niishiriojuaca, na sequesano miijia pueyaracaanunio. ¹² Cante Pueyaso pueya naacunaani, nojori cuaara jiiiaara saa niquiriyatu niquiucujaja. Cuaara quiiria necohua niishitiojuca maninia casaa, na tojitiajaca necohua quiniuria. Naajuhuj, cuaara quiiria maninia jiiiaja na tiajia quinia pueya. ¹³ Naacuajitij, Pueyaso pueya naacuna jaara maninia poonijioquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jiyanoehua Jesucristoocua tiuujacara jatanutianiya, na puereyaquiniutia nojori poonijionura pa Jiyaniijiaara.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitij, janiya jaara tarishirini, janiyari paniani juhuacarija quia niishiniuria taa quijia quia quiniutianiya, Pueyaso pueya maanujia quia quishacari. Pueyaso pueya maanucujajaari pueyaracaanu rishijia Pueyaso quiquio. Na saquiriojosano pueya nojori quiniucua, nojoriiri na rupaa jiiianaacujaja, nocujaji tacunaajaari iuhuj. ¹⁶ Seetanujuanaa nocujaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuri pa niishitiquiaari, nojuajaari tojetaarucujajanaa sesa miyashijia. Naajuhuj, Pueyaso seyacuajaari Jesu niquiquiaari na samiitasacariuhua. Nojuajiniijiri pohuatasaaquiaari Judiocuaca niquiara, taucuaca niquiarajuhuj. Pueyapueeri nocua tiuquiaari. Na Queeri na tacaniquiaariuhua Jiyaniijiajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitiojosano nojori tojiniuucua. Nojoriiri seetanujuanaa sapojosaanutaniya naa nojori tojiniuucua samaruhua niishishano. ² Nojoriiri sapojonuujua pueya tojitiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuaari tariucua sesa miiniuucua jiitiquiono. Majaari tari na niishitiuniu caririquiniu. ³ Cuno pojoriiri pueya niishitiojojua maja na caminiuria. Niishitiojonuuquiaajaariuhuj maja pueya miaquenura noojiaqueya miaquesanojuhuaj, teyano Pueyaso shipiniquiaari Jesuucua tiuujiacaracuajani, cante seetanu rupaaajanaa niishijiacacuajani. Cuno miaquesanocuaajaari pa timitiasocoriquiano, Pueyaso pa sequenura, “paacarasho”. ⁴ Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaquenu, paa jaara coteenu nocuara Pueyaso sequereni, “paacarasho”. ⁵ Pueyaso rupaacua tiuujia pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriquiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaja rootasanotanio, taa quia tojiquiaacuajanoj. Quiaa jaara naa miijia quiritij, quiaari maninia poonijiona quiniutianiya Jesucristora.

⁷ Majaari najuhuana tariucuacaanu supuetanaa pohuatanuusano tojijia quia quiniu, najuhuana tama pueya niishishanojuajaajanio. Majaari cuno tojiniuucua quia cojenu najuhuanaj. Jiyanhua quia jiaatiare cutara, saaja Pueyaso tojijia quia quiniuria. Naa miiniu quia saniniujiuri jiyanhua, seetanujuanaa Pueyaso panijia quia quiniuria. ⁸ Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaaja pa cuaqueyara, mijiria pa quishacari. Saniniuujia, socua jiyanhua maninia cutaraari Pueyaso panijia pa quiniuria seetanujuanaa. Cunoori jiyanhua maninia, mijiria pa quishacariria, Pueyaso shuriucua pa quishacaririjuhuj. ⁹ Nio cua sequesanoori seetanujuanaa. Puetunu pueyajanaa cuaara na tojiiria. ¹⁰ Cunora, pueya jaara pa miitariquia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

¹¹ Nio cua sequesano quiajaniya quia niishitiojore pueya. Nojori quia nacasuriquia jiyanhua, na tojitianura quiajaniya. ¹² Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhuj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuj, seetanujuanaa panijia quia quiri, Pueyaso rupaacua tiuujiajuhuaj. Majaari rucuajeejojua quia quiniu. Naa maninia miijia quia quiri, pueya jiaatianura quiocua. ¹³ Naacuajitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanhua, Pueyaso tojitiajaca nojori quiniuhuara seetanujuanaa. Seetanujuanaa nojori quia niishitiojoriquia maninia. ¹⁴ Pueyasocuaajaari na cumaaca niquitioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyaracaanu. Majaari najuhuana na jiitianu.

¹⁵ Puetunu niya cua rootasanojuanaa quiajaniyani, cuno tojijia quia quiriquia. Naa quia quiritij, puetunu pueyajanaa niquniuria taa seetanujuanaa socua maninia Pueyaso tojijia quia quiyareeni. ¹⁶ Naacujitij, tama quioojiaaja quia cojuare. Naa-juhuaj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacujitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojitiajaca pueyari Pueyaso pueyara quiniutianiyajuhuaaj.

5

Paatucua taa jiitariquia parta Pueyaso pueyani

¹ Majaari quia saaquiapue quia nacasunu quia juaaniutia, Pueyaso rupaa nojori tojiyaquiniucua. Nojori quia nacasure jacaria, juhua quia que. Mashiquiori quia nacasure jacariajuhuaj, juhua quia tapueyocuaca. ² Naajuhuaaj, motajoori quia nacasure juhua quia nucua. Niyacoojori quia nacasure juhua quia rimiatuhuajuhuaj, maja nojoriicua quia jiaatianuta.

³ Mashiquiopue jaara tojetaarucujanaa niqiuohuaju quiri, jinianuhuajunio, Pueyaso pueya cuaara nojori naacuura. ⁴ Saniniuujia, mashiquio jaara niqiuohuaraca quiriquia, jinianuhuaraca soj, cuno pojori cuaara coteenu tama na nucuaajaaja cojuatunu niishiiria, na jijiuhuaaj. Naacujitij, necohua cuaara na queya cojuaara, taa na queya cojuaquiaari nojoricuaani, naatujoori nojori quishacari. Pueyasoori naa na queyacuara taraajecata timitiaja. ⁵ Noo mashiquio, cante seetanujuanaa jiyopueejuni, nojuajaari saaja Pueyasoocua tiuquuaa. Majaari na tarinitianu secojonu juuca, niucuanio. ⁶ Noo mashiquio saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarija. ⁷ Parta Pueyaso pueya quia niishitiojore nio cua rootasanojuhuaj, sesacaso nojori quiniuria. ⁸ Canapuate na queecua, na nucuaacua taraajeyaquiiani, tama na tiajinia quiijaca pueyacuajuhuaaj, naa miijiacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacujitij, nojoriiri socua tojetaarucujanaa sesa, Pueyasoocua tiyuaquijia pueyajiniji.

⁹ Mashiquio jaara Pueyaso pueya jitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. ¹⁰ Cuno mashiquio cuaara niishishano maaji quiiria, maninia miijia na quiniucua. Cuaara quiiriajuhuaj, cante maninia canashitijioquiaari necohuani. Cuaara rucoojuacaacua taraajeja quiiriajuhuaj, na tiajinia na maquiojojua. Cuaara maninia miijia quiiriajuhuaj, narta Pueyaso pueya niuhuaca jeequejojua. Cuaara taraatia miishano pueyacuara taraajeja quiiriajuhuaj, nojori cumanijianajuhuaaj. Cuaara puetunu maninia na miiniujianaa tarinitiaaquijia quiiriajuhuaj.

¹¹ Saniniuujia, noo mashiquio, teyanote juhuanujuaja maja na shocotejonu sesenta marijiani, nojori cuaara jiyateyaquishaaria Pueyaso pueya jitianaa naacunaara. Nojori na naata Cristo samiritianu, niyacaaniucua nojori jiaatiasacari. ¹² Naacujitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. ¹³ Naajuhuaaj, niyacoo naata mashiquio nojori quishacarijia, nojoriiri saaja rucuanefonu maniniucuaaja, na tiuquijionura puetunu tiacojuanaa. Naa tama na poonijosanojuaja na jitiaaquishacaritij, nojoriiri taajecaturjuria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasacaraj. Naajuhuaaj, sacuaratia neteyocojiyari juhua paateca, na taajetenura pueya, na caminiujiushacari jiyasohuaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara mueturajuhuaaj. Cuaara na tia camarucua quiquioora. Nojori

jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵ Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojjijaca nojori quiniuria saniniuujia.

¹⁶ Pa Jiyaniijiaacua tiuujia maajipohuajinijinio jaara tama na pueyajinijinojuaaja jiitiare mashiquiopue, nojori cuara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucujanaa jiyopueejuni.

¹⁷ Pueyaso pueya jiitianaa, noo pojori canapuate maninia jiitianaa narta Pueyaso pueyani, nojori cuara narta Pueyaso pueya tojishano quiiria. Naajuhuj, nojori cuara nareja niqutiosaaria, na panishano nojori jiitianura. Pueyaso pueya maanu jiitianaajinijinio, canapuate Pueyaso rupaa pohuatanaacuajani, Pueyaso rupaa niishitiojonaanio, nojori cutara cuara socua queraatia niqutiosaaria, maninia poonijosano nojori miiniuucua. ¹⁸ Tariucuacaanu Pueyaso Rupaaajinia naajiotasanoori naa niishitiojiyajuhuj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucuajiniji”.

Naa sequeyajaariuhuj:

“Poonijotesano pueyano cuara niqutiosaaria na poonijionu sami”.

¹⁹ Pueyano jaara saquiriojotariquia Pueyaso pueya maanu jiitianaacuara, majaari na tojiniu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa. ²⁰ Naacuajitij, Pueyaso pueya maanu jiitianaajinijinio jaara sesa miiriquia, Pueyaso pueya maanu niqiuara quia nacasurenoj, puetunu narta Pueyaso pueyajanaa puerenura, maja sesa nojori miiniurajuhuj. ²¹ Timoteonaa, janiyari nio quia sequeya Pueyaso niquliarani, Jesucristo niquliarajuhuj, na saquiriojosano seya niquliaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijionu sacuaraatia. ²² Naajuhuj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenojoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia quiniuucua, secaja vino quia raturiquiajuhuj quia jiniacuma na jecanura.

²⁴ Noojiaqueya pueya, sesa nojori miishanoori maatia niishishanocujaja, Pueyaso saniitionu juuca quiyaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanojuaja, Pueyaso cuara nojori nujuatejore na tacojijiaatijia, na nequesoreesocoriquiano. ²⁵ Naajaariuhuj, maninia pa miishanoori maatia niishishano mijiria. Jiyasohujaja maninia pa miishanojuhuaj, cunoori na nuhuaji niishishaanutaniya maatiajuhuaj.

6

¹ Parta Pueyaso pueyajinijinio, canapuate poonijotesano pueyani, nojori cuara na camarucua tojitiajaca quiiria. Nojori cuara rerequeteyaquiiria na camarucua, na

camarucua mariqui Pueyaso sesacareeri, pa niishitiojosanonio, na tojiyashijia na seru quiniuucua. ² Poonijotesano pueyano camarnu jaara Pueyaso pueyano quiriquia, juhua na serujuhuaaj, na seru cuaara na tojjia quiiria. Cuaara na rerequeteja quiyaquiria, narta Pueyaso pueyano na camarnu quiniuucua. Nojuaja cuaara seetanujuanaa maninia poonijioora nera, na niishishacari na camarnucuaajaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuaaj. ³ Tamonu jaara tamaatia niishitiojoriquia cua niishitiojosanojiniji, nojuajaari tojetaarucuaajanaa moseeca. Pa Jiyaniijia Jesucristo rupaari jiyanhua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojaaaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaationu porocuajuhuaaj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juaajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetooquiaa na juayonuutanura. Sesacatooquiaajaariuhuaaj. Naajuhuaaj, nojoriiri najuhuaana soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaaquiijaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaa-janaa Pueyasojiniji. Nojoriiri Pueyaso pueya jiiitajacara quiniu paniya, nojori jiyani- ishacari nojoriiri naacuaji jiyanhua casamiriacara quiniutianiya. ⁶ Taaquiriirinij, Pueyasocua tiuujia pa quishacari, paacuaaquiniatejaj seetanujuanaa juhua quera- atia casamiriaca quijiacani. Paacuaajaari shuquiriaatia quijiaca Pueyaso rupaacua tiuujia pa quishacarini, juhuajaniya quijiaca pa quishacarijuhuaaj pa jiiitasano casaaniyojuata. ⁷ Paacuaajaari juhuasunucua roosaaquiaari mijiriani. Naajuhuaaj, paari juhuasunucua tacateriquianohuani. ⁸ Naaratej, paa jaara pa miaquesocoriquiano ji- itiariquiani, paa jaara pa cushishocoriquiano jiiitiariquiajuhuaaj, saa cunotaja shuquiri- atia pa quirij. ⁹ Saniniuujia, noo pojori, jiyanhua casamiriaca quiniuucua jiaatiaja- catej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casami- icua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. ¹⁰ Cumaneeacaacua jiaatianu jiyanhuaani, cuniquiji supuejaari puetunu sesa casaa pa miiniurajanaa. Naacuajitij, noojiaqueya parta Pueyaso pueyajinijinioori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatiajaca nojori quishacaritij. Naaratej Timoteonaa, majaari cumaneecaacua jiaatiaja quia quiniu.

Pablo shiniujiushacari Timoteo, Pueyaso tojjia na quiniuria pueyaracaanu

¹¹ Quiajaniya Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucuaajanaa saaja maninia miiijia quia quiri, juhua pa Jiyaniijiaja. Pueyasocua tiuujia quia quiri socua. Socua panijia quia quirijiuhuaaj. Puetunu casaajanaa rejeretaja quia quirijiuhuaaj. Jacaria pocuaja quia quirijiuhuaaj, maja pueya rerequeteja. ¹² Pa paraca nujuataja quia quiriquia, jiyanhua quia tiuuniutia Pueyaso rupaacua. Pueyasocuaajaari quia saquiri- ojuquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niquitiojonu panishano quiajaniya jaaretenu. ¹³ Quiaacuajaari niishiya taa Jesucristo seetanujuanaa pohuataquiaari Poncio Pilato

niquiaracuajani, nojuajaari seetanujuanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuajaari na samitiani quiaariuhua. Pueyasocuajaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhuj. Cua tojiri. ¹⁴ Puetunu cua rootasano quiajanijajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajanijacuajani, na tojijia quia quiri pueyaracaanu, pa Jiyaniijia Jesucristo cuaara tiuquiriohuajaatijia, Jiyaniijiajanaa na quiniuria. ¹⁵ Na Que Pueyasoori na tiuquitiniutianiya na panishacari, taa na sequequiaaricuajani. Pueyasocuajaari jiyano hua pa timitiasano, saaja maninia na quiniuucua. Nojuajanaari Jiyaniijia. Nojuajaari puetunu tamasaca jiyaniijianucujanaa Jiyaniijia. Nojuajaari camarucuajiniji Camarnujuanaa cutara. ¹⁶ Saaja nojuajaari pueyaracaanu quijiajuhuanajaj. Majaari na supueni quiquiaari. Majaari na shaajenu quiniutianijajuhuj. Nojuajaari jiyano hua na shacantuuca cumaacajinia quijiajuhuanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuaara pueyaracaanu timitiasaaria! ¡Nojuajaari namitia na cumaaca jitianajuhuanajaj! Cuaara naa quiiria pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuaara niishiiria maja pueya shocotejaca nojori quiniuria, casamiriaca nojori quiniuucua. Nojori cuaara niishiiriajuhuj, maja na casamiicua nojori tiuuniuria, nojori jyanishacari nojoriiri pueyaracaanu shuquiriaatia quijia quiniutianiya casamiriaca nojori quiniuucua. Pa jiiiasano casamiiri shaajeriquiano. Nojori cuaara Pueyasocua tiuuria cutara. Nojuajaari capora cutara, na niquitionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia miijia nojori quiniuria. Naatej, taa queraatia casamiriacatucuaa nojorini, maninia nojori miishano cuaara naa queraatia quiirajuhuj. Nojori cuaara ritia niquitiojuaca quiiria nojori jiiiasanojiniji, narta Pueyaso pueyano jiiitaaquishacari na panishano. ¹⁹ Naa capora nojori quishacaritij, nojoriiri juhua tari jiyocuacaanu racataa nojori casaa. Naacuajitij, nojoriiri seetanujuanaa shuquiriaatia quijia quiniutianiya pueyaracaanu, mijiria, jiyocuacaanunio.

Pablo rootasano Timoteo, naajionu na tucuatascari

²⁰ Timoteonaa, Pueyasocuajaari quia jiyatequiaari na rupaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaaja tojijia quia quiniu. Noo niishishanojuhuj, pueya sequesano: “Seetanu niishijajanaa niishishano cutaratej”, majaari cuno tojinu. Cuno niishishanoori seetanu niishishanojuanaa paraca, najuhuaanaari. ²¹ Noojiaqueya parta Pueyaso pueyari Pueyaso rupaa tojinu tarinitiacanu tari, cuno najuhuaana niishishanoocua nojori tiuuniuucua. Niojuanaa Timoteonaa.

Pa Jiyaniijia cuaara quia cumaquiiria.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricujani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuaaj, nojori cuaara cumaquiiria quiajaniya. Naajuhuaaj, nojori cuaara taraajeera quiocua, nojori cuaara pueyaracaanu quioojia cajitiiriajuhuaaj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojtiaquiaari Pueyasocuaani. ⁴ Majaari cua niyajetanu quiquiaa quia nujuquenu cucua, janiya jaara quia shuriucujaji quiaquiaarini. Janiyari cunora jiyanohua jiaatiaa cua niquiniuria quiajaniyani, shuquiriaatia cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujiaacua. Quia ji Loida, quia nucua Eunicenio, nojoriiri coteenujuanaa quiocujaji Pueyasocua tiuujiaa quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuaaj, taa nojori quiquiaaricuaani.

⁶ Pueyasocujiaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniuriajuhuaaj, maninia niishiriojojuacarano. ⁸ Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuaaj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuaaj, Jesucristojiniji quia pohuatasacari. ⁹ Pueyasocujiaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooniu pajaniyani, majaari na quiniu quiquiaari maninia miijiaca pa quiniuucua juucua. Maja. Nojuacuajaari naa pa jiyanooquiaari saaja naa na miiniu paniniuucua, jiyanoojia na quiniuucujuhuaaj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. ¹⁰ Quiari naataja pocujaji Tacuna Jesucristo niniuucua, Pueyasoori pa niishitiquiaari taate na naata jiyanooniu pajaniyani. Cunora, Jesucristoori pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaa jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquiaarini. Nojuacuajaari pocujaji Tacuna Jesucristo. Cunora,

janiyari seetanujuanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaatijia. Naajuhuaaj, nojuacuajaari cumaacaraca na jataninuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacujani. Naa quia miiriquia Pueyaso rupaacua tiuujia quia quishacari, pueya panijia quia quiniuucujuhuaaj, Jesucristo rupuesano pa quiniuucua.

¹⁴ Pueyasocuajaari quia niishitiquiaari seetanu rupaajanaa. Pueyaso Sohuanu quiniuucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinijinioori quiquianujuhua Figelo, Hermógenesnio. ¹⁶⁻¹⁷ Saniniuujia, Onesíforo cutaraari cucua tiuquitiasucanu. Cunora, pa Jiyaniijia cuaara nocua taraajeera, puetunu na tiajinia quijiacaacuajuhuaaj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riuriatarejaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. ¹⁸ Quiaacuajaari niishiyajuhuaaj taa nojuaja naacuquiaari pajaniyacujani, Éfeso tiacajinia pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesíforo saniniuujia.

2

Jesucristora poonijiojua quia quiri quia puereyaquiniutia

¹ Quiajaniya saniniuujia quiyanunaa, quioojia quia cumaquiriquia Jesucristo niquitiosano cumaacata. ² Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojiquiaari queraatia pueya niquiara cua pohuatasacaricujani.

³ Juhuaajaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiriquiajuhuaaj Timoteonaa. ⁵ Naajuhuaaj, pueya tacuarishijosacari, nojori cuaara quiiria tacuarishijionu camarnu tojjia. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacuajitij, majaari na niquitiosaanu casaa, sesa na miiniutia na shocotasacari. ⁶ Nio quia niishirijuhuaaj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niquitiojonu na senoosanojiniji. ⁷ Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

⁸ Majaari nio niyajetanu: Jesucristoori macujiniji samiitianishaaquiaariuhua, Pueyaso Niyanu na quiniuucua. Pueyano quiquiaarijiaariuhuaaj. Nojuacuajaari pa supuetanaa jiyaniijia David niquiohuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocuajaari cua pohuatasano Pueyaso Rupaa. ⁹ Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhuaaj, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰ Cunora, janiyari

puetunu naquiya miiniujianaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhuj, taa na jatanishano pueya pa quiyacuaani. Naacuajitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujuanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhuj, pueyaracaanu rishiriquiano pa quiniuria. ¹² Naajuhuj, paa jaara naquiya miitiasaariquia nocua pa tiuuniuucuaani, nojuajaari camarucua pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijiaca pueya niquiarani, nojuajaari pa tamacanutanijajuhuj. ¹³ Paa jaara na sequesano tojiyashijiaca quiriquiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quijiate Pueyaso shuquiritiasano nera poonijionani

¹⁴ Parta Pueyaso pueya quia niishitiojorohuarohua maja najuhuana nojori juayonuujutanura tamaatia niishitiojosanoocua. Jiyanohua quia nacasure nojori Pueyaso niquiara, maja naa nojori nacojonura najuhuana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵ Tama quia cuaqueyajaaja quia cojuare, saa maniniaja quia niishitiojonura Pueyasojiniji cuno seetanu rupaajanaa. Naacuajitij, Pueyasoori quia timitianutaniya nera poonijiona maniniu quia quiniuucua. Majaari capa quia niishitiojonu, quiaa mariqui tamajaaja caririquiriiri. ¹⁶ Naaratej, majaari najuhuana tama mijiria pueya niishishanojuaaja quia tojinuu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. ¹⁷ Cuno najuhuana niishitiojosanoori jiyanohua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiarijia. ¹⁸ Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucuajanaa samiitianishanocuaajani. Naacuajitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. ¹⁹ Naajaa, Pueyasojuanacuajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuaajaari:

“Pa Jiyaniijiaari na saquiriojosano pueya niishiyacuaaja”.

Naa naajiotasanoori quiyajuhuj:

“Canapuate pa Jiyaniijia Jesucristoocua tiuujiacani, nojori cuara sesa na miijionu tarinitiaara”.

²⁰ Sanajanaa, cua tojiri. Jiyanohua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniji panishano patacocua, conaanio. Puetunu cuno casamijinijiniojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. ²¹ Paari naajuhuj. Paa jaara tama pa cuaqueyajaaja cojuariquia tojetaarucuajanaa sesa pa miiniuucuaajini, saaja pa Jiyaniijia pa

quiniuriajuhuj, naacuajitij, pa naata juhua pa Jiyaniijia timitiasano tohuatashiniyujua quiniu. Naacuajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²² Sanajanaa, quiaacuajaari niishiya, casaa miiniuucua jiaatiajacate mashiQUIORINI. Puetunu cuno sesa niishiriojosanojuanaa quia tarinitiariquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijiajuhuj. Jiyanoojia quia quiriquiajuhuj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiaacua nojori tiuuniuucua. ²³ Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴ Pueyasora poonijiojua pueyano cuaara quiaquiiira pueya paracaajia. Saniya cuaara quiiira cutara puetunu pueya panijiajanaa. Cuaara quiiirajuhua maninia niishitiojojua. Cuaara juhujaniya rejeretaja quiiira, tamasaca jaara na taajetere. ²⁵ Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaa-janaa niishijiaca nojori quiniuria. ²⁶ Naacuajitij, nojoriiri maninia niishiriojojuaca quiniutianiya, nojori jaareteenura Sesaacaacuaji, maja Sesaaca miitiniuria nojori taa na paniyacuajani.

3

Taa quijiaca mijiria quiniaa quiniutianiya quera jiya puequesacarini

¹ Quia niishirijuhua Timoteonaa, jiya puequenu panishacari, pueyari socua jiya-catenutaniya sesa miijiacara. ² Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajaca quiniutianiyajuhuj. Naajuhuj, pueyari najuhuaana narta pueya niquiara pocuajaca quiniutianiya, na jyanishacari nojori cutara socua niishijiaca narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuj. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijiacara. Pueyari maninia miyashijiaca quiniutianiya, Pueyasojiniji maninia casaa rerequetejaca nojori quiniuucua. ³ Naajuhuj, majaari quenaaja na queya panijiacara pueya quiniu quiniutianiya, tapueyocuaca, tama necohuajaajanio. Pueyari tojetaarucuaajanaa jyanoyashijiaca quiniutianiya. Sacuaraatia rimiaacatujuri quiniutianiya-jaariuhuj. Naajuhuj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijiacara quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhuj. ⁴ Pueyari tama na cojiniaajaaja tacartajaca quiniutianiya. Pueyari cocuaatia casaa miijiacara quiniutianiya, mosanucua nojori quiniuucua. Pueyari juhujaniya quijiaca quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵ Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶ Tamasaca cuno pueyajinijinioni, nojoriiri tiaco tiuquitiajaca, noo maajipohua na sapojonura, najuhuaana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja rejetyashijiaca. Naa sesa miijiacara nojori

quiniuucuatej, nojoriiri najuhuana tacaquioquiaa. Cunora, nojoriiri cuno sapojonuujuaca tojtiaquiaa. ⁷ Cuno maajipohuari najuhuana pueyaracaanu tojtiaquiaa cuno sapojonuujuaca niishitiojosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jiyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moiséscaani. Naacuajitij, nojori niishitiajaari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuara tojiyaquiiria nojori saniniuujia. Nojoricuajaari Jesucristoocua tiuyashijaca. ⁹ Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacujaari, nojoriiri seetanujuanaa niishiyashijaca, taa pa supuetanaa niishiquiaaricuaani cuno shimiacuriiri sapojonuujuaca.

Pablo tucuatascari naajionu, socua rootaa Timoteori

¹⁰ Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miiijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiaacua tiuujia cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari coojia cua najiquitiniu quijiani, pueya miishacari naquiya janiya. ¹¹ Quiaari niishiyajuhuaaj taa cua miitiasaaquiaari Antioquiya tiacajiniani, Iconio tiacajiniajuhuaaj, Litra tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. ¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijica nojori quiniuriatej. ¹³ Saniniuujia, sesa miiijica pueya, sapojonuujuacanio, nojoriiri socua sesa miiniuria jiyacatenu-taniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

¹⁴ Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiya, cuno niishitiojosanoori seetanu rupaajanaa. Quiaari niishiyajaacuhuaaj canapueete quia niishitiojoquiaarini. ¹⁵ Quiaacuajaari quia naatujuajiniji tariucuaaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶ Puetunu Pueyaso Rupaaajanaacuajaari Pueyaso naajiotanishano na pueya. Cunora, puetunu cuno rupaaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaaj pa miishanoori sesa, na nacasunura pajaniya maninia miiijica pa quiniuhua. Pa rootajaariuhuaaj tojetaarucujanaa maninia miiijica pa quiniuria. ¹⁷ Naacuajitij, Pueyaso Rupaari Pueyasora poonijionaa pueya jeenucuaja tojetaarucujanaa, puetunu maninia casaa miiijiacajanaa nojori quiniuria.

4

¹ Quiaacuajaari niishiya, Jesucristo tiuquishacariuhua mijiria, Jiyaniijiajanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. ² Majaari pueya niquiara Pueyaso rupaa pohuatanu quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa miiijica nojori miishanoori sesa Pueyasora. Pueyaso rupaa tojiyashijica quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta,

maja juaaniutia. ³ Naa quia poojotariquia pueya niquiara, nojori tojiniu panishacar-
ijia Pueyaso rupaa. Na nuhuaji, pueyari seetanu rupaajiniji niishitiojosano tojiniu
paniyaquiniutianiya. Saaja na ruuretanutaniyajaariuhuj. Naa Pueyaso rupaa no-
jori tojiniu paniyaquishacaritij, nojoriiri queraatia tamaatia niishitiojonuujuaca rere-
jotenuutianiya, cuno pojori shuquiritiniuria nojori najuhuana pohuatasanota. ⁴ Nojoriiri
seetanu Pueyaso rupaajanaa tarinitianutianiya, najuhuana sapojonuusano tojitiajaca
nojori quiniuria saniniuujia. ⁵ Quiajaniya saniniuujia, maninia niishiriojojua quia
quiriquia, maja quia sapojosaanurajuhuj. Naquiya miiniu rejeretaja quia quiriquia.
Pueyaso rupaa Jesucristojiniji pohuatanuucua cojeja quia quiriquia, pueya tiuuniuria
Jesucristoocua. Puetunu quia poonijosanojuanaa Pueyasora quia tucuatate maninia,
taa pa Jiyaniijia sequequiaari quiajaniyacujani.

⁶ Janiya saniniuujia, janiyari quera quianutianiya jiyocuacaanu cua quiniuria pa
Jiyaniijiatani. Cua nanaca jaara shootesaare, janiyara, cunoori juhua Pueyasora cua
niquitiosano quiniutianiya. ⁷ Majaari cua taajenu quijia, pueyaracaanu cua pooni-
giosacari cua Jiyaniijia. Janiyari tari tucuatatanu miiniu puetunu na sequesano-
juanaani. Pueyaracaanu cua poojotasacari Pueyaso rupaa, majaari cua jataniniu
quiquiaari quenaaja. ⁸ Naacuajitij, shanohua tuhuajaari quiriano jiyocuacaanu
racatasano quiya tari, maninia miijia cua quiniuucua. Cua Jiyaniijiaari cuno tuhuaja
cua niqutionutianiya na samiitianishacariuhua janiya. Pa Jiyaniijiaari jiyanohua
maninia. Na jiyanooshano pueya pa quiniuucua, majaari socua na saneenu quiniu-
tianiya sesa pa miishano. Majaari saaja janiya na niqitionu quiniutianiya cuno
tuhuaja. Puetunu noo pojorijianaa niqutionutaniyajaariuhuj, canapuate nojuaja na
paniniutia sashiyajaani, cuara tiuquihuara shacantuuca na cumacatajatijia.

Pablo sequesano Timoteo miishocoriquiano

⁹ Majaari puera tarishiniu. Quia secoore, cucua quia tiuquiniuria ritia. ¹⁰ Demasri
cua tiujiaarucuaani. Tesalónica tiacajinia quiaarucuaari. Nojuacuajaari tama na pan-
ishanojuaja miiniu panijiaara jatarohuacuaa. Crecenteeri saniniuujia Galacia jiyajinia
quiaarucuaa. Titoori Dalmacia jiyajinia quiaarucuaajaacuhuj. ¹¹ Saaja Lucasri niya
cuata quiya. Quiaa jaara cumaji niyare, quiocua Marco rupoyare quiocua. Nojuajaari
na naata cua naacunu niya, pa Jiyaniijiaara cua poonijosacari. ¹² Janiyari saniniuujia
Tíquico jiyarorucuaa Éfeso tiacajiniani. ¹³ Taa cua sequeya quiajaniyacujani, quiaa
jaara cumaji niyare, quiocua cua tucuaque toque paare quiria, Carpo tiajinia cua
tiujiasano, Troas tiacajinia. Quiocua quiria patootaare cua nequesoreetuneeajuhuj.
Janiyari socua noo paniya quia patootanurani, shoqueecua naajionuutasano Pueyaso
Rupaatej.

¹⁴ Noo Alejandro, cumueeca casaajiniji shipinijiojua casamitij, nojuajaari jiyanohua
cua paracaajiaara quiquianu. Naajaa, pa Jiyaniijiacuajaari saniniuujia cucua na
naminiutianiyacujua, naa na miiniuucua janiyatej. ¹⁵ Tama quia cuaqueyajaaja quia
cojuare maja na miiniuria sesa quiajaniyajuhuj. Nojuajaari pa pohuatasano cuara-
cashitiya saaja, Pueyaso rupaa ruuretaja na quiniuucua.

¹⁶ Janiya jaara shushajanaa nujuatesaacanu jiyaniijianucua tacojitij, nojori neque-
soreenura janiya, majaari quenaaja tamonu Pueyaso pueyajinijinio quiniu quiriquiaa
tii, cucuaji na tacunura quenaaja. Puetunu cua cojiniaajanaari cua cartecanu tama-
jaaja. Naa nojori tarinitianuucua tamajaaja janiyatej, Pueyaso cuara jiyanooria
nojori. ¹⁷ Naajaa, pa Jiyaniijiaari cua cojiquianuni. Cua cumaquiquianujaariuhuj,
nojuajiniji cua pohuatanura puetunu cuniqui quiniaa Pueyaso niishiyashijiaca pueya-
janaa. Pa Jiyaniijiaari cocuaatia cua miiniujiniji juhua nojori juaashiquiajiniji cua
jaaquianu, maja nojori monura janiya. ¹⁸ Janiyari nocua tiuyani, nojuajaari cua
mashiquiniutianiya puetunu sesa casaacuajijianaa. Cua cojuanutaniyajaariuhuj,
pueyaracaanu rishijia cua quiniuria na shuriucua jiyocuacaanu, Jiyaniijiajanaa na

quishacari. ¡Jiyano hua maniniaari pa Jiyaniijia! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajionee na tucuatasaari

¹⁹ Quiria quia saruhatate Prisca, neyaca Aquilano, puetunu Onesíforo pueyajaanaajuhaj, na tiajinia quiniaani. ²⁰ Erastoori Corinto tiacajinia jateecanu. Janiyari saniniujia Trófimo tiujiacanu Mileto tiacajiniani, cusosu na quiniuucua. ²¹ Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaanio.

²² Pa Jiyaniijia cuaara quioojiajinia quijia quiiria pueyaracaanu. Pueyaso cuaara cumaquiiria puetunu niajanijajanaa.

PABLO NAAJIONEE TITOOCUARA

Pablo naajiosacari Titoocuara

¹ Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiunuaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniucua, pueyaracaanu quijiaca nojori quiniuria Pueyasota. Cunocuaajaari tariucuacaanu Pueyaso sequesano, jiyanoehua tarijiatej, jiya shipinishaacarijiyoyua. Nojuajaari maja na naata sapojonu. ³ Quiari naataja, Pueyasoori na rupaa niishitiniuria paniquiaari pueya, taa na paniquiaari jiyasohuaja tariucuacaanucuaajani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. ⁴ Quiarijiani, quiocuara naajiyaniija Titonaa, juhua cua niyanuniyoyua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaaricuaani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiiataara quioojia maninia, shuquiriaatia quia quiniuria pueyaracaanu.

Titora Pablo sequesano, Creta jiya tucuaatiajajinia na miishocoriquiano

⁵ Janiyari quia tiujiaquiaari Creta jiya tucuaatiajajiniani, quia tucuatanaa cua poonijosano cureeno. Naaratej, quia sequecanunijia quia jiyatenura jiyaniijianucua, Pueyaso muerasu maapue jiiitanaa quiniuria puetunu cuno jiya tiacajiniajanaa, taa cua sequequiaari quiajanuacuaajani. ⁶ Pueyaso pueya jiiitariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuara jiiataara niquiriyatujua niquiocua. Necohua cuara quiiria Pueyaso muerasujuhuj, maja sesa miijia, maja tojiyashijiacajuhuj. ⁷ Cante Pueyaso muerasu jiiitanani, nojuajaari Pueyasora poonijiojua. Naaratej, nojuaja cuara quiiria maninia quiija, sesacasoo, maja tojiyashijia. Cuara quiyaquiiria ritia juaajia, mashaasequejojua, piyototaja. Cuara quiyaquiiria cumaneeca panijia sesa na miishanota na masenura. ⁸ Naajuhuj, Pueyaso pueya jiiitana cuara quiiria rucoonaacua taraajeja. Cuara quiiria maninia miijia, maninia niishiriojojua. Cuara quiiriajuhua seetanujuanaa Pueyaso rootasano tojijia, maja rimiajata maninia miijia. Cuara quiiriajuhua Pueyaso panijia cutara, tama na cuaqueyajaaja jiiitaja maninia, maja sacuaraatia casaa porocua. ⁹ Cuara quiiria Pueyaso rupaa tojijia cutara, taa na niishitiojosaaquiaaricuaajani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajijuhuj, nojuaja na naata pueya tacatonuhua Pueyasooocua sesa nojori niishishanoiniji, noo pojori canapuate Pueyaso Rupaa ruuretajaca quiyacuajani.

¹⁰ Naa quia sequereenijia, queraatia tojiyashijia pueya quiniucua, canapuate juhua niishiyashijia niishitiojoquiaa najuhuaana niishitiojosanocuaajani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria juucua. ¹¹ Nojoriiri queraatia niquiohwaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacuuri tama na pueyajinijijiaaja naa sequequiaariti: “Creta pueyari pueyaracaanu saaja sapojonuujuaca. Nojoriiri jiyanohua juaajiaca juhua sayoru. Nojoriiri puera miaquenuujuaca. Nojoriiri taa-jecorijihuaaj”. ¹³ Seetanujuanaari cuno shimiacu sequesano. Nocuaji, jiyanohua quia nacasure nojori, nojori cuaara Pueyaso tojijiaca quiiria, maninia quijiaca nojori quiniuria. ¹⁴ Quia rootare nojori maja na tojitianura Judiocuaca nareja najuhuaana pohuatasano, naajuhuaaj, maja nojori tojiniuria pueya rootasano, canapueete Pueyaso seetanu rupaajanaa tojiyashijiaca quiyacuajani.

¹⁵ Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniucua, majaari quenaaja niqiriyatu casaa maninia quiniu nera. Na niishitijaari juhua curuutuuca, noojiano. ¹⁶ Nojoriiri tama na cuaqueyajaaja sequeya: “Pueyaso niishiyanjia”. Naa nojori sequesacariti, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanohua soosano pueya, puera sesa na quiniucua. Nojoriiri jiyanohua sesa, tojiyashijiaca-juhuaaj. Majaari na naata quenaaja maninia miiniu.

2

Maninia niishitiojosano cutara

¹ Nocuaji, pueya quia niishitiojore maninia nojori quiniuria taa pa niishitiojosaaquiaaricuajani. ² Naaratej, socua saaquiapue quia niishitiojore nojori cuaara quiaquiiria miaquejoru, mashaasequejorunio. Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojojuaca. Cuaara quiiria maninia quijiacajuhuaaj, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiiriajuhua maninia rejeretajaca taraatia na miishacari, juhuajaniya nojori sashishacari pa Jiyanijia. ³ Naajuhuaaj, socua motaja maajipohua quia niishitiojore nojori quiniuria maninia Pueyaso niqiuara pueyaracaanu, maja rimiaacaturu, maja mashaasequenuujuaca. Nojori cuaara pueyaracaanu miiria maninia tamasa niqiuara, tamasa miiniuria juhua nojori miishanojuhuaaj. ⁴ Nojori cuaara niishitiojora niyacaraca maajipohua, maninia na paniniuria neyaca, necohuanio. ⁵ Cuno jiyaniyacuaca cuaara niishitiojora narta maajipohua, maninia niishiriojojuaca nojori quiniuria, saaja neyaca panijia nojori quiniuria, maja tamonu caya panijiacara. Nojori cuaara niishitiojosaariajuhuaaj, maninia poonijiojuaca na tiajina nojori quiniuria, caporaturu nojori quiniuria, neyaca tojitiajancano. Nojori cuaara naa miiria, Pueyaso Rupaa mariqui rerequetesaareeri.

⁶ Naajuhuaaj, mashiqiori quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuaara quiiria maninia nojori niqiuara, nojori jiaatianura quiocua, juhua quiajaniya nojori quiniuriajuhuaaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitiojosaaquiaaricuajani. Naacuajitij, tamasaari maja na naata ruuretanu quiniutianiya quia niishitiojosano pueya niqiuara. Naa maninia quia niishitiojosacariti, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiria na camarucua panijia, maja rihuanejaca. ¹⁰ Cuaara nohuaseyaquiiria na camarucua casami. Cuaara quiiria seetanujuanaa maninia miijia, pueya niishiniuria pa Jiyanoojia Pueyaso

rootasanoori jiyanoohua maninia cutara. Poonitijosano pueya jaara maninia quiriquia, Pueyaso Rupaari juhua maniniushitishano quiya tamasaca niquiara.

¹¹ Paacuajaari niishiyani Pueyasoori jiyanoohua jiyanoojia seetanujuanaa, Jesu cusionuucua puetunu pueyacularajanaa, sesa pa miishanojiniji pa jiyanooshaanura.

¹² Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuaaj, Pueyaso jiyanooniucua pajaniya, cunoori pa shiniujiya maninia niishiriojuaca pa quiniuria mijiria pa quishacarijia, maninia miijiacajuhuaaj, Pueyaso tojjiano pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquuaajuhuaaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuuca na cumaa-cajinia. Naacuajitij, paari shuquiriaatia sashiya pa Jiyanoi. ¹⁴ Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanoohua maninia miiniuucua jiaatiajaca pa quiniuriajuhuaj.

¹⁵ Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojjishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojjijaca nojori quiniuria, jiyaniijianuucua na jiyatesano pueya nojori tojjiniuriajuhuaj. Nojori cuaara cuno pojori naacutaara jaara sequesaae maninia casaa nojori miiniuria. ² Pueya quia niishitiojore nojori cuaara pueya sesacaashijiacaa quiriiajuhuaj. Nojori cuaara quiriia juhuajaniya quijiaca, maja juaajiacaa. Cuaara quiriia jiyanoojiaca. Cuaara maninia niiquiriia puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

³ Tariija, paari mariyata mosanucua quiquiaarini, Pueyaso tojjiyashijiacanio. Paari juhua tashucuaano quiquiaarini, sapojosano pa quishacari. Paari sesa miiniuucua jiiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniuucua jiaatiajaca quiquiaarini sesa pa niishishanota. Paari sesa miijiacaa quiquiaarini. Paari tamasaca jiiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaca quiquiaarini. Paari niqutitiojuaca quiaquiquiaarini. ⁴ Naajaa, pa Jiyanoojia Pueyaso cutaraari maninia miiquiaari pajaniya. Naacuajitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusionura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶ Pocuaji Tacuna Jesucristo miiniuucua maninia, Pueyasoori jiyanoohua queraatia na Sohuanu niqutitioquiaari pajaniya. Juhua pocua totasaareeri na Sohuanu. Maja shiitianiyojua quenaaja. ⁷ Naacuajitij, pa jiyatereeri maninia quijiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiiitiasanojuanaa puera, jiyocua-caanu na racatasano. Naaratej, paari juhuajaniya sashiquiaani, pa niishishacari paari pueyaracaanu quijiaca quiniutianiya natani.

⁸ Nio cua sequesanoori seetanu rupaajanaa. Nio rupaata quia nacasure Pueyaso tojitiajaca puetunu quioojiatajanaa, nojori cuara niishiriojora, maninia nojori miinuria pueyaracaanu. Nio rootasanoori jiyanojua maninia. Maninia cutaraari puetunu pueya cumaquitiajarajanaa. ⁹ Maja cutaraari quia rupuenu cuno pueya, noo pojori canapuate najuhuana nacojoquiaani, naajuhuaaj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuaaj, maja quia rupuenu noo pojori canapuate juaatiooquiaani, canapuate tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuara quiiriaqui juhua taanusano. ¹¹ Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaaritia juhua nocuara saquiriojotaa.

Pablo sequesano Titora

¹² Janiya jaara Artemas jiyarore quiocuani, jiyanojua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. ¹³ Zenas, Apoloori quiocua tiuquiniutianiya. Nojori quia naacutare quia jiišanasota, nojori jiišanura puetunu na panishanojuanaa nojori quianu panishacari quia quijiajiniji. Zenasri pueyacuaji tacuna pueya nequesoreena.

¹⁴ Parta Pueyaso muerasu cuara niishiiria maninia miijiaca nojori quiniuriajuhuaaj, maja najuhuana quijiaca na quiniuria. Maninia cutaraari nojori naacutanura na panishano jiišiaashijiaca.

Naajionee puequesacari saruhuatasano

¹⁵ Puetunu cuata quiniaajanaari cua sequeya cua saruhuatanura quiajaniya. Canaara quia saruhuatate parta Pueyaso muerasujuhuaaj, canapuate canaa panijiacacuajani. Pueyaso cuara cumaquiiria puetunu niajaniyajanaa. Cuara naa quiiriatej. Tariucuaja Titonaa.

PABLO NAAJIONEE FILEMÓN CUARA

Pablo saruhatasacari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. ² Canaara quia saruhatatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhatatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristonio, nojori cuara cumaquiiria niajanija, jiyanoojiaca nojori quiniuucua. Nojori cuara cajitiiria nioojiajuhuj, juhujaniya nia quiniuria.

Filemón paniniujiniji pohuatasano, Pueyasocua na tiuuniujinijio

⁴ Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajanijajiniji cua tojiniuucua taa quia paniquiaa pa Jiyaniijia Jesuni, puetunu na pueyajanaano. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. ⁶ Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jiiitasanojuanaa Jesucristojiniji, Jesucristoocua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhuara tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. ⁹ Naajaa, majaari cua sequenu paniniu quiajanija juhua quia jiyaniijia. Saniniuujia, panijia quia quiniuucua, janiyari quia sequenu panijani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupuena Pablo cua quiniuucua, cua tojiri Filemónnaa. ¹⁰ Cucua quia taraajere quenaaja. Quia nenecojiyanijia cua niyanuniyojua Onésimoocuara. Nojuajaari seetanujuanaa juhua quianura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tariija, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. ¹² Janiyari quiarijia quiocua jiyaroya quianuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuan, na naacunura janiya quia niti. ¹⁴ Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajanija. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu panijani. Cunora, janiyari na jiyaroya quiocuan. ¹⁵ Onésimo jiyoteeri quiocuaji rupatecanu rupaquiriaja, quiarijia quiara na quiniuhuara pueyaracaanu cutara. ¹⁶ Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarijiani, Jesucristoocua tiuujia na quishacarijuhuj. Nojuajaari jiyanojua cua panishano parta Pueyaso pueyano. Naajaa, quiaa cuara jiyanojua na panijia quiriia

socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacuajitij, janiya jaara seetanujuanaa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajaniya, jaara quia casaa nohuasequiaarijuhuaj, nojuaja quia jiyanoori. Saniniuujia cucua quia tiutiare puetunu sesa na miishanojuanaa quiajaniya. ¹⁹ Janiyacua saniniuujia cua cumaneecajiniji quia niquitioreni puetunu sesa na miishanojinijijianaa quiajaniya. Janiyari Pabloni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitiniu panijajuhua, Jesucristojiniji cua pahuatananoocua quia tiuushacari, quiaacuajaari pueyaracaanu quiijara jatanishaaquiaari. Naacuajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. ²⁰ Naa quiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

²¹ Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaaniuhua, quiaari socua maninia na miiniutianiya cua sequesanojiniji. ²² Naajuhua, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatascari

²³ Epafraasi cua sequeree cua saruhuatanura niajaniya. Nojuajaari cuarta moronucujuhua, Jesucristojiniji canaa pahuatanuucua. ²⁴ Jaarajaaja cuata Jesucristojiniji pahuatanaa pueyari nia saruhuataajuhua. Nojoriiri Marco, Aristarco, Demas, Lucasnio.

²⁵ Pa Jiyaniijia Jesucristo cuara cumaquiiria niajaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipiniquiaari puetunu casaajanaacuaajaari; nio jiya, jiya cajiniocuajuhuaj, puetunu pa niquiyaquishoo casaajanaanio. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiiitiana quiriquiano. ³ Neyanuuri tojetaarucuaajanaa maninia, juhua na Quejuhuaj, juhua na Que niquishanojuhuaj. Naacuajitij, nojuajaari jiyanojuaa shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuaaanu tacaquiaarihuari, na Que Pueyaso miaquetajara na cajiniuria Jiyaniiijajanaa quiquojinia.

Pueyaso Niyanuuri Jiyaniiijajanaa cutara Pueyaso seyajiniji

⁴ Naacuajitij, Pueyaso Niyanuuri Jiyaniiijarajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniiija quia quiniuria”.

Neyanujiniji sequequiaarijiaarihuaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari.

⁶ Tariucuacaanu Pueyaso Rupaaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniiijajanaa na quiniuria:

“Puetunu cua seyajanaa cuara Quiyanu tojitiaara, Jiyaniiijajanaa na quiniuucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaaajinia:

“Pueyasoori na seya jataniquiaa juhua paratura, juhua maniriano, na panishano nojori miiniuria”.

⁸ Neyanu sequeya saniniuurijia:

“Quiyanunaa, quiaacuajaari Pueyasojuhuanajaj. Quiaari Jiyaniiija. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jiiitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniiijajanaa quia quiniuriani, quia Jiyaniiija cua quiniuucua. Janiyari quia jiyatequiaarijuhua socua shuquiriaatia quijia quia quiniuria puetunu quia cjiniaajinijijianaa”.

¹⁰ Pueyasoori naa sequequiaari Neyanujuhuaaj:

“Jiyaniiijianaa, quiaacuajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. ¹¹ Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. ¹² Naa na tariucuashishacaritij, quiaari juhua toque mocua na jiunioriquiano, quia jatasocoriquiano. Quiaari naa

miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarijuhuaj:

“Miji, cua miaquetajara quia cajishii, janiya jaara quia paraa shocojotare puetunu-juanaajaatiija, maja quenaaja niquiriyatu cureenura na miananajonura quia-janiya”.

Majaari naa Pueyaso sequenu quiquiaari quenaaja niquiriyatu na seyajinijinio.

¹⁴ Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

2

Maja cumaati Jesucristo tojiyashijiacara pa quiniu

¹ Naaratej, Jesucristojiniji pa tojishano tojijiaca pa quiriquia socua, paa mariqui Pueyasooquaji rupatereeri. ² Tariucuacaanu, Pueyaso seya caminiujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari.

³ Pueyaso seya caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaca pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapute pa Jiyaniijajanaa tojiquiaari pueyaracaanuni, nojoriiri saniniuujia cuno rupaa caminiujiuquiaari pajaniyara. Canaa sequetuquiaariiri nojori tojishanoori seetanu rupaaajanaa.

⁴ Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jiyanoohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jiyanoohua shiriiquitiuquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujia niqutioquiaa na Sohuanu, tamaatia pa miiniuria na cumaacata, taa na paniyacuajani. Cunora, paa cumaati seetanujuanaa Pueyaso rupaa Jesucristojiniji tojitajaca quiyani.

Jesucristo mijiria rasaaquiaari pa puerana na quiniuria

⁵ Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria.

⁶ Naajaa, tariucuacaanu Pueyaso Rupaaajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? ⁷ Quiaacuajaari na shipiniquiaari rupaquijiara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. ⁸ Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiiitasoo. Saniniuujia, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja.

⁹ ¿Jesuurijataj? Pueyano na quiniuria, na Que Pueyasoori rupaquijiara na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijajanaa na quiniuria, jiyanoohua cumaacaraca na quiniuriajuhuaj.

¹⁰ Jamueyashijia Pueyaso quiniuucua, nojuajaari puetunu na muerasuranojuanaa panitiaquiaari na cojiniaa nojori quiniuria. Paniquiaariiri jatiqi nata shuquiriaatia pa

quiniuria, puetunu tama nerajaaja na shipinishano casaatajanaajuhua. Jeenucuasano pa quiniuria pa cojiniuria Pueyaso, nojuajaari jiyanoehua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucuaajanaa maninia quiquiaari Pueyaso muerasuranoo cuaji Tacuna na quiniuria. ¹¹ Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. ¹² Tariucuacaanu Pueyaso Rupaaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niqiuara quia jaaquequejotanutaniyani cua shuquiritiasacari quiajaniya”.

¹³ Tamaqui, Jesu sequesanoori naa naajiotasano quiyajuhua:

“Janiyari cua Queecua tiuujia quiniutianiyanii”.

Naacuajitij, mijiria na quishacari, Jesuuri na Que Pueyasoo cuu tiuquiaricuaa taa pa tiuquuaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitiasacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojitianuucua janiya”.

¹⁴ Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojitiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhua, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariutiaquiaari pajaniya.

¹⁵ Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijata quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. ¹⁶ Seetanujuanaa, majaari Jesucristo niniu quiquiaari Pueyaso seya na naacunura. Niqiuacari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasoo cuu tiuujiacuaani. ¹⁷ Maninia pa naacuna na quiniuria, Jesucristoori puetunu naquiya miiniujianaa rejeretaquiaari mariyata taa narta pueya miishaquiaacuani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jiyanooniu puetunu sesa pa miishanojinijianaa. ¹⁸ Mijiria na quishacari, nojuajaari pueyaracaanu taraatia miishaquiaari. Nojuajaari jiyanoehua saniniujiushaquiaari sesa na miiniuria juucuajuhua. Naacuajitij, nojuacuajaari jiyanoehua niishijia na cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquiaajuhua.

3

Jesucristo cutaraari Jiyaniijajanaa Moisésjiniji

¹ Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanootijia pajaniya, nocua pa tiuushacari. Cunora, jacaria pa niishiriojore socua Jesucristojiniji.

² Mijiria na quishacari, Jesuuri na Jiyarona tojijia quiquiaari pueyaracaanu, taa Moisés quiquiaari Pueyaso tojjiacuani, Israel pueya jiiitiana na quishacari. ³ Naajaa, Jesucristo cutaraari Jiyaniijajanaa Moisésjiniji. Moisésri saaja narta Pueyaso pueyajiniinio pueyano quiquiaari. Saniniuujia, Jesucristoori puetunu Pueyaso pueyajanaa shipinina cutara. Naaratej, Jesucristo cuuara tojishaaria socua cutara. ⁴ Puetunu

pueyapuejanaari supuetanaaraca. Naajaa, Pueyasojuanaari nojori shipininia seetanujuanaa. ⁵ Naacuajitij, Moisésri pueyaracaanu Pueyaso sequesano caminiujuiquiaari Pueyaso saquiriojosano narta Pueyaso pueyara, maninia Pueyaso seru na quiniuucua. ⁶ Saniniuuja, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijajanaa. Nojuajaari nojori jiiitia saa maninija, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuquiaani, naajuhuj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuacaanu Pueyaso Rupaajinia pajaniyarajuhuj:

“Pueyanaa, niaa jaara quiarjia tojiriquia Pueyaso sequesano nijaniya, majaari na sequesano ruuretajaca nia quiniu. ⁸ Majaari naa nia quiniu taa nia supuetanaa quiquiaaricuaani, cariquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiacaa nojori quishacari. ⁹ Nojoricuajaari pueyaracaanu cua cumaacata cua miijiosano niquitiuquiaari. Cuarenta marijaari shocojoquiaari, pueyaracaanu jiyajeneta casaa cua miijiosacari cua cumaacata, maninia cua jiiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanusacari cucuaji. ¹⁰ Janiyari cunora seetanujuanaa juaaquiaari puetunu cunopoerioritajanaani. Naaratej, janiyari sequequiaarini: ‘Nojoriiri juhua cucuaji tashuquioonoo rucoojiya tamajaaja. Nojoriiri cua niishitiojosano ruuretaquiaa saaja’. ¹¹ Janiyari cunora jiyanojua cua juaaniutia naa sequequiaarini: ‘Majaari nojori rupeenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quiijaca nojori quiniuria cuata’”.

¹² Naarate cuarta Pueyaso pueyanaa, tama nia cuaqueyajaaja nia cojuare jiyanojua, niaa mariqui Pueyaso Rupaacua tiuyashijiacara quiriohuari, Pueyasooacuaji nia rupatenura puetunujuanaa. Pa Pueyasocuaajaari quiijajuhuanajaj. Nojuajaari na tojiyashijiacaa saniitiojua. ¹³ Cunora, seetanujuanaa Pueyaso Rupaa tojitiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarijia taa na Rupaa sequeyacuaajani. Naa nia shiniujiutiooriquiatej nia jiiitiyaquiniuucuaaji sesa miiniuria. Saniniuuja, niaa jaara sesa miijiacaa quiriquia, tama sesa nia miiniujiaarijia nia sajonnutaniya Pueyaso tojiyashijiacara nia jatanuhuara. ¹⁴ Jesucristoocua pa tiuuniuucua, paari na cojiniaara jiyatesanoni. Naacuajitij, puetunu na jiiitiasanojuanaari puera quiriqianojuhuj, paa jaara nocua tiuquiaa pueyaracaanuni, taa shushajanaa seetanujuanaa nocua tiuujiacaa pa quiriqiaacuajani.

¹⁵ Cunora, naa naajiotasano quiyari tariucuacaanu Pueyaso Rupaajinia:

“Pueyanaa, niaa jaara quiarjia tojiriquia Pueyaso sequesano nijaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijiacaa nojori quishacari”.

¹⁶ ¿Canaputeeri cunopoeriorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiqiaari pocuaano. Naajaa, nojoriiri saaja na ruuretajaca quiquiaari. ¹⁷ Nia niishiritioj, ¿canapute cunopoeriorini, Pueyaso juaatijioquiaarini, pueyaracaanu nojori camarucuneejotasacari cariquia jiyajiniani? Noo pojoricuajani sesa miijiacatej. Nojoriiri cunora cusonuquiaari nojori quiojosacari nucoo cariquia jiyaco. Na cusonuusaquijia jamojosaaquiaariiri. ¹⁸ Nia niishirijuhuj, ¿canapue

naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojtiaashijiacaanaacuajaari naa sequesaaquiaaritiij. ¹⁹ Naacuajitij, paacuajaari quiarjia maatia niishiyani, Pueyasooqua tiuyashijiaca nojori quiniuucua, majaari nojori tiuquitianu quiquiaari Pueyaso niqutionu panishano jiyajinia.

4

¹ Pueyasocuaajaari pa masuyajaa panaatia pa quiniuria nata. Cunora, jiyanohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacaari maja na rupueno quiniutianiya Pueyaso, shuquiriaatia na quiniuria Pueyasota. ² Pueyaso rupaacuajaari tari pa niqiara pohuatasaaquiaarijuhuaj, nocua pa tiuuniuria, taa pa supuetanaa niqiara na pohuatasaaquiaaricuaani. Nojoriiri Pueyaso rupaa tojiquiaari najuhuanaj. Majaari nocua na tiutuuniu quiquiaari. ³ Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniuucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’ ”.

Pajaniya saniniuujia, Jesuucua tiuujia pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuj: jiya shipininiu na tucuatano nuhuaji, nojuajaari panaatia quiya. ⁴ Cunora, tamaqui tariucuaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucatasacari puetunu na poonijosanojuanaa, na nuhuaji nojuajaari séptimo juucajinia samaatequiaari”.

⁵ Pueyaso sequesanoori tariucuaanu na Rupaajinia naa pacutejosaaquiaari naajiotanu:

“Majaari cua tojtiaashijiaca rupueno quiniutianiya janiya, panaatia nojori quiniuria cuata”.

⁶ Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritiij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniuucua. ⁷ Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarjia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarjia tojiri Pueyaso rupaa, Pueyaso sequesano niaarano, majaari na ruuretanu”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasooqua tiuyashijiaca nojori quiniuucuaajuahuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriqia, ¿Pueyasotucua casaara quiarjia pa masuuriqiaaja Jesuucua pa tiuuniuriani, seetanujuanaa panaatia quijiaca pa quiniuria natani? ⁹ Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuajaari panaatia quijiara jatanishaanutaniya. Majaari socua na tacaaniu quiniutianiya taa tama na cuaqueyajaaja na jiyanootiniutianiya Pueyasoni. Naacuajitij, nojuajaari juhuajaniya

quijia quiniutianiya, tarijia najuhuana na poonijiosanojiniji, naatej, taa Pueyasojuanaa samaatequiaari na poonijionu nuhuajicuaani. ¹¹ Naaratej, panaatia pa quiniuria Pueyasota, seetanujuanaa na Rupaa tojjiiacara pa quiriquia quiarijia. Naa na rupaa tojjiiaca pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijiaca nojori quiniuucua.

¹² Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyanojua socua shamaturucuaa nijiniaquetucuaa mueruujiniji. Nijiniaquetucuaa mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquiiijia, pa niishitijia tohuariquiiijiano. Na naata cuhatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. ¹³ Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

Jesujuanaari Pueyaso jiyanootijia pueya

¹⁴ Pueyaso Niyanu Jesuni, nojuajaari na Que jiyanootijia pajaniya. Nojuajaari jiya cajiniocua tohuariquiiiquiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujiaaca pa quiniuucua, maja cumaati pa pishiniu nocuaji. Paacuajaari na muerasuniyojuani. ¹⁵ Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. ¹⁶ Cunora, pa jiyanoojia Pueyaso pa rupueriquia pa puereyaquiniutia. Nojuacuajaari pa tojiquiaa pa secojosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaajaariuhuj, pa rejeretanura paa jaara sesa miiniuria saniniujiushaariquiani.

5

¹ Puetunu pueyacuara secojonaa jiyaniijiajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moisés cuajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niquitiojosano Pueyasorano masejojua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ² Pueyacuara secojona quiniuucua pueyanujuhuj, nojuajaari sesa miijiajuhuj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujuhuj. ³ Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacularani, sesa nojori miishacari. ⁴ Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuajaari naa saquiriojoquiaaricuaa Moisés tarajanu Aarón, pueyacuara secojona jiyaniijia na quiniuria. ⁵ Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

⁶ Pueyaso sequesanoori tamaqui tariucuacaanu na Rupaajinia naa naajiotasano quiyajuahuj:

“Pueyaracaanu rishijia quia quiniucua, quiaari pueyaracaanu pueyacuara secoriquiano cutara, taa Melquisedecuaani”.

⁷ Naa pueyano na quishacari mijiriatej, Jesucristoori jiyanoohua saniniujiushaaquiaari. Naquiya na miyaquishaanuucuaaji juucua, nojuajaari na Que Pueyaso secojoquiaari jiyanoohua na nujuquenuta. Jiyanoohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniucua, na Que sequequiaariiri: “Naajaa, quia miiri quia panishano cua Quenaa, taa quia panitiaquiaari miiniu janiyacujani”. Na Queeri na tojiquiaari. ⁸ Jesucristoori seetanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹ Naacuajitij, tojetaarucujanaa maninia miijia na quiniucua, nojuajaari pueyacuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. ¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanoohua puereetaari Jesu tojinu tarinitianu

¹¹ Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura niajaniya, juhua niishiyashijiacara nia quiniuuquiohua. Niaacuajaari tari niyajetarucuaa tariucuacaanu nia tojishano. ¹² Tariucuacaanujiniji Pueyaso rupaa tojjia nia quiniucua, ¿taateni? Niaa mariqui na niishitiojonuujuaca quiriquia tari. Saniniuujia, niaari quiarjia paniya socua nia niishitiojosaanuhuara maatia niishishaatia casaa Pueyasojiniji. Niaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijia nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojtiajaca nia quiniu, maninia miijia nia quiniuria. ¹⁴ Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhuj, puetunu Jesucristo niishitiojosanojuanaa niishijia nia quiriquia. Niaa jaara na niishitiojosano tojjia quiriquia, saaja maninia miijia nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijia. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria niajaniya. ² Naajuhuj, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniucua. Niaari niishitiojosaaquiaarijuhua Pueyaso pueyacu nia nianura nia juaashiquia nojoriicuara nia secojosacari, Pueyaso cumaquiniuria nojori. Niaari niishiyajuhuj, macunucuaari samiitiaconutanihua. Nojorijinijinio saniniuujia, Pueyaso tojyashijiaacari pueyaracaanu saniitiosocoriquiano jiyatesaanutaniya. ³ Quiarjiani, majaari socua cua niishitiojonu quiniutianiya niajaniya nio shusha cua sequesanojiniji niajaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya niajaniyani.

4-5 Pueyano jaara Pueyaso Rupaa tojiyashijiara quiriohua, najuhuanaari na niishitijonu pacutenuhua, nojuaja jaara tari Pueyaso Sohuanu cuhuatasano jiuujiaraca quiquiaari. Najuhuanaari nojuaja jaara tari jiyanoshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhuaj. ⁶ Jiyano pueyanotej, majaari tari na naata sesa miijia na quiniucua taraajetesaanuhua, Jesucristoocua na tiuuniuhuara seetanujuanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretajaca na quiniucua. Naa Jesucristo tacartaja na quiniucuatej, tamasaari Jesu rerequetequiaajuhua. ⁷⁻⁸ Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuacanio. Pueyasoori najuhua maru niyojotequiaa. Majaari cuno cuhuariquiajinia nataacuaca muetunu. Jiyano cuhuariquiatej, na camaru cuaara catijiaaaranoj. Pueyasoori naa saniitionutaniya nocuaji ruparequeno pueyajuhua. Saniniuujia, Jesucristo rupaa tojijiacani, nojoriiri juhua maninia cuhuariquia. Pueyasoori maru niyojotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhua, Pueyasoori na tojitianu tarinitiaashijiaca shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojiniu tarinitiaaquiuaani

⁹ Miriqui cua pohuatasano sesa cuhuariquiajinijini, cunoori maja niajaniya cua panishano pueyanaa. Majaari cua taacanuunu niajanijini. Niaacuajaari pa Jiyaniijia tojitiajaca quiquiaa. ¹⁰ Pueyasocujaari jiyanhua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijia nia quiniucua, taa quiaritia nia miyajaacuajani. ¹¹ Naatej, taa shitimia niarta Pueyaso pueya naacujuacatucuja niajanijani, naajuhua, janiyari nia panitiaani pa Jiyaniijia nia sashiniuria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishitiriquiajaaniuhua, Pueyasoori jiyanhua maninia miiniutianiya pajaniya. ¹² Majaari nia macuhuajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquiya miiniu rejeretajacaari quiquiaarijuhuaj. Naaratej, Pueyasocujaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijiajanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajanijani. Janiyari quia jihuahua muetutenutaniya jiyanhua queraatiani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijaatijia. ¹⁶ Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhua, Pueyaso sequesacari taa seetanujuanaa na miiniutianiya na pueyanonni, nojuajaari jiyanhua panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequesanojinijia. Cunora, nojuajaari naa sequequiaari:

“Janiyacuaajaari Pueyasoni. Majaari cua niishiniu sapojonu. Cua sequesanoori seetanujuanaa”.¹⁸ Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujica pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja.¹⁹ Naa Pueyaso sequesanoocua tiuujica pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanucua. Cuno niiquia casaari niquishoo, moo cariquimia pojyari. Naajuhuj, nocua pa tiuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniucua.²⁰ Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuaanaa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasa tiacajinijinio jiyaniijianucuaani, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoohua maninia”.² Jiyacaritij, Abrahamri na paraa casami nitiariquiohua na quiquiojiniohuara. Naacuajitij, nojuajaari puetunu cuno casamijinijiojuanaa Pueyasora na riuriosano niquitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniucua.³ Majaari tojetaarucuaajanaa na niishishaanu, ¿queraca quiquiaaritii, nucuaracajuhuj, supuetanaaracanio? Majaari quenaaja na pohuatasaanujuhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijiajuhuanajaj. Majaari na niishishaanujuhuj, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niquitioquiaari na paraa na shocotasano casamijinijinio. Secaja niquitioquiaariiri taa Pueyaso rootaquiaari pa supuetanaacuajani, nojori niquitiojonura nera. Tariucuacaanu, Pueyasoori pa supuetanaa niishitiojoquiaari nojori niquitiojonura secaja, puetunu nojori jiiitasano casaajinijijianaa. Naacuajitij, pueyano jaara diez casaa jiiitare, cuara Pueyasora niquitioora niquiriyatujua.

⁵ Pueyasocuaajaari supuetana Leví niquiohuacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasorano pueya niquitiojosano masejojua nojori quiniuriajuhuaj. Naa Pueyaso sequesanoocuaajaari Moisés Rootasanojinia naajiotasaaquiaari. Abrahamcuaajaari puetunu Israel niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya

niquitiojosano masejojua. ⁶ Melquisedecri pueyacuara secojona quiquiaarijuhuaj. Maja cutaraari Leví niquiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuaanaacuajaari tari Abraham sequequiaari, nojuajaari maninia na miiniutianiya. Naajuhuaaj, Melquisedecri pa supuetana Abraham sequequiaari Pueyasoori jiyanohua maninia miiniutianiya nojuaja. ⁷ Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. ⁸ Quiarijiani, Pueyasorano pueya niquitiojosano masejojuacani, puetunu nojorijianaari shaajejaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. ⁹⁻¹⁰ Nia niishirijuhuaaj, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojona nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riuriotaca Melquisedec, pa naata sequenu Leví quiriquianojuanaari jiyacari Melquisedec niquitioquiaari, Abraham quiniuucua na jiyasorano tari.

¹¹ Leviicuajinio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa mijiaca seya puecooquiaari pueyaracaanu tama na camaruhuacuarajaaja, nojori na jiyanoootiniuria Pueyaso. Naa nojori miishano jaara pueya jiyateriquia tojetaarucujanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajejaca cutara. ¹² Aaróncuajaari narta pueyacuara secojonaa jiyaniijiaari jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiya-juhuaj, Moisés Rootasano niti na quiniuria. ¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucujiniocuaja, saniniuujia tamonu neyanuucujiniojaarohuaaj, teyanooacuajinio quenaaja niquiriyatu pueyacuara secojona supueyaquiiciaaricuajani. ¹⁴ Maatia niishishiyacuajaari, pa Jiyaniijiaari Judá niquiohuacuajinio supueno quiquiaari. Judaari Leví tarajanucuaja. Moisés pohuatasacari pueyacuara secojonaajinijini, majaari quenaaja Judá na jiyaniquiniu quiquiaari.

¹⁵ Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari. ¹⁶ Nojoriiri pueyacuara secojonaa quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. ¹⁷ Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquiaari, najuhuaana na quiniuucua. Cuno miishanoori cumaacaaju quiquiaari pueya na jataniniuria. ¹⁹ Seetanujuanaari, Moisés Rootasanoori

maja na naata quiquiaari saaja maninia miijiacara na jataniniuria na tojitiajaca. Quiar-
ijia saniniuujia, paari Pueyaso rupaa Jesucristojiniji jiitiaani. Nocua pa tiuushacari,
Jesucristoori pueyaracaanu pa jiyanootiquiaa na Que, juhuajaniya pa rupuenura no-
juaja.

²⁰ Na Que sequesacari Neyanu quiniuria pocuara secojona pueyaracaanura, nojua-
jaari naa sequequiaari seetanujuanaa. Naacujitij, paari panaatia quiquiaani pa ni-
ishishacari Jesucristoori na Que shuriucua quiya, pueyaracaanu pocuara na secojonura
na Que. Saniniuujia, majaari naa Pueyaso sequenu quiquiaari Leví niquiohuacuajinio
supueno pueya, seetanujuanaa pueyaracaanu pueyacuara secojona nojori quiniuria.

²¹ Saniniuujia, Neyanujiniji na sequesaroni, cunoori seetanujuanaa. Majaari na seque-
sano jatanishaanu quiniutianiya. Naacujitij, naa naajiotasano quiyari tariucuacaanu
Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na seque-
sano na jataniniu quiniutianiya. Neyanu sequereecuajaari: ‘Quiaari pueyacuara
secojoriquiano pueyaracaanu’ ”.

²² Naacujitij, pueyaracaanu na Que shuriucua Jesu quiniucua pocuara na secojonura,
paari seetanujuanaa niishiyani paari Pueyaso pueyani, Neyanuucua pa tiuuniucua.
Naacujitij, Pueyaso rupaa Jesujinijiiri socua jyanohua maninia Moisés Rootasano-
jiniji. Cunoori pueyaracaanu rishijia Jesu quiniucua. ²³ Saniniuujia, Leví niquio-
huacuajinio supuenoni, queraatia pueyacuara secojonaari quiquiaari pueyaracaanu
rishiyashijia nojori quiniucua. ²⁴ Jesu cutaraari shaajeyashijia. Naa pocuara
secojona na quishacaritij, majaari quenaaja tamonu sanitiniu quiniutianiya nojuaja.

²⁵ Naacujitij, nocua pa tiuushacari, nojuajaari pueyaracaanu pocuara secojoquiaa,
tojetaarucujanaa maninia miijiacara pa jatanishaanura, Pueyaso pa rupuenura. Ma-
jaari pocuara na Que na secojonu na tarinitianu quiniutianiya, shaajeyashijia na
quiniucua.

²⁶ Jesuuri namitia pocuara secojona na Que. Majaari tamonu quiniu juhua no-
juaja. Nojuajaari tojetaarucujanaa maninia miijiajuhuanajaj, juhua na Que Pueyaso.
Majaari quenaaja sesa miiniu na niishiniu. Sesa miijiacaritij na quishacari mi-
jiria, naajaa, majaari sesa na miiniu quiquiaari quenaaja. Saaja maninia miijia na
quiniucua, nojuajaari tojetaarucujanaa tamaatia quiijia mijiria quinia pueyajiniji.
Naaratej, Pueyasoori jiyocuacaanu quiijara na jiyatequiaari, Jiyaniijiajanaa na quini-
uria na shuriucua, tii na secojonura na Que pocuara. ²⁷ Leví niquiohuacuajinio
supueno pueyacuara secojona jiyaniijianucuaari pueyaracaanu tama sesa nojori
miishanoocuarajaaja seya puecootujua coteenu, Pueyaso jiyanooniuria nojori. Naa
nojori miiniu nuhuajitij, nojoriiri jiyacari narta Israel pueya seya puecoquiaari sesa
cuno pojori miishanoocuara saniniuujia. Maja cutaraari naa Jesu miiniu quiquiaari.
Nojuaja jaara tama na cuaqueyajaaja tarinitiaquiaari pocuara na mosaanura juhua
borregoniyojua sesa pa miishanoocuara, cunajuanaari na cusonu quiquiaari. Majaari
socua na caminiu quiniutianihua cusonu. Naa na cusonuucua pocuaratej, puetunu
sesa miijiacajanaari na naata jiyanooshaanu puetunu sesa na miishanojinijijianaa.

²⁸ Moisés Rootasanojinia, Pueyasoori tii sequeyacuaja canapuate pueyacuara secojona
jiyaniijia jiyateshiyani. Puetunu cuno pueyacuara secojona jiyaniijianucujanaari
sesa miijiacaritij, juhua puetunu pueyajuhuj. Jyanohua Moisés nuhuaji,
Pueyasoori saniniuujia tama Neyanujuaaja jiyatequiaari pocuara secojonajanaa na
quiniuria pueyaracaanu. Na Que tojijia na quiniucua pueyaracaanu, naquiya miiniu
rejeretaja na quiniucujuhuj, naacujitij, nojuajaari tojetaarucujanaa maninia,
pocuara secojonara na jiyatesaanura.

Quiarinio Pueyaso Rupaacua pa tiushacari, Jesuuri pa jiyanootiquiaa na Que

¹ Nio, janiya na pacutenutaniuhua sequenuni, cunoori socua panishano nia ni-
ishiniuria. Cua tojiri. Pueyaso Niyanu quiniuucua pocuara secojona, nojuajaari
na Que miaquetajara cajiquiaari jiyocuacaanu. ² Nojuajaari tii na Que secojoquiaa
pocuara Pueyaso Quishaquijianaa. Cunoori Pueyasojuanaa shipinishano quiquio,
maja pueyano tiasano.

³ Puetunu pueyacuara secojonaajanaari jiyatesaaquiaari nojori masejonura narta
pueya poosano casaa, Pueyasora nojori niqutiojosano. Naajuhuj, nojoriiri seya
puecoojuaca, Pueyaso nojori jiyanootiniuria. Naacuajitij, Jesucristo quiniuucua
pueyacuara secojonajuhuj, nojuaja cuara casaa jiiitaara, Pueyaso na niqutioso-
coriquianojuhuaj. Cuno casaacuaajaari tama na cuaqueyajaaja quiquiaari, pocuara na
mosaanura, Pueyaso jiyanooniuria pajaniya. ⁴ Leví niqiuohuacuajinio supueno puey-
acuara secojonaacuajaari pueya nitiasano nojoriicua masejoquiaajaa, Pueyasora no-
jori niqutiojosocoriquiano taa Moisés Rootasanojinia sequeyacuajani. Naacuajitij, Je-
sucristo jaara mijiria quiriquiaja, nojuaja maara pueyacuara secojona quiaquiriquiaj.
Pueyacuara secojonaacuajaari queraatia quia. ⁵ Pueyacuara secojonaa jecajosano
casaa Pueyaso Secojoua tiajinia nojori jiiitiasanoni, nojori miishanonio, puetunu cun-
juanaari saaja juhua jiyocuacaanu casaa naaqui. Cunora, Moisés jaara tari ship-
iniriquiaa Pueyaso Secojouara suhuorotu, puetunu na casamitiajanaano, jiyacaritij,
Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuanaa, naatej, taa cua
niqutiquianucuaaja quiajaniani, Sinaí tuhananuucua quia quishacari”.

⁶ Pocuara Secojonajanaa miishanoori jiyanoohua maninia socua pueyacuara secojona
Leví niqiuohuacuajinio supueno miiijosanojiniji. Pocuara Secojona cutaraari tama na
cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojiniji-
iri jiyanoohua socua maninia Moisés Rootasanojiniji.

⁷ Pueya jiuujia jaara na naata quiriquia seetanujuanaa sesa miyashijiacara jatanis-
hano Moisés Rootasano tojijiaca nojori quiniuucua, Pueyaso maara quiarinio rupaa ni-
ishitiyaquiquiaari pajaniya. ⁸ Saniniuujia, Pueyasoori niishiquiaari Israel pueyari maja
na naata quiquiaari puetunu Moisés Rootasanojuanaa tojiniu. Cunora, tariucuaaanu
pueyara Pueyaso sequesano caminiujunia sequesanoori naa naajiotasano quia:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya
Israel jiyajinijinio pueyani, Judá jiyajinijinio pueyano. Teyano pojoriti nocua
tiuyani, nojoriiri seetanujuanaa cua pueya quiniutianiya. ⁹ Quiarinio cua ru-
paari tamaatia quiniutianiya Moisés cua niishitiojosano rupaajiniji puetunu
Israel pueyarajanaa. Jiyacaritij, janiyari nojori mashiquiquiaari Egipto jiyajini-
jini. Juhua nojori que, janiyari nojori jaatucunuuriquiaa juucuanu nojori cua
niqutiosocoriquiano jiyajiniara. Saniniuujia, nojoriiri Moisés cua rootasano
nojoriria tojiniu paniyaquiquiaari saaja. Janiyari cunora nojori cartequiaarini’.
Jiyaniijia Pueyasoori naa sequeree. ¹⁰ Socua sequeyari: ‘Nio pa quishacari
nuhuaji, janiyari naa miiniutianiya cua saquiriojosano pueyarani: janiyari
coojia nianutianiya nojori jiuujiajiniani. Naacuajitij, cua rootasanoori juhua
naajiotasano quiniutianiya nojori niishitiajajinia, seetanujuanaa cua tojitiajaca
nojori quiniuria. Naacuajitij, janiyari nojori Jiyaniijiajanaa quiniutianiani.
Nojoriiri saniniuujia cua pueya quiniutianiyacujua. ¹¹ Jiyacaritij, pueyano jaara
janiyajiniji pohuatanu paniri narta pueyano, na cojiniajuhuaj, tapueyocucanio,
cunoori najuhuaana quiniutianiya. Puetunu pueyapuejanaacuajaari tariucua cua
niishijia quiniutianiya; jiyaniijianucua, poonijotesano pueyano. ¹² Janiyari
nojoriicua taraajeja quiniutianiani. Majaari cua saniitionu quiniutianiya no-
jori, sesa nojori miishanojiniji. Naa cua jiyanooshacari nojoritij, majaari socua

cua sanejonu quiniutianiya sesa nojori miishano. Janiyari puetunujuanaa na niyajetanutaniyani' ”.

¹³ Naa Pueyaso sequesacartij, taa nojuaja quiarinio na rupaa niishitiniutianiya panijaniyani, nojuajaari tariucuacaanu Moisés na rootasano jiyatequiaari tariucaneera. Naacuajitij, Moisés Rootasanoori quera shaajasaanutaniya puetunujuanaa.

9

Tariucuacaanu Moisés suhuorotesano Pueyaso quiquioranoni, cunoori juhua jiyocuaaanu Pueyaso quiquiojuhuaj

¹ Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijaariuhua taa pueyacuara secojonaa poonijionutaniya cuno na quiquiojiniani. ² Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tacoji nujuatajaari juhuacutu, orojiniji shipinishano. Cuniqii catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuuca casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya mi-aquesocoriquiano cariiquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niqitiojosano. ⁵ Cuno caaja tiotiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetesano quiquiaari. Teecojuaari, teje Pueyaso shacantuuca mueranacujuquiaari Moisésacuajani. Cuno caaja tiotiuuri seya nanaca majiriutiasaquiijuhuaaj, Pueyaso jiyanooniuria puetunu Israel pueyajanaa. Tariucuaja puetunu cuno casaajinijijianaa cua pohuatasano niajaniya.

⁶ Pueyaso Secojoua tia jaara tari naa maninia tiasano quiquiaari puetunu na casamitajanaa, na nuhuaji, pueyacuara secojonaari pueyaracaanu tiuquiiioquiaari Pueyaso Shuriucua quiquiojinia. Nojoriiri tii tiuquiiioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. ⁷ Saaja nojori jiyaniijia cutaraari tii tiuquiquiaari saaja rupaquijia puetunu marijiajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaqui quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanojuaja maja na naata rupueni quiquiaari Pueyaso. ⁹ Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaajanaari miriqui miishano quiquiaari saaja. Naajuhuaaj, pa supuetanaa niqitiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeecanu seetanujuanaa, juhujaniya nojori rupuenura Pueyaso. ¹⁰ Naaratej, cuno tariucuacaanu rootasanoori saaja panishaaquiaari Pueyaso cuara na sanitiquiaariijaatijia quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqueshiyani,

teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiuara. Puetunu naa pueya miishanojuanaari maja na naata pueya jiuujia jeevanu sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiyate-saaquiaari, Pueyasojiniji na masenura Pueyaso jiiiasano pajaniyarano. Cuno quiquio, tee na secojoquiaa na Que pocuaracuajani, cunoori seetanujuanaa Pueyaso quiquio jiyocuacaanu, maja pueyano tiasano. ¹² Naa Cristo tiuquishacari na Que quiquiojinia Pueyaso na jiyanootiniuria pajaniyatej, nojuajaari maja na tiuquitianu quiquiaari cabra nanaca, juunu niquiohua nanacanio. Nojuaja cutaraari tama na nanacatajaaja Pueyaso jiyanootiquiaari pajaniya. Nojuajaari maja pueyaracaanu na tiuquiiionu na Queecua, taa mijiria pueyacuara secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusuucuatej, na Queeri Neyanuucua tiuujiaa jiyanooquiaa puetunujuanaa. Naacuajitij, majaari Pueyaso shuriucuaaji pa taanuusaanu quiniutianiya. ¹³ Pueyasoori Moisés niishitiquiaari, pueyano jaara macu masaqi tiuquimia, jaara na quiarejuhuj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tiajinia tiuquiniujuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhua Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijianaa. Naatej, taa pueyacuara secojonaa jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniucua, Jesucristojuanaari tama na nanacajaaja tiuquitiaquiaari Pueyasocua, pa jiyanooshaanura puetunu sesa pa miishanojinijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jiyaniinu pa naata tama pa cuaqueyajaaja jiyanootiniu Pueyaso tama pa miishanotajaaja. Naacuajitij, quiarjia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵ Jesucristo cusuucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, nojori, Pueyasocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusuuta quiari naatajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutiojonu seetanujuanaacuajani, pueyaracaanu shuquiriaatia jatiqii pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaanura maninia, teyano pueya pa panitiaa nojori jiiianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajio-taquiaaricujani, saminiio pa quishacarijia. ¹⁷ Naacuajitij, saminiio pa quishacarijia, najuhuaanari pa naajiotasano. Pa shaajesacari, jiyacari cutara pa casamiiri niqutiojosano. ¹⁸ Tariucuaaanu naajuhuj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niqiarajanaa. Na nuhuaji, Moisésri juunu niquiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naa-

tusu hisopo cashacucuataari. Cunota, mohuacanacu majiriuutiaquiaari Pueyaso Rupa na naajiotasanoocuaari, puetunu Israel pueyacuajanaano. ²⁰ Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaca quirini”. ²¹ Moisésri Pueyaso Secojoua tiaacua majiriuutiaquiaari nanacajuhua, puetunu Pueyasora poonijiotajara shipinijosano casamiicujanaano. ²² Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiaa Cristo cusonuucua pocuara

²³ Mijiria Pueyaso Secojoua tia, puetunu na casaatajanaa quiniuucua juhua jiyocuaaanu casaa naaqui, seya nanacaari maninia quiquiaaricuaaja cuno mijiria casami quiniuria jeequesano. Saniniuujia, jiyocuacaanu casaa quiniuria jeequesano, socua maninia nanacaari panishaaquiaari seya nanacajiniji. ²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojquiaa pocuara. ²⁵ Mijiria pueyacuara secojonaa jiyaniijianucuaari puetunu marijarajanaa pueyaracaanu tiuquiiioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. ²⁶ Jesu jaara Pueyaso pa jiyanootiriquia puetunu marijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijarajanaa. Quiari naataja saniniuujia, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaaja puetunu nocua tiuujiaa pueyajanaa jiyanooshaanura. ²⁷ Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua, socua na cusonuhua juhua coteenu na cusonu. Nojori shaajenu nuhuaji, nojoriiri saaja sashiya Pueyaso nequesoreenura nojori. ²⁸ Naajuhua, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacujitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianihua, noo pojoriria canapuate na sashiyacuajani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojitiajaca pueya cutaraari puetunu marijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaca pueyara na jatanishaanu seya nanacata. ² Naajuhua, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhujaniya nojori quiniuria. ³ Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano

sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵ Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacujaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. ⁶ Majaari quia timiniu quiquiaa seya catijasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani’ ”.

⁸ Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooocuara, na nataacuacajinijinio nojori niqutiojonura nerajuhuj. Nojoriiri niishitiojosaaquiarijuhuj nojori catijianura na seya Pueyasooocuara, tama nojori seya nanacajaaja shootesaanurajuhuj, sesa nojori miiniuucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹ Nocuaji, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. ¹⁰ Pueyaso tojijia na quiniuucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucuajanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucuajanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijosacari Pueyaso Secojoua tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa.

¹² Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusuucua pa niti, puetunu nocua tiuujia pueya sesa miishanojuanaari tojetaarucuajanaa jiyanooshaaquiaa. Naa na tucuatantu nuhujia Pueyaso miiniu panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuara na paraa shocotare puetunujuanaajaatijiaj. ¹⁴ Naa niquiriyatu pueyano mosaanuucuatej, puetunu nocua tiuujia pueyanaari maninia miijiacara jatanishaaquiaa, tojetaarucuajanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucujaari naa pa niishitijuhuj naa Pueyaso sequesacari tariucuacaanu na rupaajinia:

¹⁶ “Pa Jiyaniijia Pueyasoori naa sequeya: ‘Nio pa quishacari nuhujia, janiyari tamaatia miiniutianiya cua saquiriojosano pueyani, quiarinio cua rupaacua nojori tiushacari. Janiyari quiarinio cua rupaa nianutaniya nojori jiuujiajiniani, na tojijia nojori quiniuria. Naajuhuj, janiyari juhua na naajiotanutaniya nojori niishitijajiniani. ¹⁷ Janiyari puetunu sesa nojori miishanojuanaa niyajetanutaniya seetanujuanaani’ ”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupuere jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua

na nanaca pocuara. ²⁰ Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasocua. Mijiria Pueyaso Secojoua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaaquiniuria Pueyasocua. Cuno shiquiaruque toque cutaraari sutequiaari Jesu cusosacari. Cunocuaajaari pa niishitiya, pocuajiiri juhua nuunusano quiya Pueyasocua. Neyanu Jesucristocuaajaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajuhuj. ²¹ Nojuacuaajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²² Cunora, Pueyasocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujiata, juhua poojiaacua Jesu nanaca majiriuutiasano quishacari. Naajuhuj, puetunu sesa pa miishanojuanaa cuaara jiyanooshano quiiria, naatej, taa pa cuaqueyacuaani, pa nanasacari maniniuniacu mohuacata. ²³ Niaa jaara moojinia tiuquinijiosaaquiaari, niaari maninia pahuataquiaari pueya niquiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. ²⁴ Parta Pueyaso pueyacia tacaajiaca pa quiriquia. Panijiaca pa quiniuria pa shiniujiutiooriquia, maninia miijiaca pa quiniuriajuhuaj. ²⁵ Noojiaqueya parta Pueyaso pueyari tari jitiqiuocanu maja na rerejonura narta Pueyaso pueyata. Majaari naa nia miiniujiuhuj. Maninia cutaraari pueyaracaanu pa rerejonura parta Pueyaso pueyata, pa shiniujiutionura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

²⁶ Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijiaajani, ¿cancucua socua pocuara cusonu pacuterohua saajaniuhuj? Shaaqui. ²⁷ Naa sacuaraatia miijiacani, nojori cuaara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanoohua saniitiosaanutaniya. Narta Pueyaso paraata cojiritiasaanutaniya quejoonu mani quiquiojiniaari pueyaracaanura. ²⁸ Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuaajitij, majaari nocua na tarajaanu quishaaquiaari na mosaanura. ²⁹ Moisés Rootasano tojiyashijiaca jaara naa miishaaquihaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhuj, Pueyaso Sohuanuucua rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacuaajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojiyashijiaca pueyajiniji. ³⁰ Paacuajaari tari tojiquiaari naa Pueyaso sequesanonni: “Janiyacuaajaari naminiani. Janiyari sesa miijiaca saniitionutaniyani”. Naa naajiotasaaquiarijiaariuhuj: “Pa Jiyaniijia Pueyasoori na pueya nequesoreenutaniya”. ³¹ ¡Jiyanoohua puereeta quiniutianiya cutaraari Pueyaso jiyanooniu ruuretajaca pueyara, Pueyaso nequesoreesacari nojori!

³² Pueyanaa, tariucuaacaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhujaniya rejeretaquiaari saaja. ³³ Noojiaqueya nijaniyajinijinoori cararaatia macaatisaaquiaari. Niaari pueya niquiara naquiya miishaaquiarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori tarajesacari. ³⁴ Naajuhuj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojitiajaca nojori

quiniuucua, niaari nojoriicua tiuquiiioquiaari, nojori nia cumanijianura nocua nia taraajenuucua. Naajuhuaaj, nia paraa jaara nia jiiitasano casami riutiocojoquiaari tama nojoririajaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiiitaa socua maninia casaa cuno casamijiniji, pueya jaariuutiasano niajanijajinijini. Cuno, Pueyaso jiiitasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuajani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiriquia pueyaracaanu. Pueyasocuajaari jiyanohua maninia miiniutianiya nocua tiuuniu tarinitiaashijia. ³⁶ Naquiya nia miishacari pueyaracaanu, juhuajaniya nia rejeretariquia saaja, maninia nia tucuatana puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequesanoocua-jaari naa naajiotasano quiya:

“¡Niaaj! ¡Quera tiuquiya pueyacua Niriquiano! Maja na tarishiniu. ³⁸ Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiuushacari. Saniniuujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

³⁹ Cuno pojoriiri saniitiosocoriguiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacuajaari pa Jiyaniijaacua tiuujiacani, pueyaracaanu nata pa quiniuria shuquiriaatia.

11

Pueyasooocua tiuuniujiniji pohuatasano

¹ Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. ² Noojiaqueya pa supuetanaajinijiniori seetanujuanaa Pueyaso sequesanoocua tiuujia quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³ Pajaniyara naajuhuaaj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaaquiaari niquishoo casaajiniji.

⁴ Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuquiaricuaani.

⁵ Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucujia. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajinijiiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. ⁶ Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacuajitij, cante Pueyaso niishiniuucua jiaatiaani, nojuaja cuara tiuria Pueyasoori seetanujuanaa quijia. Nojuaja cuara tiuriajuhuaaj, Pueyasoori na secojonuujuaca tojiquiaa. Nojori panishano miiquiaa nojoririajaarihuuaaj.

⁷ Pueyasoori supuetana Noé numootequiaari nojuajaari nio jiya pajaashitianiniu-tianiya, puetunu mijiria sesa miijiacajanaa na shaajanura. Pueyasoori na sequequiaari-ijiuhuaj puereetuca buque na shipininiuria tii na tacatajara pajaacuaji. Jiyacaritij, Noeri maja na niishiniu quiija pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquiocohuatajuhuaj. Puetunu narta mijiria quiijaca pueyajanaari cusunuuquiaari pajaajinia, nojori tiuyaquiniuucua Noé pohu-atasanooocua Pueyasojiniji. Noé cutaraari juhua sesa miyashijiara jiyatesaaquiaari pueyaracaanu Pueyasota rishijiara na quiniuria, Pueyasooocua tiuujia na quiniuucua.

⁸ Abrahamri Pueyasooocua tiuquiaarijuhuaj. Pueyaso sequesacari nojuaja ta-monu jiyajiniara na pacunura, Abrahamri na tojiquiaari. Tama na jiyajinijijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quiijara na niquitionutaniya tama na jiyaranojuaja.

⁹ Pueyaso niquitiosocoriquiano jiyajinia na tiuquishacari, Abrahamri cuno jiyajinia quiquiaari juhua rucanejojua pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quiija quiquiaari pueyaracaanu. Abraham niyanu Isaacri naa quiija quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujanaa na sequesano Abraham. Naacuajitij, nojoriiri Pueyaso sequesanoocua tiuujia quiquiaari pueyaracaanujuhuaj. ¹⁰ Pueyaso jaara Abraham sequequiaari, nojuajaari pueyaracaanu na quiijarano quiquio na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

¹¹ Naajuhuj, seetanujuanaa Pueyaso sequesacari Abraham, nojuaja na muetutenu-taniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quiija na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. ¹² Naacuajitij, mueya shipiniyashijia saaquianoori mueya mueratequiaari. Cuno neyanuucujinio supueno pueyari queraatiara canequiaari, queraatiate juhua riya, serojiyaquishoo, juhua shoniniacu caminia shuriuquioco paajia jaaquia.

¹³ Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanujuaja maja na jitianu quiquiaari seetanujuanaa Pueyaso sequesano nojori na niquitiosocoriquiano. Naajaa, seetanujuanaa nojori tiushacari Pueyasooocua, nojoriria, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiiatiasano. Naacuajitij, nojoriiri juhujaniya quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴ Naacuajitij, paari niishiyani nojoriiri tamonu jiya jiiitanuucua jiaatiariquiaa, pueyaracaanu nojori quiquiorano cutara. ¹⁵ Nojori jaara saaja mijiria jiya camaruhua quiniuria panijaca quiquiaari, nojori maara na supuetujua jiyajiniara riujiuuquiaarijuhua. ¹⁶ Saniniuujia, nojori cutaraari socua maninia jiya jiiitanuucua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: "Pueyasoori canaa Jiyaniijia". Nojuacuajaari tari jeenucuasano tiaca jiiitiaa nojoririano jiyocuacaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyujua

quiquiaari, Pueyasoori Abraham saniquiaari, na niishiniuria nojuajate seetanujuanaa na tojijia. Naacuajitij, na sequequiaariiri cuaara na panishano niyanu moora, nocuara na catijiasocoriquiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojijia. Naacuajitij, Abrahamri neyanuniyoyua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacaani.

²⁰ Isaac tiuuniuucua Pueyasooocujuhuj, nojuaja jaara saaquiano quiquiaarijiuhuj, nojuajaari necohua sequequiaari, Jacobo, Esaúnio: “Pueyasoori jiyanoehua maninia miiniutianiya niaara, niaacuajinio supueno pueyano, taa na sequequiaari janiyacua-jani”.

²¹ Jacoboori Pueyaso sequesanoocua tiuujia quiquiaarijiuhuj. Naacuajitij, quera na cusonu panishacari, nojuajaari neyanu José niqiuohua sequequiaari: “Pueyasoori jiyanoehua maninia miiniutianiya niaara, niaacuajinio supueno pueyano”. Naa na sequenu nuhuaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijiuhuj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tujianura na nucuhua Egipto jiyajinia, nojori jaara quiojorohua Pueyaso niqitiosocoriquiano jiyajiniara.

²³ Moisés queya quiniuucua Pueyasooocua tiuujia, nojoriiri Moisés jamoquiaari jaara shusha rasaaquiaari, mueya maniniuniyoyua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niqiuocohua shusha roosano canujuanaa cuaara moojinia quejoosaaria. Naajaa, nojoriiri cuno sequesano tojiaquiquiaari nojori puereyaquiniutia saaja, Pueyasooocua tiuujia nojori quiniuucua.

²⁴ Naajuhuj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitina Faraón niyatu tamacaquiaari. Nojuajaari tama sequequiaarijiaaja: “Majaari Faraón jinianu cua quiniu paniniu. Janiyacuajaari Israel pueyanoni”. ²⁵ Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacia taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuaara cojiritiasaaria naquiya miishaanu narta Israel pueyatajuhuj. ²⁶ Pueyaso sequesanoocua tiuujia na quiniuucua, nojuajaari niishiquiaari Pueyasoori na tojitiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiitiaja na quiniuria mijiria, Faraón jinianu na quiniuucua.

²⁷ Pueyaso sequesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanoohua. Seetanujuanaa Moisés tiuushacari na niquiyaquishoo Pueyasooocua, nojuajaari Pueyaso niquiopiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocujaji Israel pueya quia numootere, borrego nanaca nojori shuquiujitianura na tia tohuatayaji, maja nia jiyapueranuhua cusojuasaanurajuhua”. Moisésri Pueyaso sequesanoocua tiuquiaari. Naacuajitij, puetunu Israel pueya jiyapueranuhajiniinjiojuanaani, majaari quenaaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jiyanishano caminiaari nojori ritiaquiaari saaja. Nocujaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuara niuutiaara caminia taquijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohwa jaara juhua nojori niuutianu paniquiaarijihuhua, nojoriiri saaja shushiniuquiaari.

³⁰ Israel pueya tiuquishacari Pueyaso niquitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹ Puetunu Pueyaso tojitiaashijiacaajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujuna na jamojonuucua tarijia narta pueyacuaji. Rahabri naa maninia miiquiaari Pueyasooocua tiuujia na quiniuucua. Naaratej, Israel pueyari cuno paanatu jiyanooquiaari.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujia quiquiaari. Tariucuja cua pohuatasano, maninia nia niishiniuria Pueyasooocua tiuujia pueyari Pueyaso jiyanooshano. Naajuhua, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefé, David, Samueljinijinio, socua narta Pueyaso sequesano caminiujunaa pueyajinijinio. ³³ Pueyasooocua tiuujia nojori quiniuucua, nojoriiri tamasa jiyaniijianucua miaquejoquiaari na jiyajiniji. Pueyasooocua tiuujia nojori quiniuucua, nojoriiri maninia jiyaniijianucua quiquiaari, maninia na jitianura narta Israel pueya. Pueyaso sequesanoocua tiuujia nojori quiniuucua, nojoriiri Pueyaso sequesano nojori na niquitiosocoriquiano masequiaari. Pueyasooocua tiuujia nojori quiniuucua, juurunu sareya rupaari juhua seecujutasaquiaari saaja, maja na soonura nojori. ³⁴ Pueyasooocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujia nojori quiniuucua, nojoriiri na paraacuaji mashiquiaari saaja, maja na puecoosaanura nijinaquetucuja mueruta. Pueyasooocua tiuujia nojori quiniuucua, sasaca pueyari jiyanoohua cumaacaraca quijiacara quiquiaari. Pueyasooocua tiuujia nojori quiniuucua, nojoriiri jiyanoohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijihuhua. ³⁵ Naajuhua, Pueyasooocua tiuujia maajipohua quiniuucua, nojori macuuri samiiticoquiaariuhua nojoriria.

Tamasacaari jiyanoohua taraatia miishaaquiaari Pueyasooocua tiuujia nojori quiniuucua. Cunora, nojori paraa jaara nojori quiooquiaari, nojoriiri puecoonura mi-ananajosaaquiaari nojori jaara Pueyaso tojiniu tarinitiaquiri. Nojori jaara na

paraa sequesano tojiquiaari, nojori maara cartesaaquiaariuhua. Pueyasooocua tiuujiaa nojori quiniuucua, nojoriiri saaja paniquiaari nojori cuara puecoosaariaqui, naajaa, jiyanoohua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanoohua shuquiriaatia nojori quiniuria pueyara-caanura cutara. ³⁶ Tamasaca quiniuucua Pueyasooocua tiuujiaajuhuaaj, nojoriiri cararaatia macaatishaaquiaari, jiyanoohua majacusaquiaariijaariuhuaaj. Naajuhuaaj, tamasaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷ Tamasacaari saitia jacusaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoohua naquiya na miishaanura. Naajuhuaaj, tamasaari nijiniaquetucuaaja mueruuta puetujusaquiaarijianaa piyonu. Naajuhuaaj, tamasa quiniuucua Pueyasooocua tiuujiaajuhuaaj, nojoriiri juhua taanuusano rucojoquiaari puetunu tiquiyocuaajanaa. Casamiiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaaj. ³⁸ Juhua taanuusano nojori quiniuucua, nojoriiri juhua tashuquioono rucojoquiaari cariiquia jiyajinia, tuhuananuhuaajinianio. Tiaajunucua nojori quiniuucua, nojoriiri saaja raaco maquiyonuujuaa quiquiaari. Mijiria quijiaca pueyari nojori jiyatequiaari juhua najuhuana quijiaca pueyara. Naajaa, nojori cutaraari seetanujuanaa Pueyaso timitiasano pueya quiquiaari, nocua tiuujiaa nojori quiniuucua.

³⁹ Pueyasocuaajaari nojori jiyanoocuaari, seetanujuanaa nojori tiuuniuucua nocua. Naajaa, nojoriiri juhuanajuaja maja nojori masenu quiquiaari seetanujuanaa Pueyaso sequesano nojori na niqutiosocoriquiano. ⁴⁰ Pueyasoori nio pa quishacari nojori sashitijajaara, jiyanoohua maninia na miishacari pajaniya na Sohuanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritiajanaa pa cojiritianutaniya jataniniu tojetaarucuaajanaa maninia miijiaca pa quiniuria, na shuricuara na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuriajuhuaaj

¹ Naa pa niishishacari taa queraatia pueya maninia miiquiaari Pueyasooocua tiuujiaa nojori quiniuucuaacuaani, cunora, tama pa cojetasano najuhuana casa pa tarinitiariquia. Tarinitiahiyari puetunu najuhuana casaajanaa, teyanooocua pa cojequiaa Pueyaso panishano pa miyaquiniuriacuajani. Naajuhuaaj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia tucuatenu puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucuaajanaa na Que Pueyasooocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoohua shuquiriaatia quijiara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuaaj. Cunora, nojuajaari na Que miaquetajara cajiya, Jiyani-ijiajanaa na quishacari.

³ Majaari nia niyajetanu taa Jesu rejeretaquiaari juhuajaniyacuaani, pueyara-caanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia taraajenuta naquiya nia miishacari.

⁴ Niaacuajaari naquiya miishaquiaa, Jesucristooocua tiuujiaa nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucuaaji. Nia rejere-tariquia saaja. Majaari juhuanajuaja nia puecoosaanu quiquianu na tojitiajaca nia quiniuucua. ⁵ ¿Niaateeri Pueyaso rootasano niyajetarucuaa tari, na rootasano pajaniya juhua necohuaa? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. ⁶ Quia Jiyaniijia cua quiniuucua, janiyacuaajaari cua panishano pueyano jiuujiayashijiani sesa na miishacari. Naajuhuaaj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniya, seetanujuanaa necohua nia quiniuucua. ¿Pueyanoteeri nareja niquijia neyanu, neyanu jaara na tojiyashijia quiriquia? ¡Maja! ⁸ Naajuhuaaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹ Naajuhuaaj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijiaca pa quiniuria. ¹⁰ Pa queyari pa canashitijioquiaari taa nojori paniquiaaricuaajani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniuuja, nojuajaari pa saniitioquiaa seetanujuanaa maninia miijiaca pa quiniuria, juhua nojuaja pa quiniuriajuhuaaj. ¹¹ Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaquirini, paari socua maninia miijiaara jatanishaaquiaani, socua Pueyaso tojiiaara pa quiniuria juhuajaniyajuhuaaj.

Jiyanohua cocuaatiaari Pueyaso pa tojiyaquishacari

¹² Naacuajitij, majaari nia pishiniu pueyanaa, Pueyaso saniitiosacari niajaniya. Nocua nia tiuuri saaja. Nioojiaca nia cumaquiriohua. ¹³ Saaja Jesucristo rupaa tojiiaaca nia quiri, jatarinitiaja Pueyasocua tiuujiaaca mariqui noojia niquijiotereeri. Nojori cuaara saniya cumaquishano quiiria cutara.

¹⁴ Tama nia cuaqueyajaaja nia cumaquiriquia, juhuajaniya quijiaca nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniijia niquiniutianiya, seetanujuanaa maninia miijiacara jatanishano pueyatej. ¹⁵ Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaaja na cumaquiniuria niajaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacua paaquenutaniya na sesonura queraatia pueya. ¹⁶ Naajuhuaaj, tama nia cojuatooriquiaajaaja. Naa nia miitiooriquia tamonu niajanijajinijinio mariqui Pueyaso sequesano na niquitiosocoriquiano pajaniya sojeara quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niquitiosocoriquiano janiya, na jiyapueranu cua quiniuucuaani, cuno cuaara quiiria quiara, quiaa jaara quia sumatuujiniji rupore quiria. Jiyanohua miaajeyanijia”. ¹⁷ Niaacuajaari niishiya, na nuhuaji, Esauuri paniquiaari na que secojonura nocuara, jiyanohua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanohua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niqiara.

¹⁸ Nio pa quishacari, pajaniyara, Pueyasoori maja juhua tariucuacaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanoehua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanoehua ninishiquiiri quiriquiaajuhuj. Paratururi jiyanoehua piyarojoriquiaa puereetajuhuj. ¹⁹ Trompeta jonenenuunuuri jiyanoehua tojishaariquiaa. Pueyaso pocuanuuri jiyanoehua tojishaariquiaajuhuj. Israel pueya tojishacari Pueyaso pocuaano, nojoriiri jiyanoehua pueretuquiaari. Naaratej, nojoriiri Moisés sequetuquiaari maja socua Pueyasojanaa pocuanura nojoriicuaa. ²⁰ Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa miijia seru cuara naa puecoosaariajuhuj”.

²¹ Puetunu Israel pueya niquishanojuanaari jiyanoehua puereeta quiquiaari seetanujuanaa. Moisésjanaari na puerequiaarijuhuj. Nojuajaari na puerenuta sequequiaari: “Cua puerenuta tetecanijia”.

²² Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cusuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiiitiaa. Cunoori seetanujuanaa jiyocuacaanujinio Jerusalén tiaca. Naacuajitij, paari jiyanoehua queraatia Pueyaso seya rupuequiaani, Pueyaso pa maniniuhaqueetanura nojoritijjuhuj. ²³ Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoreetuneejinia naajiotasano quiya. Paari Pueyasocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasocua tiuujiaa sohuanuhuari tii quiyajuhuj, canapue Pueyaso jiyatequiaari tojetaarucuajanaa sesa miyashijiacaracuajani. ²⁴ Jesucristoori tii quiyajuhuj. Nojuajaari tama na cusonutajaaja Pueyaso jiyanoetiquiaari nocua tiuujiaa. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucuajanaani. Naacuajitij, Jesu nanacaari jiyanoehua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniuujia na mona cuara mosaariajuhuj. Jesucristo nanaca saniniuujia, cunoori Pueyaso pa jiyanoetiquiaacujua.

²⁵ Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jiyanoehuaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoehuaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoehuaquishaaquiaaricuaa, nio pa quishacari saniniuujia, ¿paatucua taa jiyanoehuaquishaaquiaa pa ruuretasacari Pueyaso quiarijiani, jiyocuacaanujia na piriyojosacari pajaniyani? ²⁶ Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷ Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸ Quiarinio quiquio, Pueyaso shipinishano na niquitiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa

Pueyasoori jiyanoehua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timitiare jiyanoehua pa paniniutia nojuaja, pa puerenutatio. ²⁹ Nojuajaari puereeta mani, Neyanu ruuretajaca shaajaja, sesa pa miishano catijiajajuhuj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniuucuatej, pueyara-caanu panitioojuaca nia quiriquia. ² Naajuhuj, majaari rucoojuaca ruuretano, ni-aacua nojori tiuquishacari. Nojori panijia nia quiriquia. Noojiaqueya pa supuetanaa-jinijiniocuajaari Pueyaso seya masuuquiaari na tiacora, nojori jiyanihacari nareja pueyano naasucua.

³ Nujuatejosano pueyacuata taaajajaca nia quiriquia. Tama nia cuaqueyajaaja nia jiy-atero juhua nojoritia nujuatejosanojuhuj, nojoriicua nia taraajenura seetanujuanaa. Naquiya miitiasano pueyacuata taaajaja nia quiriquiajuhuj. Nia niishiriquia, niaari na naata naa miitiasaanujuhuj.

⁴ Pueyasojuaanaacuajaari pa niishitioquiaari pa camitioonura. Cunora, camitioonu pueya cuara saaja neyacata, necocuata quijia quiriia. Cante camiyojuani, nojuaja cuara tama na cuaqueyajaaja cojuara maja narta pueyano niquiocua na numuetu-cunura, na camishoo maajinio. Nia niishiri, Pueyasocuajaari naa sacuaraatia miijiaa saniitionutaniya.

⁵ Majaari cumaneeca porocua nia quiniu tama niaarajaaja nia jiiitianura. Juhujaniya quijia nia quiriquia nia jiiitiasanota. Nia niishiri, Pueyasocuajaari sequequiaari: “Majaari cua cartenu quiniutianiya niajaniya juhua japueyojua nia quiniuria. Majaari quenaaja cua tiujianu quiniutianiya niajaniya”. Cunora pueyanaa, maja nia tacaani. ⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanoocujani. Naa sequequiaariiri: “Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

⁷ Coteenujuanaa nia jiiitianaa pueya nia niishiriojoriquia, noo pojori canapute shushajanaa nia tojitioquiaari Pueyaso rupaacuajani. Nojoriiri seetanujuanaa Pueyaso tojijia quiquiaari, Jesucristoocua tiuujia nojori quiniuucua. Juhua nojori quiniuucua jiaatijaca nia quiriquiajuhuj, taa nojori quiquiaaricuaani.

⁸ Taa quijia Jesucristo quiquiaari tariucuacaanuni, nojuajaari naa quiyajaa. Naa quiniutianiya pueyaracaanuari. Majaari na jatanu. ⁹ Naaratej, majaari tamaatia niishitiojosano nia tojinu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojitiajaca. Naajuhuj, majaari pueyacuara secojonaa jiuujia cumaquishaanu quiquiaari nojori miaquesacari Pueyasorano puecoosano seya shujiniji. Pueyaso Sohuanu cutaraari poojia cumaquiquiaa, panijia pa quiniuria. ¹⁰⁻¹¹ Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucujanaa tenujusaquiaari maja na miaquenura cuno shu. Nio pa quishacari saniniuujia, paari jiyanoehua cumaquishaquiaani Jesucristo cusuucua pocuara. Cunojiniji, paari seetanujuanaa Pueyaso rupuesano quiyacuajani. ¹² Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na

cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijianaa. ¹³ Nojuajaari jiyanoehua cararaatia teetesaaquiaari niyacutesanojinia pa niti. Naa Jesu miiniuucua pocuaracuaatej, Pueyaso niishiyashijiaca jaara cararaatia miiriquia pajaniya Jesuucua pa tiuuniuucuaani, juhujaniya na rejeretajaca pa quiriquiajuhujaj. ¹⁴ Pajaniyara, Jesuucua tiuujiacani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jiiitianuucua pueyaracaanu rishijia quiquio pajaniyaranotej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuqiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocuaajaari na panishano. ¹⁶ Naajuhujaj, majaari nia niyjetanu maninia nia miiniuria niarta Pueyaso pueya. Nojori jiiitiaquishacari nojori panishano, nia jiiitasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casaa niqutioyoni. Cuno cutaraari na timitiquiaa.

¹⁷ Cuarta Pueyaso pueyanaa, nia jiiitanaa tojitiajaca nia quiriquia. Majaari nojori niishitiojosano nia ruuretanu. Nojoricuaajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiiitajaca nojori quiniuucua. Naaratej, shamaatia nojori tojitiajaca nia quiriquia maninia, Pueyaso nojori pohuatanura shitimia niajanijajiniji. Naa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajanijajiniji. Jaara naa quiriritij, niaa cutaraari taraatia quiniutianiyajuhujaj.

¹⁸ Canaacuara nia secojonuuriquia. Canaacuaajaari saaja maninia miiniuria saniniujiuquiaa pueyaracaanuni. Naacuajitij, canaa jiuujiaari panaatia quiya Pueyaso niqiuara. ¹⁹ Janiyari jiyanoehua paniyani cucuara nia secojonura, Pueyaso tiuquitiniuhuaa ritia janiya niaacua.

Nio naajiona panishacari maninia Pueyaso miiniuria pueya, na saruhuatasacari pueyajuhujaj

²⁰ Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanooquiaa, juhujaniya pa rupuenura nojuaja. Pueyasojuaanaacuajaari pa Jiyaniijia Jesucristo samitianiQUIAARIUHUA macujiniji. Nojuacuajaari pa cojuana, na panishano pueya pa quiniuucua. ¡Jiyanoehua maninia pa Pueyaso! ²¹ Neyanu Jesucristoocua nia tiuuniuucua, nojuaja cuara jataniiria niajanija tojetaarucujanaa jeenucuasano nia quiniuria, taa na paniyacuajani. Nojuaja cuara naa miiria niajanijatej, maninia nia tucuatana puetunu na panishanojuanaa. ¡Pa Jiyaniijia Pueyaso cuara pueyaracaanu shuqiritiasaaria jiyanoehua maninia na quiniuucua! Cuaara naa quiiriatej.

²² Cuarta Pueyaso pueyanaa, jiyanoehua nia secojiyanijia maja nia ruuretanura secaja rupaata cua shiniujiushacari niajanija nio cua naajiojinia. ²³ Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquniuucua cua quiasacari.

²⁴ Naajuhujaj, quiria nia saruhuatare puetunu nia jiiitanaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhujaj.

²⁵ Pueyaso cuara na Sohuanuta cumaquiiria puetunu niajanijajanaa.

SANTIAGO NAAJIONEE

Santiago naajiosano niyaquejeno pueyacuara

¹ Janiyari Santiagoni, Pueyaso seru, Neyanu Jesucristo serujuhuaj. Nia saruhuataanjia puetunu tiqiyocua jiyacajiniajanaa niyaquejeno Israel doce niquiohuacuajinio caneno pueyanaa.

Niishitiaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuaj. ³ Niaacuajaari niishiya, niaa jaara Pueyasooocua nia tiuuniucua saniniujiushaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maniniajanaa miiria niaarajaatijia. ⁴ Nia rejeretare seetanujuanaa maninia sashijaca nia quiniuria, majaari quenaaja nia taacanuunu. Niaa jaara naa miijia quiriritij, niaari maninia jeenucuasano quiniutianiya, pueyaracaanu maninia miijia nia quiniuria.

⁵ Tamonu niajanijajinijinio jaara niishiyaquiri taa na miiniutianiyani, nojuaja cuara Pueyaso maseera, Pueyaso na secojosacari. Pueyasoori na niishitiaja niquitionutaniya. Nojuajaari puetunu pueyajanaa niquitioquiaa, capora na quiniuucua. Majaari na juaaniu niaa jaara na masere. ⁶ Nia masesacari, seetanujuanaa nia tiuuri Pueyasooocua, majaari quenaaja nia taacanuunu. Cante na masesacari taacanuujuaani, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricaani. ⁷ Jiyano pueyanotej, Pueyasoori maja na masesano na niquitionu quiniutianiya, noojia niquijoteja na quiniuucua. ⁸ Noojia niquijoteja pueyanoori quiarijia maseya na panishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niquijoteja pueyaracaanu. Majaari quenaaja na miiniu panishano na tucuatanu quiniutianiya.

⁹ Cua panishano Pueyaso muerasunaa, niaa jaara casamiijiu quiri, naajaa, shuquiriaatia nia quiriquia. Pueyasocujaari nia jiyatequiaari na muerasura, na jiiitiasanojiniji nia jiiitianurajuhuaaj. ¹⁰ Saniniuujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niquishiya shanohuari. ¹¹ Pananu jaara nasaatia jama, neyonaari sorequee. Na shuuri tiqii. Shanohua niquishanoori shaajequeejuhuaaj. Casamiriaca pueyanoori naajuhuaaj. Na casami na niquitiojosacarijia na canijianura juucua, canashiyaquiji shaajenutaniyajaariuhuaaj.

Naquiya pa miishacari

¹² Shuquiriaatia quijia cutaraari Pueyasooocua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niquitiosaanutaniya, pueyaracaanu rishijia na quiniuria. Cunoori Pueyaso niquitionu panishano na panijaca, taa na sequequiaaricujajani. ¹³ Niaa jaara sesa miiniuucua jiaatiaa, majaari sequenu: “Pueyasooqui sesa cua miitiniu paniya”. Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? ¹⁴ Saniniuujia, tama poojia sequejaarijia pa shiniujuquiaa sesa pa miiniuria. Naa-juhuaaj, tama pa niishitiajajaarijia pa sapojoquiaa sesa pa panishano pa miiniuria.

¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia sapojonu. ¹⁷ Puetunu maninia casaajanaa pa masesanoni, cunoori Pueyaso niqutiosano jiyocuacaanuji. Nojuajaari puetunu jiyocuacaanu pa niquishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸ Pueyasocuajaari pa sohuanu samiitianijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacujitij, taa pueyano tutaacuaa na shuquiriniutia na saaco rishishacaricuaani, Pueyasoori naa juhua pa tutaquiaari na shuquiriniutiajuhuaj, coteenujanaa na jiyapueranuhua pa quiniuucua. Nojuajaari tariucuacaanujiniji naa pa riurioquiaaritij.

Seetanujuanaa Pueyaso tojtiajaca

¹⁹ Naacujiti cua panishano cuarta Pueyaso pueyanaa, cua tojitiare. Puetunu nianijayanaa cuaara quiiria ritia tojijia, jacaria pocuaja. Cuaara quiiria shiniquiajuhuaj, maja ritia juaajia. ²⁰ Pueyanoori maja na naata Pueyaso panishano miiniu na juaniutia. ²¹ Naaratej, nia cartere puetunu sacuaraatia nia miiniujanaa, puetunu sesa nia niishiriojosanojuanaanio. Nio pa quishacarini, puera sesa miiniuuri quiquiaa. Naajuhua pueyanaa, juhua maninia naatujua nia tojiri Pueyaso rupaa, taa nia niishitiojosaaquiaaricujani. Majaari na ruuretanu. Pueyaso rupaacuajaari cumaacaraca tojetaarucuajanaa sesa miyashijiacara na jiyatenura pajaniya.

²² Pueyaso rupaa tojijia nia quiri seetanujuanaa. Majaari nia numaa shama nia tojtianunoj. Naa jaara Pueyaso rupaa tojiyaquiri, niaari tama nia cuaqueyajaaja sapojiya. ²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. ²⁴ Jaara tacateyaru-hua, na jiquioco niyasetaseequiohuari taamuecate na jiquioco quiriquiaani. ²⁵ Pueyaso rootasanoori jiyanohua maninia, maja quenaaja sesa. Sesa miiniuucua jiiitio pueyano jaara na tojijia quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhua.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojiyajaacujua. Saaja sacuaraatia pocuaja quia pueyaracaanuuri. Nojuajaari najuhuaana Pueyaso rupaa tojijia. ²⁷ Cante seetanujuanaa pa Que Pueyaso rupaa tojijiani, nojuaja cuaara japueyojuaca niquniuucua rucaneera, nojori na naacunura. Cuaara naa miiria mashiquiopuerajuhua, nojori taraajenucujusacari nojori na cumanijianura. Naajuhua, cuaara tama na cuaqueyajaaja cojuara, narta pueya na miyaquiniuucujia sesa. Naa miijia pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucuajanaa maninia quijia. Nocua tiuujia nia quishacari, majaari rimiajata nia niquniu tamasaca. ¿Pa Jiyaniijiateeri pa sooquiaaricuaa, ninishiqui quijia pa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara nia secojonuujua tijinia tiuquimia, maniniuqui toqueraca, jaaniishoracajuhua, ¿taa nia miiniutianiyan? ³ Niaari naa sequeja: “Niya quia cajishii pueyanonaa, cajituu maniniujiniani”. Saniniujia, toqueeju pueyano

jaara jiyacari tiuquimiajuhuaj, jiyareta curuutuquenaniyoyua, niaari na sequereecu-
jua: “Cuniquijia quia nujuare”. Casaa maaraja: “Cuniquijia quia cajiri quiaa tii nu-
juaani”. ⁴ Naa jaara naa miiritij, niaari tama nia cuaqueyajaaja jiyateree juhua niarta
pueya nequesoreenara. Niaari casamiriaca pueyano jiyaniya nojuaja naasucua socua
maninia pueyano casamiijiu pueyanoiniji. Naaratej, niaari casamiriaca pueyano
shuquiritiniu panijia.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari
casamiijiuniucua pueya saquiriojoquiaari nocua tiuujia nojori quiniuria? Nocua tiu-
ujia nojori quishacari, nojoriiri juhua jiyanoehua casamiriaca Pueyasora. Naajuhua,
Pueyasoori nojori jiyatenutaniya jiyaniijianucua nojori quiniuria, puetunu Pueyaso
jiitiasanojuanaa nojori jiitianura. Naa miiniutaniya na panijiaaari taa na seque-
quiaari seetanujuanaacuajani. ⁶ Niajanijarijataj, niaari nojori cararojoquiaacuajua.
¿Majateeri nia niishiniujuhuaj, cuno casamiriaca pueyacuajaari nia nohuasejoquiaa
na sapojonuta? Nojoriiri nia jaamitiquiaa nequesoreenaacua, niaacuara na saquirio-
jotanura. Nojoriiri nia miitiuquiaaqui nia jiitiasano casaaniyoyua na jaariutianura
puetunujuanaa. ⁷ ¿Majateeri nia niishiniu, nojoricuajaari pa shuquiritiasano Jiyaniijia
sesacaquiaajuhua? Pa Jiyaniijia sesa jiyaniquituquiaa na soonutaari.

⁸ Puetunu Pueyaso rootasanojinijijianaani, niiori socua tojishocoriquiano. Naa
naajiotasano quiyari:

“Pueya nia paniri taa nia paniya tama nia cuaqueyacuanaani”.

Pueyanaa, niaa jaara cuno rootasano miiija quiriquia, niaacuajaari maninia miiija.
⁹ Saniniuujia, niaa jaara rimiajata paniri pueya, niaari sesa miya. Niaari saniitioso-
coriquiano, Pueyaso niishitiojosano tojiyashijia nia quiniucua. ¹⁰ Pueyano jaara
puetunu Pueyaso rootasanojuanaa tojiquiaa maninia, saniniuujia, jaara niquiriyatu
cuno rootasanojiniji tojiyashijia quiri, cuno pueyanocuajaari Pueyaso tojiyashijia.
¹¹ Pueyasojuaacuajaari sequequiaari: “Maja nia camishoo maaji nia numuetucunu”.
Sequequiaarijuhuaj: “Maja monu”. Naacuajitij, pueyano jaara na camishoo
maaji numuetuqueyaquijia quiri, saniniuujia narta pueyano moyari, cuno pueyanoori
Pueyaso rootasano tojiyashijiajuhuaj. ¹² Naa cumaati niishiya, Pueyasoori na muerasu
nequesoreenutaniya taa nojori tojitiaquiaari na rootasanocuajani. Nocuaji tama pa
cuaqueyajaaja pa cojuare taa pa miiquiaani, taa pa pocuaquiaani. Nia niishiri,
paari nequesoreesaanutaniya pa miishanojinijini, taa pa miiquiaari parta pueyani.
Cante pueya panijia quiyani taa Pueyaso rootaquiaaricuajani, nojoriiri jiyanooshaanu-
taniya taa nojori jiyanooquiaaricuaa tamasaani. ¹³ Saniniuujia, canapuate narta
pueyano jiyanooyashijiaa quiquiaarini, Pueyaso nequesoreenu juuca puetunu pueya-
janaa, nojoriiri jiyanooyashijiaanutaniyajuahuaj. Canapuate jiyanoojia cutarani, no-
joriiri jiyanooshaanutaniya cutara, taa tamasa nojori jiyanooquiaacuanaani. Nojoriiri
shuquiriaatia quiriquiano cuno juuca, Pueyaso nequesoreesacari nojori.

Pueyasocua tiuujiaaari maninia miiijaca

¹⁴ Cuarta Pueyaso pueyanaa, ¿maniateeri pueyano jaara sequere: “Janiyacuaajaari
Pueyasocua tiuujiani”, nojuaja jaara maninia miyashijia quiyajaa? Nojuaja jaara
maninia miiijara jatanishoo quiyajaa, najuhuaa sequere: “Pueyasocua tiuujian-
ijia”. ¹⁵ Naacuajitij, tamonu parta Pueyaso pueyano jaara pa sequesee: “Maja cua
jiitianu toque. Maja quenaaja cua miaquesocoriquiano cua jiitianujuhuaj”, ¿taa pa
miyani? ¹⁶ ¿Maniateeri paa jaara na sequereni: “Juhujaniya quia quiaarohua.
Quia miaquesuhua. Toque quia cushishuhuaajuahuaj”? Maja. Paa jaara quenaaja na
niquitioyiquiri na panishanoni, pa sequesanoori najuhuanaj. ¹⁷ Naajuhua, pueyano
jaara sequere: “Jesucristoocua tiuujianijia”, jaara seetanujuanaa Pueyaso rootasano
tojiaquiri, na sequesanoori najuhuanajuahuaj. Jiyano pueyanoori maja seetanujuanaa

Jesuucua tiuujia. Paa jaara seetanujuanaa Jesuucua tiuujia quirini, pocua maninia miijiaca quirijuhuaaj. Maninia miyashijiaari maja seetanujuanaa Pueyasocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujuanaa Jesuucua tiuujia cutarani, maninia cua miishacari”. ¹⁹ Pueyaso Rupaacua quia tiuuniucua, quiaari niishiyacuaja Pueyasoori Jiyaniijiajanaa. Cuno quia tiuuniuuri maniacuaja. Naajaa, nia niishiri, samarhuari cuno niishiyajuhuaaj. Na puerenuta nocuaji tetecatuiyari. ²⁰ Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijiaa quiyajaa, Jesuucua nia tiuuniuuri najuhuanaj, nia tojiyaquishacari Pueyaso. ²¹ Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyojua quia more cucuara quia catijasocoriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojjia cutara”. ²² Naacuajiti cuarta Pueyaso pueyanaa, naa Abraham tojjiniucua Pueyasotej, paari maatia niishiyani nojuajaari seetanujuanaa Pueyasocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasocua tiuujia quiquiaari tojetaarucujanaa. ²³ Naa Abraham miiniuucuatej, nojuajaari tariucuaaanu Pueyaso rupaajinia nojuajiniji naajiotasano tohuateequiaari. Naa sequeyari: “Abrahamri Pueyasocua tiuquuaari. Naa na tiuuniucua Pueyasocuatej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniucua Pueyaso tojjiatej, nojuajaari sequesaaquiaari Pueyaso rupenata.

²⁴ Naacuajiti pueyanaa, Pueyasocuaajaari na sequesano miijia jiyanoquiaa. Maja cutaraari na jiyanooni noo pojori, nocua tiuuniu sequeja najuhuanatej. ²⁵ ¿Niaate niishiyajuhuaaj taa Pueyaso jiyanoquiaari Jericó tiacajinijinio paanatucuaani, nooj, Rahab jiyanishanotej? Pueyasoori na jiyanoquiaari neyatu na quiniuriajuhuaaj. Na jiyanoquiaariiri maninia na miiniucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinijinio pueya puecuyaquiniucuaaji cuno pojori. Rahabri naa maninia miiquiaariti Pueyasojiniji na tojjishanoocua na tiushacari. Niishiquiaariiri Pueyasoori Israel pueya cumaquinia quiquiaari. ²⁶ Nio pohuatasanoori pa niishitiojiya, naatej, taa pa cuaqueya macu quiya sohuanuujucuaani, naajuhuaaj, paa jaara Pueyaso sequesano miyashijia quirini, paari najuhuaana sequeyani: “Jesuucua tiuujianija”.

3

Pa niti juhua mani

¹ Cuarta Pueyaso pueyanaa, maja cumaati puera nijaniyajinijinio jiaatianu Pueyaso rupaa niishitiojona nia quiniuria. Niaacuajaari niishiya, Pueyaso rupaa niishitiojonaari socua jiyanohua saniitiosaanutaniya tamasaajiniji, nojori tojjitiaquiniucua tama nojori niishitiojosanojuaja. ² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacarini? Shaaqui. Pueyano sequesano jaara puetunu maniniajanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jiiitianu niishiriquiajuhua sesa na miyaquiniucuaaji. ³ Niaacuajaari nishiya, caballo rupaama jaara niasaare na niquitijotaja, na camaru na tojjiniuria, na netesacari, na camaruuri puetunu

na caballo cuaqueyajanaa niqutijiotaa na panishaco. ⁴ Puereetuuca buqueeri naajuhuaaj. Shiitianiyojua na niqutijiotaja jiiitaaajaariuhuaaj. Jiyanojua paratu piyarojoscari, naajaa, na camaruuri saa cunotaja na niqutijiotaa na panishaco. ⁵ Pa nitiiri naajuhuaaj, shiitianiyojua casaaniyojuaari pa cuaqueyajinia shipinishano. Naajaa, jiyanojua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuuca cuhuariquiajia, cuno maniyashiiri puereetuuca maniria pacusee. Cuhuariquiaari puetunu catemaajanaa. Pa nitiiri naajuhuaaj. ⁶ Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijiajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasa niquiarani. Pa nitiiri Sesaaca poonijotesano. Naacuajitij, sesa pa pocuasacari, paari puetunu mijiria pa quiniujianaa sesoquiaani. ⁷ Pueyanoori na naata jiyartuutenu puetunu casaajanaa: jaacuatujuaca, roshiyocuatujuacajuhuaaj, moojinijinio casaanio. Seetanujuanaari, pueyari tari naa na jiyartuutejoquiaa. ⁸ Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nititiaja pa Que Pueyaso maniniuhuaqueetaquiaani. Naajuhuaaj, paari Pueyaso shipinishano parta pueya sesacaquiaa natajuhuaaj. ¹⁰ Naacuajitij, pa rupaamaji tohuataari maninia sequesano, sacuaraatia sequesanojuhuaaj. Cuarta Pueyaso pueyanaa, ¡maja cumaati naa pa quiniutij! Maja maninia naatej. ¹¹ Samo naciniji pueyaracaanu pacaretajaari shocuanacu mohuaca. ¿Jataquiaate soj? ¿Pianacuta saniniuuja pacaretaquiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso pueyanaa, ¿mariyajate na naata muetunu shucuenajara? ¿Natecate sacamanajara muetujuajuhuaaj? Maja. Naajuhuaaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuaaj, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu nijaniyajinijinio jaara niishijia quiri, nojuaja cuara juhuajaniya maninia miijia quiiria nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. ¹⁴ Saniniuuja, nioojia jaara najiqutishano quiri, niishijia nia quiyaquiniucua juhua niarta Pueyaso pueyano, niaari seetanujuanaa mosanucua. Naajuhuaaj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniniu niaari niishijia. Naa miijia nia quishacaritij, niaa jaara tama nia niishitiajaaja shuquiriare, niaari mosanucua saaja. Nia sequesacari: “Niishijia cutaranija”, niaari sapojiya. ¹⁵ Cuno nia niishitiajaari maja jiyocuaanuji Pueyaso niishitiaja. Cuno niishitiajaari tama nia niishishanojuaja, mijiria niishishanojuhuaaj, Sesaajanaa niishishanonio. ¹⁶ Pueyanaa, tee Pueyaso pueya juaatishano quiya tamasa jaara na shocotare, naajuhuaaj, pueya miishacari saaja tama na panishanojuaja, tii quiyari juayonuujutano, puetunu sesa miiniujianaanio. ¹⁷ Saniniuuja, cante Pueyaso niishitiaja jiiitaa cutarani, nojuajaari maninia miijia pueyano cutara. Jiyano pueyanoori maninia quijia puetunu pueya niquiarajanaa, jiyanoorio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhuaaj, cante juaatioyano jiyanooriootejani, nojuajaari jiyanojua shuquiriaatia quiniutianiya Pueyaso shuqiritishacari nojuaja maninia na miiniucua.

4

Mijiria casaacua jiaatiajacajiniji pohuatasano

¹ ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. ² Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaquij! Niaari naa quiyaqui Pueyaso nia secojiyaquiniuucua nojuaja niqutionura niajaniya nia panishano. ³ Naajuhuaaj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaca miishano timitiajacani, nojuajaari Pueyaso paracara quirii. Niaa jaara naa miijiaca quiniu panijuhuaaj, niaari tari Pueyaso paracara quirii. ⁵ Tariucuacaanu Pueyaso Rupaajinia naa naajiotasanoori quiyaquij:

“Pueyasoori na Sohuanu niaquiaari poojiajinia, nera na cojuanura pajaniya. Jiyanoohua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhuaaj, Pueyasajuanaari jiyanoohua maninia naacuquiaa pajaniya, jiyanootio na quiniuucua. Na Rupaajiniaari naa naajiotasano quiyajuhuaaj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuujia noo pojori maniniucuaarijia, naa sequejacatej: ‘Maja cua naata miiniu maninia tamajaaja. Pueyaso cuaara cua naacuura’ ”.

⁷ Naarate pueyanaa, seetanujuanaa Pueyaso tojtiajacara nia quiriquia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyari. ⁸ Niaa jaara Pueyaso rupuere, Pueyasoori nia rupenutaniyajuhuaaj. Sesa miijiacanaa, cua tojitiare. Taa curuutucojuanucua shuquirioyacuani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiacari mijiria sesa miishano paniquiaajuhuaaj. Cuno pueya cuaara noojia jeequejora maja socua noojia na niquijitenura najuhuanaj. Cuaara saaja Pueyaso panijiacara quiriia cutara. ⁹ Sesa nia miiniuucua nia nujuquette, nia taraajerejuhuaaj. Nia sapiyonuure. Sesa miishano nia saroojotanu nia jataniri namijiaacatenucua. Sesa miiniuujiniji nia shuquiriniu nia jataniri taraajenuucujuhuaaj. ¹⁰ Niaa jaara nioojiajinia sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueyaso pueyacuara rimiaaqueyashijiaca pa quiriquiaj

¹¹ Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiaari jiyanotej. Niaa jaara naa miiritij, niaari Pueyaso Rupaajinia naajiotasano sesacaa. Naajuhuaaj, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiqii. ¹² Pueyasajuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhuaaj. Nojuajaari cumaacaraca pocuaji na tacunura, na shaajanura pajaniyajuhuaaj. ¿Canteeri quiajaniyanijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqutiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa. ¹⁴ Majaari nia niishiniu taa nia juhuaquenutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhuj. ¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuaani”. Naa cutarate maninia sequenu. ¹⁶ Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuana nia rupaa riutioconeetequiaa puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanohua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaa.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Jhuuacarijia nia sapuere! ¡Nia sariyocuatire! ¡Niaari naquiya miiniutianiya taraatia! ² Niaari jiyanohua casamiriaca. Cuno nia jiitiasano casamini, najuhuana moqueyari. Surequeyari nia maniniuquiya toqueya miaqueyajuhuj. Naacujitij, puetunu nia jiitiasanojuanaari moquenutaniya. ³ Nia paatijosano oroni, nia cumaneecanio, najuhuana tiyarashiyari. Naacujitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijiaa nia quiniuucuatej, niaari saniitiosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujuniuria pajaniya. ⁴ ¡Jiyaniijijajanaari nia poonijioteseano pueya tojiquiaa! Nojoriiri sariyocuatituya nia cumaneecajiniji nia niqutioyaquiniuucua nojori poonijionuunujiniji, niaara na senoonuucua nataacuaca nia cuhuariquiajiniji. ⁵ Mijiria nia quishacarijia, niaari shuquiriaatia quiquiaa puetunu nia panishanojuanaa nia jiitiasacari. Naa shuquiriaatia nia quishacaritij, niaari juhujaniya shiyoshiya juhua puecoosocoriquiano cushiya. Niaari naa miishaanutaniyajuhuj. ⁶ Niaari maninia miijiaa puecooquiaa. Majaari nojori nujuatanu quiquiaa nijaniya, nocuara nia tonujusacari nia cuaracashiniutia najuhanaj. Naacujiti casamiriaca pueyanaa, niaa cumaati puetunu nio niaara sequesanojuanaa tojitiaa.

Jhuujaniya pa sashiri pa Jiyaniijia

⁷ Naacujiti cuarta Pueyaso pueyanaa, juhujaniya nia sashiri pa Jiyaniijia cuara tiuquiuhua. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiyajaariuhua cuara niiria, na natau jajau na querajaacaatiniuria. ⁸ Naa nia sashirijuhuj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. ⁹ Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaareeri. Nia niishiri, pa saniniuujunia Pueyasoori pocua catecanoya. Tari juhua pa tohuateyaji nujaari. Nojuajaari seetanujuanaa pa saniniuujunia cutara. Nocuaji maninia pa quirij. ¹⁰ Pueyanaa, juhujaniya pa rejeretarejuhuj, paa jaara naquiya miishaareni. Naatej, taa tariucuacaanu Pueyaso sequesano caminiuujuniaa rejeretacoquiaari taraatia nojori miishacaricuaani, naa nia rejeretarejuhuj. ¹¹ Paari niishiyacuajani, Pueyasoori

naquiya miiniu rejeretajaca pueya shuquiritiaja. Maninia na miiniutianiyari. Niaacua-jaari tari pohuatasaaquiaarijiuhuj taa supuetana Job rejeretaquiaari naquiya na mi-ishacaricaaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacia taraajeja na quiniucua, jyanoojiaariuhuj.

¹² Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuraatej. Nia sequesano jaara seetanujuanaa quiri, nareja nia sequere: “Taaquiririnij”. Naajuhuj, nia sequesano jaara quiri “maja”, cuara naa quiiria seetanujuanaa. Majaari nia sequesano nia maatenu socua, Pueyaso mariqui nia saniitioreeri.

¹³ Tamonu niajanijajinijinio jaara naquiya miishiya, nojuaja cuara Pueyaso sec-ojoora. Shuquiriaatia nia quishacari saniniuujia, Pueyasora nia jaaquequejore. ¹⁴ Cusosu nia quishacari, Pueyaso pueya jitianaa nia sequere nojori cuara secojoora niaacuara. Nojori cuara shiyocua cojuata cusosu quiaara, pa Jiyaniiija sesajinia nojori secojosacari. ¹⁵ Nia secojosacari Pueyaso seetanujuanaa nocua nia tiuniutia, cusosuuri naatanutaniuhua. Nojuaja jaara sesa miiquianu, Pueyasoori na jyanoo-niutianiya sesa na miishanojiniji. ¹⁶ Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanijiorohua. Maninia pueyano secojosacari jiyanohua, cunoori jiyanohua cumaacaraca. Pueyasoori na secojosano tojijia. ¹⁷ Tariucuacaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijiuhuj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca mari-ja cuara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸ Elías jaara pacutequiaariuhua secojonu maru na panishacari, maruuri shusha niquiaariuhua. Pueya nataacuacaari jiyacari shusha moritiaquiaar-uhua.

¹⁹ Cuarta Pueyaso pueyanaa, tamonu niajanijajinijinio jaara Pueyaso rootasano tojiyashijara quiriohua, tamasaca jaara na niquiri, cuara na rootaaranon, maninia mi-ijia na quiniuhuara. ²⁰ Nia niishiri, cante sesa miijia tacatorohua Pueyasocua sesa na miiniujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jyanootiyajaariuhua puetunu sesa na miishanojinijijianaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya ni-aacuarani, noo pojoriicuara canapuede tiquiyocua niyaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuacaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanooquiaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujuanaa Jesucristo tojijiaca nia quiniurijuhua. Naa Pueyaso panishano pueya nia quiniuucua, nojuaja cuara cumaquiiria jiyanoohua niajaninya. Cuara nioojia cajitiiria pueyaracaanujuhua.

Pa niishiri, paari jiyanoohua maninia miishaariquianoni

³ Pa Jiyaniijia Jesucristo Que Pueyaso pa maniniuhuaqueetare, jiyanoohua maninia na miiniuucua pajaniya. Jiyanoohua na taraajenuucua pocua, na pueya pa quiniuucujuhua, nojuajaari pa niishitiquiaari paari juhua quiariniora samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaariuhuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani. ⁴ Naacuajitij, niaari niishiya niaari seetanujuanaa masenutaniya puetunujuanaa niaarano Pueyaso jiitiasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuashiniujiuhua. ⁵ Pueyasocua nia tiuuniuucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanoohua maninia Pueyaso miiniu panishano na pueyaranoni, shusha jiyacari niquishaanutaniyari.

⁶ Cunora niaari shuquiriaatia quiya. Saniniuujia, niaa naasucuaari taraajeya ru-paquijia nia miijiosacari naquiya mijiria. Naajaa, niaa jaara naquiya miishaare, cunoori maja najuhanaj. ⁷ Naquiya pa miiniuni, cunoori pa saniniujiushaanura paate seetanujuanaa Pueyasocua tiuujiacani. Niaacuajaari niishiya, pueyari jiyanoohua oro panijiaca. Saniniuujia, Pueyasocua pa tiuuniuni, cunoori jiyanoohua socua panishano orojiniji. Niaacuajaari niishiya, pueyari oro catijaja, na sanishaanura maninia oro seetanutejanaa. Naajaa, seetanujuanaa maninia oroori shaajejajuhua. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujia pa quiniuucua, cunoori socua jiyanoohua maninia cuno shaajeja orojiniji. Pueyasocua nia tiuuniu jaara saniniujiushaare juhua orojuhua, jaara seetanujuanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanoohua maninia miiniutaniya niajaninya. Jiyaniijianucua nia jiyatenutaniyari.

⁸ Majaari juhuanojuaja Jesucristo nia niquiniu. Naajaa, niaacuajaari na panijiaca. Nia niquishoo na quishacarija, naajaa, niaari nocua tiuquiaa. Niaari na timitiaquiaa jiyanoohua. Tojetaarucujanaa jiyanoohua nia timiniu quiniuucua nioojiajinia, majaari nia naata na pohuatanu nia rupaata. ⁹ Niaari naa timiquiaa, tariucua jatanishano nioojia quiniuucua, Jesucristoocua nia tiuushacari.

¹⁰ Tariucuacaanu, pueyara Pueyaso sequesano caminiujiuniaa pueyari poojo-taquiaari taa Pueyaso jiyanooniutaniya nio pa quishacari pueyani, na pueya nojori

quiniuria. Nojoriiri tama nojori naajiotasanojuaaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanojuaa niishiniu paniquiaari taa Pueyaso jiyanooniutianiya pueyani. ¹¹ Jesucristo Sohuanucuaajaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijiaariuhuaaj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniuujiaari juucua, cantejaara cuno quiniutianiya, Pueyaso Jiyarosocoriquianoni, naajuhuaaj, taacari na muetanutaniya. ¹² Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjaaja na quiniu quiquiaari. Cuarta Pueyaso pueyanaa, ¡cunoori niaarano quiquiaari seetanujuaanaa! ¡Tariucuacaanu poojotasano Pueyaso Jiyarosocoriquianojinijiri tari tohuateequiaari! Jiyocuacaanu jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuaajaari pueyarano Pueyaso miishocoriquianoocua maatia niishiniuucua jiaatiaajuhuaaj.

Pueyasoori paniya saaja maninia miijiacapa quiniuria

¹³ Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanojuaa maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niquijotejaca nia quiniu. Maninia niishiriojojuaca nia quiriquia. ¹⁴ Tarijia, niaari tama nia cuaqueya panishanojuaaja miijiacapa quiquiaari, Pueyaso niishiyashijiacapa nia quishacarijia. Quiarijia saniniuujia, niaari na tojijiacapa cutara. Naaratej, na muerasu nia quiniuucua, majaari naa quijiacapa nia quiniu socua. ¹⁵ Saniniuujia, saa maninia miijiacapa nia quiriquia. Pueyasocuaajaari nia saquiriojojuacaari naa tojetaarucuajanaa maninia miijiacapa nia quiniuria, juhua nojuajuhuaaj. ¹⁶ Tariucuacaanu Pueyaso sequesanoori naa naajiotasano quiyajuhuaaj:

“Tojetaarucuajanaa sesa miyashijiacapa nia quiri, taa janiyacuaani”.

¹⁷ Nia secojosacari, niaari Pueyaso sequequiaa, “cua Quenaa”. Cunoori maniniacuaaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiata na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacapa quiriohuari. ¹⁸ Pa supuetanaa quiniuucua sesa miijiacapa, paari naa miijiacapa quiquiaarijiauhuaaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. ¹⁹ Nojuajaari pa masequiaari tama Neyanuniyujua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niquiara mosaquiaari na camaru niti, cuno borregoori tojetaarucuajanaa borrego maniniu quiquiaari. Naajuhuaaj, Jesucristoori tojetaarucuajanaa maninia miijia quiquiaari. Naacuajitij, nojuajaari tojetaarucuajanaa maninia pueyano quiquiaari pa niti na mosaanura. ²⁰ Jiya shipiniyaquishacarijia, Jesucristoori tariucua pueya niti mosocoriquiano sequesaaquiaari, sesa miijiacapa jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹ Naa Jesucristo miiniuucua pocuaratej, niaari Pueyasocua tiuuquiaa. Pueyasocuaajaari Neyanu samiitianiquiaariuhua. Na jiyatequiaariiri Jiyaniijiajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria niajanijuhuaaj.

Naaratej, niaari juhuajaniya sashiya, shacantuuca quijiacara nia jatanishaanura-juhuaj.

²² Seetanu rupaajanaa tojitiajaca nia quiniuucua, nioojaari tari jeequejosaaquiaari, niarta Pueyaso pueya panijiaca nia quiniuria seetanujuanaa. Naaratej, seetanujuanaa panitioojuaca nia quiriquia puetunu nioojiatajanaa, maja sesa nia niishiriojonuta que-naaja. ²³ Naa panijiaca nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijiaca nia quiniuria seetanujuanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniuucua. ²⁴ Tariucuacaanu Pueyaso Rupaajinia naajiotasanocuaajaari naa sequeya:

“Puetunu pueyajanaari rishiyashijiaca juhua jiyasocua. Na cumaaca, puetunu na jiitiasanojuanaajuhuj, cunoori soreja, juhua naana shuu. Jiyasocuaari soreja. Naana shuuri tija. ²⁵ Saniniuujia, Pueyaso Rupaa cutaraari pueyaracaanu quijia”.

Cuno rupaacuajaari nia niquiara pohuatasaaquiaari pueyaracaanu quijiacara na jataniniuria niajaniya.

2

¹ Naaratej, nia tarinitiare puetunu sesa nia miiniuujianaa. Seetanujuanaa nia tarinitiare cuaracashijionu. Naajuhuj, majaari sapuenu juhua maninia pueyano niquishano nia quiniu najuhanaj. Majaari tamasaca jiitiasanoocua jiaatiajaca nia quiniu-juhuaj. Majaari coriaacojuaca nia quiniu socua. ²⁻³ Naa jaara tari niishiyacuaja pa Jiyaniijaari seetanujuanaa maninia, na rupaacua jiaatiajaca nia quiricuarajaj. Naatej, taa shusha rasano conaaja jiaatiaa supuenucuaacuaani, naa Pueyaso Rupaacua jiaatiajaca nia quiriquiajuhuaj, cumueca Pueyaso muerasu nia quiniuria seetanujuanaa. Naacuajitij, niocua tojetaarucujanaa jatanishano pueya quiri.

Cristoori juhua saminio saajia, Pueyaso quiquiorano tiataja

⁴ Saijiniji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiata Pueyaso quiquiora. Mijiria Pueyasora tiajonaari jiyaniquiaari cuno saajiaari sesarujau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. ⁵ Naajuhuj, puetunu Jesuucua tiuujia pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniuujiaaca sai Pueyasorani, na quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niquitiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucuaani, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso sequesano Jesucristojiniiri naa naajiotasano quiya:

“Janiyari Si6n tuhuananuucua jiyanohua cua panishano saajia nianutaniyani. Cuno saajiaari tama cua saquiriojosanojuaja. Maniniuujiajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

⁷ Cua panishano pueyanaa, cuno saajiaacua tiuujia nia quiniuucua, cuno saajiaari jiyanohua nia timitiasano. Nocua tiuyashijiaca cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jiyanishacari cuno saajia naasucua sesarujaujau, cuno saajiacuajaari socua jiyanohua panishano saajiara jiyatesaaquiaariuhua”.

⁸Tamaqui, nojuajiniijiiri naa miriqui naajiotasano quiyajuhuj:

“Pueyari cuno saajiacua tiuriiniutianiya. Nocua jiriatanutaniyajaariuhua na tiuriiniuria”.

Nojoriiri nocua tiuriiquiaa, nojori tojiyaquiniucua Pueyaso rupaa Jesucristojiniji. Pueyasocuaajaari tariucuacaanu sequequiaari Neyanuucua tiuyashijiacaari tiuriiniutianiya puetunurajanaa.

⁹Niajaniya saniniuujia, niaari tama Pueyaso saquiriojosano pueyajaaja. Nojuajaari puetunu niajanijajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijiaca nia quiniuriajuhuaj. Puetunu niajanijajanaari tamasaca pueyapuejinijinio saquiriojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niquiara. Tarijia, niaacuajaari juhua ninishiqui quijiaca quiquiaari. Pueyaso cutaraari nioojia cuhuataquiaari, seetanujanaa shacantuuca cumaacajinia quijiaca nia quiniuria nata. ¹⁰Tariucuacaanu, Jesucristoocua tiuyashijiaca nia quishacarijia, niaari juhua soosano taucuaca quiquiaari Pueyasora. Quiarijia saniniuujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanooquiaari.

Pueyaso panishano miijiaca pa quiriquiaj

¹¹Cua panishano cuarta Pueyaso pueyanaa, nia tojiri cua sequesano. Niaari juhua ruconaa mijiria. Nio jiyari maja pueyaracaanu pa quijiara. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹²Saaja maninia miijiaca nia quiriquia Pueyaso niishiyashijiaca niquiara. Naacuajitij, nojori jaara niaacuara rimiaaqueriquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucujajanaa maninia miijia na saniitiosacari nojori, maninia na miishacari niajaniya saniniuujia.

¹³Pa Jiyaniijia tojiijaca nia quiniucua, puetunu mijiria pa jiitianaa jiyaniijianucua tojtiajaca nia quiriquiajuhuaj. Naacuajitij, nia jiya jiyaniijiajanaa tojiijaca nia quiri. Nojuacuajaari jiyaniijiajanaa cutara. ¹⁴Cunora, na jiyatesano jiyaniijianucua tojiijaca nia quiriquiajuhuaj. Nojoricuajaari na jiyaramiquishano, sesa miijiaca saniitiosaanura, maninia miijiaca maniniuhuaqueetasaanura saniniuujia. ¹⁵Naacuajitij, saaja maninia miijiaca nia quishacari, niaari niishiyashijiaca sesa miijiaca sanaajanutaniya, najuhuana nojori sesacasacari niajaniya. Cunora, Pueyasoori paniya maninia miijiaca nia quiniuria.

¹⁶Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojishocoriqiano. Quiarijia saniniuujia, Jesu cusonuucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiyaquishacari niaacuara tari, naajaa, majaari nia jiyaniiniu naacuajiti nia naata tama nia panishanojuaaja miiniu. Pueyasojuaanaacuajaari nia Jiyaniijiajanaa cutara. Naaratej, seetanujanaa na tojtiajaca seya nia quiriquia cutara. ¹⁷Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriquia cutara. Seetanujanaa Pueyaso tojiijaca nia quiriquia. Majaari jiya jiyaniijiajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸Poonijotesano pueyanaa, seetanujanaa maninia nia camarnu tojiijaca nia quiriquia. Nia camarnu jaara juajiacua quiriquia, naajaa, saaja na tojiijaca nia

quiriquia. Majaari saaja maninia nia jiitiajaca tojjiaca nia quiniu, nia jiyanoojiacanio. ¹⁹ Naa jaara juhuajaniya rejeretariquia najuhuana nia camarnu saniitiosacari niajaniya, cunoori jiyanohua maninia Pueyasora. ²⁰ Pueyaso cutaraari maja na timiniu niaa jaara juhuajaniya rejeretare nia camarnu saniitiosacari niajaniya seetanujuanaa sesa nia miiniuucua. Saniniuujia, nia camarnu jaara saniitiore niajaniya maninia nia miiniuucua, niaa jaara na rejeretare juhuajaniya, Pueyasoori cuno timitiaja cutara. ²¹ Pueyasocuaajaari nia saquiriojoquiaari naquiya rejeretajaca nia quiniuria maninia nia miiniuucua. Cristojuanaacuajaari naquiya miishaquiaari maninia na miiniuria pajaniya. Nojuajaari naa miiquiaariti, pa niishiniuria juhua nojuaja pa miiniuria-juhua. ²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhua. ²³ Jaara sesacasaquiaari, nojuajaari maja quenaaja nojori na riucuanu quijia na juaaniutia. Jaara miiti-asaquiaari, majaari quenaaja nojori na miananajonu quiquiaari. Nojuajaari saaja na Que Pueyasocua tiuquiaari, na niishishacari nojuajaari seetanujuanaa maninia nequesoreena cutara. ²⁴ Cristo jaara niyacutesanojinia cusouasaquiaari, nojuajaari tari puetunu sesa pa miiniujuanaa cusotaquiaari. Naa pa niti Cristo cusonuucuatej, cunoori quiquiaari maninia miijia pa quiniuria saniniuujia, maja socua sesa miijia pa quiniuria. Naajuhua, nojuajaari pa niti nootusaquiaari, pa naatanijiosaanura saniniuujia. ²⁵ Tarijia, niaari juhua tashuquioono borregohua rucojuaca quiquiaari. Quiarijia saniniuujia, niaari nia cojuana Cristoocua tiuquiijoquiaari. Nojuacuajaari nioojia jiitiana maniniu.

3

Camiyono pueyara rootasano

¹ Camishano maajipohuanaa, nia niyaca tojitiajaca nia quiriquia maninia. Naacua-jitij, nia niyaca jaara Pueyaso rupaacua tiuyashijia quiriquia, naajaa, nojori tojitia-jaca nia quiniuucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohu-ataaquishacarijia Pueyaso Rupaa. ² Nojori niquishacari tojetaarucujanaa maninia miijia nia quishacari, nojori tojjiacajuhua, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucasano, saaja na mucaca na canuusacari maninia, na cushitiasacari orojiniji shipinishano tuhua-jashiquia, na cushishacari shanohua toquejuhua? ¿Jiyano maajitiiri maniniucasano jaara juaaniu maniniu quiriquiajuhua? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniuucua jiaatiajaca nia quiriquia cutara, jacaria pocuajajuhua, maja juaajia. Jiyano maajitij, cunoori seetanujuanaa maninia niquishano Pueyasora cutara. Naa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhua, Pueyasocua tiuujia tariucuaanu maajipohuari neyaca tojjiaca quiquiaari. Naa nojori miiniuucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niquiocua Saaraari naa neyaca tojjiaca quiquiaari. Seetanujuanaa neyaca tojjiaca na quishacari, nojuajaari na jiyaniquijia na jiyaniijata. Naacuaajitij, niaa jaara maninia miijia quiriquia, niaa jaara nia puereyaquiniutia nia niyaca tojjiaca quiriquiajuhua, Pueyasora, niaari Saara niquiojori.

⁷ Niajaniyarijiaata canuunaa, nia niquiocua nia jiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuajaari

Pueyaso jiyanooshanojuhuaj, taa na jiyanooquiaari niajaninyacuaani. Pueyasoori ni-aata nojori cojiritianutaniya samiitianijionu, pueyaracaanu rishijiaca nojori quiniurijuhuaaj. Naacuajitij, maninia nia jiitariquia nia niquiocua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸ Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocuacata. Taraajetoojuaca nia quirijiuhuaj. Naajuhuaaj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹ Naa jaara sesa miishaariquia, majaari na naminiu. Naajuhuaaj, niaa jaara sesacasaariquia, majaari nojori nia riu-cuanu nojori nia sesacanurajuhuaaj. Saaja maninia nia rihuanere nojori. Tariucua-caanu, Pueyaso paraca nia quishacarijia, nojuacuajaari nia saquiriojoquiaari maninia na miiniuria niajaninya. Naaratej, saaja maninia nia miiriquia nia paracajuhuaaj. ¹⁰ Tariucuaacaanu Pueyaso Rupaajiniacuajaari naa naajiotasano quiyajuhuaaj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuhuaj, nojuaja cuara na niti cojuaara maja sesa na pocuanura. Cuaara na rupaa cojuaarajuhua maja na cuaracashijionura. ¹¹ Naajuhuaaj, cuara sesa na miijionu tarinitiaara saaja maninia na miiniuria. Nojuaja cuara pueya jiyanoootiooteja quiiria. Cuaara naa maninia na miiniu tarinitiaaquiiria. ¹² Cante naa maninia miijiani, Pueyasoori na cojuaja, na secojosano tojjiajaariuhuaaj. Saniniuujia, Pueyasoori sesa miijiaca samiritiaja saaja”.

¹³ ¿Cantucua sesa nia miiriquiani niaa jaara saaja maninia miijiaca quiriquia?

¹⁴ Naajaa, niaa jaara saaja maninia nia miiniuucua miitiasaare, nia timiquiore. Pueyasocuaajaari jiyanoohua maninia miiniutianiya niajaninya saniniuujia. Mijiria quiniaa miananajosacari niajaninya, majaari puerenu, majaari nioojia nia niquijiotenu.

¹⁵ Saniniuujia, nioojiajinia Cristo nia jiyatere nia Jiyaniijiajanaara, seetanujuanaa na tojjia nia quiniuria. Juhucarijia nia niishiriojoriquia, jeenucuasano nia quini-uria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare niajaninya, casaara juhuajaniya naquiya miiniu rejeretajacate niajaninyani. ¹⁶ Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia miijiaca nia quiriquia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijiaca nia quishacari Jesucristoocua tiuujia nia quiniuucua, niaacuara rimiaaquejacaari tama sesa na pocuanuucuaajaaja caririquiniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia mi-iniuucua. ¹⁸ Cristojuaanaacuajaari mosaaquiaari sesa miijiaca pa quiniuucua. Majaari socua na pacutenu quiniutianiya cusonu. Nojuajaari tojetaarucuaajanaa maninia miijia quiquiaari. Naacuajitij, nojuajaari sesa miijiacaacuara cusoquiaari, Pueyasocua na jiyatanura niajaninya. Pueyano cuaqueyaraca na quishacari, mosaaquiaariiri. Pueyara-caanu rishijia sohuanuraca na quiniuucua, nojuajaari samiitiaquiaariuhua. ¹⁹ Naa sohuanu na quiniuucuatej, nojuajaari macunucua quiquiojinia rosequiaari tii tama no-juajinijiaaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. ²⁰ Cuno pojoriiri, noo pojoricuaja tariucuaacaanu supuetana Noé tojiyashijiaca quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuca buque na shipin-ishacari, pajaacuaji na tacajara, Pueyasoori jiyacari cuno sesa miijiaca sashiquiaari juucua. Pueyaracaanu sashiquiaariiri nojori tacatonuhuaara noojia nia nocua juucua.

Puetunu mijiria quijiaca pueyajiniinjiojuanaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniuushacari pajajinia, cuno pajaari saniniuujia Pueyasooocua tiuujia cuataniquiaari na buquejina. ²¹ Quiaritia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasooocua tiuujia na quiniuucua, pueraari naajuhua. Naacuaajitij, paa jaara moojinia tiuquinishaareni, paari pa timiniutia moojiniji tohuataquiuhuani, poojia cajitishano seetanujuaanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²² Jesucristo samitiasacariuhua, nojuajaari jiyocuacaanu tacaquiaariuhua. Quiaritia cajiya Pueyaso miaquetajaraari. Jiyaniijajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhuanio.

4

Maninia miijiaca pa quiriquia, Pueyaso cumaaca pa jitianuucua

¹ Naacuaajiti pueyanaa, naatej, taa Cristo rejeretaquiaari naquiya miiniu mijiria na quishacaricaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ² Naacuaajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaja pa miiniuria socua. ³ Tarijia, Pueyaso tojiyashijiaca nia quishacarijia pueyanaa, niaari jiyanohua sesa miijiaca quiquiaari, taa Pueyaso niishiyashijiaca miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenujuaca quiquiaari. Nia queranacunuusaqui, niaari tojetaarucujanaa sacuaraatia miijiaca quiquiaari. Niaari rerejojuajuhua puera nia ratunura, jiyanohua nia mashaasequenuunurajuhua. Naajuhua, niaari juaashiquiata shipinishano nia pueyasora nia jiyatesano shuquiritiajaca quiquiaari. Niaari na taccoji sacuaraatia pueresano casaa miiquiaarijuhuaj. ⁴ Quiaritia saniniuujia, Pueyaso niishiyashijiaca nia cojiyaquishacari naa sacuaraatia nia miiijionuratej, nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. ⁵ Cuno pojori cuara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuara tama nojoriicuaaji riucuaarajaaja. ⁶ Cunora, pa Jiyaniijia Jesucristoori macunucua niqiuara pohuataquiaari Pueyaso rupaa tama nojuajiniijiaaja, nocua tiuujiacara na jiyatesocoriquiano. Nocua tiuujiaacari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajajinia cusonuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianijiosaanutaniuhua.

⁷ Nio pa quishacarini, paari socua quenaacoya jiya puequesacariicuarani. Naaratej, niishiriojuaca nia quiriquia. Maninia nia jiiitariquia tama nia cuaqueyajaaja, saaja Pueyaso secojuaca nia quiniuria pueyaracaanu. ⁸ Jiyanohua panitiojuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jiyanoojia quiniutianiyani. Naaratej, seetanujuaanaa panijiaa nia quiriquia. ⁹ Niarta Pueyaso pueya jiiitiaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquinitiariquia nia tiajina nia timiniutia. Majaari nojori nia ririjiotanu nia taajenuta. ¹⁰ Pueyasocuaajaari na Sohuanu niqitioquiaa puetunu na pueyajanaa,

tamaatia maninia casaa miiniu niishijiaca pa quiniuria. Naaratej, puetunu nia-janiyanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niqutiojosano niajaniyani. ¹¹ Naacuajitij, nia pocuasacari, Pueyasoocua nia tiuuri nojuaja cumaquiniuria niajaniya na panishano nia sequenura. Naajuhuj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqutiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaca nia quiniuucua. Nojuaja cuaara manini-uhuaqueetasaaria pueyaracaanu, tojetaarucujanaa maninia miijia na quiniuucua, puetunu cumaacaracajanaa na quiniuucujuhuj. Cuaara naa quiiriatej.

Juhujaniya pa rejeretare naquiya miiniu, Pueyaso pueya pa quiniuucua

¹² Cua panishano cuarta Pueyaso pueyanaa, majaari nia shiriiquiniu niaa jaara jiyanohua naquiya miishaariquia. Majaari nia jiyaniujuhuaj saa niajaniyaja naa miishiya. ¹³ Niaa jaara naa naquiya miishaariquiatej, nia timiri. Jesucristoocua tiuujiaca nia quiniuucua, niaacuajaari naa miishiya taa Jesucristo miishaarquiaaari naquiyacuani. Naa naquiya miiniu nia rejeretasacaritij, niaari jiyanohua timitianutaniya Jesucristo, shacantuuca na cumaacata na tiuquishacariuhua, na jataniniuria niajaniya juhua nojuaja nia quiniuriajuhuaj. ¹⁴ Naajuhuj, niaa jaara sesacasaariquia Jesucristo tojiijaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijiacua nia quishacari, Pueyaso Sohuanuraca nia quiniuucua. ¹⁵ Niaa jaara naquiya miishaariquia pueyanaa, cuno cuaara quiiria maninia miijiacua nia quiniuucua, maja sesa miijiacua nia quiniuucua. Niaa cuaara caririquiiria cutara niaa jaara mojua quiri, nohuasejojua, sesa miijia, timia niishiniu panijia tamasa casaa. ¹⁶ Saniniuujia, maja cutaraari nia caririquiniu niaa jaara naquiya miishaariquia Jesuucua tiuujiaca nia quiniuucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquiaa na tojitiaaquishacari na rupaa. Paa jaara naa saniitiosaaquiaacuani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretatacatej? ¹⁸ Naacuajitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojiyashijiaca miishaanutaniyatej? ¡Juhuej! Puereeta miishaanutaniyari Pueyaso ruuretataca, sesa miijiacanio. Nojoriiri jiyanohua socua naquiya miishaanutaniya, Pueyaso saniitiosacari nojori. ¹⁹ Naacuajitij, Pueyaso jaara naa naquiya nia miishaanura paniya, juhujaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasoocua nia tiuuriquia nioojia na cojuanura maninia. Nojuacuajaari na Shipinia. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

5

Socua rootasano Pueyaso pueyara

¹ Quiarijia saniniuujia cuarta Pueyaso pueyanaa, janiyari nia jitianaa nacasuyani. Niajaniya, Pueyaso pueya maapue jitiananaa, cua tojitiare. Janiyacuajaari Pueyaso pueya maanu jitianajuhuj, juhua niajaniyajuhuj. Janiyacuajaari pa Jiyaniijajanaa niquiniani, nojuaja jaara naquiya miijioquiaari mijiria na quishacarijia canaata. Naajuhuj, nojuajiniji cua pohuatanuucua, janiyari naquiya miishaarquiaaajaaniuhuj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya jitiananaa, shamaatia nia cojuare Pueyaso pueyaniyaja, teyano jitianara Pueyaso jiyatequiaari niajaniyacujani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jitianu nia taajenuta saaja nojori jitianaa nia

quiniuucua. Naajuhuj, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jiitanu juhua tama nia seyajaaja. Niajaniya saniya cuara maninia miijiaca quiiria nojori niquiara, nojori niishiniuria naa quijacate Pueyaso pueya, naa nojori miiniuriajuhuaj. ⁴ Naacuajitij, pa Jiitiana-janaa tiuquishacarihua jiyocuacaanuji, niaari shacantuuca quijiacara jatanishaanutaniya, pueyaracaanu rishijiaca nia quiniuriajuhuaj.

⁵ Niajaniya mashiquiorinia, Pueyaso pueya jiitianaa tojijiaca nia quiriquiajuhuaj. Puetunu niajanijanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niquijia narta pueya shocoteja. Saniniuujia, narta pueyano shocoteyashijia naacujua cutaraari”.

⁶ Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijiaca nia quishacaritij, pa Jiyanijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniuriajuhuaj. ⁷ Pueyanaa, puetunu nia tacaaniujianaa nia niquitiore Pueyaso. Nojuacuajaari niaacua taraajequiaa.

⁸ Pueyanaa, nia Paraca sequeeri nia shanacujuquiaa, juhua sare, taa sare shanacujia na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujuanaa Pueyasooocua tiuujia nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiquiyocuajanaa naa naquiya mi-iquioyajujuaj. ¹⁰ Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jiyanoojia na quiniuucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesucua nia tiuuniuucua. Naaratej, nojuacuajaari nia jiyatenutaniya seetanujuanaa nioojia niquijioteyashijia nia quiniuria, socua jiyanoohua na cumaaca jiitiajaca nia quiniuria, maja quenaaja Sesaaca pootionura niajaniya. ¹¹ ¡Jiyanoohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuara naa quiiriatej!

Pedro sequesano quera na naajio na tucuatascari

¹² Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyanijia. Janiyari niaacuara naajiotereeni, cua nacasunura niajaniya, cua shiniujiuniuria niajanijahuaj maja nia pishiniuria Pueyasooocujia. Seetanujuanaa jiyanoojia na quiniuucua, naarate nojuajaari nia jiitiaa maninia, naquiya na miitishacari niajanijahuaj. Cunora, nocua nia tiuuriquia, pueyaracaanu na cumaquiniuria niajaniya.

¹³ Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajanijani. Marcoori nia saruhuataajujuaj. Nojuajaari juhua quiyanu. ¹⁴ Naa saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapute Jesucristooocua tiuujiacacuajani.

TANEE PEDRO NAAJIONEE

Pedro saruhuatasacari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquiaaricuaani. Nocua nia tiuuniuni, cunoori jiyanojua panishano. Naacuajitij, Pueyasoori nia jiyanojuaa juhua sesa miyashijiaca nia quiniuria na niqiuara, taa canaa quiyacuaani. ² Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanojua cumaquishaanutaniya. Nioojiaari cajitishaanutaniyajuhua, juhuajaniya quijiaca nia quiniuria.

Pueyaso pueya cuara nio niishitiojosano miijiaca quiiria

³ Jesucristojuanaacuajaari pa sequequiaari na pueya pa quiniuria. Paari na masuunu tojiqiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniuriajuhuaj. ⁴ Naa jiyanojua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacuajitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriqiuani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniuucua. ⁵ Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniuucuatej, jiyanojua nia saniniujiuri maninia miijia nia quiniuria pueyaracaanu. Naa maninia miijia nia quishacaritij, jiyanojua nia saniniujiuri socua niishijiaca nia quiniuria, sesa miiniu nia ruuretatura. ⁶ Naa niishijiaca nia quishacaritij, jiyanojua nia saniniujiuriquia tama nia cuaqueya miiniu panishanojuaaja rejetejaca nia quiniuria, maja nia miiniuria sacuaratia casaa nia panishano. Naa tama nia cuaqueyajaaja rejetejaca nia quishacaritij, jiyanojua nia saniniujiuriquia juhuajaniya sashijiaca nia quiniuriajuhuaj. Naa juhuajaniya sashijiaca nia quishacaritij, jiyanojua nia saniniujiuriquia seetanujuanaa Pueyaso panijiaca nia quiniuria. ⁷ Naa Pueyaso panijiaca nia quishacaritij, jiyanojua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanojua nia saniniujiuriquia tojetaarucujanaa panijiaca nia quiniuria.

⁸ Naa jaara puetunu nio niishitiojosanojuanaa tojijiaca quiriqiu seetanujuanaa, majaari najuhuana pa Jiyaniijia Jesucristo niishijiaca nia quiniu quiniutianiya. Naajuhua, majaari najuhuana quijiaca nia quiniu quiniutianiya. ⁹ Nio rootasano tojiyashijiaca saniniuujia, nojoriiri juhua cariojuaru, niishiyashijiaca. Naa nojori quiniuucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰ Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriqiu seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupertenu quiniutianiya. ¹¹ Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuaanu

pocuaiji Tacuna Jesucristoocua, pueyaracaanu nata nia quiniuria, pueyaracaanu Jiyani-
ijiajanaa na quiniuucua.

¹² Niaacuajaari maatia niishitiojosaaquiaari Pueyaso rupaa Jesucristojiniji. Niaari
cuno seetanujuanaa rupaacua tiuujiaca. Naajaa, janiyari pueyaracaanu nia niishitiniu-
tianiyan, maninia nia racatanura nia numaama. ¹³ Mijiria cua rishishacarijia, Jesu-
cristo jiyaramiquishano cua quiniuucua, maniniacuajaari pueyaracaanu cua shiniuju-
niuria niajaniya, maja tariucua nia niishishano Jesucristo rupaajiniji nia niyajetanura.
¹⁴ Pa Jiyaniijia Jesucristoori tari cua niishitiriucuaa janiyari quera mosaanutaniyan.
¹⁵ Cunora, janiyari nio naajiya niaarani. Naacuajitij, janiya jaara mosaareni, niaari
nio cua naajionee jiitianutaniya cua nuhuaji nia serojosocoriquiano. Maniniacuajaari
nia jiitianura cua naajionee maja nia niyajetanura puetunujuanaa cua niishitiojosano
niajaniya.

Shacantuuca Jesucristo cumaaca niquiniaajiniji pohuatasano

¹⁶ Canaa niishitiojosano niajaniya pa Jiyaniijiajinijini, cunoori maja canaa tojis-
hano tamonujiniji. Naajuhua, cunoori maja tama niishijiacajaaja pohuatasano na
saponura pueya. Jesucristo cumaacajiniji canaa pohuatasani, naajuhua, taa
na tiuquiniutianihuani, puetunu cunajuanaari maja tama canaa niishishanojuaaja.
Canaajanaacuajaari canaa namijiatajanaa na niquiquiaarini nojuaja jaara shacantuu-
cara jataquiaari canaa niquiara. ¹⁷ Jiyacaritij, na Que Pueyasoori jiyanohua na timi-
tariquiaa canaa niquiara. Canaari na tojiquiaarini naa na sequesacari Neyanujinijitij:
“Nojuajaari Quiyanuniyojua. Jiyanohua cua timitiasano”. ¹⁸ Canaa quishacari pa
Jiyaniijia shacantuucara na jataqui tuhuananuucua, canaajanaari naa Pueyaso
tojiquiaari jiyocuacaanuji pocuaanoni.

¹⁹ Canaa tojinuuucua Pueyaso sequesanojuanaa Neyanujiniji, canaari cunora see-
tanujuanaa niishiyani, tariucuacaanu nojuajiniji pueyara Pueyaso sequesano camini-
ujiunias sequesanoori seetanujuanaajuhua. Naaratej, maniniacuajaari nia tojinuria
nojori naajiotasano Pueyaso Jiyarosocoriquiano Pueyanojiniji. Nojori naajiotasani,
cunoori poojiajinia cuhuataquiaa, naatej, taa samaritiu cuhuataa ninishiquicuaani,
cuaara juhuaquemajaatijia. Pananuuri saniniuujia muetanutaniyacujua, seetanujua-
naa na cuhuatanura pajaniya. Naa quiniutianiyajaariuhua pa Jiyaniijia muetasacar-
iuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso
sequesano caminiujiunias naajiotasanojuanaari maja na naata niishishaanu maatia
tama pa niishitiajataaja. ²¹ Tariucuacaanu Pueyaso sequesano caminiujiunias naa-
jionuutasani, cunoori maja tama nojori niishishanojuaaja. Pueyaso Sohuanujua-
naacuajaari nojori niishitiquiaari nojori pohuatanura Pueyaso sequenu panishano
pueyara.

2

Sacuaraatia miijiaca niishitiojonaajiniji pohuatasano

¹ Tariucuacaanu, nojiaqueya Israel pueyajinijinioori tama na cuaqueyajaaja jiyate-
quiaari juhua Pueyaso sequenu panishano caminiujiunias nojori quiniuria. Naacuaji-
tij, nojoriiri narta Israel pueya saponuuquiaari. Naajuhua cua panishano pueyanaa,
saponuujuacaari nia tajinia supenuutaniyajuhua. Nojori niishitiojosacari sacuaraa-
tia tama nojori niishishanojuaaja, nojoriiri nia saponutaniya. Nojori niishitio-
josanoori Pueyaso pueya sesojua cutara. Naacuajitij, nojoriiri tama nojori Camar-
nujuaja tamacanutaniya, cante nojoriicuaa mosaaquiaaricuaajani, na pueya nojori
quiniuria juucua. Cunora, nojoriiri canashiyajuiji niiquiji puetunu shaajasaanu-
taniyajanaa saniitosocoriquiano. ² Queraatia pueyari sacuaraatia miijiaca quiniu-
taniyajuhua, sacuaraatia cuno pojori niishitiojosano tojiijaca nojori quiniuucua. Naa
nojori miiniuucuatej, Pueyaso niishiyashijiaaari seetanu rupaajanaa sesacanutaniya.

³ Cuno sacuaraatia niishitiojonuujuaaari jiyanoehua casamiriaca quiniuucua jiaatiajaca quiniutianiya. Naaratej, nojoriiri najuhuaana shanohua nojori niishitiojosanota nia sapojonutaniya, nareja nia niqutiojonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuacaanujiniji Pueyaso riuriosanocuaaja na saniitiosocoriquiano. Majaari Pueyaso jiyanooni quiniutianiya nojori.

⁴ Naajuhuj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. ⁵ Naajuhuj, Pueyasoori Noé quishacari sesa miijiaca pueya jiyanoyaquiquiaarijuhuaj. Cuno sesa miijiaca pajaashitiani quiaariiri nojori cusuunura puetunujuanaa. Saaja Noé curoquiaariiri Pueyaso tojjia na quiniuucua, socua siete pueyano. Noeri pueyaracaanu cuno sesa miijiaca pueya numootequiaari juucua, nojori tacatonura noojia Pueyasocua, sesa nojori miiniujiniji. ⁶ Naajuhuj, Sodoma tiacajinia quiniaa pueya quiniuucua jiyanoehua sesa miijiaca, Pueyasoori cuno tiaca catijiatquiaari tojetaarucujanaa juacara. Naa catijiatquiaari Gomorra tiacajaarihuaj. Cuno caapiqui tiaca naa catijiatasaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniurajuhuj, nojori mariqui saniitiosaaarijuhuaj. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanoehua taajequiaari tari, cuno pueya miijionuucua sacuaraatia casaa, tariucua nojori jiiitishano casaacua.

⁸ Puetunu juucujanaa, Lotri narta Sodoma tiacajinia quiniaa niquiquiaari cararaatia miitioojiano. Sacuaraatia nojori pocoojonu tojiquiaarijuhuaj. Maninia pueyano Lot quiniuucua, nojuajaari jiyanoehua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacuajiti pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniuujia, Pueyasoori sesa miijiaca racatajajara nujuatejosano, nojori saniitiojosaanu juucara. ¹⁰ Pueyasoori socua jiyanoehua nio pojori sanitiioriquiano: na camishoo maajipohua numuetucunuucua jiaatiajacani, maajishuriu numuetucunuujacajuhuj, noo pojoriujuhuaj, pa Jiyaniijia rootasano ruuretajaca saajatej. Naa sacuaraatia miijiacani, nojoriiri tojetaarucujanaa tojiyashijia. Majaari na pueretunu quiquiaa sacuaraatia tama nojori panishanojuaja nojori miiniuria. Naajuhuj, nojoriiri maja na pueretunu quiquiaa jiyocuacaanu cumaacaraca quijia na sesacanura. ¹¹ Saniniuujia, Pueyaso seya cutaraari jiyanoehua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijia nojori sesacanura.

¹² Cuno pojori, saaja sacuaraatia miiniuria niishitiojonaani, nojoriiri niishiyashijia. Nojoriiri juhua nacujiniaaco quijia casami, teyanote saaja puecoosocoriquiano roosaquiaacuajani. Tojetaarucujanaa niishiyashijia nojori quiniuucua, nojoriiri maninia quijia pa quiniuria pa Jiyaniijia rootasano sesa quiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya miishocoriquianojuhuaj, naquiya nojori miitianuucua narta pueya. Nojoriiri jiyanoehua timiquiaa nojori jaara naata quiriquia sesa miiniu juucajuhuj taa nojori miiquiaa niucucuaani. Cuno pojoriiri sacuaraatia miijiaca. Majaari na niishiniu caririquiniu. Nojori sapojonuucua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajinatej, nojoriiri jiyanoehua timiquiaa tariucua nojori jiiitishano sesa casaacua nojori niishiriojosacari. ¹⁴ Naacuajitij, nojoriiri maja nareja na niqiniu quiquiaa maajipohua. Puetunu maajipohujanaa niqutiucua nocua na jiaatianutaari. Nojoriiri maja na taajenu sesa na miiniuria pueyaracaanu. Canapuetetarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta,

sesa nojori miiniuriajuhuaj. Naajuhuaaj, cuno pojoriiri tariucua jiiitnio puetunu nojori panishanojuanaa nojori jiiitianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. ¹⁵ Pueyaso rootasano tojiyashijiaca nojori quiniuucua, nojoriiri juhua tashuquioono Pueyasoocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niqutionutaniya, nojuaja jaara nocua quiaare, Israel pueya na shimiojonura nera. ¹⁶ Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseca sesa na miiniu panishacari juucua.

¹⁷ Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhuaaj, nojoriiri juhua niqutioocua paratu piyarojosano, tamoco quiamaa saajaari. Nojori niishitiojosanoori naajuhuaaj. Majaari na tojitiajaca na naacunu. Pueyasoori jiyanoehua ninishiqui quiquio tari jiiitiaa nojoriicuaaji, pueyaracaanu nojori quiquiorano. ¹⁸ Nojori pohuatasanoori najuhuana shanohua tojishano. Saaja sapojonuuri. Naacuajitij, nojoriiri shusha Jesuucua tiuujiaa shiniujuquiaa nojori miiniuhuara tama nojori cuaqueya panishanojuaja. Cuno Jesuucua tiuujiacacuaajaari shusha naataja sesa miijiaa pueyajinijinio jatanishaariquiaa juucua, Pueyaso tojijiaa nojori quiniuria juucua. ¹⁹ Sapojonuujuaa cuno niishitiojonuujuaca quiniuucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujuanaa juhuajaniya quijiaa quiniutianiya shuquiriaatia, nojori jaara nojori niishitiojosano tojijiaa quiriquia. ¿Nojori niishitiojosano pueyatucua taa juhuajaniya quijiaa quiriquiani, tama nojorijiaaja jaara sesa miiniuucua jiiitnio quiyajaa? Seetanujuanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujuanaa juhua tama sesa na miijosano serujuaaja. Majaari na naata na tarinitianu. ²⁰ Pueyanaa, niaacuajaari niishiya, pueyano jaara pocuaji Tacunaacua tiuujiaa quiri, pa Jiyaniijia Jesucristoori na cumaquijia na tarinitianura sesa miiniuria na jiiitishano. Saniniuujia, cuno pueyano jaara sesa miijiaa quiriohua, nojuaja jaara sesa miijionura jiiitiriohua socua, neraari socua puereeta quiniutianiya Pueyaso niishiyashijiaca pueyajiniji. ²¹ Naacuajiti pueyanaa, pueyano jaara seetanu rupaaanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhuara. Cuno pueyanora maara socua maninia quiquiaari maja na niishiniuria Jesucristo rupaa, teyanote na niquiara pohuatasaaquiaaricuaajani, jatanishano pueyano na quiniuria. ²² Naa pa Jiyaniijia samiritiajaca pueya quiniuucuatej, sesa miijiaa nojori quiniuhuara, nojoriiri nio tariucuaaanu Pueyaso Rupaaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuaaj: “Cushiiri nanatosaree juucua. Saaja na cooquiojina neeneecuasuuhuariuhuaaj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojina, janiyari nia nacasuquiaarini socua cua shiniujiuniuria niajaniya maja nioojia niquijotejaca nia quiniuria Pueyaso rootasanojiniji. Janiyari naa miya quiarjia nio cua naajiojiniajuhuaj. ² Maninia nia numaama nia racatariquia tariucuaaanu pueyara Pueyaso sequesano caminiujiuniaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriiri tama na cuaqueya miiniu panishano miijiaca-jaaja. Na macaatiniuria niajaniya, nojoriiri nia nequesotanutaniya: ⁴“¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhanijia’. Majaari na tiuquiniu. Tariucuacaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. ⁵ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijiaca. Jiyano- hua tariucuacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujiajinia na quini- uria. ⁶ Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. ⁷ Quiarijia saniniuujia, jiya cajiniocua, nio jiyanio, Pueyasoori na cumaacata nojori jiiitaaajara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

⁸ Naajuhuj cua panishano cuarta Pueyaso pueyanaa, pueyaracaanu nio nia ni- ishiriquia. Pa Jiyaniijiaara, niquiriyatu juucaari juhua mil marijia. Naajuhuj, mil marijiaari juhua niquiriyatu juuca nera. ⁹ Majaari nia jiyaniniu maja pa Jiyaniijia tacatenu quiniutianihua. Majaari na tarishiniu najuhuanaj, taa tamasa jiyaniy- acujani. Maja. Maja cutaraari na paniniu pueya quejoosaanura mani quiquiojinia. Naacuajitij, nojuacuajaari pueya sashiyajara nojori tacatonura nojori jiuujia sesa nojori miiniuujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianihua. Pueya jiyanishacari Jesucristo maja na tiuquiniu quiniutianihua, jiyacaritij, canashiyaquiji tiuquiniutianihuari. Juhua nohuasejojua tiuquiniutianihuari, sesa miijiaca na saniitionura. Na nuhuaji, jiya cajiniocuaari shaajenutaniya. Jiyano hua cojuatunenutaniyari na shaajesacari. Casaa- jiniji jiya shipinishaaquiaarini, cunoori puetunu catenutaniyajanaa. Naacuajitij, jiyari puetunu mijiria na jiiitiasano casaatajanaa shaajasaanutaniya jiyano hua naseeca mani- jinia.

¹¹ Quiarijia pa niishishacari taa pa jiya shaajasaanutaniyani, cunora, seetanujuanaa Pueyaso panijia nia quiriqia saa maninia miijiaca nia quiniuria. ¹² Naa maninia miijiaca nia quiriqia, Pueyaso cuaara pa Jiyaniijia mueraterohua pocuajaatijia. Pa Jiyaniijia sequesano tojijia nia quiriqia, na tiuquiniu juuca nia secootenura. Jiy- acaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cu- taraari seetanujuanaa sequequiaari pajaniya, nojuajaari quiarinio jiya cajiniocua ship- ininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jiyano hua nia saniniuujiriquia saaja maninia miijiaca nia quiniuria. Tojetaarucujanaa jiyanooshano nia quiriqiajuhuaj, juhujaniya nia quiniuria pa Jiyaniijia tacoji, na nequesoreesacari pajaniya. ¹⁵ Naacuajiti pueyanaa, nio nia niishiriquia: pa Jiyani- ijaari tarishiyajara pueyacia na taraajenuucua, nocua nojori tiuuniuria, Pueyaso jiyanooniuria nojori. Tarishiyajarihuaj tojetaarucujanaa jeenucuasano pa quini- uria nera. Pa panishano parta Pueyaso pueyano Pablori naa naajioquiaari niaacuara- juhuaj, Pueyaso niishitiaja na jiiitanuucua. ¹⁶ Nojuacuajaari puetunu na naajioneeca- jiniyajanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacuajitij, mosanucua, noojia niqiujiotejacio, nojoriiri Pablo niishitiojosano jataniquiaa tamaatiara, nojori niishiyaquishacari cuno

rootasano. Nojoriiri naa jataniquiaa puetunu Pueyaso Rupaajanaa. Naacuaajitij, nojori-iri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuaajaari tari niishiya cuno Pueyaso rootasano tojiyashijiacajiniji. Nocuaaji jiyanohua nia cojuariquia tama nia cuaqueyajaaja maja nia sajojosaanura sesa miijiaca nia quiniuhuara. Saaja Pueyaso rupaacua tiuujia nia quiriquia cutara, taa nocua tiuujia nia quiyacuajani, cuno pojori mariqui nioojia niquijiotereeri. ¹⁸ Naajuhuj, socua pocuaji Tacuna niishiniucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijia nia quiniuria, socua na cumaaca nia jitianurajuhuj. ¡Pa Jiyaniijaari jiyanohua maninia! ¡Nojuaja cuaara shuquiritiasaaria quiarjia, pueyaracaanujuhuj! Cuaara naa quiiriatej.

COTEENUJUANAANAA JUAN NAAJIONEE

Pueya samiitianijia rupaa

¹ Jiya shipinishaacarijiyojua, Jesucristoori quijiajuhuanajaj. Canaari niaara naa-jiyani, canaa niishitiniuria niajaniya nojuajiniji canaa tojishano, canaa niquishano-juhuaj. Pueyanaa, canaari seetanujuanaa na niquiquiaari canaa namijiatani, pueyara-caanu nata canaa quishacari mijiria. Canaari na cooquiaarijuhuaaj canaa rupuesacari nojuaja. Nojuajaari pueyaracaanu quijia cutara, pa Samiitianijiajaariuhuaaj, pueyara-caanu quijia pa quiniuriajuhuaj, na sequesanoocua pa tiuushacari. ² Cuno pueyara-caanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pahuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pahuataajaaniuhuaaj. Coteenu na Queta quijia jiyocuacaanuuri. Na nuhuaji, canaacua muetaquiaariiri. ³ Canaari seetanujuanaa nia pahuataa canaa niquishanoni, canaa tojishanojuhuaj. Canaa pahu-atasanocua nia tiuushacari, pocua rupuetooreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴ Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaca quiniutianiya. Canaa jaara niaacuaji tojiriqiani, canaari shuquiriniutianiyajaacuhuaaj.

Pueyaso pa cuhuatana

⁵ Jesucristocuaajaari nio rupaa canaa niishitioquiaari, canaa nia pahuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶ Naacuaajitij, paa jaara sequerani: “Pueyaso rupueja cutaranijia”, na rupaa pa tojiaquishacari, paari saaja najuhuaana sapojijiani. Paari juhua ninishiqui quijia quiyajaani. ⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

⁸ Paa jaara sequerani: “Janiya sesa miyashijiani”, paari tama pa cuaqueyajaaja sapojijiani naa pa sequesacaritij. Majaari Pueyaso rupaa tojijia pa quiniu. ⁹ Paa jaara sesa pa miishano pahuatare saniniunijia, Pueyasoori jiyanootio cutara, na jiyanooni-uria pajaniya, taa na sequequiaaricuaajani. Poojiajiniji jeequenutaniya puetunu sesa casaajanaari. ¹⁰ Paa jaara saniniuujia sequerani: “Maja sesa cua miiniu”, paari Pueyaso jiyateya juhua sapojojuarani. Paa jaara naa quirini, majaari seetanujuanaa na rupaa quiniu poojiajinia.

2

Jesucristo pocuaji tacuna

¹ Quiquihuaniyojuanaa cua tojitiare. Nio naajiya niaaranijia, maja juhuaajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jitiiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaa-juhuaj.

³ Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishianijia”, jiyano pueyanoori sapojojuaja. Majaari na jitianu Pueyaso rupaa noojiajinia. ⁵ Cante

saniniuujia pa Jiyaniijia sequesano tojjia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqúi quiya natani. ⁶ Cante sequejani: “Janiyari Pueyaso rupuejani”, nojuaja cuaara quiiria juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuacaanu nia tojishano, majaari quiarinio. Niaacuajaari tari na tojiqúiaari, Pueyaso rupaa jaara shushajanaa nia niquiara pohuatasaaquiaari.

⁸ Naajaa, nio rootasano quiarijia cua naajiosanoni, nioori seetanujuanaa juhua quiarinio niaara. Niaari tari na tojiqúiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniqúiaari tari quiamacuaa nioojiajiniji. Pueyasoori nioojiajinia cuhuataa nia panitiosacari quiarijia.

⁹ Naa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqúiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quiqúia cutara. Tamasacaari maja na naata sesa na miitiniu, naajuhuaaj, tama nojuajaarijia maja sesa na miiniu quiniutianiya, pueya panijia na quishacari. ¹¹ Cante narta Pueyaso pueya niqúiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuaaj. Majaari na niishiniu tee na quiaani. Naa na quiniucua juhua ninishiquitij, nojuajaari juhua cariyujuaru quiya. Majaari na niishiniu Pueyaso casaa.

¹² Quiquihuaniyojuanaa, niaara naajiya nionijia, Pueyaso jiyanooshano muerasu nia quiniucua, Neyanu Jesucristo mosaanuucua pocuara. ¹³ Queyanaa, niaara naajiyani nia niishiniucua pueyaracaanu Quijia, cante tari pocuaji quiquiaari jiya coteyaquishacarijiacuajani. Mashiquioriniaa, janiya niaara naajiyajaaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuaaj mashiquioriniaa, seetanujuanaa maninia nia tojiniucua Pueyaso rupaa, niaa jaara na masequiaari nioojiajinia, Sesaaca nia shocotanuucua-juhuaaj.

¹⁵ Majaari mijiria sesa miiniucua nia jiaatianu, mijiria casamiicuanio. Cante mijiria casaacua jiaatijani, cunoori maja pa Que Pueyaso panijia. ¹⁶ Mijiria niishijia coretanijosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriajaaja. Paari pa niquishano pa maniniucuasano casaa paniquiaa pueyaracaanuni. Naajuhuaaj, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej.

¹⁷ Nio jiyari tari tariucuaashiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari

supueree. Naacuaajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajinijinio pueya quiquianucuaaja. Pocuaji rupatetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiquianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

²⁰ Saniniuujia niajaniya Pueyaso muerasunaa, Jesucristoori nia niquitioquiaari na Sohuanu. Naaratej puetunu niajanijajanaari Pueyaso niishitiajaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuaaj, sapojojua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojojua. Cante sequejani: “Pueyasoori maja Jesu Que”, cunocuaajaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuaaj. ²³ Cante Pueyaso Niyanu Cristo tamacajani, majaari Pueyaso na jitianu na Querajuhuaaj. Cante Pueyaso Niyanu Cristo jittiaa cutarani, pa Que Pueyaso jittiaa na Querajaariuhuaaj.

²⁴ Naaratej, Pueyaso rupaa nia racatare nia numaama taa nia tojiquiaari tariucuaaanucuaajani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqiu quiya pa Que Pueyasota, Neyanu Jesucristotanio. ²⁵ Jesucristocuaajaari na Sohuanu niquitioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhuaana na cuaracashiniuniutiani. ²⁷ ¿Casaara nojori nia tojiquiaani? Niaacuajaruhua tari Pueyaso Sohuanu jittiaa, Jesucristo niquitiosano niajanijani. Naacuaajitij, majaari tari panishaanu tamasaca niishitiojonura socua niajaniya. Pueyaso Sohuanucuaajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqiu nia quiriquia Jesucristota, taa Pueyaso Sohuanu niishitiojoquiaa nia quiniuriacuajani.

²⁸ Quiarijiani quiquiohuanijoyuanaa, jatiqiu nia quiri Cristota, seetanujuanaa juhua-janiya nia quiniuria pa Jiyaniijia jaara tiuquiriohua pocua. Naa nia quiritij maja nia caririquiniuria nojuaja jaara pa jittiasuhua. Na rupaa tojiyashijiaaari caririquiniutianiya cutara. ²⁹ Niaacuajaari seetanujuanaa niishiya, Jesucristoori tojetaarucuaajanaa sesa miyashijia cutara. Niaa cumaati niishiyajuhuaaj, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishitiyuaquiyari nojori niishiyaquiniucua pa Que Pueyaso.

² Cua panishano Pueyaso muerasunaa, paari tari Pueyaso muerasucuaajani. Maja cutaraari pa niishiniu taamuecaquitijia pa quiniutianiya na nuhujitijiaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyanani. Na tiuquishacariuhua, paari na niquiniutianiyanani taa na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucuaajanaa.

⁴ Cante sesa miijiani, cunoori Pueyaso rootasano na rupaaajinia tojiyaquijia. Puetunu sesa miiniujianaari Pueyaso rootasano tojiyaquiniu. ⁵ Niaari niishiyajuhuaaj, Jesuuri mijiria pocua niqiaari poojia seque na jataniniuria. Nojuajaari tojetaarucuaajanaa sesa

miyashijia cutara. ⁶ Naacujitij, cante jatiqui quiya pa Jiyaniijiatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquniu quiquiaarijuhuaj. ⁷ Quiquiohuaniojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacacujajaari tari sesa miijia quiquiaari. Pueyaso Niyanuuri cunora niqiaari puetunu sesa na miijosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiuniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jiiiasacari. Naacujitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. ¹⁰ Naacujitij, maatia niishishanocujajaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhuj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacujajaari naa niishitiojosaaquiaaritij: “Panitiojuaca nia quiri”. ¹² ¡Maja cutaraari pa quiniu juhua Caín! Nojuajaari tama tarajanujajaaja moquiaari, Sesaaca tojijia na quiniuucua. Nia niishiritio casaara Caín moquiaari tarajanuni. Nojuajaari tama tarajanujajaaja tacartaquiaari monu, tarajanu miishano quiniuucua maninia. Saniniuujia, tama na miishanojuarijia sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquniu paniyaquiriquia niajaniya. ¹⁴ Paacujajaari juhua macu samiitiani-jiosaaquiaariuhuani, seetanujuanaa saminiucua pa quiniuria. Paari seetanujuanaa na niishiyani panitiojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. ¹⁵ Naajuhuj, narta pueyano niquniu paniyashijiacani, nojuajaari juhua pueya mojua Pueyasora. Niaacujajaari niishiya, pueyano mojuuari Pueyaso samiitianiyaquishoojua pueyaracaanu na rishiniuria. ¹⁶ Paacujajaari niishiyani, Cristoori jiyanojua pa panijia na cusonuucua pocuara. Naacujiti paari niishiyani taamuecate seetanujuanaa paniniuni. Paa cuara naa panijia quiirijuhuj, tama pa cuaqueyajaaja pa tarinitianura parta Pueyaso pueyacuara, jiyanojua pa paniniutia nojori. ¹⁷ Naa jaara nareja niquniu niarta Pueyaso pueya casamiijuniucua, puetunu nia panishanojuanaa nia jiiiasacarcuaa, niaari najuhuaana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niquntioyaquijia na jiiiasanojiniji? ¡Maja! ¹⁸ Quiquiohuaniojuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuaana pa sequenu: “Nojori paniyanijia”.

Pueyaso tojijiaari juhuajaniya quijia Pueyaso niqiuara

¹⁹ Naacujitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰ Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyanojua maninia niishijia socua poojia niishishanojiniji. Nojuacujajaari pa niishiya cutara. ²¹ Cua panishano Pueyaso muerasunaa, poojia jaara pa macuhujajaquiri, paari shuquiriaatia quiya Pueyaso niqiuarani. ²² Nojuajaari puetunu pa masesano niquntionutaniya pajaniya, na

rupaa pa tojishacari, puetunu na panishanojuanaa pa miishacarijiuhuj. ²³ Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuj taa na sequequiaaricujani. ²⁴ Canapuate Pueyaso rootasano tojijiacani, nojoriiri Pueyasota rupuetootesano quijiaca. Naajuhuj, Pueyasoori nojorijinia quiyacujua. Nojuacuajaari na Sohuanu niqutioquiaari pajaniya. Naa na Sohuanu pa jiitiasacaritij, paari maatia niishiyani Pueyasoori poojiajinia quiya.

4

Pueyaso Sohuanujiniji pohuatasano, Cristo Paraca sohuanujinijinio

¹ Cuarta Pueyaso pueyanaa, quiarijiani, queraatia Pueyaso sequenu panishano caminiujiunias pueyari supueya. Majaari ritia nia tiuuniu puetunu nojoriicujanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaari caneya. Nojoriiri najuhuaana cuaracashiniuya na sequesacari: “Janiyacujaari Pueyaso sequenu panishano caminiujiuniani: Pueyaso Sohuanu niishitishano janiya”. ² Niaari naa niishiniutianiya cante seetanujuanaa Pueyaso Sohuanu niishitishano caminiujiuniani: Pueyaso Sohuanu jiitiajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³ Cante saniniuujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jitianu. Saaja Sesaaca sohuanu jiitaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquihuanijoyuanaa, niaacuajaari Pueyaso muerasu. Naacuajitij, niaari cuno sapojonuujuaa shocotacanu Pueyaso cumaacata. Nioojiajinia Quijiaari socua cumaacaraca nojori jiitiasano Sesaaca cumaacajiniji. ⁵ Cuno sapojonuujuaari saaja Pueyaso niishiyashijia, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojitiaquiaa. ⁶ Paa cutaraari Pueyaso pueyani. Naacuajitij, cante Pueyaso tojitiajacani, nojoriiri pa tojitiaquiaa. Canapuate saniniuujia maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiitaa cutarani, cante saniniuujia sapojoua sohuanu jiitiaanjia.

Pueyaso pa panijia cutara

⁷ Cua panishano Pueyaso pueyanaa, jiyanojua panitioojua pa quirij. Pueyasocujaari pa panijia. Nojuajaari pa panitijia na Sohuanuta, jiyanojua panijia pa quiniurijuhuj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. ⁸ Canapuate pueya paniyashijiacani, nojoriiri maja na niishiniu Pueyaso. Pueyasocujaari panijia cutara. ⁹ Nojuajaari pa niishitiquiaari taa na paniquiaa jiyanojua pajaniyani, Neyanuniyujua na jiyarosacari mijiria pa samitianiijoriquiano, pocuara na cusosacari. ¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojucara pa quirijuhuj. ¹² Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamacata panitioojuaa quirini, Pueyasoori poojiajinia quiyacujua. Naacuajitij, paari tojetaarucujanaa panijiacara quiniutianiyani, na paniniu quishacari poojiajinia. ¹³ Nojuajaari na Sohuanu pa niqutioquiaari poojiajinia na quiniuria. Naacuajitij, paari niishiyani paacuajaari nata rupuetoojua quiyani. ¹⁴ Canaajanaari seetanujuanaa canaa

niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaa jiyatesaanura Pueyaso pueyara. ¹⁵ Cante pueya niquiara sequejani: “Jesuuri seetanujuanaa Pueyaso Nyanu”, Pueyasoori noojiajinia quiya. Nojuajaari Pueyasota rupuetoojua quiyajuhuaaj.

¹⁶ Naacuajitij, paari niishiyani Pueyasoori jiyanojua pa panijia. Paari na niishiyajaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuaaj, Pueyasoori poojiajinia quiya. ¹⁷ Naa Pueyaso quishacari poojiajiniatej, paari pueya panijia jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. ¹⁸ Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu noojiatajanaa. Puerejaari niishiriojia: “Saniitiosaanutaniyanijia”.

¹⁹ Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani. ²⁰ Saniniuujia, cante sequejani: “Janiyari Pueyaso panijiani”, narta pueya niquiniu paniyaquiya saajaraariuhuaaj, jiyano pueyanoori sapojoua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? ²¹ Pueyasocuaajaari naa pa rootaquiari: “Cante cua panijiani, cuara paniiria narta pueyajuhuaaj”.

5

Taa pa shocotanutaniya mijiria niishishanoni

¹ Naa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijiaariuhuaaj. ² Naacuajitij, pa panishacari Pueyaso, pa tojishacari na rootasanojuhuaaj, jiyacariti paari niishiyani paari parta Pueyaso muerasu panijiaacuhuaaj. ³ Paa jaara Pueyaso panijia quiri seetanujuanaani, paari na sequesano tojijiaa quiyajaniuhuaaj. Na rootasano pajaniyani, majaari jiyajeneta na quiniu pajaniyara. ⁴ Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. ⁵ Cante Jesu jiyateya seetanujuanaa Pueyaso Nyanurani, saaja jiyano pueyano na naata mijiria niishishano shocotanu cutara.

Pueyaso Nyanujiniji pohuatasano

⁶ Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaaquiaari. Canaa niishitiquiaariiaariuhuaaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuaaj, janiyajanaari na niquiquiaari na nanaca shooteyano na shuucujini. Naajuhuaaj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Nyanu quijiajuhanajaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuaaanu quijiaacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. ⁸ Paari mijiria jitiiaa Jesujiniji pa niishitijiacajuhuaaj. Cunoori jiuujianaraca quiyajuhuaaj. Cuno pojoriiri nio: poojiajinia quijia Pueyaso Sohuanu, jiyocuaaanuji tojishano rupaa Jesu tiuquinishacari moojinia, naajuhuaaj, na nanaca, pueya niquishano na shuucujia shoyano. Puetunu cunojuaanari mariyata pa niishitiya Jesuuri seetanujuanaa Pueyaso Nyanu. ⁹ Paa

jaara tojiriqia pueya pohuatanuusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujiniiri socua seetanu rupaaanaa cutara pueya pohuatanuusanoiniji. ¹⁰ Cante Pueyaso Niyanuucua tiuujiiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiuyaquishacari tama Pueyaso sequesanoocuaajaaja Neyanujiniji. ¹¹ Pueyasocuaajaari sequequiaari, Neyanuucua tiuujiacaari pueyaracaanu rishijiaca quiniutianiya. ¹² Cante Pueyaso Niyanu jiiitaa noojiajiniani, nojuajaari tari samitianishaarohua pueyaracaanu rishijia na quiniuria. Pueyaso Niyanu jiiitaaashijaari saniniuujia maja na rishiniu quiniutianiya.

Nio naajio puequenu panishacari rootasano

¹³ Nio naajiya niaaranijia nia niishiniuria, Pueyaso Niyanuucua nia tiushacari niaari tari samitianijiosaarohua pueyaracaanu nia rishiniuria.

¹⁴ Paari Pueyasocua tiuuquiaani, pa niishishacari nojuajaari pa tojiquiaa pa secosacari nojuaja, pa masesano jaara quiri taa na paniyacuajani. ¹⁵ Naatej, taa pa niishiyacuani Pueyasoori pa secojosano tojiquiaa, paari naa niishiyajuhua paari nojuaja pa masesano maseree tarini.

¹⁶ Cante narta Pueyaso pueyano niquiya sesa miyanoni, cuara Pueyaso secojoora nocuara, sesa na miishano jaara na cusojuashijia quiri. Naacuajitij, Pueyasoori cuno sesa miiijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari niajanijatej, majaari cua sequenu niajaninya nia secojonura jiyano sesa miishanoocuaratej. ¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuajaari niishiyani pueyanaa, cante Pueyaso jiiitaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitiniu. Majaari na naata sesa na miiniujuhuaj.

¹⁹ Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiiitacuajua. Nojuajaari nio jiya camarnu.

²⁰ Paari niishiyajuhua Pueyaso Niyanuuri mijiria pocua niquiaari. Nojuajaari na niishitaja niquitioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupetoosacari. Nojuajaari Pueyasojuhuanajaj, pa Samitianijiajaariuhua, pueyaracaanu rishijiaca pa quiniuria. ²¹ Quiquihuanijoyuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucuaaja.

TANEE JUAN NAAJIONEE

Pueyaso Rupaa seetanujuanaa panijiara pa jiyateja

¹ ¿Quiaate quiyajaa cua panishano cua rimiaticuanaa? Quiaacuajaari Pueyaso saquiriojosano, neyatu quia quiniuria. Quiocuara naajiyaniija, quia panishano muera-suucuaranio.

Janiyari saaquiano Juanni, Pueyaso muerasu jiitiana. Seetanujuanaa nia paniyanijia, taa puetunu Pueyaso rupaa tojiniaa pueya paniya niajanियacuani. ² Pueyasojiniji seetanu rupaaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. ³ Nia tojishacari seetanu Pueyaso rupaa-janaa, nia panitioosacarijiuhuj, naacujitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaariuhuj. Nioojia jiyatenutaniya juhuajaniya quijiacarajaariuhuj.

⁴ Noojiaqueya quia niquiohuajinijinio niquiquianunijia. Nojori timitiacanunijia nojori tojtianuucua maninia seetanu rupaaajanaa, taa pa rootasaaquiaari pa Que Pueyasojinijicuajani. ⁵ Quiocuara naajiya quiarijianijia cua panishano cua rimiaticuanaa, cua sequenura quiajaniya: “Jiyano hua pa panitioore”. Majaari quiarinio rootasano nio, cua naajiosano quiocuarani. Nio rootasanocuajaari pa jiitiasano pueyaracaanu Jesucristojiniji. ⁶ ¿Taate pa naata paniniuni? Paari pueya panijiaca quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuaara quiriia Pueyaso pa paniniutia poojiajinia.

Cristo paraari sapojonuujuaca

⁷ Quiarijiani, queraatia sapuenu juhua Pueyaso sequenu panishano caminiujiuniaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuacaanu, cuaqueyaraca na quiniuria, seetanujuanaa pueyano na quiniuria”. Canapuate naa sequejacani, nojoriiri sapojonuujuaca. Nojoricuajaari Cristo paraa. ⁸ Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niquitionu panishano pajaniya maseyaquiriiri, pa Jiyaniijia nia poonijionujiniji na niquitionu panishano. Suraatiaja nia tojiriohuarohua seetanu rupaaajanaa, nia masenura puetunu Pueyaso jiitiasanojuanaa niaara. ⁹ Cante tama na cuaqueyajaaja jiyateja Pueyaso casaa niishijiara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiquii, na shocotanuucua Cristo rupaa. Cante saniniuujia seetanu rupaaajanaa tojtiaquiaa maniniani, taa pa rootasaaquiaari Cristo rupaacuajani, Pueyasocuajaari na Que, Neyanuuri nocuaji Tacunajuhuj. ¹⁰ Seetanu rupaaajanaa jiitiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhuatanujuhuj nia cumaquiniuria nojuaja. ¹¹ Cante na sequeyani: “Pueyaso cuaara cumaquiiria quiajaniya”, naa sequejaari cuno sapojoua cojiritiasaaree tari sesa na miishanotaja.

Juan puecasacari naajionu

¹² Socua queraatia sequenu paniya niajanियanijia. Naajaa, majaari cua naajionu panini. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niquiohuari cua sequeree nojoriria cua saruhuatanura quiajaniya. Nojuacuajaari Pueyaso saquiriojosano maajijuhuj. Tariucuaja.

SOCUA TANEE JUAN NAAJIONEE

Juan maninia pahuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiitiana. Seetanujuanaa quia paniyanijia, Pueyaso rupaa quiniuucua coojiajinia. ² Quiocuara secojoquiaanijia, puetunu quia miishanojuanaa cuaara quiiria maninia. Janiyari quiocuara secojoquiaaaniuhuaaj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojjia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanojua shuquiriaatia quiquianuni nojori pahuatasacari quiajanijiajiniji. Quiaanaari seetanujuanaa maninia miijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetanu rupaaajanaa, sanajanaa.

⁴ Jiyanojua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanojua cua timitiquiaa socua tamonu casaajiniji.

⁵ Sanajanaa, quiaacuajaari maninia miijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiicuaajinio Pueyaso muerasu. ⁶ Pueyaso muerasu rerejosacari niya, Pueyaso rupaa pahuatanura rucoojuacaari canaa niquiara pahuatanu maninia quia miishanojiniji nojoriria, quia paniniutia nojori. Quiarijiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuqiritiniuria. ⁷ Nojoriiri Jesucristojiniji pahuatanura rucoojiya. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuaara naacuura jiyano pueya, noo pojori canapuate pa Jiyaniijia rupaa pahuatanura rucoojiyacuaajani. Naa pa miiriti Pueyaso rupaa pahuatanu naacuna pa quiniuriajuhuaj.

Sesa Diótfes miishanojiniji pahuatasano

⁹ Janiyari quia quijia tiacajinia Pueyaso pueya maanuucua na naajioquiaarijuhuaj. Janiyari nojori sequequiaarini nojori cuaara Pueyaso Rupaa pahuatanura rucoojuaca naacuura, cuno pojori jiitianura na panishano. Diótfesri saaja tama na cuaqueyajaaja shuqiritiaja, Pueyaso pueya maanu jiitiana na quishacari. Nocuaaji cua sequesano ruuretacanuuri. Cua rerequetequiaaariuhuaaj. ¹⁰ Naajaa, janiya jaara niaacua quiaareni, janiyari naa sacuaraatia na miiniuucua na nacasunutaniyani. Nojuajaari tamasa niquiara canaa sesacaquiaa na sapojonuta. Naa socua sesa miiquiaajaariuhuaaj: majaari na tiuquinitianu quiquiaa Pueyaso Rupaa pahuatanaa na tiajinia. Canapuate saniniuujia nojori tiuquitiniu paniquiaa nojori tiajiniani, Diótfesri nojori tenujuquiaa saaja. Canapuate Pueyaso rupaa pahuatanura rucoojuaca tiuquinitianu paniquiaaja na tiajiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cuno sesa miijiaacua, quiaa mariqui juhua nojuaja quirijaariuhuaaj. Saaja quia jiaatiare cutara maninia miijiaacua, juhua nojuaja quia quiniuria. Cante maninia miiquiaani, cunocuaajaari Pueyaso pueyano. Sesa miijia saniniuujia, nojuajaari Pueyaso niishiyashijia.

Maninia Demetrio miishanojiniji pahuatasano

¹² Puetunu pueyajanaari saniniuujia maninia pahuatanuquiaa Demetrijiniji. Tama Demetrio miijosanojinijiaaja, pueyari niishiya Demetrioori maninia pueyano.

Seetanujuanaa, nojuajaari maninia pueyano, taa tamasaca sequequiaacuajani. Ni-aacuajaari niishiya canaari seetanujuanaa sequequiaani, naa canaa sequesacari Demetrijiniji.

Naajio puequesacari

¹³ Janiyari queraatia sequenu panijajaa quiajanijani. Naajaa, majaari cua sequenu paniniu saaja cua naajiojinia. ¹⁴ Janiyacuaja quiocua naquerejiyani. Jiyacaritij, pocua maninia pocoojore cutarani.

¹⁵ Pueyaso cuara quioojia jiiitaara maninia, juhuajaniya quia quiniuria. Niya pa rpuenaari cua sequeturee cua saruhuatanura quiajanija. Puetunu cuniqui pa rpuenaajanaa quia saruhuatere canaarajuhaj. Tariucuaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajianijia canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajanijari Neyanu Jesucristo cojuasano, nia rupesacari nojuaja.

² Pueyaso cuara nia jiuujiaaria. Cuaara nioojia cajitiirijuhuj. Cuaara paniiria niajanijuhuj. Pueyaso cuara naa miiria jiyanojua niajanijatej.

Sapojonuujuacajiniji pohuatasano

³ Cua panishano pueyanaa, janiyari niaacuara naajionu paniriquiaa jiyanojua, cua pohuatanura niajanijia taa maninia pa miishaanutaniyani, Pueyaso saquiriojosano pueya pa quiniuucua: niajanijia, canaajuhuj. Saniniuujia, quiarijiani, socua maninia cutaraari cua naajionura niaacuara, cua nacasunura niajanijia seetanujanaa Pueyaso tojjijia nia quiniuria. Jiyanojua nia tiuuri pueyaracaanu Pueyaso rupaacua, cumueca Pueyaso pueya nia quiniuria. Pueyasocujaaari na rupaa pohuataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaaricuaani. ⁴ Naa nia sequeyanijia Pueyaso rerequetajaca supuesacari jiyasohua nia tajinia. Tariucuaaanu Pueyaso Rupaa-jiniacujaaari cuno sesoriquia pueyajiniji naajiotasaaquiaaricujaja. Nojorinjiaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanojua Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitioyashijia, pa Jiyaniijiajanaa Jesucristoni.

⁵ Niaari niishiyacujaja, Pueyasoori Israel pueya supuetanaa mashiquiquiaari Egipto jiyajiniji, Egipto pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijia puecooquiaari. ⁶ Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijiaa quiquiaari jiyocuaaanucujani. Nojoriiri Pueyasora na poonijosano tiujiaquiaari. Nojori poonijosaaqui tiujiatuquiaarijiaariuhuj. Cunora, cumayocuata morojosaaquiaariiri, pueyaracaanu ninishiqui nojori quiniuria, cuara quirijiaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiacajanaa saniitiojonutaniya. ⁷ Nia niishirijuhua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanojua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhuaj. Pueyasoori maja na shipininiu quiquiaari naa pueya quiniuriatej. Naa Pueyaso tojiyashijia nojori quishacari, mariyata taa tama Pueyaso seyajaaja na tojiyashijia quiquiaaricuaani, Pueyasoori nojori quejooquiaari mani quiquiojia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijia pa quiniuria taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricujaaari Pueyaso saniitionujiniji niishiya. Naajaa, nojoriiri juhuajaniya miiquiaa puetunu sesajanaa taa noojiajinia nojori niishiyacujani. Nojoriiri tama nojori jiuujiacajaja curuushojoquiaa nojori miishacari tama nojori niquishanojuaaja na maquenujia. Pa

Jiyaniijia sootiuyajaariuhuj. Nojoriiri jiyanoehua cumaacaraca quiijaca sesacaquiaa-juhuj, jiyocuacaanu quiijacani. ⁹ Supuetana Moisés shaajesacari, Pueyasoori na seya jiyaniijia Miguel jiyaroquiaari Moisés quete na jamonura. Sesaacari Moisés quete paniquiaari juucua. Nocua Miguelta juayonuutaquiaariiri. Miguel cutaraari seetanujuanaa cumaacaraca quijia. Naajaa, majaari na saarijionu quiquiaari Sesaaca. Na sequeree saajaari: “Pueyasojuaanaa cuaraa juaaria cutara quiajaniya”. ¹⁰ Saniniuuja cuno sesa niishitiojona nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhujaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanoehua cocuaatia miiquioquiaa. Nojoriiri narta pueya niqiniu paniyaquiquiaa, taa supuetana Caín niqiniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuj, naatej, taa supuetana Balaam miiniu paniquiaari juucuacuaani. Nojoriiri mariyata puetunu quejoosaanutanijanaa nojori ruuretenuucua Pueyaso, taa supuetana Coré cusoquiaaricuaani na ruuretasacari Moisés. ¹² Nia queranacusacari Pueyaso niqiara nia panitioonuta, cuno sacuaatia niishitiojonuujuacaari jiyanoehua caraaatia nojori miaquesacari niaata. Majaari nojori paniniu tamasa. Nojoriiri saaja tama na cuaqueyajaaja shuquiritiniu niishijia. Puera miaquenuujuaca nojori quishacari, cunoori caraaatia. Jiyano pueyari maja na cumaquiniu nijaniya. Nojoriiri najuhuaa quiijaca, juhua niqitioocuaari tajimiaquiaa paratu piyarojosacari. Majaari maru niiniu. Nojoriiri najuhuaa quia, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. ¹³ Nojori nuhuaji, pueyari saaja taraatia quiquiaa, caraaatia nojori miishanojiniji. Sesa nojori miishanoori juhua jiyanoehua shoniacu caminia queyocuasacari cushau, curuutuuca. Nojoriiri shanoehua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴ Pa supuetana Adánri coteenujuanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqitishano nojuaja pohuataquiaari taa nio sesa miijia pueya miishaanutaniyani. Nojuajaari naa sequequiaariti: “Janiyari Jiyaniijia niqirii cunocoji niyano jiyanoehua queraatia na pueyatani. ¹⁵ Nijioriquiaari sesa miijia na saniitionura. Rerequetejacaacua tiutianutaniya puetunu sesa nojori miishanojuanaari. Puetunu na sojeacajanaari saniitiosaanutaniya puetunu nojori sesacanuucujanaa pa Jiyaniijia”. ¹⁶ Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiitiasanota. Nojoriiri tama na cuaqueya panishanojuaja miiquiaa. Puera pocujaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishirioehua pa Jiyaniijia Jesucristo jiyaramiquishano pueya sequesano nijaniya. ¹⁸ Nojoricuajaari nia pohuataquiaari taate quera jia puequesacari quiniutianiyani. Nojoriiri naa sequetuquiaariti: “Quera jia puequesacari, Pueyaso sesacajaca pueyari Pueyaso casaa sojeaca quiniutianiya, na rupaa sojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹ Naa cuno pueya miiniuucuatej, nojoriiri Pueyaso muerasu jiuujia niaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

²⁰ Cua panishano Pueyaso muerasunaa, Jesucristo rupaacua nia tiuuri jiyanoehua socua, seetanujuanaa na pueya nia quiniuria maninia. Pueyaso nia secojore Pueyaso

Sohuanu cumaacata. ²¹ Naacuajitij, niocua Pueyaso panishano pueya quiri pueyara-caanu. Juhuaianiya nia sashiri pa Jiyaniijia Jesucristo, nojuaja cuaara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jiyanoojia na quiniuucua.

²² Canapuate pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuuniuria maninia pa Jiyaniijiaacua. ²³ Tamasaca nia piriyojore-juhuaj Pueyaso pueya nojori quiniuria, nojori mariqui manijinia puetunu quejoosaare-janaari. Tamasacaari jiyanohua sesa miijiaca. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaaja jiyanohua nia cojuare niaa mariqui sesa miitishaarejaariuhuj nia cojishacari nojori. Jiyano pueyacua nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishano-juanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanohua na timitianutaniyani.

²⁵ ¡Jiyanohua maniniaari pa Que Pueyaso! Nojuajaari niishijiajanaa. Pa jiyatequiaari na muerasuraari pa Jiyaniijia Jesucristo cusuucua pocuara. ¡Jiyanohua shanohua na cumaaca! ¡Nojuajaari Jiyaniijiajanaa! ¡Jiyanohua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quiijiajuhanajaj. Naa quiyajaari. Naa quiniutianiya pueyaracaanuuri. Taaquiririnij, naacuaaquinatejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ² Janiyari puetunu na niquitishanojuanaa caminiujiya niajaniya seetanujuanaani. Niocujaari seetanujuaana Pueyaso rupaa, Jesucristojiniji cua caminiujiushano niaara.

³ Shuquiriaatia quijiaca cutaraari noo pojori, canapuate nio cua caminiujiushano Pueyasojinijini serojonutaniya Pueyaso pueya maapue niquliarani. Na tojitiajacaari shuquiriaatia quijiaca quiniutianiyajuhua, nojori tiuuniuucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapueecua

⁴ Janiyari Juanni. Asia jiyajinia quiniaa siete Pueyaso pueya maapueecua naa jiyaniijia. Pueyaso cuara cumaquiiria niajaniya, cuara nioojia cajitiirijuhua. Pocua niriqiano pa Que Pueyasoori jiyanojia maninia. Nojuajaari pueyaracaanu quijiacua. Quiarijia quiyajaariuhua. Na Sohuanuuri juhua siete saminio casaa niquishano, puetunu tiqiyocuajanaa quiija na quiniuucua. Nojoriiri Pueyaso cajishaqui tacoji quiituya. ⁵ Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupaaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucua jianucua Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucuajanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyaniijianucua pa quiniuria, na Que Pueyaso secojona pa quiniuria pueyacuara, nojuaja pa shuqiritianurajuhua. ¡Pa Jiyaniijiaari jiyanojia maninia! ¡Pa Jiyaniijia cuara shuqiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

⁷ ¡Nia maure! ¡Pa Jiyaniijia Cristoori cohujajinia tari cunocojihua! Puetunu pueyajaari na niqiniutianiya, noo pojorijuhua, na motenaatej. Puetunu mijiria quijiaca pueyapuejanaari nocuaji nujuquenutaniya nojori martenu. Taaquiririnij. Naa quiniutianiyacuaaquiniateja na tiuquishacariuhua.

⁸ Pa Jiyaniijia Pueyasoori tama nojuajiniijiaaja sequeya:

“Janiyacuajaari puetunu casaajanaa coteetanani, na shaajariqianojuhua. Puetunu cumaacaracajanaanijia. Janiyacuajaari pueyaracaanu quiijiani. Majaari cua supueni quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumaacajinia quiyano

⁹ Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniuucujuhua, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucua jiyatesocoriquianoni. Cunora, paari juhujaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanuucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰ Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niqiuani jiyanojia na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niquitiniutianiya quiajaniyani, cuno quia naajiotare nequesoreetuneer-ano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijiniara tacatequeeni cua niquiniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijosano. ¹³ Cuno samari nujuatacojua tajiniani, janiyari pueyano niquiriini, juhua Pueyaso Niyanu niquishano. Tucuaque toque cushiriquiaari. Na niohuacaacuma puecariquiaari. Na jiriquiajia camarucuteriquiaa orojiniji shipinishano casaari. ¹⁴ Pueyaracaanu quijia na quiniucua, na muezacaari tojetaarucujanaa jiyanoehua cohujaja quiriqiaa juhua sohuanatuu. Maatia pueya jiuujia niquijia na quiniucua, na namijiaari juhua mani rimianacuriquiaa. ¹⁵ Na niohuacaari nenecuariquiaa juhua jiyanoehua naseeca casaajinia mohuaquishano bronce. Naa shacantuuca niquishano quiriqiaari puetunu sesa casaajanaa paracajia na quiniucua. Cumaacaraca Jiyani-ijia na quiniucua, na pocuasacari, jiyanoehua tojishaariquiaari juhua sararohua, jiy-ocuaaanuji mohuaca tijia. ¹⁶ Na miaquetajata siete riya muetujuriquiaari. Naajuhuj, nijiniaquetucujaja mueruuri na rupaamaji mueranacuriquiaa, na rupaa ruuretajaca na puecoonura. Na jiquiocoori jiyanoehua shacantuuca quiriqiaa juhua jiyanoehua pananu jasacari panacari.

¹⁷ Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetajani, na shaajariquianojuhuj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samiitiaquiaarihuani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaa cua quejoonura macunucua quiquiojinia. ¹⁹ Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijiaa miishaanutaniya na nuhuajini. ²⁰ Quiarijia quia pohuatareera maatia quia niishiniuria cua niquitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojaniuhuj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucuaru naajione

¹ Juhucatecara naa cua sequereeri:

—Éfeso tiacajinia quijia cua seruucuaru quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: ² ‘Janiyari puetunu quia miishanojuanaa niishiyani. Quiaari jiyanoehua poonijioquiaa quiria. Naajuhuj, quiaari puetunu casaajanaa rejeretaquiaa juhuajaniya. Janiyari niishiyajuhuj, majaari quia shanacunu quiquiaa sesa miijiaa nia tajinia. Naajuhuj, quiaari cuno sapojonuujua nequesoreecanu, noo pojori canapuate tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishi-quianu nojoriiri sapojonuujua seetanujua-naa. ³ Quiaari puetunujuanaa taraatia quia miiniu rejeretaquiaa, cucua tiuujia quia quiniucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵ Cunora, quia

niishiri taa jiyanoehua cua panijia quia quiquiaarini. Quioojia quia tacatorohua cucua, maninia miijia quia quiniuhuara, taa quia quiquiaari coteenucujani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. ⁶ Quiaari maniniajuhuaj, sacuaraatia casaa Nicolás niishitiojosano tojijiaca miishano soojea quia quiniuucua. Janiyari cuno pojori miishano soyajuhuj. Nio cua sequesano quiajaniyani, cunoori puetunu cua pueyarajanaa. ⁷ Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijiaca nojori quiniuria’ ”.

Esmirna tiacajinia quiniaa Pueyaso pueya maanuucua naajione

⁸ Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucua quia naajiore, Pueyaso pueya maanu jiiitianani. Naa quia sequere nojuaja: “Naa sequeyari cante puetunu casaajanaa coteetenacuajani, na tucuatajanio. Nojuacuajaari cusoquiaari, na nuhuaji samiiti-aquiaariuhuari. Janiyacuajaari nojuajani. ⁹ Janiyacuajaari niishiyani, quiaari naquiya miishaquiaa. Quiaari casamiijujuhuaj. Naajaa, quiaari jiyanoehua casamiriacuaja niya cua shuriucuanu. Janiyari niishiyajuhuj, cuno Judiocuacaari quia sesacquiaa. Nojoriiri tama sequequiaaajuja nojoriniaari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanásacuajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya niajanijini nijuatejotenutaniya nijuatejojuajinia nia sanishaanura, niaate cucua tiuujia seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojijia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jiyanoehua shuquiriaatia quijia quia quiniuria pueyaracaanuni. Nio cua sequesano quiajaniyani, cunoori puetunu cua pueyarajanaa. ¹¹ Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Cante cucua na tiuuniuucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminia-jinia’ ”.

Pérgamo tiacajinia quiniaa Pueyaso pueya maanuucua naajione

¹² Jiyaniijia Jesucristoori socua cua sequere:

—Pérgamo tiacajinia quijia cua seruucua quia naajiorejuhuaj, Pueyaso pueya maanu jiiitianani. Naa quia sequere nojuaja: “Nijiniaquetucua mueruu jiiitianaari naa sequeya: ¹³ Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquiniuucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoehua maninia. ¹⁴ Saniniuujia, maja cutaraari nio cua maniniucuanu: tamasa niajanijinioori maja na tarinitianu paniniu sesa na miijonu. Nojoriiri supuetana Balaam niishitiojosano tojijiaca quiyajaa. Balaamcuajaari Israel pueya paraca Balac niishitiojoquiaari na pueya cuara shiniuuiuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecoosano quiquiaaricuajani juhua Pueyasocua. Naa sacuaraatia nojori queranacujusacari nojori paraatatej, Israel pueyari cuniquijia cuno taatujuri numuetucujuquiaarijuhuaj. ¹⁵ Naajuhuj, majaari

nio cua maniniucuanu: noojiaqueya niajanijajinijinioori maja na tarinitianu paniniu jiyanoehua sacuaraatia casaa Nicolás niishitiojosano. ¹⁶ Quiaari nareja niquiquiaa sacuaraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaraatia miijiaca cua miaquejonura cua rupaamaji mueranacujua mueruuta. ¹⁷ Cante numaaracani, nojori cuara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaaja rejetejani, janiyari na mianuutenutaniya jiyocuacaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanocua quiarinio sesa naajiotasano quiniutianiyacuajani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niqutionutaniya cuno saajiacuajani' ”.

Tiyatira tiacajinia quiniaa Pueyaso pueya maanuucuaa naajione

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaa quia naajiore, Pueyaso pueya maanu jitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantuuca niohuacaracajuhua, nojuajaari naa quia sequeya: ¹⁹ ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuaj, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhua, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaaquisano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiunia pueyara. Quiaari juhuajaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniuuiuquiaa juhuajaniya nojori numuetucunura na camishoo maajipohua. Cua pueya shiniuuiuquiaaariuhua nojori miaquenuunura noo shu, teyanote juaashiquiacata shipinijosano taucua pueyasohuacuara puecoosano quiquiaacuajani. ²¹ Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhua, na numuetucunujuaca jaara noojia tacatoyaquiri sesa nojori miiniujiniji, janiyari jiyanoehua naquiya miiniutianiya nojorini. ²³ Noo maajipohuajuhua, paanatuririria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa pueconutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiaca niajanijajinijinio maninia miiniutianiyani. Niajanijajinijinio sesa miijiaca saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya niajanijajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhua, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jiyajeneta casaa, Satanásjiniji niishishano”. Naa nia ruuretannuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia niajanija. ²⁵ Saaja tama nia cuaqueyajaaja nia cojuare jiyanoehua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. ²⁷ Jiyaniijianucuaa cua jiyatesano pueyani,

nojoriiri cumaacaraca quiniutianiya na jiitiasano pueya na tojitiniuria nojuaja. Na tojtiaashijiaca na saniitiosacari saniniuujia, nojori piyonutaniya jacanauraari, juhua cumamacata pishano conatu. ²⁸ Naajuhuaaj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuaaj. ²⁹ Cante numaacarani, nojuaja cuara tojiiria Pueyaso Sohuanu sequesano puetunu Pueyaso pueya maapuerajanaa' ”.

3

Sardis tiacajinia quiniaa Pueyaso pueya maanuucuaru naajione

¹ Jiyaniijia Jesucristoori socua cua sequeree:

—Sardis tiacajinia quijia cua seruucuaru quia naajiorejuhuaaj, Pueyaso pueya maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatare! ¡Suteja quia quiri! Quia cumaquiri noo pojori canapuate jatarinitiaja rishiyajaani. Quera cusonuyari. Janiyari Pueyasora quia miishano niqiquiaani. Majaari maninia na quiniu cua Pueyasora. ³ Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricuajani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojijia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejojuani, quia jiyanihacari maja naasucua juhuanujuaja cua tiuquiniu quiniutianihua. ⁴ Quia jiitiasano pueyajinijinio cuniqui Sardis tiacajini-ani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiyaquishano janiyara. Naaratej, janiyari nojori cushiyotenutaniya cohuajaqueya toqueni, cuata nojori rucanejonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujia nojori quishacari. ⁵ Canapuate naa sesa miiniu ruuretajacani cua tojtiajaca nojori quiniuucua, nojoriiri naa cohuajaqueya toqueya cushiyotesocoriquianojuhuaaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuaaj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuaaj, janiyari nojori jaatianutaniya cua Queecuanu, na seya tacobiriano, cua sequenura nojoriiri cua timitiasano pueyaniyojua. ⁶ Cunora, cante numaacarani, nojuaja cuara tojiiria Pueyaso Sohuanu sequesano Pueyaso pueya maapuera' ”.

Filadelfia tiacajinia quiniaa Pueyaso pueya maanuucuaru naajione

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucuaru quia naajiorejuhuaaj, Pueyaso pueya maanu jiitianani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojijia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiotiu riatataja jiitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuaaj, janiyacujaari juhua tiotiu riatarucuaa quiocujani, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojijiacuja. Naajuhuaaj, majaari cua soojeaca pueya niqiuara

quia tamacanu quiquianu janiya. ⁹ Naa maninia quia miiniuucua janiyaracuaatej, janiyari naa maninia miiniutianiya quiarajuhuaaj. Janiyari noojiaqueya Satanás pueya maanujinijinio mojuquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuaajaari Pueyaso pueyano, cucua tiuujia quia quiniuucua. ¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuaajaari jiyacari nia co-juanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niqutionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojoua tiajinia na nujuatenutaniya juhua morijiu-uni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuaaj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuaaj, cua Que Pueyaso tiaca sesanio. Cuno tiacacuaajaari quiarinio Jerusalén tiaca, jiyocuacaanuji roshinitiasaariquiano. ¹³ Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucua naajione

¹⁴ Jiyaniijia Jesucristoori socua naa cua sequeree:

—Laodicea tiacajinia quijia cua seruucua quia naajiorejuhuaaj, Pueyaso pueya maanu jiitianani. Naa quia sequere nojuaja: “Cua tojiri. Naa sequeyari noo pueyano cana sequesano seetanu rupajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuaajaari janiya. Cunora, cua tojiri. ¹⁵ Janiyari puetunu quia miishanojuanaa niishiyani. Quiaari najuhuana quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojijia quiriquia, janiya maara quia timitiaren. Saniniuujia, najuhuana cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷ Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jiitiaani maninia miijia cua quiniuucua’. Maja cutaraari quia niishiniu quioojiaari cusosu. Janiyara, quiaari tojetaarucuaajanaa casamiiju, cariojuaru, juhuaasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojijia quia quiri, seetanujuanaa casamiriaca quia quiniuria. Naajuhuaaj, maninia miijia quia quiriquia cua cushitiniuria quiajaniya cohuaaque toque, maja cararaatia quia quiniuria juhuaasu. Naajuhuaaj, cua niishitiaja quia masere cutara, quioojia namijia riatenura, seetanujuanaa maninia niquijia quia quiniuria. ¹⁹ Janiyari puetunu cua panishano pueyajanaa nacasujuani, nojori saniitiojuajuhuaaj. Cunora, quioojia quia tacatore cucua. Tama quioojiaaja quia shiniujiurijuhuaaj shamaatia cua tojijia quia quiniuria. ²⁰ Cua tojiri. Janiyari quioojia tiotiujiniji jiiquioonuujiyani. Cante cua tojiyani, nojuaja cuaara na tiotiu riataara cucuaji. Janiyacua nocua tiuquiumiani, nata cua miaquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojijia cua quiniuucua. Naaratej, cua Queeri cua cajitiquiaari na shuriucua, Jiyaniijiajanaa

cajitiujinia. Naajuhuj, janiyari Sesaaca shocotajaca cajitijionutaniya cua shuriucuan, jiyaniijianucua nojori quiniuriajuhuaj. ²² Cante numaacani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

4

Juan niquishacari Jiyocuacaanu Quijiaari maniniuhuaqueetasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaaajari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuacaanuuri. Janiyari jiyacari Jiyaniijiajanaa cajitiu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jyanohua shacantuuca juhua jaspe saajia, jyanohua naatuucajuhuj, juhua cornalina saajia. Naashiiri na cajitiu caco nujuariquiaa. Jyanohua shacantuuca quiriquiaari neeruuca, pocojuanaque juhua esmeralda saajia. ⁴ Janiyari socua veinticuatro cajitiucua niquirii Jiyaniijiajanaa cajitiu shocuan. Tii cajitiuriquiaari veinticuatro niishijiaca jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. ⁵ Jiyaniijiajanaa cajitiujiniji, miacanaari nunujuriquiaa. Jyanohua majacuriquiaajaariuhuj. Jiyaniijiajanaa cajitiu tacoji, tii noshiquioriquiaari siete samari. Cunocuaajari siete Pueyaso Sohuanu, puetunu tiqiyocuajanaa quijia na quiniuucua. ⁶ Jiyaniijiajanaa cajitiu tacoji, juhua jyanohua puereetuuca caminiaari quiriquiaajuhuj, juhua cohuaja motiiquio maatia niquishiyari na tamajiria.

Jiyaniijiajanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jyanohua queraatia namijiaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonu casa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijiniara na niquitiajano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijiajanaanaa, quiaari saa maniniaja, jyanohua maninia, tojetaarucujanaa maninia miijia! Quiaacuajaari Pueyaso, puetunu cumaacaracajanaa. Quiaari quijiajuhuanajaj. Majaari quia supueno quiquiaari. Quiaari quia pueyacua taceriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijiajanaa, na cajitiujinia cajiyano, pueyaracaanu Jiyaniijiajanaa quiriquiano na quiniuucua. ¹⁰ Naa pueyaracaanu cuno cuatro saminio casa timitiasacari Jiyaniijiajanaacuaatej, cuno veinticuatro niishijiaca jiyaniijianucuaari jaarajaaja mojuquetacooqueequiaa Jiyaniijiajanaacuara. Nojoriiri na tuhuajaa jartaqueequiaa Jiyaniijiajanaa cajitiu pajama, naa na sequenuta:

¹¹ —Nioori quiara, Jiyaniijianaa. Quiaa cutaraari Jiyaniijiajanaa, maja canaa. Quiaacuajaari canaa Pueyaso. Quiaa cuaara timitiasaaria pueyaracaanu, jyanohua maninia shacantuuca quijia quia quiniuucua, puetunu cumaacaracajanaa quia quiniuucujuhuj. Quiaacuajaari puetunu casaajanaa shipiniquiaari. Tama quia paniniuucujaja, quiaari na shipiniquiaari.

5

Rupanacujusano naajioneejiniji pohuatasano, Borrego Niquiojuajinijinio

¹ Na nuhuaji, janiyari Jiyaniijiajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri jiuniosano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante seetanujuanaa maninia miijia cutarani? Cuno cuaara rupartaara rupanacutanaso, na riatanura cuno naajionee.

³ Jiyacaritij, majaari quenaaja maninia miijia quiniu quiquiaari jiyocuacaanu, jiyajinia, jiya cariquimiano na riatanura cuno jiuniosano naajionee. Tojetaarucujanaa shaaqui quiquiaariiri cuno naajionee serojoriquiano. ⁴ Naaratej, janiyari jiyanoehua nujuqueriquiaani, tojetaarucujanaa shaaqui maninia miijia quiyaquiniuucua cuno naajio na riatanura, na serojonurano. ⁵ Cua nujuquesacari, tamonu cuno veinticuatro niishijiaca jiyaniijianucujinijinioori cua sequeree:

—Maja nujuquenu. Quia cumantare. Quia niquiri. Pa Jiyaniijiajanaacuajaari jiyanoehua cumaacaraca. Tariucuacaanu Pueyaso Rupaajinia, nojuacuajaari miriqui sequeshiya Juurunu sareta, Judá niquihuacuajinio supueriquiano, Jiyaniijiajanaa na quiniuria na supuetana David niti. Nojuacuajaari pa paraca Satanás shocotana, tojetaarucujanaa Jiyaniijia Pueyaso tojijia na quiniuucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijiajanaa cajitiu tacoji nujuano, cuno cuatro saminio casaa tajiniano. Cuno veinticuatro niishijiaca jiyaniijianucuaari na shocua quiriquiaajuhua. Borrego Niquiojuaari seetanujuanaa juhua mosano samiitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniuucua. Naajuhua, siete namijiaaraca quiriquiaari. Cuno na siete namijiaani, cunocujaari Pueyaso Sohanu, Pueyaso jiyaramiquishano puetunu mijirijanaa. ⁷ Cua niquishacari, Borrego Niquiojuaari Jiyaniijiajanaa cajitiujinia cajiyano juaashiquiajiniji jiuniosano naajionee masetaree. ⁸ Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniojosano casaa jiitariquiaa. Naajuhua, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹ Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajaniyari seetanujuanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiojuanaa, puetunu tamaatia rupaa pocuajacajinijiojuanaa, puetunu tiacajinijiojuanaajuhua, puetunu jiyacajinijiojuanaanio. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maninuhuaqueetanura pa Pueyaso. Nojoriiri jiyacua jiyaniijianucua quiriquianojuhua.

¹¹ Na nuhuaji janiyari tojetaarucujanaa jiyanoehua jiyanoehua queraatia Pueyaso seya niquiriini. Jiyaniijiajanaa cajitiu shocua mariquiaari, cuno cuatro saminio casaa shocujuhua, niishijiaca jiyaniijianucua shocuanio. Nojoriiri jiyanoehua queraatia

quiquiaari, juhua jaaquia, serojiyaquishoo. Janiyari nojori tojirii pa Jiyanijia Jesu maniniuhuaqueetaanoni. ¹² Nojoriiri naa na sequeturiquiaa na nacanuta:

—¡Pa Jiyanijiaari jyanohua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyanijiajanaa pueyaracaanura. Saaja nojuaja cuaara jítiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quijiaca casaajanaa cuaara tojitiaara pa Jiyanijia. Saaja nojuaja cuaara quiiria jyanohua timitiasano. Puetunu quijiacajanaa cuaara na maniniuhuaqueetaara.

¹³ Naajuhua, janiyari puetunu Pueyaso shipinishano saminio casaajanaa tojiriini, jiyocuaaanu quijiaca, jiyajinia quijiaca, jiya cariquimia quijiacajuhua, shoniniacu caminiajia quijiacanio. Puetunu nojorijianaari jyanohua na timiniutia sequeturiquiaa:

—¡Cuno, na shacantuuca cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasaariajuhua! ¡Saa nojorijia cuaara na cumaaca jítiaara pueyaracaanura!

¹⁴ Jiyacaritij, cuno cuatro saminio casaari nojori rihuaneriquiaa saniniuujia:

—¡Taaquiririni! ¡Cuaara naa quiiriatej!

Cuno veinticuatro niishijia jiyanijianucuaari saniniuujia mojuquetacoqueecujua cuno pueyaracaanu Quijiacaacuara, nojori na shuquiritianura.

6

Jiuniocosano naajioneecua seis rupanacujutasano rupareetasacari

¹ Na nuhuaji, cua shootiasacari, Borrego Niquiojuaari coteenujanaa cuno naajioneejinia rupanacutasano rupartaree. Naa miiriiri cua niquitishaanura taa mijiria quiniaa miishaanutaniya jyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “¡Miji!”. Na pocuanuuri juhua miacana majanu tojishano quiriquiaa. ² Naa na sequesacaritij, janiyari cohujahuana caballo niquirii nocua canujiyanoni. Na nijinia cajiniaari balista cacariquiaa. Jiyacaritij, jiyanijiaara shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “¡Miji!” ⁴ Naa na sequesacaritij, naatuhuana caballoori nocua canujumaa. Na nijinia cajiniaari cumaaca niquitiosaare. Naacuajitij, nojuajaari mijiria quijiaca tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucujua mueruu niquitiosaaree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. ⁶ Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niquitiosaaria saaja niquiriyatu kilo trigo jajau. Jaara trigo jajau paniyaquiri, cuaara niquitiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocujaaari queraatia quiniutianiya cutara.

⁷ Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “¡Miji!” ⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niquitiosaaree jiyanohua queraatia pueya na cusojuanura. Naacuaajitij, jiyanohua queraatia pueyari puecoosaanutaniya miaquetoosacari. Tamasacaari cusunuunutananiya jiyanohua miaajesacari. Tamasacaari paaqueja cusonu cusunuutanutananiya. Naajuhuaaj, tamasaacari sareya sootesaanutananiya. Sacocua satejosaanutaniyajaariuhuaaj. Naacuaajitij, jiyanohua jiyanohua queraatia pueyari cusojuasaanutananiya. Na nuhuaji, puetunu macunucua-janaa jaara serojosaare, puetunu nojorijianaari na cajiniocua quiniutiananiya puetunu mijiria quijiaca pueya cajiniocuaajinijuanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasocuara catijiasaqui juhuacutu cariquiaco niquirii Pueyaso pueya sohuanuhuaani, noo pojori canapuate puecoosaaquiaaricuaajani Pueyaso Rupaa tojijiaca nojori quiniuucua, Jesucristojiniji nojori pohuatanuucuaajuhuaaj. ¹⁰ Jiyacaritij, nojoriiri naa jiyanohua nacaree:

—¡Jiyaniijianaa! ¡Quiaari saa maniniaja! Quiaari quia sequesano miijia seetanujuanaa. ¿Taa quia tarishiniutianiyajaara canaa puecoonaa quia nequesoreenurani, nojori quia naminiuria canaacua saniniuujia?

¹¹ Jiyacaritij, puetunu nojorijianaari cohuajaque toqueya niquitiojosaaree. Nojoriiri naa sequesaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajiniujinio cuara puecoosaria nia shirijaatijia, taa nia puecoosaaquiaaricuaani.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiuiutiaree jiyanohua. Janiyari na niquiriquiaani. Pananuri mueruucara quiquii juhua mueruque toque. Racaari naatuucara quiquii juhua nanaca. ¹³ Riyari jiya cajiniocuaaji toteree jiyocua, taa satuna totequiaa jiyanohua paratucaricuaani. ¹⁴ Jiya cajiniocuaari shaajequuejuhuaaj, juhua tucuanee naajioneeri jiuniososaaree. Shoniniacu caminiajinia, puetunu jiya tucuaatiajajanaa, puetunu tuhuananuhuaajuhuaaj, puetunu cunojuanaari jiyajeetaquee na nujuatusaqui. ¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhuaajinijuhuaaj. Naa jamaatiushiijaariuhuaa noo pojori: pueyacua paaretajaca na cumaacatej, soldadohua jiyaniijianucua, jiyanohua casamiriaca pueya, pueya tojishano pueya, poonitijosano pueyajuhuaaj, puetunu narta pueyajanaanio. Puetunu pueyajanaari naa mashiriquiaa juucua. ¹⁶ Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunoocuaaji, na cajitiujinia cajiya na shacantuuca cumaacajiniani! ¡Canaa nia jamojore maja na niquiara canaa quiniuria, naajuhuaaj, maja Borrego Niquiojua saniitionura canaa, jiyanohua na juaashacari! ¹⁷ Quiarijiacuajaari Pueyaso saniitionu juuca. Jiyanohua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niquiohuacuajinio supueno pueyajiniujinio

¹ Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaqui paratu tenujuriquiaa maja na piyarojonura jiya, shoniniacu caminia, nacuhanio.

² Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapuate cumaacaraca quiriquiaacuajani nojori sesonura jiya, shoniacu caminiano. Naa nojori sequereeri:

³ —¡Cuaara! ¡Maja juhuanojuaja jiya nia sesonu, shoniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴ Janiyari jiyacari tojiriini taa pueyate na jiniji jirioosaareni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. ⁵ Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶ Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷ Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸ Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹ Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucatej, majaaari na naata serojosaanu quiriquiaa. Nojoriiri Pueyaso shacantuuca cajitiu tacoji nujuaturiquiaa, Borrego Niquiojua tacinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriqiaa. ¹⁰ Puetunu nojorijianaari naa mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuuca cajitiujinia cajiyani, Borrego Niquiojuajuhua. Nojoricuajaari pa jiyanooquiaari, tojetaarucujanaa quiariniora jatanishano pa quiniuria!

¹¹ Naajuhua, puetunu Pueyaso seyajanaa, canapuate shacantuuca cajitiu shocua nujuaturiquiaacuajani, niishijica jiyaniijianucua shocujuhua, cuno cuatro saminio casaa shocuanio, nojoriiri Pueyasoocura jacamaturee nojori timitianura nojuaja.

¹² Pueyaso na timitiatuacari, naa sequetureeri:

—¡Taaquiririnij, seetanujuanaacuaj! ¡Canaari pueyaracaanu quia maniniuhuaqueetanutaniyani! ¡Quiaacuajaari canaa timitiasano! ¡Saaja quiajanियari seetanujuanaa niishijia cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyaniijajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijica jiyaniijianucujinijinioori cua nequesotaree:

—¿Canapuate cuno pojorini, cohuajaque toqueyaracani? ¿Tejenote nojorini?

¹⁴ Janiyari na riucuree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jiyanohua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacujitij, nojoriiri cohujaqueya toqueya cushiyonuya. ¹⁵ Naa Pueyaso jiyanooshano pueya nojori quiniuucuatej, nojoriiri Pueyaso cajishaqui tacoji quijiaca. Nojoriiri pueyaracaanu tii Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teetenutaniya nojori caco, jatiqiu na quiniuria nojoritia pueyaracaanu. ¹⁶ Naacujitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuj, majaari socua nasaatia pananu jartanu nojori niishiniu quiniutianiya. ¹⁷ Borrego Niquiojuacuajani, Jiyaniijiajanaa cajitiu jiuujiajinia cajijiani, nojuajanaari nojori jitianutaniya juhua tama na borregohujaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajajini, pueyaracaanu shuquiriaatia quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijiajiniji.

8

Séptimo rupanacutasanojiniji pohuatasano, shanohua jaanutaja patajajinijinio

¹ Borrego Niquiojua jaara séptimo rupanacutasano rupartaree, cuno naajionee saacatanura puetunujuanaa, tojetaarucujanaa sanaacara quiquiiri jiyocuacaanu pueyaracaanura. Maja cua niishiniu, media horaruhua. ² Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niqutiojosaaree. ³ Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniji shipinishano Pueyasoocuara catijiaja casaa tacoji nujuaseeri, Jiyaniijiajanaa cajitiu tacoji. Queraatia shanohua jaanutaja niqutiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secojonuusanotajanaa, Pueyasoocuara na jaanujunura cuno catijiaja casaajini. ⁴ Naacujitij, Pueyaso seruuri Pueyaso pueya secojosano tacanirii Pueyasoocuara, shanohua jaanujua najacata. ⁵ Na nuhuaji, cuno Pueyaso seruuri catijiaja casaajini na shanohua jaanutaja pataja mishinirii nishiyata. Jiyanohua na majiriataree nio jiyacuaari. Miacanaari ritia nunujuquee. Jiyanohua majacureeri. Jiyanohua cojuatunereeri. Rijiaari jiuquiujiutiareejuhuj.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriiri jecanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijinioori na trompeta jonenenu coteeree. Jiyacaritij, miacanajaa shiniitijiaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatano.

⁸ Segundo Pueyaso seruuri na trompeta joneneree. Jiyacaritij, casaa juhua puereetuuca tuhananu noshiyanoori shoniniacu caminiajinia jataaaree. Quera shoniniacu caminia cajiniocuaari nanacara quiquii. ⁹ Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhuj, shoniniacu caminiajinia ruhanetasano puereetuuca buqueyajinijinioori, quera puetunu na cajiniocujanaa sesosaaree.

¹⁰ Tercero Pueyaso seruuri na trompeta joneneree. Jiyacaritij, puereetuuca rijiaari jiyocuacaanuji tiquii, jiyanohua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuj.

¹¹ Cuno rija sesaari quiriquiaa “Piiquia”. Cunora, tee cuno rija tiyareeni, puetunu cuno mohuacajanaari piiquiara quiquii. Pueya ratusacari cuno mohuaca, queraatia pueyari saaja cusonuuree.

¹² Cuarto Pueyaso seruuri na trompeta joneneree. Jiyacaritij, casaari pananuucua pitiaree, racaacia, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuaaj, riya, racanio, majaari na cuhuatanu quiriquiaa quera niucua cajiniocuaajuhuaaj.

¹³ Na nuhuaji, janiyari juhua puereetuuca surohua miooru niquirii jiya cajiniocuani. Na jaasacari naa nacariquiaa jiyanoahuari:

—¡Puereeta, puereeta, puereeta! Seetanujuanaa jiyanohua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenere, canapue te joneneyaquiyaajaa juhuanajuajacuajani.

9

Quinto trompeta jonesacari

¹ Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuacaanuji jiyocua tinio rija niquiriini. Cuno rijaari tiotiu riatataja niqutiosaaree, puequeetuuju raa na riatanura. ² Na riatasacari, najacaari nojooma juhua puereetuuca cuhuariquia sesacari. Pananu namijia tiomaari. Jiya cajiniocuaari mueruucara quiquiijiuhuaaj. ³ Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niqutiosaaree nojuaraca na quiniuria juhua turucuanini. ⁴ Sequeruuri rootasaaree maja nojori miaquenura jiyasocua, nacuhua jaamasujuhuaaj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapue te na jiniji jirioyaquishoo quiriquiaa Pueyaso sesatacuajani. ⁵ Sequeruuri rootasaareejuhuaaj, maja nojori cusojuanura pueya. Cinco raca cuara nojori shocojora cutara, pueyaracaanu sequeru saashi noosacari. Cuno sequeru saashiiri juhua turucuanini saashi noonutaniya.

⁶ Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanohua na shaajenu panishacari juucua, nojoriiri saaja rishiniutianiya, jiyanohua naquiya nojori miishacari.

⁷ Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casa jiiitariquiaa na nacajinia juhua jiyaniijianucua ora jiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. ⁸ Nojoriiri juhua maaji muecacaraca quiriquiaa, tucamuejarujuri. Juhua juurunu sare quiacaraca quiriquiaaajariuhuaaj. ⁹ Nojori jiriquiaqueeri cumueeca quiriquiaa juhua turtuco. Nojori jacuatusacari, na nesuhuari jiyanohua cojuatuneri quiaa juhua caballohua jayotasacari queraatia rucanejotaruhua, miaquetojonucua na netecuatusacari. ¹⁰ Cuno sequeruuri juhua turucuanini nojuacaraca quiriquiaa. Jiyanohua noonacuracajuhuaaj. Jaara nojori saare, cunoori quiquiaari nojori na noonura cinco raca. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuju raa camarujaariuhuaaj. Hebreo rupaaajinia, na sesaari “Abadón”. Griego rupaaajinia saniniuujia “Apolión”. Pueyano rupaaajinia saniniuujia, nioori sequeya “Pueya Puecoona”.

¹² Janiyari naa niqutishaareni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyajaa na nuhuajiria.

Sexto trompeta jonesacari

¹³ Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanohua jaanutaja catijiaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuca Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jiyanoehua queraatia pueya nojori puecoonura, quera na cajiniocua puetunu mijiria quijiaca pueyajinijiniojuanaa. Cuno Sesaaca seyari tariucuacaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijiara. ¹⁶ Janiyari tojiriini cuno cuatro Sesaaca seya soldadohuari, doscientos millones pueya quiriquiaa saa caballohuaracaja.

¹⁷ Janiyari cuno caballohua niquitishaaree juhua cua maquenujiniani, na nijinia cajitiuniaanio. Jiyanoehua tamaatia niquishano quiriquiaari. Puetunu nojori jiriqia-cajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucuaaji nojori cushiyosano turtuconi, cunoori puereeta niquishano quiriquiaa; naatuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸ Cuno jiuujianaraca puereeta casaata quera na cajiniocua puetunu pueyajinijiniojuanaari cusojuasaaree. ¹⁹ Naacujitij, caballohuari cumaaca jitiariquiaa na rupaama, na pitijinijuhuj, nojori puecoonura pueya. Na pituucuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

²⁰ Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhuj, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saajiajinijijuhuj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niqiniu. Majaari na tojiniu. Majaari na rucuanenujuhuj. ²¹ Naajuhuj, majaari pueya tarinitianu quiriquiaa narta pueya monu, shimiojonuhuj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunuhuj. Nohuasejonu tarinitiatuquiriquiaajaariuhuj.

10

Pueyaso seru mueetasano tucuanee naajioneeniyujuajiniji pohuatasano

¹ Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaatiariquiaari. Na nacaacua camarucuteriquiaa naashiiri. Na jiquiocoori jiyanoehua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. ² Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuurijia. ³ Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniaajaa quia racatare.

⁵ Jiyacaritij, Pueyaso seru cua niqushano shoniniacu caminiaacua nujuaanoni, nio jiyacuajuhuj, nojuajaari na miaquetajara na juaashiquia shiitioree jiyocuacaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipinijuhuj, puetunu tii quijiaca casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujuniaa pueyacujani”.

⁸ Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaani, jiyacuano. Nojuaja quia masetasee cuno riatasano naajioneeniyojua, na mueetaani.

⁹ Janiyari Pueyaso seruucua quiaareni. Janiyari na sequeseeni na naajioneeniyojua na niqutionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitotaja rupaa na quiniucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. ¹¹ Jiyacaritij, janiyari naa sequesareeni:

—Quiocua Pueyaso sequesano caminiujiuriohua pohuatanu queraatia pueyapue niqiara, queraatia tamaatia jiyacajinia quiniaa niqiara, queraatia tamaatia rupaaca pocuajaca niqiarajuhuj, queraatia jiyaniijianucua niqiaranio.

11

Caapiqui Pueyaso sequesano caminiujuniaa miishanojiniji pohuatasano

¹ Na nuhuaji, janiyari tia shanacujutaja naajua niqutiosaareni, juhua nataca niqushano. Janiyari naa sequesareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojujua tia quia shanacujusee quia shanacujutajata, orojiniji shipinishano shanohua jaanutaja catijiajanio. Quia serojorejuhuj puetunu Pueyaso secojonuujuacajanaa tii. ² Maja cutaraari quia shanacujunu Secojujua tia carijiniacuma. Cunocujajari taucuaca niqutiosaarucuaa tari. Pueyaso soojeaca taucuacaari Pueyaso saquiriojosano na tiacarano jitianutaniya pueyaracaanu, cuarenta y dos raca cuaara na shocojorejaatijia. ³ Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niqiara. Nojoriiri janiyajiniji pohuatanutaniya cuaara shocojorejaatijia mil doscientos sesenta juuca. Nojoriiri cocuaque toqueya cushiniutianiya taa pueya cushiyocuaacujani nojori taraajesacari.

⁴ Cuno caapiqui janiyajiniji pohuatanaani, nojoriiri cuno caapiqui olivo naana, tariucuaaanu Pueyaso Rupaajinia pohuatahiyacujani. Naajuhuj, nojoriiri cuno caapiqui samari nujuatacojua, Jiyaniijiajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuj. ⁵ Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapete nojori miiniu paniya sesa juucuacujani. ⁶ Nojori, janiyajiniji pohuatanaani, nojoriiri cumaaca jitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuj, nojoriiri cumaaca jitianutaniya mohuaca na jataniniuria nanacara. Nojoriiri cumaaca jitianutaniyajuhuj nojori sesonura

jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari. ⁷ Nojori jaara janiyajiniji pohuatanu tucuatate, jiyacaritij, puequeetuuju raamaji tohuatariquiano pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacujitij, nojori puecoonutaniya socuaari. ⁸ Nojori queteeri cuno puereetuuca niishishano tiaca nuucujinia pojoconutaniya, tee nojori Jiyaniijia mosaaquiaari niyacutesanojinia teetesanoaujani. Cuno tiacaari miriqui jiyaniquishiya Sodomata, Egiptotanio. ⁹ Naacujitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajinijinio pueya, tamaatiuucua rupaaca pocuajaca pueyajuhuj, queraatia tamonu jiyacajinijinio pueyano. Nojori paraari maja na shanacunu quiniutianiya nojori jamojosaanura. ¹⁰ Puetunu mijiria quiniaajanaari shuquiritiuniutianiya, macunucua cuno caapiqui Pueyaso sequesano caminiujiuniaa quishacari. Pueyari jiyanohua timiquionutaniya, naquiya nojori miitiajaca puecoosaanuucua. Naaratej, mijiria quijacaari tama na casamijiniijiaaja nareja niqutiojotoonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianiijiorohua. ¡Nojoriiri na matusaqui saneecuaturuhua! Puetunu nojori niquniaajanaari jiyanohua shiriiquitiurii. ¹² Jiyacaritij, cuno caapiqui Jesucristojiniji pohuataanaari puereetuuca rupaa tojitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niqiara tacataquee cohujajinia jiyocuacaanura! ¹³ Na paraa shootiasacari nojori, jiyacaritij, rijiaari jiyanohua jiuuquiujitiaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusuuree. Cureeno pueyari jiyanohua jiuujiateree Pueyasooauji. Nojoriiri jiyacari niishirii jiyocuacaanu Quijiaari seetanujanaa Pueyaso cutara.

¹⁴ Janiyari naa segundo naquiya miiniu niqutishaareejaaniuhuj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta joneneree. Jiyacaritij, puereetuuca rupaa-caari jiyocuacaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jiiitianutaniya puetunu jiyacua jiyaniijianucua jiiitiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriqiano!

¹⁶ Jiyacaritij, cuno veinticuatro niishijia jiyaniijianucua, shanohua cajitujinia cajituriquiaa Pueyaso tacojini, nojoriiri Pueyasooauara jacamaturee jiyanohua na shuquiritianuta nojuaja. ¹⁷ Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! ¹⁸ Cunora, puetunu jiyacua jiyaniijianucujanaari juaaquiuya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuj. Saniniuujia, quiaari pueyara quia sequesano caminiujiuniaa pueya niqutiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaanio, jiyaniijianucua, narejaca pueyano. Naajuhuj, quiaari jiya sesojuaca pueya shaajanutaniya.

¹⁹ Jiyacarijihuuj, jiyocuacaanu Pueyaso Secojoua tiaari riataaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujanaa

na Rupaajanaa na racataja. Cuno na Rupaari na pueya na jiyanootiaja, na tojiyashijiaca na saniitotajajuhua. Jiyacaritij, miacanaari nunujuree. ¡Jiyanohua majacureeri! ¡Puereetatej, jiyanohua cojuata! ¡Rijaari jiyacari jiuuquiutiaree! ¡Jiyanohua queraatia miacanjaa shiniituijiaacaari juhua maru totereejuhua! ¡Jiyanohua puereetaari quiriquiaa!

12

Miriqui pohuatasano maajijiniji, puereetuuca Naaquerujinijijuhua, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce riyari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niquitishaaree jiya cajiniocuani. ¡Puereetuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucua shipinijosano nacaqueya niquitiacoriquiaari na siete nacacaacua. ⁴ Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mianura jaara rasaare! ⁵ Maajiiri cayaniyocua raree. Nojuajaari puetunu mijiria quijiaca pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucua. Pueyasoori na shuriucua na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhua, cuaara shocojorejaatijia mil dosciento sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhua puetunu na seyatajanaa. Puetunu nojorijianaari puereeta quiaquetooriaquiaa jiyocuacaanu. Cuno Naaqueruuri na seyata jiyanohua quiaqueriquiaa Pueyaso seya juucua. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanohua nojori, majaari quiquio quiniu quiriquiaa socua nojoriria jiyocuacaanu. ⁹ Naacuajitij, cuno Naaqueruuri jiyocuacaanuji taanuusaaree. Nojuacuajaari cuno tariucuacaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰ Jiyacaritij, janiyari jiyocuacaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa seque-turiquiaari:

—¡Pueyasoori parta Pueyaso pueyacuara Saquiriojotana jatatee tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jataaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jiitianutaniya pajaniya, jiyanohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. ¹¹ ¡Pueyaso Borrego na quiniuucua, nojuajaari na nanaca shootequiaari, tojetaarucuaajanaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaarijianaa, nojori pohuatanuucua Jesucristoocua nojori

tiuuniujiniji. Nojoriiri maja na puerenu quijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaratej, jiyocuacaanunaa, shuquiriaatia quia quiri! ¡Naa Sesaaca jatasaanuucuatej, nia timiquiore jiyocuacaanu quijiacanaa! ¡Niajaniya saniniuujia, jiyacua quijiacanaa, shoniniacu caminiajinia quijiacanio, jyanohua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jyanohua na juaaniutia!

¹³ Cuno puereeta niquishano Naaqueru niishishacari nojuaja tari jatasaaree jiyocua, nojuajaari cuno mueya nucua neteyojotanu coteeree na mianura juucua. ¹⁴ Cuno maa-jiiri querajaa puereetuca nesu niquitiosaaree saaja, juhua jyanohua puereetuca surohua mioru nesu. Cuno nesuta, maajiiri na quiquiojiniara jaaree cariiquia jiyajinia, tucuaaanu cuno Naaqueruucujaji. Tii mianuutesaanutaniya pueyaracaanuuri cuara na shocojorejaatijia jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶ Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. ¹⁷ Naaqueruuri jiyamitia maajiicua macaarii jyanohua. Quiaareeri maajiicujajinio supueno pueyata miaquetoojonura. Cuno pojoricuajaari Pueyaso rootasano tojitiajaca, canapuate Jesucristoocua nojori tiuuniu seetaashijiacacujani.

¹⁸ Naaqueruuri shoniniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez nacajaacua jitiariquiaa jyaniijianucuaara shipinijosano nacaqueyari. Puetunu na nacacaacujanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. ² Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucucocua juaashococuaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitiooree. Tama na cajitiujiniajaaja na cajitiriiri jyaniijjajanaa na quiniuria jiyacua. ³ Cuno puereeta niquishano Casaa siete nacacaracani, niquiriyatu na nacacajiniijinoori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriiquiiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojjijiacara quirii. ⁴ Jiyacaritij, mijiria quiniaa pueyari cuno naatuhuana Naaqueruucuaara jacamaturee juhua Pueyasoocuaara, cuno puereeta niquishano Casaa na jiyatenuucua nojori jyaniijjajanaa na quiniuria. Pueyari cuno siete nacacaraca puereeta niquishano Casaacuaara jacamatureejuhuj. Nojoriiri naa sequetooree tamajaaja:

—Maja socua tamonu jyaniijia quiniu juhua nio pa jyaniijia. ¿Tamonu jyaniijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasoocuaara, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jyaniijiara jiyatesaaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu

coteeree. Pueyasooacara rimiaaquereeri. Jesuucua tiuujiaa pueya sesacareejaariuhuj, jiyocuacaanu Pueyaso quiqionio. ⁷ Mijiria quijiaca Pueyaso saquiriojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyaniijiajanaa na quiniuria, puetunu tamaatiuucua pueyapuejanaa na jiitianura, puetunu tiqiyocua tiacajinijinio pueyajanaa, puetunu tamaatia rupaaca pocuajaca pueyajuhuj, puetunu tamonu jiyacajinijiajanaa quijiacanio. ⁸ Naacuajitij, puetunu mijiria quijiaca pueyajanaari cuno puereeta niquishano Casaacara jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiiitasano naajioneejinia, cante pocuara mosaaquiaaricujani. Pueyaso muerasu sesaca cutaraari cuno naajioneejinia naajiotasaaquiaari jiya shipinishaacarijiyujua, pueyaracaanu rishijiaca pa quiniuria.

⁹ Cante numaacani, nojuaja cuara tojiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujuanaa quiasano pueyano quiniutianiya. Naajuhuj, cante nijiniaquetucujaja mueruuta mosocoriquianoni, seetanujuanaa naa mosaanutanitari”. Naaratej, Pueyaso pueya cuara puetunu casaajanaa rejeretajaca quiiria, seetanujuanaa nojori tiushacari Pueyasooaca.

¹¹ Na nuhuaji, janiyari tamonu puereeta niquishano Casaa niquirii jiyajiniji mue-taaroni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. ¹² Jiyano-hua cumaacaraca quiriquiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasooacara, nojori timitianura na naca pishano cushiriinohua puereeta niquishano Casaa. ¹³ Naajuhuj, nojuajaari na cumaa-cata miiri jiyajeneta casaa pueya jiuujiatenura nocuaji. Jiyano-hua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. ¹⁴ Naa na cumacata na miiniuucua cuno na naca cushiriinohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaa quiriquiaa, teyanote na nacajinia mueruuta pishano na quishacari samiitarohua saajacuajani. ¹⁵ Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocujara na quiniuria, nocuara jacamatiuyashijiaca na puecootenurajuhuj. ¹⁶ Naajuhuj, cuno caapiqui nacajaraca puereeta niquishano Casaa na pueya sequeree nojori naajiotanura puetunu pueyacujanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacujanaa naa naajiotasaareeri, tojiyaquishoo pueyacu, tojishano pueyacu, casamiriaca pueyacu, casamiijuniucua pueyacu, tama nojoriria poonijionuujuacajaja pueyacujuhuj, poonijioteseano pueyacu. ¹⁷ Jiyacaritij, canapuate cuno puereeta niquishano Casaa sesa naajiotasano jiiitaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuj, majaari nojori naata na casami niquitiojonu quiriquiaa na cumaneecata. Pueya jaara cuno puereeta niquishano Casaa sesa jiiitaaquiri naajiotasano na cuaqueyacu, na naata na sesa número jiiitanu nocua naajiotasano.

¹⁸ Nio niishishaanura maninia, jiyano-hua niishitiajaari panishiya cutara. Niishijiaca pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia

cuaqueyajaaja nia cojuare maja cuno puereeta niquishano Casaa sesa naajiotasaanura niaacuaajuhuaaj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhuananuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuaaj. ² Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanujuhuaaj. ³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa tacojijuhuaaj, cuno veinticuatro niishijiaca jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricua-jaari mijiria quiniaajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucujanaa maaji numuetuqueyashijiaca quiquiaari, saaja pocuaji Tacunaacua jiaatiajaca nojori quiniuucua. Naaratej, tiquiyocua Borrego Niquiojua rucuanajosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniuriajuhuaaj. Nojoriiri socua Pueyaso timitiasano pueya puetunu Pueyaso saquiriojosano pueyajinijiniojuanaa, taa pa shuquiritiaa shushajanaa pa carojosano pa nataujinijicuaani. ⁵ Nojoriiri tojetaarucujanaa sapojonu niishiyashijiaca quiquiaari, tojetaarucujanaa sesa miyashijiaca nojori quiniuucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuaaj, puetunu tiquiyocua tiacajinia qui-jiaca pueyarajanaanio. Na pohuatasanoori seetanu rupaaajanaa pueyaracaanura. ⁷ Pueyaso seruuri mijiria quiniaa pueyacua nacariquiaa naatej:
—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijiaari na nequesoresacari pueya! ¡Nocuara nia mojuquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuca shoniniacu caminiajuhuaaj, puetunu samocua nacaca pacartacojuacajanaanio!

⁸ Jiyacaritij, tamonu Pueyaso seruuri narta Pueyaso seru nuhuajimiaajuhuaaj. Naa miriqui sequeriquiaa Roma tiacajinijiiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhuaaj. Babilonia tiacani, nojuajaari puetunu sesa casaa na miijiosanotajanaa juhua mashaasequetejoquiaari puetunu mijiria quijiacajanaa. Naacua-jitij, puetunu pueyajanaari tama na cuaqueya miiniu panishanojuaaja miijiacara quiquiaari, jiyanojua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuaaj. Mijiria quiniaa pueyacua nacaree naari:

—¡Jiyanojua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojuquetacojua juhua Pueyasooouarani! ¡Jiyanojua puereeta quiniutianiyari noo pojoririajuhuaaj, canapuate juhua na naca cushiriinohua niquishano shipinishano Casaacuara jacamatujucani!

¡Naajuhuj, puereeta quiniutianiyari noo pojoriria, canapuate na cuaqueya tariniti-ajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰ ¡Pueyasoori puetunu cuno pueyajanaa saniitionutaniya jiyanhua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoriti, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriiniohua puereeta niquishano Casaacuara jacamatujuaca juhua Pueyasoocuarani, juhua nojuaja niquishano shipinishano Casaacuarajuhuj! ¡Naa miishaanutaniyajaariuhuj noo pojori, canapuate cuno puereeta niquishano Casaa sesa naajiotaniniutianiya tama nocujaaajani!

¹² Cunora, Pueyaso saquiriojosano pueyani, canapuate na rootasano tojitiajacani, Jesuucua tiuuniu tarinitiaashijiacajuhuj, nojori cuara juhujaniya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jiyanhua shuquiriaatia quijiaca cutaraari cuno macunucua, canapuate tariucua Jiyaniijia Jesucristoocua tiuujiaa cusunuutaniyani!” Pueyaso Sohuanuuri naa sequeyajuhuj: “¡Taaquiriirinij! Nojoriiri samaateya, pueyaracaanu na Jiyaniijiaara na poonijionuunu nuhuaji. Maninia nojori miishanocujaaari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijiaara shipinishano nacaque cushitariquiaari, orojiniji shipinishano. Nataacuaca na senootajara shamatucaja jacatunee mueruu mueturiquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanhuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacajaari tari noshuriujua! ¡Cuara quiarijia senoosaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucaja jacatunee mueruu mueturiquiaajuhuj. ¹⁸ Na nuhuaji, socua tamonu Pueyaso seruuri tohuatamaa Pueyasoocuarara catijiaja casaa-jiniji. Nojuajaari mani camaru. Nojuajaari narta Pueyaso seruucua nacaree, shamatucaja mueruu muetuyanooocua. Na sequereeri:

—¡Quia shamatucaja mueruuta uva quia carojotare, jiyajinia moritiaconuni! ¡Tari noshuriujuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijianaa. Uva jaapuejoree saajajinia quejasano puereetuuca surocohuamaari. Pueyasoori tii na rapijiotenutaniya jiyanhua na juaaniutia. Cuno uvani, nojoriiri Pueyaso ruuretajaca pueyacuaja. ²⁰ Cuno uvaari rapijiosaaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanhua nanaca quiniuucua, cabollohua rupaacuma puecariquiaari. Pueyaso tojiyashijiaa pueya nanacaari jiyanhua tucuaaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitiaja na mueetacosacari

¹ Na nuhuaji, janiyari jiya cajiniocua socua niqutishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanoohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

² Janiyari casaa niquiriijiaaniuhuaaj juhua puereetuuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturuquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casaa-juhuaaj. Naajuhuaaj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niqutiojosano arpaa taquinionuuriquiaa. ³ Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jiyanoohua maninia, nocuaji jiuujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaca pueya Jiyaniijajanaa. ⁴ ¡Quiaari pueresano, Jiyaniijianaa! ¡Quiaari tojetaarucujanaa maniniuhuaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajiniinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuaaj.

⁵ Naa cua tojinu nuhuajitij, janiyari jiyocuaanu Pueyaso Quishaquijianaa niquirii riateyanoni, tee cuniqui seetanu Pueyaso rupaaajanaa racatasano quiyacuajani. ⁶ Cua niquishacari, cuno siete Pueyaso seyari Pueyaso Quishaquijianaa tohareetariquiaa, canapuate cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. ⁷ Jiyacaritij, niquiriyatu cuno cuatro saminio casaajiniinioori miacojua niqutiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyara-caanu rishijia Pueyaso juaaquiacata mishinijosano quiriquiaari. ⁸ Jiyacaritij, Pueyaso Quishaquijianaari maatia najacata mishiquiimiasa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuaara puecaarajaati-jia naquiya nojori miitajaca pueya. Cuno najacaari Pueyaso shacantuuca cumaacajiniji quiriquiaa, naa na saniitiojosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiacaa nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanoohua nootuuca sapueyari pueyagua supueee. Noo pueyagua supueereeri, canapuate nocua naajiotasano jiitariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhuaaj. Jiyanoohua nootujuaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuuca shoniniacu caminiajinia. Mohuacaari puetunu nanacara quiquiiijanaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusonuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujiniajanaa, puetunu samocua nacaca pacartacojuacajiniajanaano. Jiyacaritij, nanacara jataquee puetunujuanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supuenu quiquiaari. Quiaari tojetaarucujanaa maninia. Naa quia miitiasacari quia tojitiaashijiatej, quiaari seetanujanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujiunaa nanacanio. Quiaritia saniniuujia, naa miijiaa nojori quiniuucuatej, quiaari nojori raatejoree nanaca. ¡Maniniacuaja Jiyaniijiana!

⁷ Jiyacaritij, janiyari Pueyasoocuaa catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacuaaari maninia saniitioree quia tojiyashijiaa, taa quia sequequiaari tariucuaaanu nojoricuajani, quiaari quia tojiyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jyanohua naseecara quiqiii, pueya na catijianura juhua mani. ⁹ Naa pananu januucua jyanohua nasaatiej, pueyari jyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniuujiniji, nojori tacatonuhuaa noojia Pueyasoocua, nojori jiyaniijiaara nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapueseeri, tee cuniqui juhua jiyaniijiajanaa na cajiriquiaacuajani. ¡Jiyacaritij, puetunu na jiitiasano jiyacajanaari ninishiquiria quiqiii! Cunora, na pueyari na niti saaquioriquiaa jyanohua nooeta naquiya na miiquiosacari. ¹¹ Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniuujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujuaaca sapueyaraca nojori quiniuucujuhuaaj.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuuca Eufrates moojinia. Moori joojequetaquee jiya pajamaji niriqiano jiyaniijianucua niuutiajara.

¹³ Jiyacarijiuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuaretariquiaa juhua cohuaniquia niquishano naatuhuana Naaqueru rupaamaji. Tohuaretariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaaminio. Cuno puereeta niquishano Casaari mijiria quiniaa pueya sapojoriquiaacuaja, nojori tojiniuria na naca pishano cushiriinohua puereeta niquishano Casaa. ¹⁴ Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatesano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura.

Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocuaajaari tariucuacaanu niishiriojoquiaari naa cuno juuca na miaquetoojonura nojoritia. Naa paniquiaaricuaajaari na paraa na puecoonura.

¹⁵ Jiyacaritij, janiyari pa Jiyaniijiajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejojua tiuquiquiaa casami nohuasenuucuaacuaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyara-caanu na secojosacari, na sashishacari janiya. Tojetaarucuaajanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niqiaraari.

¹⁶ Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaa-jinia, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuanaacuaaja!

¹⁸ Jiyacaritij, miacanaari nunujuree. ¡Jiyanohua majacureeri! Cojuataari quiriquiaa puereeta. Rijiaari tojetaarucuaajanaa jiyanohua jiuuquiujutiaree. Pueyano shipin-ishaanujiniji, majaari naa rijia jiuuquiujutianu quijia juhua nio rijia. ¹⁹ ¡Naa rijia jiuuquiujutianuucua jiyanohuatej, cuno puereetuuca tiacaari neequeresetaquee! Jiuujanaracara raquitijiquiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuuca Babilonia tiaca saniitioree, taa tariucua-caanu na niishiriojoquiaari cuno juuca na saniitionuracuajani. ¡Jiyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacuaaja. ²⁰ Jiyacarijuhuaj, puetunu shoniniacu caminiajinia jiya tucuaatijacajanaari shaajequee, puetunu tuhuananuhujanaanio. ²¹ Naajuhuj, jiyocuacaanuji jiyanohua puereetujuaaca miacanajaa shiniitijuaacaari totere pueyacu. ¡Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianuucua shiniitijuaaca miacanajaatej.

17

Miriqui pohuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajininio, canapuate siete miacojua patootariquiaacuajani. Cua sequeseeeri:

—Miji quia nimia. Janiya quia niquitiniutianiyani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. ² Mijiria jiyaniijianucuaari cuno Maaji numuetucujuuca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuj.

³ Pueyaso seru niquitiniuria janiya na niquitiniu panishano, nojuajaari cua sohanu jiyataare cariquia jiyajinia. Janiyari tii niquishii Maajini, naatuhua puereeta niquishano Casaa nijinia cajiyano. Queraatia sesacaari cuno naatuhua Casaa cuaqueyacu quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. ⁴ Cuno Maajiiri shanohua toqueya cushiriquiaa, naatuque, shaaruquejuhuj, juhua jiyaniijianucua cushishano. Queraatia shanohua maniniushitija casaa cushitariquiaari: orojiniji shipinijosano casaa, shanohua saijiniji shipinijosano tiujiaujuhuj, noturu shipinijosano saijiniji tiujiaunio. Orojiniji shipinishano miacojua muetariquiaari.

Mishaja quiriquiaari puetunu sacuaraatia na miiijosano casaatajanaa, numuetucujusaanu porocua na quiniucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatujuri nucuani, puetunu mijiria sacuaraatia miishanojuanaa coretanijiojua nucuano”. ⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanohua timijia, Jesujiniji pohuatanaa puecoonu porocua na quiniucua.

Naa cua niquishacari nojuajatej, janiyari jiyanohua jiuujiatereeni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunojuanaari miriqui. ⁸ Cuno puereeta Casaa quia niquishanoni, cunoori tariucuacaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuuju raamajiiri, seetanujuanaa puetunujuanaa na shaajasaanuhuara cutara. Pueyaso ruuretajaca pueyari jiyanohua shiriiquitiuniutianiya nojori jaara cuno puereeta niquishano Casaa niquiri tacatehuano, teyanote tariucuacaanu quijia quiquiaaricuajani, quiarijia saniniuujia majaari na quiniu. Jiya shipiniyaquishacarijia, cuno pueya sesacacuajaari Pueyaso saquiriojosano pueya sesaca naajiotasaqui naajiotasoo quiquiaari.

⁹ ‘Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyacuajani. ¹⁰ Cuno siete jiyaniijianucua-jinijinioni, cinco nojorijinijiniori tari shaajasaquiaari. Cuno caapiqui curenojini-jini, niquiriyatuuri jiyaniijia quiya quiarijia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. ¹¹ Cuno puereeta niquishano Casaa, teyanote tariucuacaanu quijia quiquiaaricuajani, nojuajaari cuno cinco shaajasano jiyaniijianucuaajinijinio quiquiaaricuaja. Majaari quiarijia na quiniu. Na nuhuaji supuenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹² ‘Cuno diez nacajaa quia niquishanojaniuhua, cunoori diez jiyaniijianucuaranocujaa. Nojoriiri cumaaca niquitiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³ Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. ¹⁴ Nojoriiri Borrego Niquiojuata miaquetojonutaniya. Borrego Niquiojuaaari nojori shocotanutaniya saaja, seetanujuanaa Jiyaniijiajanaa na quiniucua. ¡Nojuajaari puetunu jiyaniijianucuaajanaa Jiyaniijia! Nata quiniaa pueyari Pueyaso saquiriojosano pueya, Neyanu tojitiajacatuhua.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa cajiyano. Cuno mohuacacuajaari queraatia tiaca, tamaatiucua pueyapue, tamaatia rupaaca pocujacajuhua, tamaatia jiyacajinia quijia pueyano. ¹⁶ Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucuaajanaa. Na cartetunutaniyari. Tojetaarucuaajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuahua catijiatunutaniyari. ¹⁷ Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na miishaanuracuajani. Naa-juhua, Pueyasoori cuno diez jiyaniijianucua niishiriojotenutaniya jatiqiu. Naacuajitij, cuno jiyaniijianucuaari rojotoonutaniya nojori cuara cumaquiiiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori

tohuateesaanutaniya taa na sequequiaaricujani. ¹⁸ Naajuhuj, cuno Paanatu quia niquishanoni, nojuajaari cuno puereetuca Roma tiacacuja, miriqui sequeshiya Babiloniatani. Nojuajaari puetunu mijiria jiyaniijianucujanaa tojitiqiaa nojuaja.

18

Babilonia tiaca catetanujiniji pohuatasano

¹ Naa Pueyaso seru niquitiniu nuhuaji janiyatej, janiyari socua tamonu Pueyaso seru niquirii jiyocuacaanuji roseyanoni. Jiyanoehua cumaacaracaari quiriquiaa. Na shacantuuca cumaacaari jiya cuhuatariquiaa. ² Jiyocuacaanuji na rupaa paaretaree jiyanoehuari. Seetanujanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiqiora jatanishaaree quiarjia saniniuuri. Naaquiya quiqiora quiniutianiyajaariuhuj, puetunu pueya soosano pueresano jaacuatujuaca casaajanaa quiqioranio. ³ Puetunu jiyacajinijinojuanaa pueyari sapojonuuusaquiaari Babilonia tiacajinijinio niishitiojosanota, juhujaniya sacuaraatia miijica nojori quiniuriajuhuj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia miijosano miijioquiaajuhuj, cuno paanatu shiniujiuniucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajinijianaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuujuaca pueyari jiyanoehua cumaneecaraca pueya.

⁴ Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasuna, cuno tiacajiniji nia quiojore, niaa mariqui sesa miijiacara quiri-ohuari, cuno sesa miijica nia cojiniuucua! Nojorijiniji nia carajere, niaa mariqui puetunu nojoritajanaa cojiritiasaare naquiya miiniuuri. Nojoricujaari quera saniitioshiya. ⁵ Cuno tiacajinia sacuaraatia miishanoori puera jiyanoehua caneyaree. Juhua tuhuananuuri maashiyaree jiyocuacaanura. Pueyasocujaari sacuaraatia nojori miijosano niishiya. Majaari socua tari na naata rejeretanu. ⁶ Babilonia cuara namishaaria taa naquiya na miijioquiaa tamasacacuaani. ¡Nojuaja cuara saniitionu caminiuujushaaria saniniuujia, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijica nojori quiniuria juhua nojuajuhuj. Cunora, nojuaja cuara puetunu Pueyaso juaaquiacaajanaa raatesaaria, tama na suhuocojiniaajaaja mishinishanoni. ⁷ Naatej, taa tama na cuaqueyajaaja na shuquiritiquiaa sacuaraatia na miishacaricaani, saniniuujia cuara naa jiyanoehua miitiasaariajuhuj. ¡Jiyanoehua tama na cuaqueyajaaja timitiaja na quiniuucujuhuj, cuara saniitiosaaria! Nojuajaari tama sequequiaajaacujua: “Janiyari niya cajija shuquiriaatiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”. ⁸ Cunora, niquiriyatu juucajiniaaja, cuno Paanatuuri jiyanoehua taraatia miitiasaanutaniya. Jiyacaritij, cusuunuuri quiniutianiya, naquiya miiniu, miaajenujuhuj. Jiyacari catijiatasaanutaniyajaariuhuj. Jiyanoehua cumaacaraca Jiyaniijia Pueyaso quiniuucua, nojuajaari naa saniitionutaniya cuno Paanatu.

⁹ Mijiria jiyaniijianucuaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanoehua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. ¹⁰ Nojoriiri na puerenuta na shootianutaniya tucuacaanuji, nojori mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanohua cumaacaraca quiija juucua Babilonianaa! ¡Quiaari canashiyaquiija saniitiosaaree!

¹¹ Puetunu jiyacajiniajanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanohua taraatia quiniutianiya nojori ni- ishishacari, nojoritiucua tee na casami niqutiojore na cumaneecarani. ¹² Tucuacaanuji Babilonia tiacajiniara nojori nitiasano casami quiijaari nio: oro, plata, jiyanohua panishano saijiuhuaj, noturu shipinijosano sainio. Nitiasaaquiaajaariuhua manini- uqui toqueya linojiniji, sedajiniji toqueya, shaaruque toqueyajuhaaj, juhua jiyani- iija cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiajajiniji shipinijosano casami- jiuhuaj, shanohua naanajiniji shipinijosano casaminio. Nitiasaaquiaajaariuhua broncejiniji shipinijosano casami, cumueeca casaajiniji shipinijosano casamijiuhuaj, shanohua mármol saajajiniji shipinijosano casaminio. ¹³ Naajuhuaaj, nio shanohua jaanujua casami: canela, miesu nunacuhua, catijasocoriquiano shanohua jaanujua casaa, mirrajuhuaaj, cuaqueyacua shuquiujutiasano shanohua jaanutajanio. Niti- asaaquiaajaariuhua jereeca uva caaca, shiyocua, maninia cashojuajuhuaaj, trigo jajau- nio. Nitiasaaquiaajaariuhua casami niyotesano seya, borregohua, caballohua, caballo- hua jayotasocoriquiano shipinijosano casaanio, cumaneecara niqutiojosocoriquiano pueyajuhuaaj seya nojori quiniuria. ¹⁴ Jiyacaritij, Babilonia tiacaari naa sequesaanu- taniya:

—¡Majaari socua quia mioonu quiniutianiya jiyanohua quia maniniucasano naana jajau, jiyanohua quiioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanohua cumaneecata quia masesano casaminio!

¹⁵ Puetunu cuno casami niqutiojonaa pueyajanaari jiyanohua casamiriaca quiya Babilonia tiacajinia quiniaa masejonuucua nojori casami. Maja nojori saniitiosaanura- juhuaaj, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶ —¡Juhuej! ¡Babiloniaari tiaca maniniu quiija juucua! Jiyanohua shanohua niquishano quiijaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniija cushishano, orojiniji ship- inishano casaata na maniniushishacarijuhuaj, noturu shipinijosano saitiajuhuaj, shanohua niquishano saitanio. ¹⁷ ¡Jiyanohua queraatia puetunu na jiiatiasano casami- jianaari canashiyaquiija catijiasaaree juhua sohuanatuu!

Puetunu pueyajanaa, canapuate shoniniacu caminiajinia poonijionaa na cuma- neecaracuajani, nojoriiri tucuacaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquiicua tiaca tacatajajini- aqueya, ruconaa pueya, buquejinia poonijionaa pueyajuhuaaj, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari.

¹⁸ Nojori niquishacari najaca nujuaano jiya cajiniocuara, nojoriiri naa sariyocuaturee:

—¿Socua tamonu tiacateeri quiya juhua cuno Babilonia tiacajuhuaaj? ¡Shaaqui!

¹⁹ Jiyanohua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuaturee:

—¡Juhuej! ¡Babiloniaari tiaca maniniu quiija juucua! ¡Puetunu shoniniacu caminiajinia buque jiiatianaajanaari jiyanohua casamiriaca quiya, jiyanohua casamiriaca Babilonia quiniuucua! ¡Quiarijia saniniuujia, canashiyaquiija puetunujuaanaari shaajasaaree!

²⁰ Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhaaj, Pueyaso sequesano caminiujiuniaanio! ¡Pueyasocuaajaari niaacua namirii Babilonia!

²¹ Jiyacaritij, cumueeca Pueyaso seruuri jiyanoehua puereetuuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashiyaquijijihuhuaaj, Babilonia tiacanaa! ¡Majaari socua quia niquishaanu quiniutianiya! ²² ¡Quia nuucuaari tojetaarucujanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jonenenuunujuhuaaj, trompeta jonenenuunonio! ¡Puetunu tamaatia poonijosano niishijiaca juaashiquiaraca pueyajanaari shaajasaanutaniyajuhuaaj! ¡Majaari quenaaja niquiriyatu cureenu quiniutianiya quia quishaqui! ¡Naajuhuaaj, majaari socua riiquiniuuniu tojishaanu quiniutianiya! ²³ ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhuaaj, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaaerequij, jiyanoehua cumaacaraca quia casami niquitiojonaa pueya quiniuucua puetunu jiyacajinijanaa! ¡Naajuhuaaj, quiaari puetunu jiyacajinia quijiaca pueyajanaa shimiojona, sapojosano nojori quiniuria puetunu sacuaraatia casaa quia miijosanotajanaa! ²⁴ ¡Quiarijia saniniujia, quiocua tiuutiashiyari pueyara Pueyaso sequesano caminiujiuniaa puecoosaanu, Pueyaso saquiriojosano pueya puecoosaanujuhuaaj, puetunu jiyacajinijanaa pueya puecoosaanonio!

19

¹ Naa cua tojiniu nuhujitij, janiyari jiyocuacaanu tojirii queraatia rupaacani. Naa sequeturiquiaa jiyanohuari:

—¡Jiyanoehua maninia pa Pueyaso! ¡Nojuaja pa shuquiritiare! ¡Nojuacuajaari pa Jiyanoojia! ¡Nojuajaari jiyanoehua shacantuuca, tojetaarucujanaa maninia miijia na quiniuucua! ¡Puetunu cumaacaracajaariuhuaaj! ² ¡Maninia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree! ¡Cuno Paanatuuri jiyacua quijiaca pueya sesoquiaari tojetaarucujanaa, sacuaraatia na miijosano na niishitiojosanota! ¡Pueyasoori cunora na saniitioree! ¡Naajuhuaaj, Babilonia pueconuucua Pueyaso tojitiajaca pueya, Pueyasoori na namiriijuhuaj!

³ Jiyocuacaanuji rupaaca cua tojishanoni, nojoriiri na sequerohuacuhuaaj:

—¡Jiyanoehua maninia pa Pueyaso! ¡Nojuaja pa timitiariquia pueyaracaanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

⁴ Cuno veinticuatro niishijiaca jiyaniijianucua, cuno cuatro saminio casaajuhuaaj, nojoriiri jiyacari jiyocuara jacamaturee Pueyasocuara. Nojoriiri naa timitiaree Pueyaso, cante na shacantuuca cumaacajinia cajiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyaracaanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojitiajaca pueyanaa! ¡Nojuaja nia shuquiritiare, tojishano pueyanaa, nijaniyajuhuaaj, tojishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanoehua nacaanoni, juhua puereetuuca sararojua, juhua miacana majacunujuhuaaj. Puetunu nojorijianaari naa sequeriquiaa:

—¡Jiyanohua maninia pa Jiyaniiija Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniiijajanaa! ¡Puetunu cumaacaracajanaajuhua! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuujica pueyajanaa. Naajuhuaaj, cuno cohuajaque na toqueni, cunocujaari puetunu maninia nojori miijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapuate Borrego Niquiojua camishacari queranacujuajiniara masuusanoni”.

Naa cua sequeree socuaari:

—Cua sequesanooni, cunoori seetanu Pueyaso rupaaajanaa.

¹⁰ Jiyacaritij, janiyari Pueyaso seruucua mojoquetareeni, juhua Pueyasocuara, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajaniyacuaani, juhua quia tapueyocucajuhuaaj, noo pojori canapuate pa Jiyaniiija Jesujiniji pohuatanu tarinitiaashijiacaani. ¡Pueyasocuara quia mojoquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu niishitishano na pohuataanaa, janiya, niajaniyajuhuaaj.

Cohuajohuana caballo nijinia cajiniajiniji pohuatasano

¹¹ Na nuhuaji, janiyari jiyocuacaanu Pueyaso quiquio niquirii tariucua riatasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucujanaa maninia miijia na quiniuucua, puetunu niishijiajanaa-juhuaaj, nojuajaari seetanujuanaa maninia saniitiojua sesa miijica. Naajuhuaaj, majaari najuhuaana na miaquetojonu na paraata. ¹² Puetunu casaajanaa niquijia na quiniuucua, na namijiaari juhua mani rimianacuyano niquishaariquiaa. Jiyaniiijanucuarano shipinijosano nacaqueya pasacoriquiaa na nacaacuaari. Cunoori seetanujuanaa Jiyaniiijajanaa na quiniuucua. Tamonu na sesaari naajiotasano quiriquiaajuhuaaj. Cuno sesaari tama na niishishanojuaja cutara. ¹³ Na toqueeri nanacatuque quiriquiaa. Nojuajaari tariucuaanu nio sesaraca quijiacuaja, “Pueyaso Rupaa”. ¹⁴ Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijinia cajitiuriquiaa. Naajuhuaaj, nojoriiri linojiniji cohuajaquijasano toqueyaraca quiriquiaa, jiyanohua cohuajaqueya tojetaarucujanaa. ¹⁵ Nojori Jiyaniiijajanaa rupaamaji, nijiniaquetucuaaja mueruuri puereeta mueranacuriquiaa. Cunoori puetunu mijiria jiyacajiniajanaa na tojitiaashijiaca na puetujutajara. Nojuajaari jiyacari nojori Jiyaniiijajanaa quiniutianiya, nojori na jitianura jiyanohua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijioshiya na caaca shoonuracuaani. ¹⁶ Na tucuaque toqueecua, na ruhuajacuucujuhuaaj, naa naajiotasanoori quiriquiaa: “Jiyaniiijanucua Jiyaniiijajanaa”, “Camarucua Camarnujuanaa”.

¹⁷ Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujuaca casaajanaa jiiquioonuuriquiaa jiyanohua, teyano jaacuatujuacate shu miojonuujuacacujani. Naa cuno jaacuatujuaca casaa sequeriquiaari:

—¡Miji, niya nia rerejosee! ¡Pueyasoori nia queranacutenutaniya! ¹⁸ ¡Nojuajaari queraatia shu nia mianuutenutaniya! ¡Cuno shuuri jiyaca jiyaniiijanucua shu, soldadohua camarucua shu, jiyanohua cumueeca puereyaquijiaca shu, caballohua shu, na nijinia

cajitiuniaa pueya shujiuhua! ¡Camarucuaaju pueya shuuri quiniutianiyajuhua, pooni-
jotesano pueya shu, tojishoo pueya shujiuhua, tojishano pueya shunio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyani-
ijianucuanio, puetunu nojori soldadohuatajanaa. Puetunu nojorijianaari tariucua
rerejonu quiriquiaa na miaquetojonura cohujohuana caballo nijinia cajiyanta, nata
quiniaa na soldadohuatano. ²⁰ Cuno na naca pishano cushiriinohua puereeta niquis-
hano Casaari jiyacari quiasaaree, narta puereeta niquishano Casaanio. Nojuajaari
cumaacaraca quiriquiaacuaja mijiria quijiaca pueya na sapojonura na cumaacata na
miishanota, nojori na tiutiniuria na naca pishano cushiriinohua Casaacua. Naa
na sapojonuucua mijiria quijiaca pueyatej, nojoriiri nojori cuaqueya tarinitiaquiaari
na naca pishano cushiriinohua Casaa sesa naajiotasaanura nojoriicua. Naajuhua,
nojoriiri juhua cuno puereeta niquishano shipinishano Casaacuara mojuquetacojua
quiquiaari juhua Pueyasocuara. Jiyacaritij, cuno caapiqui puereeta niquishano
Casaari azufreta noshiyano mani quiquiojina quejoosaaree saminiucua. Nojoriiri tii
pueyaracaanu naquiya miishaanutaniya. ²¹ Puetunu nojoritia quiniaajanaari saniniu-
ujia puecoosaaree nijiniaquetucua mueruuta, teyanote cohujohuana caballo nijinia
cajiyano rupaamaji mueranacuriquiaacuajani. Puetunu jiya cajiniocua jaacuatujua
casaajanaari nojori shu tooquioree jiyano.

20

Mil marijara Satanás morosaanujiniji pohuatasano

¹ Na nuhuaji, janiyari tamonu Pueyaso seru niquirii jiyocuacaanuji roseyanoni.
Puequeetuaju raa riatataja patariquiaari, puereetiuyocua cumayocua shipinishano
casaanio, Pueyaso Paraca na morotajara. ² Pueyaso seruuri cuno naatuhua Naa-
queru juhua cohuaniquia niquishano quiasae. Na morojoreeri mil marijara. No-
juacuajaari cuno tariucuaanu Soconu, samaruhua jiyaniijiajanaatuhua. Na sesaari
“Satanás”. ³ Maninia na morojonu nuhuaji, Pueyaso seruuri puequeetuaju raama na
jartaree. Raa tiotiu mishiquiorohuari. Tiotiu rupanacureeri, maja na riatasaanura.
Sesaacari naa mishiquiosaareequij mijiria quijiaca pueya na sapojiyaquiniucuaaji
cuara na shocojorejaatijia mil marijia. Cuno mil marijia jaara na shocojore, rupaqui-
jara cartesaanutaniuhuari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucujinia cajitiuyanoni.
Nojoriiri nequesoreenaara Pueyaso jiyatesano pueya quiriquiaa, mijiria quijiaca no-
jori jiitanura. Janiyari noo pojori sohuanuhua niquiriijiaaniuhua, canapue naca-
reesaaquiaaricuaajani nojori poojotanuucua pa Jiyaniijia Jesujiniji, Pueyaso rupaa to-
jitiacajaca nojori quiniucujuhua. Nojori cutaraari cuno na naca pishano cushiriinio-
hua Casaacuara jacamatiuyaquiquiaari tojetaarucujanaa, juhua nojuaja niquishano
shipinishano Casaacuarajuhua. Naajuhua, majaari nojori shanacunu quiquiaari
cuno puereeta niquishano Casaa sesa naajiotasaanura nojoriicua. ¡Cua niquishacari,
nojoriiri cua niquiara samiiticoquee, jiyaniijianucua nojori jiyatesaanura! Mil mar-
ijiaari nojori shocojoree, jiyaniijianucua nojori quishacari pa Jiyaniijia. ⁵ Saniniuujia,
narta macunucuaari maja na samiitianijiosaanu quiriquiaa cuno mil marijia cuara
shocojorejaatijia. Nio macunucua samiitianijiosacari cua niquishanoni, cunoori co-
teenujanaa Pueyaso samiitianijiosacari pueya. ⁶ Shuquiriaatia quijiaca cutaraari
noo pojori, canapue Pueyaso samiitianijionutaniya coteenujanaacuajani. Nojori-
iri jiyacari tojetaarucujanaa maninia quijiacara jatanishaanutaniya pueyaracaanu
rishijiacajaca nojori quiniuria. Naacuajitij, Pueyaso ruuretajaca pueya jaara puetunu
shaajasaarejanaa, jiyacari majaari Pueyaso pueya pacutenu quiniutianihua cusonu.
Saniniuujia, nojoriiri pueyaracaanu shamaatia timitianutaniya Pueyaso, Cristonio.

Naajuhuj, nojoriiri jiyaniijianucua quiniutianiya Cristota, mijiria quijiaca nojori jiiti-asacari cuno mil marijara.

Sesaaca saniitiosacarijiana cutara

⁷ Cuno mil marijia shocojonu nuhuaji, Satanásri tohuatesaanutaniuhua na nuju-atesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyanio. Nojori na sapojonuta, nojuajaari puetunu jiyaca jiyaniijianucuaajanaa rerejotenutaniya, puetunu nojori soldadohu-atajanaa, nojori miaquetoojonura pa Jiyaniijiata, puetunu na pueyatajanaanio. Nojori soldadohuari jiyanoehua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosaanu.

⁹ Cua niquishacari, tojetaarucujanaa jiyanoehua queraatia pueyari nijioriquiaa. Jiya pueturiquiaa puetunujanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyanio. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucujanaa. ¹⁰ Satanás, cante puetunu cuno pueyajanaa sapojoreecuajani, nojuajaari caminiajina jatasaaree tee cuniqui mani noshiya azufretacuajani. Tariucuaaanu tii jaqueroosaaquiaaricuaajari na naca pishano cushiriinohua Casaa, narta puereeta niquishano Casaanio. Cunocuaajari mijiria quijiaca pueya sapojoquiaaricuaaja, na naca cushiriinohua Casaacuaa jacamatujuaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

Macunucua nequesoreesacari cohuaja cajitiu tacoji

¹¹ Na nuhuaji, janiyari Jiyaniijiajanaa cohuaja puereetuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. ¹² Jiyacaritij, janiyari puetunu macunucujanaa niquirii nujuatiuayano cuno cohuaja cajitiu tacojini; jiyaniijianucua, tojishoo quijiaca pueyanio. Jiyacaritij, na cohuaja cajitiujinia cajiniaari na nequesoreetuneece riataquere, socua tamonu nequesoreetuneeenio. Cuno nequesoreetuneejinia naajio-tasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanojinijianaa, taa cuno nequesoreetuneeceajinia na naajio-tasaaquiaaricuaajani. ¹³ Cua niquiara, macunucua quiquojinia racatasano puetunu cusonuuno sohanuhuaajanaari na cuaqueya rupuetesaarohua, shoniniacu caminiajina moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricuaajani. ¹⁴ Na nuhuaji, Cusojuana, macunucua Quiquio-juhuj, nojoriiri mani noshiyano caminiajina jaqueroosaaree. Canapuate cuno mani noshiyano caminiajina quejoosocoriquiano pueyacuaajani, nojoriiri cusonuunu pauteriquianocuaaja. ¹⁵ Naacuajitij, canapuate Pueyaso samiitianijosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajina quejoosaaree pueyaracaanura.

21

Quiarinio jiya cajiniocujiniji pohuatasano, quiarinio jiyajinijinio

¹ Na nuhuaji, janiyari quiarinio jiya cajiniocua niquiriini, quiarinio jiyanio. Co-teenujanaa jiya cajiniocuaari tari shaajasano quiriquiaa, jiyanio. Naajuhuj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushi-tishano quiriquiaari, juhua neyacarano camishocoriquiano niyacoo. ³ Naajuhuj, janiyari Jiyaniijiajanaa cajitiujiniji tojirii jiyanoehua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhua! ¡Nojuajaari nojori cojiniutianiya, nojori Jiyaniijiajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucujajaari tari shaajasano quiriquiaa!

⁵ Na nuhuaji, Jiyaniijiajanaa cajitiujinia cajiniaari naa sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequereejajaariuhua:

—Cua sequesano quia naajiotare. Seetanujanaari cua sequesano. Janiyacujajaari cua sequesano tohuateequiaa pueyaracaanuni.

⁶ Cua sequerohuariuhua:

—Cua sequesano cua miishocoriquianoni, janiyari tari na tucuatarae miiniuni. Janiyari quijiajuhuanani. Janiyari pueyaracaanu quiriquianojuhua. Janiyari puetunu casaajanaa coretanijiani, na shaajajajuhua. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samitianiija mohuacani, cunoori cua Sohuanucujaja. Janiyari nareja na niqutioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojijia na quiniucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyani. Nojuajaari quiyana quiniutianiyacujaja. ⁸ Sesa pueya saniniujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojtiaashijia pueya, puerejaca nojori quiniucua, Pueyaso Rupaacua tiuyashijia, soosano pueya tama sesa nojori miiniucujaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacuara jacamatujuaca juhua Pueyasocuara, puetunu cuaracashijionujuaca pueyajanaanio. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuriucujaja. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujajaari sequeshiya, “pueya pacesacariuhua cusonu”.

Quiarinio Jerusalén tiacajiniji pohuatasano

⁹ Janiyacujajaari tari nia pohuataree cuno siete Pueyaso seyajinijini, canapute siete miacojua patootanaa quiquiaaricujani, mishaja Pueyaso saniitotajata. Niquiriyatu nojorijinijiniori cucua nimiaa. Nojuajaari cua sequesee:

—Miji. Quia niqutiriiria Borrego Niquiojua niqiorano. Nojuacujajaari pa Jiyaniijia pueya, na quiquiojajaariuhua.

¹⁰ Jiyacaritij, nojuajaari cua sohuanu jiyataaree jiyanojua puereetuca jiyaconaja tuhuananuucua. Tiji cua niqutirii cuno puereetuca quiarinio Jerusalén tiacaari, Pueyaso shuriucujaja roseyano. Tojetaarucujanaa shanohua maniniushitishano quiriquiaari. ¹¹ Nenecuariquiaari Pueyaso shacantuca cumaacata. Na nenecuanuuri juhua jiyanojua panishano saajia nenecuanu quiriquiaa, juhua jase saajia. Maatia niqutishiyari na tamajiria, juhua cohujaja motiiquio. ¹² Cuno tiaca shocua matacaari jiyanojua puereetuca quiriquiaa, jiyaconajajuhua. Tiaca shocua matacaari doce tiotihuvaraca quiriquiaa. Niquiriyatu Pueyaso seruuri puetunu cuno tiotiuujinijianaa nujuaturiquiaa. Naajuhua, supuetana Israel doce niqutihuacuajinio supueno doce pueyapue sesacaari puetunu cuno tiotihuacuajanaa naajiotasano quiriquiaa. ¹³ Jiuujianaraca tiotihuuari pananu muetasamajiria quiriquiaa, cuno tiaca matacaacua. Socua jiuujianaraca tiotihuuari quiriquiaa pananu muetasamaji miaquetajara. Naajuhua, socua jiuujianaraca tiotihuuari pananu muetasamaji muenecara quiriquiaa. Socua jiuujianaraca tiotihuuari quiriquiaa pananu tiuquishocora. ¹⁴ Cuno

tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵ Cuno Pueyaso seru cuata pocoojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. ¹⁶ Cuno tiacaari jiyanojuaa tucuhuana quiriquiaa. Na cajiniocuaari mariyata juhua na tucuhuana quiriquiaajuhua. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jyaconaja, na cajiniocuanio. ¹⁷ Na nuhuaji, tiaca mataca shanacujureejaariuhua. Setenta y cinco metro jitiariquiaari. Pueyaso seru shanacujutaja tucaneeri mariyata juhua mijiria pueyano shanacujutaja quiriquiaa. ¹⁸ Cuno tiaca matacaari puetunu jaspe saijinijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹ Cuno mataca nujuataja doce sairi queraatia tamaatiujuaaca shanohua niquishano saitia maniniushitishano quiriquiaa. Cuno mataca nujuataja doce saijinijinioni, coteenu saajaari jaspe saitia maniniushitishano quiriquiaa. Jaspe sairi neeruua cojitishano pocojuanaqueta. Segundo saajaari zafiro saitia maniniushitishano quiriquiaa. Zafiro sairi nentujuaaca naata. Tercero saajaari ágata saitia maniniushitishano quiriquiaa. Ágata sairi tejatujuaaca neeruua. Cuarto saajaari neeruua esmeralda saitia maniniushitishano quiriquiaa. ²⁰ Quinto saajaari ónice saitia maniniushitishano quiriquiaa. Ónice sairi pocojuanaque naatuua cojitishano. Sexto saajaari naatuua cornalina saitia maniniushitishano quiriquiaa. Séptimo saajaari crisólito saitia maniniushitishano quiriquiaa. Crisólito sairi tiijiaaca. Octavo saajaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajaari topacio saitia maniniushitishano quiriquiaa. Topacio sairi jiyanojuaa pocojuanaque. Décimo saajaari crisoprasa saitia maniniushitishano quiriquiaa. Crisoprasa sairi jiyanojuaa neerujuaaca. Undécimo saajaari jacinto saitia maniniushitishano quiriquiaa. Jacinto sairi jariya naata naatuua. Duodécimo saajaari jiyanojuaa nentuuca amatista saitia maniniushitishano quiriquiaa. Puetunu cuno saijianaari jiyanojuaa shanohua sai, shacantujuaaca. ²¹ Tiaca shocua mataca doce tiotiuhuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajiajiniji shipinishano quiriquiaa. Naa shipinijosano quiriquiaari puetunu cuno doce tiotiuhuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanojuaa maninia cuno oro quiniuucua, Pueyaso shacantuuaari na tohuariquiriquiaa, juhua motiiquio cohuajaco na quiniuucua.

²² Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqii, majaari socua Pueyaso Secojuaa tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhua. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. ²³ Cuno tiacaari maja na paniniu pananu na cuhuatariquiano, racajuhua. Pueyaso shacantuua cumaacacuajaari na cuhuataa. Borrego Niquiojuacuajaari na cuhuatana. ²⁴ Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijiajanaa nojori niquitiosocoriquiano. ²⁵ Cuno tiaca tiotiuhuari pueyaracaanu riataquesano quiniutianiya, juuca na quiniuucua pueyaracaanu. Cuniqii, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanojuaa nojori timitiasano quiniutianiya. ²⁷ Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa

miijiaca tiuquiniu quiniutianiya tii, sapojonuujuaicano. Saaja noo pojori cutaraari tii tiuquitianutianiya canapue sesacate pueyaracaanu rishijiacarano Borrego Niquiojua naajioneerjina naajiotasano quiyacuajani.

22

¹ Na nuhuaji, Pueyaso seruuri cua niqutirii pueya samiitianijiotaja moo, cohua-janacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartariquiaa, tee Borrego Niquiojua cajiyaaniuhuaaj. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhuaaj, niqijiria, na taquijirianio. Cuno naanaari puetunu racarajanaa muetujuaca. Naacuajitij, puetunu marijiajanaa, doce caminiujiya muetunuuri. Na mucacaari maninia, puetunu jiyacajinia quijiaca pueyajanaa naarajotajara. ³ Cuniqii, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhuaaj, nojoricuajaari cuno tiacajinia quijiaca quiniutianiya, Jiyaniijiajanaa cajituu quiniuucua tii. Nojori tojitiajacaari nojori timitianutianiya pueyaracaanu tii. ⁴ Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. ⁵ Cuniqii, majaari niucua niishishaanu quiniutianiya. Tii quijiaaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutianiya. Nojoriiri jiyaniijianucua quiniutianiyajuhuaaj, puetunu Pueyaso shipinishanojuanaa nojori jiitianura pueyaracaanura.

Jesucristo quera tiuquiuhua

⁶ Na nuhuaji, Pueyaso seruuri cua sequeree:

—Cua niqutishano quiajaniani, cua sequesanojuhuaaj, puetunu cunojuanaari see-tanujanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niqiara na niishitiniu panishano. Naajuhuaaj, nojuacuajaari quiaritia na seru jiyaroree, na tojitiajaca na niishitiniuria taa quiari naataja nojuaja tucuatanutianiya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquiuhua niaacuani”. Shuquiriaatia quijiaaca cutaraari noo pojori, canapuete nio naajioneerjina Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojiniajuhuaaj. Janiya Juanni. Naa cua niquiniu nuhuajitij, cua tojinuu nuhuajijuhuaaj, janiyari Pueyaso seru pajama mojuquetareeni. Janiyari naa mojuquetaree nojuaja cua timitianura juucuanu, juhua Pueyaso. ⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaaj, juhua quiajanijiajuhuaaj, juhua puetunu quiarta Pueyaso sequesano caminiujiuniaa pueyajuhuaaj. Naa-juhuaaj, nio naajioneerjina naajiotasano tojijiaaca pueyani, nojoriiri cuarta Pueyaso seyajuhuaaj. ¡Pueyasojuanaa quia timitiare cutara!

¹⁰ Cua sequereejaariuhuaaj:

—Pueyaso niishitishano nio naajioneerjina quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasanocujaari quera tohuateya. ¹¹ Naacuajitij, canapuete sesa na miiniu tarinitianu paniaquiyani, sacuaraatia miiijiojuacajuhuaaj, cuara na tarinitiaaquiriiaqui. Saniniuujia, canapuete maninia miiijiojuaca cutarani, saaja Pueyasora poonijionuujuacajuhuaaj, nojori cuara tarinitiaaquiriia maninia nojori miiniuujuhuaaj.

¹² Pa Jiyaniijiacuajaari naa pa sequeya:

—¡Taaquiriirini! ¡Quera tiuquiuhuanijia! Janiyari cua tojitiajaca cua niqutiojoso-coriqiano casaa tiuquitianutianuhuaani. Janiyari puetunu nojorijianaa nareja niqutiojonutianiani, maninia nojori miiniuucua quiria, nojori miishano jaara maninia

quiri. ¹³ Pueyaso Rupaa cua quiniuucua, janiyari puetunu Pueyaso sequenu panishano-juanaa caminiujiuniani. Janiyari quijiajuhuanani. Majaari cua supueno quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ 'Shuquiriaatia quijiaca cutaraari noo pojori, canapuate juhuacarijia nojori jiu-ujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijiaca, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueyasocuara, cuaracashijionu porocua pueyano.

¹⁶ 'Janiyacujaari cua seru jiyarorucuaa quiocuani, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacujaari Jesuni, supuetana David niquiohuacuajinio caneno pueyajinijinio supueno, Jiyaniijiajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quia tariucuacaanu Pueyaso Rupaajiniacuajani.

¹⁷ Pueyaso Sohuanuuri Borrego Niquiojua niquioranota naa sequetiuya: "¡Miji Jiyani-ijiana!" Canapuate naa nio naajioneejinia naajiotasano tojiyani, nojori cuara naa sequeerajuhuj: "¡Miji!" Cante jiyamueyani, nojori cuara niiria, Pueyaso samiitian-ijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸ Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitaja casaata. ¹⁹ Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanu-unutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajioneejinia na pohuatashiyacuajani.

²⁰ Cante nio sequeyacuajani, nojuajaari naa sequeya: "Taaquiriirinij, quera tiuquiuhuanijia".

Jaa, Jiyaniijia Jesunaa. ¡Naacuaaquiniatejaj! ¡Ritia quia nimiohua canaacua!

²¹ Pa Jiyaniijia Jesu cuara puetunu niajanijajanaa cumaquiiria na Sohuanuta.